

BENUNU TEPO  
 AE  
 SAKRAMENT DA KANDOARI  
 AE  
 EKALESIA DA JIMBO NENEI  
 AINDA BOOK  
 ENGLAND DA EKALESIA  
 DA JIMBO ANGO

THE BOOK OF COMMON PRAYER IN THE  
 BINANDERE LANGUAGE,  
 PAPUA

LONDON  
 SOCIETY FOR PROMOTING  
 CHRISTIAN KNOWLEDGE

1959

CONTENTS

SIPO TUMONDEBAIN . . . . .	I
TURO TUMONDEBAIN . . . . .	13
SIPO TUMONDEBAIN DA . . . . .	22
LITANY . . . . .	25
BENUNU DE ATEGARI DE ARI EVEKARA EMBO . . . . .	32
PARI AE EPISTLE AE GE EWA TARI DE DAEDO IJI BERARI TEORA AWA . . . . .	38
BADA DA TURO INDARI KANDO ARI, TAMO DOREGARI KOTOPU . . . . .	165
MAMAI DA BAPATAITO JIMBO, DORE- GARI DA JISI DA, EKALESIA DA ETERA . . . . .	184
MAMAI DA ONJIGA BAPATAITO ARI MANDO DA . . . . .	190
BAPATAITO IKA DA JIMBO . . . . .	195
ATOPATARI . . . . .	202
GOROBA ARI DA JIMBO . . . . .	208

## CONTENTS

JIMBARI KOTOPU DA JIMBO . . . . .	211
PRIEST DA BENUNU EMBO AMBUBU- GARI DE DAEDO AWAMANE DA ORO BENUNU TEORA . . . . .	218
KARU EGEREGARI DA DADAUTARI . . . . .	226
BEBETEGARI DA GOIARI . . . . .	228
EUTU MAI KUMBARI AINDA ATEGARI . . . . .	235
GOD DA DUDUNO ARI EDO RIROA KUMBARI EMBO TA BEBEGAE DA IAI TARI GARI . . . . .	238
DAVID AINDA PSALMS . . . . .	245

## SIPO TUMONDEBAIN

### IJI BERARI TEORITA

*Sipo Tumondebain tuturo de Kera ari mi ge inakade Tari eiwa Ove da da kaki ta nenei ajijigare. Ango edo amboda gagurevira awa ajijigare.*

Engo de jimbo bebegae embo re jimbo bebegae ika dodo taigedo, edo beiamana ge ango are, amo asisi wasiri de toregedo aina. *Ezek. 18. 27.*

Ae dumbae edo gotona; edo jimbo bebegae nato do nato da matawa isima eira. *Psalms 51. 3.*

Jimbo bebegae nato de dombu ito onjigatate; edo beiae nato itae sitewasi. *Psalms 51. 9.*

God da rorou dubore bedarira; dubore bededo depeka arira, imo, God, isimai ae. *Psalms 51. 17.*

Dubo itomane jido kerewavi, edo tamo woru ae, edo Bada itomane God da iai wareregemo; amo tonembari de do ari de, duduno babaingo edo evira, edo tamo dave jiwaevira, edo beiae da dubo kotembetevira. *Joel 2. 13.*

Bada God kaenato da re doari ae kotembedo doari de, kaena ainda iai itoro eimono; edo Bada God kaenato da ge da gido ae, edo gere jisi kaenato da pipitevira awa kaen tembae. *Dan. 9. 9-10.*

Bada, na babaingo jiato dambu jindane; duduno ae, edo gido na sitewasi. *Jer. 10. 24; Psalms 6. 1.*

Dubo itomane kotembewavi; utu basileia atutumbe-teira. *Matth. K. 3. 2.*

Erido Maka da iai baundo tai ena, Maka, jimbo beiae etena utu da iai de, ito jisi da de; na beiamana raro mai ito teri. *Luke K. 15. 18-19.*

Singa ito katote dowasi, Bada; jisi ito da iai beiamana tain ae. *Psalms 143. 2.*

Kaen tetenane jimbo kaenato mana beiae esira, edo kaen pitawa akuta tetenane, edo ge be do kaenato da mana

itesira; edo jimbo beiae kaenato kaen ajijigetenane, edo awa beiamana edo jimbo beiae kaenato kotembedo doesira, edo jimbo bebegae berari da kaena beiamana esira.  
I John 1. 8-9.

**E**MBOMAI nato, Ove mi iai nenei de kaenamonde tevira, edo jimbo beiae kaenato jiwae onjiga tedo ajijigetenana; edo kaen mana tedo onjigetenana ta apuregetena, God Goroba jiwae Mamaka kaenato utu topo da jisi da; edo gido burau edo, dubo kaenato kotembedo, edo ge gido, edo kaen ajijigetenana; ango beiamana ari mi do edo, kaenamonde kotembedo dovesira. Awa iji da doae God da jisi da kaen ajijigetenana; awara ta edo kaena einda doregetena, edo ami kaena embo pisiuriawa embo kaen ategarago, edo kaen dasiga arago, edo ainda ge kotopu kaen garago, edo tamo ae asisi de embo kaen jipapa eona awa tedo garago eona, awa kaen ane, edo jimbo beiae kaenato ajijigari beuto ainae. Awa embo imomane teno gotewa, imomane einda isima ewa awa, do ikamane dave ai, ge ikamane bajina tae edo, God da do da na ae da de engo ajijigave.

*Jimbo beiae ajijigari embo jiwae mi tore Kera ari amboda, edo jiwae mi baongo dadari ore.*

**M**AMO, Goroba jiwae, Do kato, nakare bambae dumbae, edo be sinopu dutari begata ito doturutera. Nakare ge katari ae jipapa natokare amboda amboda etera. Ge ito kotopu jindetera. Jimbo ai edo darutegetera; edo jimbo domain edo etera. Natokare iai ro beiamana itae. Ae dumbae edo mamato era, Bada, edo ine mi do ewasi. Jimbo beiae ajijigotora awa inemi dowasi. Dubo kotembaro gido toregewasi; Ango imo embomai de teoto gotora Keriso mi Iesu Bada natokare. Awa embo, Mamo, do kato, ewasi, eimango rorae natokare dave ore, edo netegedo itore, Dao ito kotopu parara de awa embo. Amen.

*Udegari, ta Jimbo beiae da piedo dodo babariri, Priest mi berari tedo aina; edo embo awara baongo dadari aro.*

**G**OD, Goroba jiwae, Bada kaenato Iesu Keriso da Mamo, jimbo bebegae ari embore betari jipapa ae, edo gido jimbo bebegae ika dodo taingedo kaviegesira.

Ami gisi jiari ainda Kera ari de pisina, ango de embomai ika dubo mi kotembotora ainda jisi da jimbo bebegae da udegari topa ajijigorate. Embo jiwae ainda dubo kotembotora awa, edo ami da Evanelia kotopu ge be eora, amo kotembedo dodo udegetevira. Awara ta kae tedo gane dubo wareregari kaenamonde piarate, edo ainda Asisi Kotopu, edo jimbo kaenato boroko kaen edo ena awa dubo dave are, edo eimango jimbo kaenato kotopu are, edo amboda kaen matawa kaviegana; Iesu Keriso Bada kaenato embo.

*Edo embo mina tara, edo benunu nenei berari mendo da, Amen.  
Awara da Kera ari, baongo dadari edo, Bada da Benunu ge bajina ajijigare, ae embomai de baongo dadari edo, awa ae da de ajijigore*

**M**AKA natokare, utu da isima eta awa, Dao ito kotopu Metera; Basileia ito puresira; Jipapa ito etera awa; butu de utu de ango. Boroko edo iji da doae, rorae natokare piedo ewasi, Edo buria natokare kotembedo dowasi, Ango nakare embo nenei da buria natokare iai kotembedo doturora. Edo bawari da nakare kundo aimbote; Ko beiae da nakare toregewasi: Imo de basileia, ae goroba, ae parara de matawa. Amen.

*Edo emi ajijigare.*

Bada, begisi natokare angewasi.

*Mina tari.* Edo be natokare imo dasiga ari ge tara.

*Priest mi.* God, nakare burigiburigi toregewasi.

*Mina tari.* Bada, burigiburigi gundo tonembatate.

*Itae eraro edo, Priest mi tare,*

Mamo de, Mai de, Asisi Kotopu de da iai: parara itesira;

*Mina tari.* Ango teka de: boroko, edo natopo itaina. Amen.

*Priest mi.* Imomane Bada dasiga ewavi.

*Mina tari.* Bada da Dao dasiga ara.

*Edo Psalm emone ajijigara ta ia tara, edo gido Easter Day, iji engo de Anthem eve pisina: edo Kariga iji 19 engo de einda ajijigaeae, ae Psalm nenei de daedo.*

## SIPO TUMONDEBAIN

VENITE, EXULTEMUS DOMINO

### Psalm 95

**P**UWAVI, Bada da iai da kaen ia tane: ge kaenato dave are kaviegari kaenato ganuma da iai.

2. Do da kaen pumango edo kaen ategane: ge kaenato dave are ainda iai Psalm da.

3. Bada God siakabadae: edo Daotari siakabadae God jiwaie da tamo da.

4. Ipa da iai ungono: edo peji eno topa ainda.

5. Ewa topa ainda, edo ami ena: edo ipa mi iai tanambari jina.

6. Kaen pumango, benunu site tumondebain ane: kaen baongo dadari ane Bada kaena Ariembo da jisi da.

7. Amo God kaenato: edo kaena ainda buro embobo, edo ipa ainda undari vetari.

8. Boroko ge getewa dubo itomane okain eove: Meriba da ango, be Masa dumo da inge.

9. Engo de mamono mi na bavewa: na kotembedo, jimbo nato giwa.

10. Jienda 40 umo ainda iai na sini gamuna: tema, Embo do da bambae dumbae, edo begata nato gae eora.

11. Edo na duduno eite temo giwa: tema, Dango turari nato da torore kae.

Mamo de, Mai de, Asisi Kotopu de da iai: parara itesira,

Ango teka de: boroko, edo natopo itaina. Amen.

*Edo Psalm ajijigara tevira awa ango. Edo Psalm da awa itae aina, edo Benedicite, Benedictus, Magnificat, ae Nunc Dimittis ango, ango ajijigara,*

Mamo de, Mai de, Asisi Kotopu de da iai: parara itesira:

*Mina tari.* Ango teka de: boroko, edo natopo itaina. Amen.

*Edo Ajigari Da ajigara Book Matu da kupevira awa ango teora awa; Edo Ajijigetevira awa petedo wareregedo edo jiwaie mi gain sima gore.*

## SIPO TUMONDEBAIN

*Edo amboda ia Te Deum Laudamus, iji da doae ajijigedo ari ta ia tedo ari.*

*Edo gisi Kera ari mi tare, Eminda be eira Book angora, Chapter angora, Gano engo de. Edo Ajigari itae ari, engo tare. Ajigari Da, ta Da da gagane mi, itae esira.*

TE DEUM LAUDAMUS

**I**MO GOD dasiga eora: imo Bada ajijigotora.

2. Imo Mamo matawa itari: butu berari Ito iai tumondebain eora.

3. Ito iai anela jiwaie ia teora: utu ae gisi jiari de jiwaie.

4. Ito iai Kerubim ae Serapim de: ia matawa teora.

5. Kotopu, Kotopu, Kotopu: Bada Sabaoth da God.

6. Parara Ito dave jiwaie: utu ae butu de be da esira.

7. Aposetolo doregari ika giro ari mi: Imo dasiga edo eora.

8. Peroveta umo jiari ika dave jiwaie mi: Imo dasiga edo eora.

9. Garitutu embo da jisi beiamana mi: Imo dasiga edo eora.

10. Imo butu berari da: Ekalesia kotopu mi ajijigetevira;

11. Mamo: Ainda parara matawa itari;

12. Mai Ito kotopu be de: dakaima de;

13. Asisi Kotopu de daedo: Tonembari.

14. Imo Parara da Daotari: Keriso.

15. Imo Mamo da Mai: matawa itari.

16. Engo de embo toregain ge katata: Kakara Gagara da sini Imo beuto ae.

17. Engo de betari da tamo memesi gisi jiata: Utu da Basileia bejiteta kotembotora berari da iai.

18. God da be da anumbedo itota: Mamo da parara da.

19. Imo kotembeteiario puwasi: katain tedo.

20. Awa tedo Imo tedo gera, singabanga Ito tonembewasi: awamane embo ororo ika mi beiamana piata.



## SIPO TUMONDEBAIN

21. Ewasi edo Kokotopu Ito de daedo: parara matawa itari da ajigara.
22. Bada, teotopo Ito ewasi kavigore: edo baiyau Ito beiamane ewasi.
23. Undewasi: edo jiato matawa erore.
24. Iji da doae: nakare Imo dasiga eora.
25. Edo Dao Ito: matawa tumondebain edo eora.
26. Ewasi Bada: edo iji engo de nakare jimbo beiae da awa toregewasi.
27. Bada, nakare do ewasi: nakare do ewasi.
28. Bada, do Ito natokare iai wotesira: ango nakare Imo sima edo eora.
29. Bada, Imo sima etena: nanjigo na usimbese ain ae.

*Edo gido ia eiwa,*

## BENEDICITE OMNIA OPERA

**B**ADA da jimbo jiwae mi, imomane Bada beiamana ewavi: dasiga natopo edo gandewavi.

2. Bada da anela, imomane Bada beiamana ewavi: dasiga natopo edo gandewavi.
3. Utu, imomane Bada beiamana ewavi: dasiga natopo edo gandewavi.
4. Un tano ikane da, imomane Bada beiamana ewavi: dasiga natopo edo gandewavi.
5. Bada da jimbo goroba jiwae mi, imomane Bada beiamana ewavi; dasiga natopo edo gandewavi.
6. Iji ae kariga de, imomane Bada beiamana ewavi: dasiga natopo edo gandewavi.
7. Utu da dabori, imomane Bada beiamana ewavi: dasiga natopo edo gandewavi.
8. Wa ae damo de, imomane Bada beiamana ewavi: dasiga natopo edo gandewavi.
9. God da bisi, imomane Bada beiamana ewavi: dasiga natopo edo gandewavi.

## SIPO TUMONDEBAIN

10. Ni ao ae vevera de, imomane Bada beiamana ewavi: dasiga natopo edo gandewavi.
11. Tuvira ae duberi de, imomane Bada beiamana ewavi: dasiga natopo edo gandewavi.
12. Damo ae damo okain de, imomane Bada beiamana ewavi: dasiga natopo edo gandewavi.
13. Damo okain ae dademo de, imomane Bada beiamana ewavi: dasiga natopo edo gandewavi.
14. Ice ae snow de, imomane Bada beiamana ewavi: dasiga natopo edo gandewavi.
15. Tumba ae sipo de, imomane Bada beiamana ewavi: dasiga natopo edo gandewavi.
16. Utata ae munia de, imomane Bada beiamana ewavi: dasiga natopo edo gandewavi.
17. Birigi ae poraga de, imomane Bada beiamana ewavi: dasiga natopo edo gandewavi.
18. Butu, Bada beiamana aina: dasiga natopo edo gandaina.
19. Peji ae Pamo de, imomane Bada beiamana ewavi: dasiga natopo edo gandewavi.
20. Rorae awae jiwae butu da, imomane Bada beiamana ewavi: dasiga natopo edo gandewavi.
21. Sinini, imomane Bada beiamana ewavi: dasiga natopo edo gandewavi.
22. Ewa ae un de, imomane Bada beiamana ewavi: dasiga natopo edo gandewavi.
23. Ewa wo babaingaemane, imomane Bada beiamana ewavi: dasiga natopo edo gandewavi.
24. Bisi ni jiwae mi, imomane Bada beiamana ewavi: dasiga natopo edo gandewavi.
25. Abu wo ae nasi wo jiwae de mi, imomane Bada beiamana ewavi: dasiga natopo edo gandewavi.
26. Enembo da mamain, imomane Bada beiamana ewavi: dasiga natopo edo gandewavi.
27. Israel, Bada beiamana ewavi: dasiga natopo edo gandaina.

## SIPO TUMONDEBAIN

28. Bada da priests, imomane Bada beiamana ewavi: dasiga natopo edo gandewavi.

29. Bada da singabanga, imomane Bada beiamana ewavi: dasiga natopo edo gandewavi.

30. Rorae dave embobo da asisi, imomane Bada beiamana ewavi: dasiga natopo edo gandewavi.

31. Embo kokotopu burau de mi, imomane Bada beiamana ewavi: dasiga natopo edo gandewavi.

32. Ananaias ae, Azaraias ae, Misael de, imomane Bada beiamana ewavi: dasiga natopo edo gandewavi.

Mamo de, Mai de, Asisi Kotopu de da iai: parara itesira;

Ango teka de: boroko, edo natopo itaina. Amen.

*Edo Ajigari Da da gagane Book Teka da ajigara. Edo amboda Ia ainda isira awa; edo gido ainda Iji da Chapter da ajigari, ta Evanelia da, John Bapataito ari Kotopu da Iji da.*

## BENEDICTUS

Luke K. 1. 68

**B**EIAMANA Bada, Israel mai da God: awa etega edo, Bembo ika da iai da rorou piesira.

2. Edo torari korere kaena embó jiri erira: singa ika David da oro da.

3. Ango tena peroveta kokotopu da be da: nasi teka de itoro angó;

4. Torari itoro kaenato da iai: ae ipa ikaito mi kaena ge jindetera awa.

5. Edo mamaka kaenato tunu giwa awa do arate: edo ainda tari gari kotopu kotembarate.

6. Ge tedo gain tena awa: mamaka kaenato Abraham da jisi da.

7. Engo edo itoro kaenato ami da ipa da toregesira: ainda iai kaena ambodani, edo adu ain ae.

8. Edo amo gisi jimbo kaenato kotopu ari dave are: iji kaenato jiwae.

## SIPO TUMONDEBAIN

9. Ango edo, Mai, imo Ikane Matawa Itari da peroveta tedo ore: imo Bada da gisi da baunteite, ainda begata sirige.

10. Edo ainda embo torari ewasi gore: beiae ika ruve-gari de.

11. God kaenato do evira awa embo: angó sipo atae ikane wowoteira, kaenato iai punaina;

12. Edo munia de, ae betari da dunga de anumbotora awa parara amaina: edo tai kaenato paposimene, bega da begata da bambara.

Mamo de, Mai de, Asisi Kotopu de da iai: parara itesira.

Ango teka de: boroko, edo natopo itaina. Amen.

*Edo gido Psalm eiwa,*

## JUBILATE DEO

Psalm 100

**B**ADA da iai da ia tewavi, iai berari: dubodubo mi beiamana Bada da iai da kera ewavi; do da ia de puwavi.

2. Giwavi Bada owa God: omi mi kaena ena, edo kaena ounda ikaito; kaena ounda embomai, edo ounda buro da sinopu.

3. Ounda pua be da torido ategewavi: ounda kamboro da dasiga ewavi, owa do tewasi, ounda Dao beiamana tewavi.

4. Bada beiamana, do eite itevira: edo ounda ge be otatawo berari da iai itevira.

Mamo de, Mai de, Asisi Kotopu de da iai: parara itesira.

Ango teka de: boroko, edo natopo itaina. Amen.

*Edo Aposetolo da Kiki ia tedo ari ajijigedo ari, Kera ari ae embomai petedo eora awa; edo gido iji awa Athanasius Kotopu da Kiki tetero ajijigore.*

## SIPO TUMONDEBAIN

**N**A GOD ge be eona, Mamo goroba jiwae, Utu de butu de Ariembo. Edo Iesu Keriso ainda Mai dakaima, Bada kaenato, Asisi Kotopu esiri watou jirido, Mary Kakara mi kumuna, Mamato ena Pontius Pilate gisi jina ango de, Cross da dewo, betenu, goewo, Hades da wotena; Iji tamonde betari de teda erido, Utu da visina, Edo God Mamo Goroba jiwae da be da anumena isira; Ango de wotedo wawasiri de bebetegari de kataina.

Asisi Kotopu ge be eona; Ekalesia Kotopu Katoliko; Embo Kokotopu da Dada utari; Rorae beiae Kotembedo dowari; Tamo erari; Edo Kaviegari Matawa itari. Amen.

*Edo amboda Benunu eiwa, edo embo jiwae baongo dadari aro; edo Kera ari gisi ge bajina tedo ajijigare.*

Bada itomane iai itare.

*Mina tari.* Edo dubo ito da ango.

*Kera ari mi.* Kaen benunu tana.

Bada, nakare do ewasi.

*Keriso, nakare do ewasi.*

Bada, nakare do ewasi.

*Edo Kera ari, Ia embobo, edo embo, Bada da Pari ge bajina tedo tore.*

**M**AKA natokare, utu da isima eta awa, Dào ito kotopu Metera; Basileia ito puresira; Jipapa ito etera awa; butu de utu de ango. Boroko edo iji da doae, rorae natokare piedo ewasi, Edo buria natokare kotembedo dowasi, Ango nakare embo nenei da buria natokare iai kotembedo doturora. Edo bawari da nakare kundo aimbote; Ko beiae da nakare toregewasi. Amen.

*Priest mi erido tare.*

Bada, do ito nakare ewasi gore.

*Mina tari.* Edo kaviegari ito namondekare piewasi.

*Priest mi.* Bada, Queen ewasi kaviegare.

*Mina tari.* Edo do edo nakare giwasi imo ategetera ango de.

*Priest mi.* Kera ari ito jimbo dave piewasi ombore.

*Mina tari.* Edo avigari ito da dubo dave ewasi.

*Priest mi.* Bada, teotopo ito ewasi kaviegore.

*Mina tari.* Edo baiiau ito beiamana ewasi.

## SIPO TUMONDEBAIN

*Priest mi.* Bega iji natokare de piewasi, Bada.

*Mina tari.* Embo nei nakare embo itoro ae, rata imo God.

*Priest mi.* God, do natokare ewasi dave are.

*Mina tari.* Edo natokare iai Asisi Kotopu ito kundo aimbote.

*Edo Pari tamonde ajijigare; Da, Iji da pari, ango Doregari da piena awa; Da da gagane, Bega embo: Tote da gagane, Tonembari embo, ango beiamana etera. Edo Pari tote eiwa iji da doae ajijigedo ore, Sipo Tumondebain da engo; jiwae mi baongo dadari eora ami.*

### PARI DA DA GAGANE, BEGA EMBO

**G**OD, imo bega tutu, edo umo jiari jipapa eota, embobo Gimo kotembedo matawa kaviegatora, imo kera edo gisi jijiora; Nakare singa ito burau gaiari jiwai da toregewasi; edo nakare, imo toregari sima edo, ro itoro ari adu ain ae; Iesu Keriso Bada natokare goroba awa embo. Amen.

### PARI TOTE DA GAGANE, TONEMBARI EMBO

**B**ADA, maka natokare utu da, God goroba jiwae natopo, boroko sipo de nakare tepo kundo gumbeta awa, engo okain edo toregeteiato jinaina. Imo ato beiae da dunain ae, adu ari da ato eve da idegara. Imo Dariga iteto gido, ari natokare ango jisi ito da beiamana ara; Iesu Keriso Bada natokare awa embo. Amen.

*Quire da, edo iai ia teora amo, einda Anthem isira.*

*Benunu ipa da eiwa einda ajijigore, edo gido Litany ajijigorate.*

### BENUNU QUEEN PARARA DE EMBO

**B**ADA, Mamo natokare utu topo, ikane isite, imo goroba, daotegeregari da Daotari, babadegari da Badari, dadariga da Dariga da be da, jisi tu da edo iai da sima ari jiwae gotota awa; imo inaka de tedo gotera, edo ito tonembari mi Daotari natokare Queen Elizabeth giwasi; edo Asisi ito Kotopu tonembari mi ewasi be da are, ango iji da doae ge ito ainda iai wareregaina, edo begata ito da tembudo aina; utu rorae itae piewasi; ainda iji jiwae ari

## SIPO TUMONDEBAIN

kaviegare; ewasi goroba edo itoro ika jiwae da beiamana gaiare; ango edo kaviegari ika itae are, edo dubo beiamana ari da matawa itaina; Iesu mi Keriso Bada natokare. *Amen.*

### BENUNU QUEEN DA TEOTOPO EMBO

**G**OD, Goroba jiwae, jimbo ewagaewa jiwae jisi, imo tedo gera, edo Elizabeth Queen da ai, ae Philip, Edinburgh da Duke de, Charles, Wales da Prince de beiamana ewasi, ae ainda embomai jiwae de daedo: Asisi Kotopu mi piewasi ombore; utu tonembari ito piewasi; dubo dave ari jiwae piewasi; edo basileia ito matawa itari da kundo puwasi; Iesu Keriso Bada natokare. *Amen.*

### BENUNU PRIEST AE EMBO DE EMBO

**G**OD, Goroba jiwae, jimbo ewagaewa jiwae karupa ari babaiingaemana edo eta, Bishop natokare da iai, ae embo natokare sima ari de, ae dada doregari jiwae awa-mané mi sima edo eora awa, tonembari ito Asisi kaviegari piewasi wotare: Edo beiamana ari ito matawa piewasi, ango ato awa-mané aro dubo ito beiamana aina. Eiwa piewasi namondekare Bada; Ge tari natokare awa embo; Iesu Keriso. *Amen.*

### BENUNU CHRYSOSTOM K. DA

**G**OD, Goroba jiwae, nakare toregeteto, boroko jisi ito da benunu inono de tetera; edo nakare teoto gotora edo embo tote ta tamonde ra mi Dao ito da doregeteri edo tedo gotora awa pitiesi; Boroko, Bada, singabanga ito jipapa edo tedo gotera awa piewasi ro kumbari tao de awa, edo iai ainda, ge ito kotembari namondekare piewasi, edo nasi da isipira awa, kaviegari matawa itari. *Amen.*

### 2 Corinthians 13

**B**ADA Kaenato Iesu Keriso da tonembari, edo God da Bdubobari, edo Asisi Kotopu da dada utari, kaena berari da iai matawa itorote. *Amen.*

*Einda Sipo Tumondebain itae.*

## TURO TUMONDEBAIN

### IJI BERARI TEORITA

*Turo Tumondebain tuturo de Kera ari mi ge inakade Tari eiwa Ove da dakaki ta nenei ajijigare. Ango edo amboda gagurevira awa ajijigare.*

Engo de jimbo bebegae embo re jimbo bebegae ika dodo taingedo, edo beiamana ge ango are, amo asisi wasiri de toregedo aina. *Ezek. 18. 27.*

Ae dumbae edo gotona; edo jimbo bebegae nato do nato da matawa isima eira. *Psalms 51. 3.*

Jimbo bebegae nato de dubo ito onjigatate; edo beiae nato itae sitewasi. *Psalms 51. 9.*

God da rorou dubore bedarira; dubore bededo depeka arira, imo, God, isimain ae. *Psalms 51. 17.*

Dubo itomane jido kerewavi, edo tamo woru ae, edo Bada itomane God da iai wareregemo; amo tonembari de do ari de, duduno babaingo edo evira, edo tamo dave jiwae evira, edo beiae da dubo kotembetevira. *Joel 2. 13.*

Bada God kaenato da re doari ae kotembedo doari de, kaena ainda iai itoro eimono; edo Bada God kaenato da ge da gido ae, edo gere jisi kaenato da pipitevira awa kaen tembae. *Daniel 9. 9-10.*

Bada, na babaingo jiato dambu jindane; duduno ae, edo gido na sitewasi. *Jer. 10. 24; Psalms 6. 1.*

Dubo itomane kotembewavi; utu basileia atutubeteira. *Matth. K. 3. 2.*

Erido Maka da iai baundo tai ena, Maka, jimbo beiae etena utu da iai de, ito jisi da de; na beiamana raro mai ito teri. *Luke K. 15. 18-19.*

Singa ito katote dowasi, Bada; jisi ito da iai beiamana tain ae. *Psalms 143. 2.*

Kaen tetenane rorae kaenato mana beiae esira, edo kaen pitawa akuta tetenane, edo ge be do kaenato da

## TURO TUMONDEBAIN

mana itesira; edo jimbo beiae kaenato kaen ajijigetenane, edo awa beiamana edo jimbo beiae kaenato kotembedo doesira, edo jimbo bebegae berari da kaena beiamana esira. I John 1. 8-9.

**E**MBOMAI nato, Ove mi iai nenei de kaenamonde tevira, edo jimbo beiae kaenato jiwae onjiga tedo ajijigetenana; edo kaen mana tedo onjigetenana ta apuregetena, God Goroba jiwae Mamaka kaenato uto topo da jisi da; edo gido burau edo, dubo kaenato kotembedo, edo ge gido, edo kaen ajijigetenana; ango beiamana ari mi do edo, kaenamonde kotembedo dovesira. Awa iji da doae God da jisi da kaen ajijigetenana; aware ta edo kaena ainda doregetena, edo ami kaena embo pisiuri awa ambo kaen ategarago, edo kaen dasiga arago, edo ainda ge kotopu kaen garago, edo tamo ae asisi de embo kaen jipapa eona, awa tedo garago eona, awa kaen ane, edo jimbo beiae kaenato ajijigari beuto ain ae. Awa embo imomane teno gotewa, imomane ainda isima ewa awa, do ikamane dave ai, ge ikamane bajina tae edo, edo God da do da na ae da de engo ajijigave.

*Jimbo beiae ajijigari embo jiwae mi tore Kera ari amboda, edo jiwae mi baonga dadari ore.*

**M**AMO, Goroba jiwae, Do kato, nakare bambae dumbae, edo be sinopu dutari begata ito dotururtera. Nakare ge katari ae jipapa natokare amboda ambo da etera. Ge ito kotopu jindetera. Jimbo ai edo darutegetera; edo jimbo domain edo etera. Natokare iai ro beiamana itae, Ae dumbae edo mamato era, Bada, edo ine mi do ewasi. Jimbo beiae ajijigotora awa inemi dowasi. Dubo kotembaro gido toregewasi; Ango imo embomai de teoto gotora Keriso mi Iesu Bada natokare. Awa embo Mamo, do kato, ewasi; eimango jimbo natokare dave ore, edo netegedo itore, Dao ito kotopu parara de awa embo. Amen.

*Udegari, ta Jimbo beiae da piedo dodo babariri, Priest mi berari tedo aina; edo embo awara baongo dadari aro.*

**G**OD, Goroba jiwae, Bada kaenato Iesu Keriso da Mamo, jimbo bebegae ari embore betari jipapa ae, edo gido jimbo bebegae ika dodo taigedo kaviagesira.

## TURO TUMONDEBAIN

Ami gisi jiari ainda Kera ari de pisina, ango de embomai ika dubo mi kotembotora ainda jisi da jimbo bebegae da udegari topa ajijigorote. Embo jiwae ainda dubo kotembotora awa, edo ami da Evanelia kotopu ge be eora, amo kotembedo dodo udegetevira. Awara ta kaen tedo gane dubo wareregari kaenamonde piarate, edo ainda Asisi Kotopu, edo jimbo kaenato boroko kaen edo ena awa dubo dave are, edo eimango jimbo kaenato kotopu are, edo amboda kaen matawa kavigana; Iesu Keriso Bada kaenato embo. Amen.

*Awara da Kera ari, baongo dadari edo, Bada da Benumu ge bajina ajijigare, ae embomai de baongo dadari edo, awa ae da de ajijigore.*

**M**AKA natokare, utu da isima eta awa, Dao ito kotopu etera; Basileia ito puresira; Jipapa ito etera awa; butu de utu de ango. Boroko edo iji da doae, rorae natokare piedo ewasi. Edo buria natokare kotembedo dowasi, Ango nakare embo nenei da buria natokare iai kotembedo doturora. Edo bawari da nakare kundo aimbote; Ko beiae da nakare toregewawi. Imo de basileia, ae goroba, ae parara de matawa. Amen.

*Edo emi ajijigare.*

Bada, begisi natokare agewasi.

*Mina tari.* Edo be natokare imo dasiga ari ge tara.

*Priest mi.* God, nakare burigiburigi toregewasi.

*Mina tari.* Bada, burigiburigi gundo tonembatate.

*Itae eraro edo, Priest mi tare,*

Mamo de, Mai de, Asisi Kotopu de da iai: parara itesira;

*Mina tari.* Ango teka de: boroko, edo natopo itaina. Amen.

*Priest mi.* Imomane Bada dasiga ewavi.

*Mina tari.* Bada da Dao dasiga ara.

*Edo Psalms ajijigara ta ia tara tevira awa ango. Edo Ajigari Book Matu da ango teora awa. Edo amboda Magnificat (ta Mary Kakara beiamana ainda Ia) engo de.*



## TURO TUMONDEBAIN

### MAGNIFICAT

#### Luke K. 1

**D**UBO nato Bada gandeiro: edo God, Torari nato rare, na dubo dave esira.

2. Kera ari ika da burau ari gira: edo boroko ta amboda umo jiwae mi na beiamana tara.

3. Awa goroba evira edo ari babain nato iai esira: edo kotopu ainda Dao.

4. Edo umoamo adu eora awa: do esira.

5. Ipa mi goroba esira: embo dubo da iawa eora awa evckara esira.

6. Embo badari da anumba de piesiri wotetera: edo buburau jiri erera.

7. Beji ambubugari undesiri osi era: beiamana ami pipitevira.

8. Edo rorae embobo: tepo tesiri auntera.

9. Ambodani ika Israel tonembesira: angoo do ari kote-mbesira.

10. Mamono kaenato angoo sisina: Abraham ae mamain de da iai da matawa.

Mamo de, Mai de, Asisi Kotopu de da iai: parara itesira;

Ango teka de: boroko, edo natopo itaina. Amen.

*Ango ae ra ta Psalm eiwa; edo gido iji 19 angoo de Psalm da tepo teora awa.*

### CANTATE DOMINO

#### Psalm 98

**B**ADA da iai ia teka teu: ami ari kore ari esisina.

2. Ainda ingoo be, edo ingoo kotopu: goroba ari awa embo burisina.

3. Bada da ari kaviegari dambu bejisina: edo ari ika dave ewowo da jisi da piesiri gositera.

4. Do ari ika de ge be ika de Israel embo da iai kote-mbesisina: butu gombu berari mi God kaenato ari kavie-gari gositera.

## TURO TUMONDEBAIN

5. Ge itomane dave eu Bada da iai, imomane butu berari mi: dubo itomane dave ari ia site, dasiga eu.

6. Bada ae kitara de daedo dasiga eu: kitara de daedo ae psalm de.

7. Ae to de angoo: Daotari, Bada da jisi da ia teu.

8. Ewa aoro gataina, edo berari do da: butu, ae awa-mane nasi jijiora awa de daedo.

9. Un ingoo mi pokupoku daro, ko jiri dubo ewa ari, ia inono de tara Bada da dombu da: awa gupeira butu katain tedo.

10. Butu jimbo dave mi kataina: ewowo dambuda-rari mi.

Mamo de, Mai de, Asisi Kotopu de da iai: parara ite-sira;

Ango teka de: boroko, edo natopo itaina. Amen.

*Edo Ajigari Book Teka da teora angoo. Edo amboda, Nunc Dimittis ta Simeon ainda Ia) engoo de.*

### NUNC DIMITTIS

#### Luke 2. 29

**S**INGA ito de te boroko bambare, Bada: ge ito angoo, Sbegaa de.

2. Jisi nato: torari ito gira.

3. Embo jiwae: jisi da eota awa.

4. Utata etene da kumbari keresira: edo embo ito Israel mai da parara.

Mamo de, Mai de, Asisi Kotopu de da iai: parara ite-sira;

Ango teka de: boroko, edo natopo itaina. Amen.

*Ango ae ra ta Psalm eiwa, edo gido iji 12.*

### DEUS MISEREATUR

#### Psalm 67

**G**OD nakare do aina, edo beiamana aina: namondekare daedo dombu utata aina.

## TURO TUMONDEBAIN

2. Edo nasi da begata ika kotembara: edo ari kavigari ito etene jiwae da iai.

3. Jisi imo dasiga ara, God: jisi jiwae mi imo dasiga ara.

4. Embo dubo dave ari ia tara: jisi be tedo gi, edo embo nasi da kundo gumbuwasu.

5. Jisi imo dasiga ara, God: jisi jiwae mi imo dasiga ara.

6. Nasi be esira: God, natokare God beiamana aina.

7. God nakare beiamana aina: edo nasi gombu, jiwae awa adu ara.

Mamo de, Mai de, Asisi Kotopu de da iai: parara itesira;

Ango teka de: boroko, edo natopo itaina. Amen.

*Edo Aposetolo da Kiki ajiggedo ari ta ia tari, Kera ari ae embomai petedo eora awa.*

**N**A GOD ge be eona, Mamo goroba jiwae, Utu de butu de Ariembo.

Edo Iesu Keriso ainda Mai dakaima, Bada kaenato. Asisi Kotopu esiri watou jirido, Mary Kakara mi kumuna, Mamato ena Pontius Pilate gisi jina ango de, Cross da dewo, betenu, goewo, Hades da wotena; Iji tamonde betari de tedarido, Utu da visina, Edo God Mamo Goroba jiwae da be da anumena isira; Ango de wotedo wawasiri de bebetegari de kataina.

Asisi Kotopu ge be eona; Ekalesia Kotopu Katoliko; Embo Kokotopu da Dada utari; Rorae beiae Kotembedo dowari; Tamo erari; Edo Kavigari Matawa itari. Amen.

*Edo amboda Benunu eiwa, edo embo jiwae baongo dadari aro; edo Kera ari gisi ge bajina tedo ajigigare.*

Bada itomane iai itare.

*Mina tari.* Edo dubo ito da ango.

*Kera ari mi.* Kaen benunu tana.

Bada, nakare do ewasi.

*Keriso, nakare do ewasi.*

Bada, nakare do ewasi.

*Edo Kera ari, Ia embobo, edo embo, Bada da Pari ge bajina tedo tore.*

**M**AKA natokare, utu da isima eta awa, Dao ito kotopu Metera; Basileia ito puresira; Jipapa ito etera awa;

## TURO TUMONDEBAIN

butu de utu de ango. Boroko edo iji da doae, rorae natokare piedo ewasi. Edo buria natokare kotembedo dowasi, Ango nakare embo nenei da buria natokare iai kotembedo doturora. Edo bawari da nakare kundo aimbote; Ko beiae da nakare toregewasi. Amen.

*Priest mi erido tare.*

Bada, do ito nakare ewasi gore.

*Mina tari.* Edo kavigari ito namondekare piewasi.

*Priest mi.* Bada, Queen ewasi kavigare.

*Mina tari.* Edo do edo nakare giwasi imo ategetera ango de.

*Priest mi.* Kera ari ito jimbo dave piewasi ombore.

*Mina tari.* Edo avigari ito da dubo dave ewasi.

*Priest mi.* Bada, teotopo ito ewasi kavigore.

*Mina tari.* Edo baiaw ito beiamana ewasi.

*Priest mi.* Bega iji natokare de piewasi, Bada.

*Mina tari.* Embo nei nakare embo itoro ae, rata imo, God.

*Priest mi.* God, do natokare ewasi dave are.

*Mina tari.* Edo natokare iai Asisi Kotopu ito kundo aimbote.

*Edo Pari tamonde ajigigare; Da, Iji da Pari; Da da gagane, Bega embo; Tote da gagane, Tonembari embo, adu ari jiwae da iai, ango; edo eiwa tote iji da doae ajiggedo ore, Turo Tumondebain da engo.*

## PARI DA DA GAGANE, TUMONDEBAIN TURO DE DA

**G**OD, inemi dubo kotopu, ge katari beiamana, jimbo Gdambudarari berari gupera awa, bega nasi piaedumbae, inemi ambodani ito de pie; edo nakare ge ito kera ain jipapa era, inemi nakare toregewasi, edo itoro natokare adu ain ae, edo nakare oena apedo tepo sima ara; Iesu Keriso nakare Ari erari awa tedo. Amen.



## TURO TUMONDEBAIN

PARI TOTE DA GAGANE, TONEMBARI EMBO, ADU ARI DA IAI

**T**UMBA natokare parara ato gumaina, Bada, benunu tera; edo nakare eiwa munia de adu ari jiwae de tore-gewasi. Mai ito dakaki awa embo, nakare Ari erari embo, Iesu Keriso. *Amen.*

*Quire da, edo iai ia teora amo, einda Anthem isira.*

### BENUNU QUEEN PARARA DE EMBO

**B**ADA, Mamo natokare utu topo, ikane isite, imo go-Broba, daotegeregari da Daotari, babadegari da Badari, dadariga da Dariga da be da, jisi tu da da edo iai da sima ari jiwae gotota awa; imo inaka de tedo gotera, edo ito tonembari mi Daotari natokare Queen Elizabeth giwasi; edo Asisi ito Kotopu tonembari mi ewasi be da are, ango iji da doae ge ito ainda iai wareregaina, edo begata ito da tembudo aina; utu rorae itae piewasi; ainda iji jiwae ari kaviegare; ewasi goroba edo itoro ika jiwae da beiamana gaiare; ango edo kaviegari ika itae are, edo dubo beiamana ari da matawa itaina; Iesu mi Keriso Bada natokare. *Amen.*

### BENUNU QUEEN DA TEOTOPO EMBO

**G**OD, Goroba jiwae, jimbo ewagaewa jiwae jisi, imo tedo gera, edo Elizabeth Queen da ai, ae Philip, Edinburgh da Duke de, Charles, Wales da Prince de beiamana ewasi, ae ainda embomai jiwae de daedo: Asisi Kotopu mi piewasi ombore; utu tonembari ito piewasi; dubo dave ari jiwae piewasi; edo basileia ito matawa itari da kundo puwasi; Iesu Keriso Bada natokare. *Amen.*

### BENUNU PRIEST AE EMBO DE EMBO

**G**OD, Goroba jiwae, jimbo ewagaewa jiwae karupa ari gbabaingamana edo eta, Bishop natokare da iai, ae embo natokare sima ari de, ae dada doregari jiwae awa-mane mi sima edo eora awa, tonembari ito Asisi kavie-gari piewasi wotare: Edo beiamana ari ito matawa pie-wasi, ango ato awamane aro dubo ito beiamana aina.

## TURO TUMONDEBAIN

Eiwa piewasi namondekare Bada; Ge tari natokare awa embo; Iesu Keriso. *Amen.*

### BENUNU CHRYSOSTOM K. DA

**G**OD, Goroba jiwae, nakare toregeteto, boroko jisi ito da benunu inono de tetera; edo nakare teoto gotora edo embo tote ta tamonde ra mi Dao ito da doregeteri edo tedo gotora awa pietesi; Boroko, Bada, singabanga ito jipapa edo tedo gotera awa piewasi ro kumbari tao de awa, edo iai einda, ge ito kotembari namondekare piewasi, edo nasi da isipira awa, kaviegari matawa itari. *Amen.*

### 2 Corinthians 13

**B**ADA Kaenato Iesu Keriso da tonembari, edo God da Bdubobari, edo Asisi Kotopu da dada utari, kaena berari da iai matawa itorote. *Amen.*

*Einda Turo Tumondebain itae.*

## SIPO TUMONDEBAIN DA

*Bonda einda; Christmas Iji, Epiphany, Matthias K., Easter Iji, Vitari Iji, Pentecost, John Bapataito K., James K., Bartholomew K., Matthew K., Simon ae Jude Kk., Andrew K., edo Trinity Sunday, Sipo Tumondebain da ia tari ta tepo tari, Kiki kaenato da Bedari eiwa, dao teora Athanasius K. da Kiki; Kera ari ae embo de petedo orote.*

### QUICUNQUE VULT

**E**MBOMAI berari kavigari jipapa eora awa: gisi Kiki Katoliko be jido takimborote.

Embo ami Kiki eiwa de de ra ta dave sima ae aina: awara natopo betaina.

Edo Kiki Katoliko evire: God dakaki ae Trinity de da rata, ko Trinity da da awa kaen tumondebain eona ane tae.

Person kaen sirae: ko Tamo kaen evekara ae.

Mamo da Person eve, Mai da Person eve; Asisi Kotopu da Person eve.

Ango edo Mamo de Mai de Asisi Kotopu de God da be da: Parara amo dawa, Dariga amo daedo itari dawa.

Mamo ango, Mai ango; Asisi Kotopu ango.

Mamo ainda ari embo itae, Mai ainda ari embo itae: Asisi Kotopu ainda ari embo itae.

Mamo gano ae, Mai gano ae: Asisi Kotopu gano ae.

Mamo natopo itari, Mai natopo itari: Asisi Kotopu natopo itari.

Ko awamane awa natopo itari tamonde ae rata: ko natopo itari da kaki.

Ko gano ae amo tamonde ae rata, edo ainda ari embo ae amo tamonde ae: edo gido ko awa ainda ari embo ae, rata dakaki, edo gano ae dakaki.

Ango Mamo Goroba jiwae, Mai Goroba jiwae: Asisi Kotopu Goroba jiwae.

## SIPO TUMONDEBAIN DA

Ko Goroba jiwae amo awamane amo tamonde ae rata: Goroba jiwae da kaki.

Ango Mamo amo God, Mai amo God: Asisi Kotopu amo God.

Ko God tamonde ae rata: God dakaki.

Ango Mamo amo Bada, Mai amo Bada: Asisi Kotopu amo Bada.

Ko Babadegari tamonde ae rata: Bada dakaki.

Kiki Christian mi kaenamonde atopapotevira: awa Person daradara God de Bada de kaen dao tane tae.

Ango Kiki Katoliko mi kaena ge tevira: kaen tane tae God tamonde ta Babadegari tamonde.

Mamo amo aimi eae: ko jiae, ko kumbae.

Mai Mamo akuta da iai ango: ae rata jiae rata ko kumuna.

Asisi Kotopu Mamo da iai ango, Mai da iai ango rata: ae, jiae, rata wotena.

Awara ta ko Mamo dakaki rata, ko Mamono tamonde ae; Mai amo dakaki rata, ko Mamai tamonde ae: Asisi Kotopu amo dakaki rata, ko Asisi Kokotopu amo tamonde ae.

Ko Trinity einda nei nomi daginegae, amboda itae: ko nei nomi badae, siaka ae.

Edo gido Person tamonde awamane awa natopo itari da dawa ra ta: ko badari mi engoengo.

Ango edo berari da gisi tesira ango: Dakaki da Trinity awa ko Trinity da Da dawa kaen baido ane tae.

Awa tedo embo ami kavigari jipapa evira awa: Trinity engo kotembarate.

Ko nei da, kavigari matawa itari awa tedo: embo Bada kaenato Iesu Keriso Pisi kumbari be kotembore tae.

Kiki tepo awa, kaen kotembedo bedane tae: Bada kaenato Iesu Keriso God da Mai, Amo God rata ko Embo.

Amomo God, Mamo da Tamo mi, awa kumuna, butu berari da gisi da: ko embo, ai da tamo mi butu da wotena.

## SIPO TUMONDEBAIN DA

Amo God de de, Embo de de: asisi ika ae dubo de rata pisi ika embo da iai ango.

Amo God rata ko Mamo ango: omo Embo rata ko Mamo da iai ango siaka ena.

Amo God rata ko embo: tote ae rata Keriso dakaki.

Dakaki, ko God mi pisi ae rata: ko embo ari God da iai kumuna.

Dakaki, Tamo sirae rata: Person mi dada ena.

Asisi ae dubo de rata pisi amo embo dakaki: ango God de Embo de Keriso dakaki.

Mamato ena, kaena ari kavigeganate tedom: Hades da wotedom, iji tamonde de betari de teda enina.

Utu da visina, Mamo, God Goroba jiwae da ipa be da anumena isira: ango de wotedom wawasiri de bebetegari de kataina.

Gumbari, embomai berari teda erara ae tamonde da: edo ari ika ajigara.

Edo awamane awa jimbo dave eora awa kavigari matawa itari da aimbara: edo awamane jimbo beiae eora awa niao matawa itari da aimbara.

Kiki Katoliko eiwa: embo be kotembae ara mana kavigara.

Mamo de, Mai de, Asisi Kotopu de da iai: parara itesira.

Ango teka de: boroko, edo natopo itaina. Amen.

## LITANY

*Litany, ta Benunu Enembo jimbo jiwae de embo, einda isira; Sipo Tumondebain itae ari edo Litany ia tari ta tepo tari Sunday, Wednesday de, Friday de, edo ango de Bishop mi ajigedom aina.*

**G**OD, Mamo, Utu topo: nakare jimbo bebegae embobo dubo beiae kakato do ewasi.

*God, Mamo, Utu topo: nakare jimbo bebegae embobo dubo beiae kakato do ewasi.*

God, Mai, nasi Rorou piari embo: nakare jimbo bebegae embobo dubo biae kakato do ewasi.

*God, Mai, nasi Rorou piari embo: nakare jimbo bebegae embobo dubo beiae kakato do ewasi.*

God, Asisi Kotopu, Mamo de Mai de da iai wotata awa: nakare jimbo bebegae embobo dubo beiae kakato do ewasi.

*God, Asisi Kotopu, Mamo de Mai de da iai wotata awa: nakare jimbo bebegae embobo dubo beiae kakato do ewasi.*

Trinity Kotopu, beiamana ari, parara de, Persona tamonde edo God dakaima: nakare jimbo bebegae embobo dubo beiae kakato do ewasi.

*Trinity Kotopu, beiamana ari, parara de, Persona tamonde edo God dakaima: nakare jimbo bebegae embobo dubo beiae kakato do ewasi.*

Bada, jimbo bebegae natokare ae mamono da jimbo bebegae kotembote; jimbo bebegae natokare riroa kumbote: nakare dowasi, Bada, teotopo ito ororo mi dave jiwae kumbata awa dowasi, edo nakare duduno de matawa itote.

*Nakare dowasi, Bada.*

Bebegae de ae usimbese ari de; jimbo beiae de, diaboloda pitawa edo gaiari ika de; duduno ito de, edo betari matawa de,

*Nakare toregewasi, Bada.*

## LITANY

Dutari berari de; iawa ari de, edo pitawa kato ari de; embo nei da rorae jipapa ari de, ge jindari de, edo umo jiaae berari de,

*Nakare toregewasi, Bada.*

A gigi ari de, edo jimbo bebegae jiwae ainda rorou betari de; edo iai, ae pisi de, ae diabololo da jimbo pitawa jiwae de,

*Nakare toregewasi, Bada.*

Birigi de, tugari de; ievi de, abari babain de, beji de; gaiari de, dari betari de, ae borae betari de,

*Nakare toregewasi, Bada.*

Ge jindari berari daotari ika da iai de; kotembae dubae de, kiki pitawa de, edo evekara ari de; dubo dombugari de, ae Ge ito tedi jiri de,

*Nakare toregewasi, Bada.*

Pisi Kumbari ito kotopu botu da gido; Wotari ito Kotopu ae Tamo ito jugari de gido; Bapataito ito gido, Rorae doari ito ae Bawari ito de gido,

*Nakare toregewasi, Bada.*

Tamo memesi ito ae Iwori ororo inge de gido; Cross ito de ae Mamato ari ito de gido; Betari ito de ae Goiari ito de gido; Erari ito de ae Vitari ito de gido; ae Asisi Kotopu gumbari de gido,

*Nakare toregewasi, Bada.*

Dubo beiaae natokare da iji jiwae da; rorae jiwae natokare da iji jiwae da; betari da iji da, ge katari da iji da,

*Nakare toregewasi, Bada.*

Jimbo bebegae embobo nakare imo tedi gera nakare giwasi Bada God; edo Ekalesia ito Katoliko begata dambudarari da gisi jiwasi;

*Bada, nakare giwasi, tedi gera.*

## LITANY

Singa ito Elizabeth, Queen edo Governor natokare jijimbedo ewasi goroba are, ae rorae beiamana de daedo imo tumondebain esira, edo kotopu esira;

*Bada, nakare giwasi, tedi gera.*

Dubo gisi jiwasi, kotembari, adu ari, edo karupa ari ito da sima natopo itaina, edo dasiga ari ae parara de ito matawa kakoa aina;

*Bada, nakare giwasi, tedi gera.*

Jijimbeteite toregewasi, edo itoro ika jiwae odare;

*Bada, nakare giwasi, tedi gera.*

Elizabeth Queen da ai, ae Philip, Edinburgh da Duke de, ae Charles, Wales da Prince de, ae embomai ainda jiwae beiamana ato kavigore;

*Bada, nakare giwasi, tedi gera.*

Bishop ae Priest ae Deacon jiwae de atopateite, Ge ito be kotembedo topo gido ore; edo ge tari de jimbo de matawa ango piaro gore;

*Bada, nakare giwasi, tedi gera.*

Katari Badarikadari, ae Dadariga jiwae de tonembari, dubo ewagaewa de ae gari de piawasi ombore;

*Bada, nakare giwasi, tedi gera.*

Government Badarikadari beiamana eite jijimbedo ewasi, edo kondade ewasi edo mina beiamana piore edo ge be sima edo ore;

*Bada, nakare giwasi, tedi gera.*

Teotopo ika jiwae beiamana eite jijimbedo ewasi;

*Bada, nakare giwasi, tedi gera.*

Dadautari, bega, ae umo jiri de oro be jiwae de piawasi;

*Bada, nakare giwasi, tedi gera.*

## LITANY

Ewasi, edo nakare imo karupa edo, adu edo, ge ito da ro tembarago are;

*Bada, nakare giwasi, tedo gera.*

Teotopo ika jiwae da tonembari ewasi bajina ore, edo ge ito gore edo kundo karupa ore, edo Asisi ve be aina.

*Bada, nakare giwasi, tedo gera.*

Embo jiwae bambae dumbae eora awa, edo kotembae dumbae eora awa, begata dambudarari da tekago kundo gumbuwas; i

*Bada, nakare giwasi, tedo gera.*

Embo petedo itera awa ewasi goroba ore; edo embo gadae eora awa do edo tonembewasi; edo embo dudurera awa jiwasi erore; edo amboda Satan tai natokare kambada piato dunaina;

*Bada, nakare giwasi, tedo gera.*

Embo jiwae aduari da, ta ro jipapa ari da, ta dubo beiae ari da toregedo, kondade edo, ato dubo damo are;

*Bada, nakare giwasi, tedo gera.*

Embo jiwae butu da ta ewa da tembudo eora awa, watou jijirigari, ae mamai babaingae jiwae sima ewasi; edo bundari embobo ae torora jiwae ainde do ewasi;

*Bada, nakare giwasi, tedo gera.*

Popoiwo ae rorigarori de, ae embo umo itae de, ae usimbese eora ainde jiwae toregedo undewasi;

*Bada, nakare giwasi, tedo gera.*

Embo jiwae do ewasi;

*Bada, nakare giwasi, tedo gera.*

Ito ro natokare, embo usimbese eite etetebotora awa buria ika kotembedo dodo, ainde dubo jiato wareregaina;

*Bada, nakare giwasi, tedo gera.*

Butu ve sima eite nakare piewasi ainde iji de indore;

*Bada, nakare giwasi, tedo gera.*

## LITANY

Dubo kotembari be namondekare piewasi, edo jimbo beiae jiwae natokare, domain ari, gae dumbae ari de kotembedo dowasi; edo Asisi Kotopu ito da tonembari mi namondekare piewasi ombore edo wareregedo purara Ge ito kotopu ang;

*Bada, nakare giwasi, tedo gera.*

God da Mai: nakare giwasi, tedo gera.

*God da Mai: nakare giwasi, tedo gera.*

God da Arini: nasi embobo da jimbo bebegae kupota awa;

*Bega ito nakare piewasi.*

God da Arini: nasi embobo da jimbo bebegae kupota awa;

*Nakare do ewasi.*

Keriso, nakare giwasi,

*Keriso, nakare giwasi.*

Bada, nakare do ewasi.

*Bada, nakare do ewasi.*

Keriso, nakare do ewasi.

*Keriso, nakare do ewasi.*

Bada, nakare do ewasi.

*Bada, nakare do ewasi.*

*Priest, embomai de daedo, Bada da Pari ajijigore.*

**M**AKA natokare, utu da isima eta awa, Dao ito kotopu etera; Basileia ito puresira; Jipapa ito etera awa; butu de utu de ang. Boroko edo iji da doae, rorae natokare piedo ewasi. Edo buria natokare kotembedo dowasi, Ango nakare embo nenei da buria natokare iai kotembedo doturora. Edo bawari da nakare kundo aimbote; Ko beiae da nakare toregewasi. Amen.

*Priest.* Bada, nakare mina eote beiae natokare angora.

*Mina tari.* Edo nakare mina piote ge jindari natokare angora.

## LITANY

Kaen benunu tana.

**G**OD, Mamo do kato, dubo beiae evira ainda ji, edo mamato eora ainda benunu beuto ae eota; do kato benunu natokare ito do da etera awa dubo beiae ari natokare da nakare usimbese era ango de kondade ewasi; edo nakare giwasi, edo itoro ari ango diabolos ae enembo natokare iai buro eora awa doworote, edo ito tamo beiamana ari mi evekara ewasi; edo nakare singabanga ito, beiae ro usimbese ain ae, edo Ekalesia ito kotopu da matawa ategedo ara; Iesu mi Keriso Bada natokare.

*Bada, erido, nakare kondade ewasi, edo nakare tore-gewasi Dao ito embo.*

God, dengoro nakakare mi gotera edo mamakamane nakare atopapositera, jimbo dave be dave ainda iji de eota awa, edo teka de.

*Bada, erido, nakare kondade ewasi, edo nakare tore-gewasi parara ito embo.*

Mamo de, Mai de, Asisi Kotopu de da iai: parara itesira.

*Mina tari.* Ango teka de: boroko, edo natopo itaina. Amen.

Itoro natokare da iai nakare jijimbewasi, Keriso.

*Mamato ari natokare umo dave jido jisi tu da ewasi.*

Do kato dubo beiae ari nakare giwasi.

*Do kato teotopo ito da buria kotembedo dowasi.*

Do edo benunu natokare giwasi.

*David da Mai, nakare do ewasi.*

Engo de eima ango nakare matawa gido ewasi, Keriso.

*Umo dave jido nakare giwasi, Keriso; umo dave jido nakare giwasi, Bada Keriso.*

*Priest.* Bada, do ito natokare iai ewasi gore.

*Mina tari.* Nakare imo tumo da eora ango de.

Kaen benunu tana.

**B**URAU mi tedo gotera, Mamao, imo do kato, siwari natokare giwasi; edo Dao ito ae parara de awa embo

## LITANY

jimbo beiae natokare da buria natokare iai gaedo kumbu; edo ewasi, dubo vevera ari natokare berari da, do ari ito akuta awa tumo jirore, edo ito iai jimbo fave kotopu da singa natopo edo imo dasiga ore; nakare Toregari Ge kato da be da, Iesu Keriso Bada natokare awa tedo. Amen.

BENUNU CHRYSOSTOM K. DA

**G**OD, Goroba jiwae, nakare toregeteto, boroko jisi ito da benunu inono de tetera; edo nakare teoto gotora edo embo tote ta tamonde ra mi Dao ito da doregeteri edo tedo gotora awa pietiesi; Boroko, Bada, singabanga ito jipapa edo tedo gotera awa piewasi ro kumbari tao de awa, edo iai ainda, ge ito kotembari namondekare piewasi, edo nasi da isipira awa, kavigari matawa itari. Amen.

2 Corinthians 13

**B**ADA Kaenato Iesu Keriso da tonembari, edo God da dubobari, edo Asisi Kotopu da dada utari, kaena berari da iai matawa itorote. Amen.

*Einda LITANY itae.*

## BENUNU DE ATEGARI DE ARI EVEKARA EMBO

*Chrysostom Kotopu da Benunu awa gisi ajigore, Litany da; edo Tumondebain ari Sipo de edo Turo de.*

### BENUNU

#### *Wa embo*

**G**OD, Mamo natokare, utu da ango, Mai ito mi Iesu Keriso embomai berari mi basileia ito de jimbo ito dave de kakoa eora awa be de teota, berari awamane da tamo mi jipapa eora awa ine mi plate tae; boroko wa jipapa era awa pie wotara, tedo gotera, butu da ji kumbaro dubo natokare damo ari, edo imo dasiga ore; Iesu mi Keriso Bada natokare. *Amen.*

#### *Iai atarate*

**B**ADA God Goroba jiwae, matu embomai da jimbo beiae embo dauma mi embo berari gidata, edo embo 8 akuta ato kavigewa, edo amboda do ari ito bajinanane matu tata iji nei de dauma mi ginain ae; Jimbo beiae natokare bajina gidò dauma piato wotare tae, edo gido dubo natokare be wareregeteira burau mi imo de tedo gotera, edo iai atari butu da be awamane da iji de kumbore, edo riroa ito nakare atopatari jimbo beiae natokare doware, edo imo dasiga ore do ito embo; Iesu Keriso mi Bada natokare. *Amen.*

#### *Beji da iji de*

**G**OD, Mamo utu topo, eoto wa woteuri butu be evira, sinopu mai egeuri, wo jigevira; Embo ito da mamato ari gi, imo tedo gotera; ko eoto beji boroko nakare apera, jimbo beiae natokare embo, itae ari, edo nakare rorae be are; Iesu Keriso Bada natokare embo, ainde, imo de Asisi Kotopu de daedo dasiga ae parara de natopo ara. *Amen.*

## BENUNU DE ATEGARI

### *Edo gido eizwa,*

**G**OD, Mamo do kato, Elisha peroveta da iji de Samaria beji kato awa ato rorae be ena; nakare do ewasi, edo nakare beiae ango riroa burora awa, natokare iai ango doware tae; Butu be da paira ito mi indewago e; edo inemi namondekare pie, edo nakare imo kando kato rorae natokare kundo jiore parara ito da, edo burau kondade aro nakare dubo damo are; Iesu Keriso mi Bada natokare. *Amen.*

### *Ito iji de*

**G**OD, Goroba jiwae, dariga berari da Daotari, edo berari da Gamana, goroba ito berari aimi ge tae, ika ito rare jimbo beiae embo mina riroa edo eta, edo awa-mane da dubo awara be wareregetevira awa do edo eta; nakare toregewasi, tedo gotera, gitopo natokare da ingo da; ainda iawa ari e siaka are, ainda dumo ari itae e, jipapa eora awa ge te; edo nakare kondade ari ito natokare giro ari, adu ari berari da nakare toregewasi, edo imo dasiga ore, imo be gaiari piari kato da be da; Mai ito ao dada ari embo, Iesu Keriso Bada natokare. *Amen.*

### *Ievi, ta karu bajina iji de*

**G**OD, Goroba jiwae, embo ito dumo da Moses ae Aaron de mi ge jindewa imo ae duduno de dubo vevera ari awamane da iai piato wotena; ko dariga David da iji de, embo 70,000 gauga mi itae ato beteiwo, ko embo nenei do edo, ato kavigewa; Nakare jimbo beiae embo mamato egeregari do ewasi, boroko karu bajina mi ae betari de mi nakare tamo da viviteira; matu rorou kundo, ko Anela gindari ge siteta, ko ango boroko, ambari siakabadae natokare iai inemi kumbu; Iesu Keriso mi Bada natokare. *Amen.*

*Ember Iji da, iji da doae tara, Buro Kotopu da torara awa embo*

**G**OD, Goroba jiwae, Mamao natokare utu da ango, Ekalesia Katolika ito piedo buriteta, Mai ito dubo bari da ororo dave mi; ae do ito jisi tu da edo gi, edo ango de singa ito, sinopu ito Bishop ae Sima ari natokare de, dubo pie garo edo badari ate, ango edo awamane ada iai



## BENUNU DE ATEGARI

da borae ingo ika pieriko, edo dubo embobo embo dave be sirigore, edo Ekelesia ito ainda Singa ari da singa ara. Edo awamane buro ari kotopu da buro ore, kondade ito de beiamana ari ito de utu da ango awa pie, ango edo ari de kiki de mi parara ito bedare, edo embo berari kavigari sia ore; Iesu Keriso mi Bada natokare. *Amen.*

*Edo gido eiwa,*

**G**OD, Goroba jiwae, rorae ewagaewa berari kando kato, imo ge jirido, Ekalesia ito buro evekara piteta; Embo berari Ekalesia ito da buro eiraro kondade ari pie, burau mi tedo gotera; edo kiki ito dave ainda do da pie be da ore, edo eato ainda jimbo dave ari, edo jisi ito da singa dave edo, Dao ito siakabadae dasiga edo, Ekalesia ito kotopu kondade ore; Iesu Keriso mi Bada natokare. *Amen.*

*Benunu eiwa ajigare tae benunu gisi pitera ambo da*

**G**OD, ari ito rare embo do matawa ate tae, edo jimbo natokare kotembedo dowate tae, benunu natokare kumbu; jimbo beiae natokare mi nakare bundesira, edo gido do ari ito bajina mi nakare undare tae; Iesu Keriso nakare Toregari ko natokare Ge kato ainda parara embo. *Amen.*

*Benunu embo berari embo tara, iji de Litany ajigae*

**G**OD, embo jiwae Ariembo, edo Ari kavigari, umo berari embo tedo gotera, ainda iai begata ito onjiga tate, ari kavigari ito oro be jiwae da iai. Ikana de Ekalesia Katoliko embo tedo gotera, edo Asisi beiamana ito ango ainda iai badari aina, edo embo jiwae ainda dao Kerisiana teora awa, ge be da begata da paposimene aimbara, edo kotembari jido bega kajigari da, edo jimbo paira da dada utara. Awara ta mamato egeregari embo tedo gotera, Maka natokare, dubo mi, ta tamo mi, edo atoto edo era, ainda iai beiamana ewasi; (\*ango de nenei boroko benunu natokare awamane embo tedo gotera), edo dubo damo ewasi, edo ainda mamato ari berari da tepo sima ara, edo gombu da toregewasi, edo dubo ewa are. Eiwa Iesu Keriso embo tedo gotera. *Amen.*

*\* Embo Doregari da Benunu jipapa eora ango de engo tara.*

## BENUNU DE ATEGARI

### ATEGARI

*Ategari embo berari embo*

**G**OD, Goroba jiwae, Mamo do jiwae ari kato, nakare Gambodani ito burau mi imo ategetera, imo natokare iai edo embo berari da iai beiamana matawa eteta awa. (\*Ango boroko embo nenei imo be ategetera, jimbo embo ainda iai esiteta awa), Esiteta, toregesita, beiamana berari pipi-tota, edo jimbo ito nei, nasi be jipapa eota, edo Iesu Keriso mi Bada natokare ato kavigewa, tonembari ainda jimbo pipitota, edo parara utu da teota awa. Tedo gotera, nakare doari ito be kotembara, edo do natokare be ategara, edo dasiga ito begara, begisi natokare mi, ango ae ari mi, engo edo nakare ito iai ambodani matawa ara, edo jisi ito da iji berari pepeta ara, edo be ito bara. Iesu Keriso Bada natokare awa ebo, ainda iai imo de Asisi Kotopu da iai parara de dasiga matawa itaina. *Amen.*

*\* Awamane embo matu benunu sitera awa ategari jipapa eora awa ango de engo tara.*

*Wa embo*

**G**OD, Mamo natokare utu topo, paira ito mi edo eta, Gedo duberi de tuvira de da wa wotedo eira, ko embo-mai embo ni be gaedo eira; Nakare burau mi imo de tedo gotera, jipapa eora ango, butu ito paembari da engo de wa pieteto wotesira, edo nakare singabanga ito burau awa eteto dubo natokare damo esira, edo Dao ito kotopu parara eteta; do ari ito mi Iesu Keriso Bada natokare da iai. *Amen.*

*Iai atarate tedo*

**B**ADA God, dembae wa jiwae pieteto wotesira ko jimbo beiae natokare embo rorou esiteta, edo boroko iai atesiri dubo natokare eteto damo esira; Dao ito kotopu dasiga cite parara era do ari ito eiwa embo, edo jimbo ito dave onjiga be de tara, umo iji da doae; Iesu Keriso mi Bada natokare. *Amen.*

## BENUNU DE ATEGARI

### *Rorae torari embo*

**M**AMO do kato, paira ito mi Ekalesia ito da benunu gotota, edo beji dodo rorae toresira; Burau mi imo ategetera paira ito eiwa embo; ko imo de tedo gotera do ito bajina ari, ko butu natokare da ji piari, edo nakare imo dasiga aro, dubo natokare damodamo are; Iesu Keriso mi Bada natokare. *Amen.*

### *Bega de Itoro de da iai Toregari embo*

**G**OD, Goroba jiwae, imo toregari dave singbanga ito da iai awamane da itoro da jisi da; Ito dasiga de ategari de imo de piera, nakare toregeteta adu ari babain mi natokare gadetera awa; Paira ito mi wo ango raro awamane da iai nakare pieri kae; awa ajigedo ko imo de tedo gotera paira ito natokare iai matawa isirari ko butu berari mi dubo ore, imo Ari kavigari natokare edo Toregari natokare; Iesu Keriso mi Bada natokare. *Amen.*

### *Bega nasi da tekago piari embo*

**G**OD, Imo natopo itari, Mamo natokare utu topo, embo oro da imo akuta ainda dubo dada eota awa, edo embo iawa kakato de duduno ari de ge teota; Dao ito kotopu beiamana era imo duduno ge jindari natokare iai ge tedo eta; ko nakare burau mi imo de tedo gotera, ko berari de kondade ari namondekare pie, edo boroko ta eimango nakare ge ito kotopu da pepeta edo ara; edo babain ango tepo itara, edo iji da doae jisi ito da ia natokare de ategari de ajigara, emo ari ito ewagaewa natokare iai embo; Iesu Keriso mi Bada natokare. *Amen.*

### *Ango de ievi ta karu babain itae arate*

**B**ADA God, dembae karu adu ari kato pieteto wotesira, Bedo nakare deteta jimbo beiae natokare embo, ko deteto ambera ge jindari natokare embo; ko boroko katari toropu da do ari kotembedo eta, edo asisi natokare betari da toregeteta; Nakare, asisi natokare ae tamo natokare de toregeteta awa imo Mamo natokare de piera, edo jisi ito da rorou wasiri de itare, edo do ari ito Ekalesia ito toropu da dasiga matawa eite karupa natopo ara; Iesu Keriso mi Bada natokare. *Amen.*

## BENUNU DE ATEGARI

### *Edo gido eiwa*

**J**ISI ito da onjiga tera, Mamo, Do ari embo, riroa mina berari ge da tevira awa awara natokare iai durare tae, nakare jimbo beiae natokare jiwae rare do natokare wawo-egesira; edo imo ae do ari ika jipapa eteto, nakare isira ango burau etera, karu natokare bajina ge teteta, nakare dembae esiri mamato etera, edo oro natokare da iai dubo ewa ari tekago piteta; Parara ito kotopu dasiga eite ategetera, edo Dao ito dave gadera, paira ito engo natokare iai awa embo; Iesu Keriso mi Bada natokare. *Amen.*

## PARI AE EPISTLE AE GE EWA TARI DE DAEDO, IJI BERARI TEORA AWA

*Giwo, Sunday da Pari, ta Iji kotopu ainda Vigil itevira ainda Pari Turo Tumondebain teka de torote.*

### ADVENT DA SUNDAY DA

*Pari*

**G**OD, Goroba jiwae, nakare kondade ewasi, edo munia da jimbo dodo parara da itoro ari ombara, boroko engo de, Iesu Keriso natokare iai atoto etega gumuna awa. Edo iji gombu da, ouwa giro edo parara edo gumaina wawasiri de bebetegari de katari embo, edo nakare kavigari matawa itari da erara, awa embo imo ae Asisi Kotopu de daedo boroko matawa isite dariga matawa evira. *Amen.*

*Pari eiwa Pari nenei de daedo Advent da torote, iji berari, edo Christmas da Turo teka da.*

*Epistle. Rom. 13. 8*

**A**NDa mina torove, tena dubo mina bara ewo. Embo adubo budo evira awa ge itae esira. Ko eiwa, A ipu da dowasi, Ango ato betore dowasi, Beono eote dowasi, Etetembote dowasi, Udo tepotapo eote dowasi, edo ge nenei itarete, dada edo ge borae teora, Nembu ito dubo buio imo ang. Dubo bari ainda usimbese ain ae; awa gido bari ge itae evira.

Edo eiwa, iji kotembotowa, ko boroko iji gumbira kaena aundo ruvegari da enanate; boroko kavigari kaenato atutumbesira, ang be kaen kotembotona ang ae. Munia itae eiri, iji atutumbeteira; awa tedo Munia da jimbo dodo, parara da itoro ari kaen omane. Kaen dave temane, iji de ang, osi da ae, dutari de ae, avitari ae, dono de da ae, duduno ae, dubo de ari de da ae. Tena Bada Keriso ombuwo, ko tamo gido sirigove ainda jipapa evira awa ain tedo.

## PARI AE EPISTLE AE GE EWA TARI

*Ge Ewa Tari. Matt. K. 21. 1*

**E**DO Jerusalem da atutumbedo Bethphage da gumbero Ejiri Olive da, Iesu ambodani ika tote etegedo sisina, Nasi da do itomane da do itomane da torido borae ass ragiragitana tuvewo, ae mai de da; udugewo nato iai kundo puwavi. Ko embomai tedo gari, engo tewo, Bada kumain jipapa eira; edo borae kundo piaina. Ko eiwa esitera peroveta mi tevira awa petugorote, tesiri,

Zion da gagara tawo garate,  
Gio, Daotari ito, ito iai isipira:  
Burai awa, ass da vivisisina,  
Ko ass mai.

Edo ambodani aundo Iesu tevira awa etera, edo ass ae mai de kundo gudo ainda gun da ainda woru jirido pietro anumbesisina. Edo jisi da jiwae ainda woru begata da besi jijiritera. Edo nenei ni patu judego kundo begata da jijiritera. Edo jisi gisi aundo edo amboda edo aoro gatedo sitera, Hosanna David da Mai da iai: Beiamana ainda, Bada da dao da gupevira awa; Hosanna ikane be. Edo Jerusalem da toriri nasi berari dada kore esitera, tedo, Emo averi? Edo jisi tetera, Eiwa peroveta Iesu Nazareth ang Galilee da.

Edo Iesu God da Tempela da torido ori egeregari embo piesiri idegesitera, edo money ori ari da tenemba wokiembesisina, edo gumbara ori eora ainda pumango ami; tedo sisina. Ove ena, Oro nato benunu orora dao tore, ko imomane tataimbari da бага to etewa.

### ADVENT DA SUNDAY TOTE

*Pari*

**B**ADA ewa, eteto edo Ove Kotopu berari ove eora, edo nakare gorota; kondade ewasi edo nakare dengoro mi gido, jisi mi gido, tedo, ajijigedo, do da kotembedo ara, ang edo ge ito kotopu dubo natokare damo aina, edo nakare kavigari matawa itari sima eiraro jinaina, ine mi pipitota awa, Ari erari mi Iesu Keriso. *Amen.*

## PARI AE EPISTLE AE GE EWA TARI

*Epistle. Rom. 15. 4*

**M**ATU gagurisina awa kaena piari ganate gagurisina, ko kaena ove gaiari da sima ari de ko dubo damo ari de sima edo ane tac. Sima ari de dubo damo ari de da God mi imondemane piesira edo da daima kotembewo Keriso Iesu ango; edo dubo itomane da mi ko be itomane da mi God Bada kaenato Iesu Keriso da Mamo awa parara awate. Awa tedo mina uda ewo, Keriso imomane ujisina ango God da parara da. Awara ta ko tena, Iesu Keriso oru esira, jugari da singa, God da ge be embo, edo matu ge tari mamono kaenato de matu ge sisina awa, ari goroba are tae; ko etene mi God parara ore tae ainda do ari embo; gagurevira awa ango,

Eiwa tedo Etene da iai imo de dasiga edo,  
Ko dao ito da iai ia tana.

Edo ge nei mi tedo sira,

Dubo itomane dave are, imomane Etene, ae ainda embo de daedo.

Ko nei,

God dasiga awo, Etene embo berari mi,  
Edo ewowo berari dasiga be ara.

Ko nei, Isaiah mi sisina,

Jesse da tai isirari  
Ko erari mi Etene da iai badari aina;  
Edo ami mi Etene sima ara.

Awara ta sima ari da God esira awa, ko dubo ewa ari de bega berari de asisi itomane be da are, kotembari itomane da, edo sima ari mi atoae awa, Asisi Kotopu da badari ari da.

*Ge Ewa Tari. Luke K. 21. 25*

**E**DO iwata iji da, kariga da, dabori da, nasi da jisijisi Evibado ari edo ewa beu ae iawata de ruvegedo; embo adu edo, edo nasi da gupeira awa sima edo jisivi betore; gido utu da goroba ari jipare. Edo ango de embo da Mai goteiari amo poraga da gumaina edo goroba ari ika de ae parara ika siakabadae de. Tena eiwa be edo aina,

## PARI AE EPISTLE AE GE EWA TARI

pangewo, edo kopuru ikamane jiwo erare; udegari itomane atutumbeteirare.

Edo parabole amindemane sisina, Tao giu, edo ni jiwae; boroko tuno jiveirare, giu goteiawo, edo inemane mi akuta gido ewa tuvira boroko aikae. Ango eiwa ari gawa, edo giu God da basileia aikae. Awara imondemane tena, Einda umo itae bamain ae, edo gisi jiwae mi ore, Utu ae butu de itae bambara, ra ta ge nato itae bamain ae.

## ADVENT DA SUNDAY TAMONDE

*Pari*

**B**ADA Iesu Keriso, gisi gumbata, edo singa ito dodomo tato aimuna edo imo iari sia arate; jimbo ito botu da ainda singabanga de sima egeregari de ango imo iari sia ara, edo ge jindedegari embo da dubo, embo ewa da dubo ari da wareregara. Awara ta tekago gumbato katari embo, nakare embo ewa ari ito jisi da tuata, imo Mamo ae Asisi Kotopu de daedo, God dakaki, matawa isite, Dariga matawa itari. *Amen.*

*Epistle. I Cor. 4. 1*

**E**MBO nakare kotemborote, nakare Keriso da singabanga rata, ko God da jimbo botuda da sima ari. Ko ae nei de daedo jipapa eora, ko sima ari mi moka arate. Ko nato iai siaka rata esira, awa inemane na katavi ra embomai na kataina; awara ta na akuta katae. Bekumba nato iai na gae; awa gido na ewa ae; na kateira Bada. Awa tedo ro gisi katove, ko Bada gundo ami munia da ari gae itari dambu bedari, ko dubo mi sitari awa piari gore, edo ango de embo daradara dasiga God da awa kumaina.

*Ge Ewa Tari. Matt. K. 11. 2*

**A**NGO edo John mi jimbura da Keriso da jimbo gido, Aambodani ika tote etega piedo sisina, Imo gupeira awa, ko eve sima era? Edo Iesu mi mina sisina, Aimbwo aundo dengoro mi gotowa awa, jisi mi gotowa awa John de tave; jisi akikiembari gotora, ko teisi dupasi egeregari pepeta era, tai koiara dave era, edo dengoro dududegari gotera, ko bebetegari jiri erurera, edo ato-

## PARI AE EPISTLE AE GE EWA TARI

tokatoto da iai Ge ewa tari atopapoteira. Ko awa ewa, durari nato iai mana tuaina.

Edo aimbero, edo Iesu jisi da John da ge tuturo esisina, Dumo da wotetewa ta ro geteu? Opema bisi mi jipeiri ta? Awa ae rata ro gain tedo wotetewa mi? Embora tamo woru gadae ombari awa ta? Gi, embomai tamo woru gadae ombari awa daotari da oro da itera. Ango ae rata nongain tedo woteteu? Peroveta gain? Awara imodemane tena, edo peroveta da daginegari. Eiriri eiwawa gagurisina awa,

Gi, dodomu naka ito jisi da piano bambarate,  
Edo iai tembari ito gisi ito da sirigarate.

## ADVENT DA SUNDAY IPA AO PASIDO

### *Pari*

**B**ADA, goroba ewasi (tedo gera), natokare iai puwasi, Bedo be toregewasi. Nakare jimbo beiae mi toreira, edo begata pipitota awa bambae dumbae eora ango gido goroba ito de do ari ito de burigiburigi tonembedo tore-gara, Mai ito Bada natokare ainda rorou embo, ouwa imo ae Asisi Kotopu de daedo ito iai parara de dasiga ari de matawa itara. *Amen.*

*Epistle. Philip. 4. 4.*

**B**ADA da iai dubo itomane ewa natopo ewo, edo iji Bnei de imomane tedo tena, Dubo itomane ewa ewo. Tamo paira itomane embo berari gorote. Bada atutumbeteira. Nomi imomane ari dubo beiae ain ae; ko ari berari da, pari mi ae benunu tari mi ategari de daedo, God da iai benunu tari itomane onjiga tawa. Ko God da bega embo mi mana gara, Keriso mi Iesu, do itomane de dubo itomane de sima aina.

*Ge Ewa Tari. John K. 1. 19*

**E**IWA John da onjiga tari, ango de Judaea mai Jerusa-lem awa priest de Levi embo de ainda iai etegedo atota orote site sitera, Imo averi? Ko onjiga sisina, bero ae; edo onjiga tedo sisina, Na Keriso ae. Ko atota edo sitera, Edo nongo ariri? Imo Elijah ri ta? Ko sisina, Na ae.

## PARI AE EPISTLE AE GE EWA TARI

Imo peroveta ri ta? Edo mina sisina, Aa. Awa tedo sitera, Imo averi? Ko nakare etegотора аинде мина тара. Ave dao tesi? Site sisina, Na embo dumo da dengoro baievira awa da ge, tevira, Bada da iairi jiwo dambudarare, Isaiah peroveta mi tevira ango. Edo awamane mi Pharisee da awa etegesitera. Edo atota eite sitera, Nongain tedo bapataito esi, ko imone Keriso aera, ko Elijah ae, ko peroveta ae? John mi amindemane mina sisina, Na un mi bapataito eona ta; itomane toropu da embo darowa awa petesira isira awa, nato ambo da gupeira awa, tai woru da asi na beiamana rare undeni. Eiwa esitera Bethany Jordan da beipa da, John bapataito esisina ainda.

BADA KAENATO KUPUSINA AINDA, TA KERISO DA IJI,

## CHRISTMAS IJI

TEORA AWA

### *Pari*

**G**OD, Goroba jiwae, Mai ito dakaima namondekare piato, tamo natokare omuna, edo ango de engo de Gagara Kakara mi kumuna. Ato nakare tekago wareregetera awa, edo undari mi ae kondade ari mi mamai ito esitera awa, iji da doae Asisi Kotopu mi kaviegari teka kumbara; dawa embo Bada natokare Iesu Keriso, imo de Asisi Kotopu da dawa аинде даедо, God dakaki isite, Dariga matawa itota. *Amen.*

*Epistle. Heb. 1. 1*

**G**OD, matu dembae mamono kaenato de iji jiwae edo Jimbo jiwae mi peroveta da be mi tena awa, boroko gombu da Mai mi tesira. Awa berari baiau bariembo edo, ami mi utu de butu de ena; awa ainda dasiga parara, edo ainda tamo asisi, edo ainda goroba ari da ge de berari jina awa, awa akuta rorae beiae embo teiari itai piedo, Badari da be da ikane isira awa anumena; awa anela

## PARI AE EPISTLE AE GE EWA TARI

daginegena, ainda baiau dao beiamana kumuna awamane  
ango ae. Anela ade naji tesira,

Imo Mai nato,  
Boroko imo kumena?

edo nei,

Na ainda iai Mamo ane,  
Edo awa nato iai Mai are?

Edo ango de Ao da tekago toriri, tesira, Edo anela berari  
ainda iai da tumondebain orote. Edo anela de ge tesiri,

Awa ainda anela asisi evira,  
Edo ainda kera ari niao gege evira;

Ko Mai de ge tesiri,

Anumbari ito, God natopo eira;  
Jimbo beiamana ketu, basileia ito da ketu.  
Jimbo beiamana karupa esiteta, edo rorae ge jinde-  
teta;

Awa tedo God, God ito,  
Dubo beiamana ainda gama mi imo datevira  
Otatawo ito ango ae.

Edo,

Imo, Bada, teka de butu da tutu pitera;  
Edo utu ipa ito da jimbo;  
Ami dowara; tena imo matawa itota;  
Edo ami berari mi wotewa orote woru ango,  
Edo apuregari ango ruata,  
Woru ango, edo kapetegari;  
Tena imo dawa,  
Edo iji ito domain ae.

*Ge Ewa Tari. John K. 1. 1*

**T**EKA de Ge mi isinesina, edo Ge amo God de daedo,  
edo Ge amo God. Amo teka de God ae dade.  
Berari amimi sinenembewa; edo awa itae ro ae sine-  
nembae. Sinenembewa awa ami wasiri de itevira; edo  
wasiri amo embo da parara. Edo parara munia de utata  
esira, edo munia goroba ae.

## PARI AE EPISTLE AE GE EWA TARI

Embo itevira, God mi tesiri gumbira; ainda dao John,  
amo garitutu ain tedo gumbira, parara garitutu ain tedo,  
ango edo embo berari ami mi ge be orote. Ami parara  
ae, ko gumbira parara garitutu ain tedo. Ouwa awa  
Parara be, embo berari datembedo evira, but da gupeira  
ami.

Amo butu da itevira, edo amimi butu sinenembewa,  
edo butu mi awa kotembae. Iai ikaito da gumbiri, edo  
ikaito mi kumbae. Tena awamane mi awa kupetera ami,  
amindemane bada ari piena God da mamai orote, aminde-  
mane ainda dao ge be eora ami: wowositera awa ororo mi  
ae, pisi da jipapa mi ae, embo da jipapa mi ae, rata God  
mi.

Edo Ge pisi de idegena, edo kaenato iai einisina (edo  
kaena ainda parara gotona, parara be Mamo da Mai ao  
da da parara) tonembari de ge be de atoae.

## STEPHEN KOTOPU DA IJI

*Pari*

**N**AMONDEKARE piewasi, Bada, mamato natokare  
de nasi cinda ge be da onjiga tari embo, utu da  
pangedo jisi mi eiraro jinaina edo kotembari mi parara  
badaina awa gido ara; Ango de Asisi Kotopu be da gido,  
usimbese ari dubo budo ewa ara. Garitutu ito gisi  
Stephen kotopu da kenatu ango, ainda dari ambari embo  
tedo pari tena ito iai, Iesu beiamana, God da be da petedo  
isite, berari imo embo mamato eiworo kondade edo eota,  
imo Kondade ari de Ga tari natokare dakaki. *Amen.*

*Engo de CHRISTMAS da Pari torote, edo iji berari de rata  
KERISO DA JUGARI da Turo teka da.*

*Epistle Embo. Ari. 7. 55*

**S**TEPHEN awa Asisi Kotopu be da enu, utu da pagi-  
sinesina, edo God da parara gosisina, edo Iesu awa God  
da ingo be da petedo isiri, edo sisina, Utu pirigesiri embo  
da Mai awa God da ingo be da petedo isiri gena. Ko ge  
bajina tedo aoro gatetero dengoro dujitera, ainda iai  
inono de inaka de tuputera; edo nasi da aungedo, detero

besisina. Edo garitutu mi woru ika pitera singa da tai da ainda dao Saul Ko Stephen doritera, edo God dao tedo sisina, Bada Iesu, asisi nato kumbu. Edo baongo dadari edo ko ge bajina tedo sisina, Bada eiwa jimbo beiae awa-mané da iai ajigote. Edo eiwa tedo aundo ruvegesisina.

*Ge Ewa Tari. Matt. K. 23. 34*

**A**WA tedo gi, peroveta, dubo embobo, edo ove egere-gari itomane iai nanemi etegetena; nenei dawoa-mbaro edo cross da dawo; ko nenei sunagogo itomane da vededo, ko nasi nei de nei de da awamane usimbési awo; itomane iai ororo dave berari nasi da averegetevira awa gumaina, teka de Abel jimbo dave embo da ororo, ongo de Barachiah da mai Zachariah da ororo iai kotopu de altar toropu da dawo betewa awa. Awara nane imonde-mane tena, berari eiwa umo ainda gumaina.

Jerusalem, Jerusalem, peroveta dorevira awa, ko ainda iai etegetevira awa dorevira awa! iji nandogo mamai ito sirigetení, be kokora mamai wasi du da sirigarago, ko dotewa! Edo gi, oro ikamane itomane iai dosiri andari. Nanemi imondemane tena, Na mana gawa boroko de amboda de, edo gido gisi tedo teu, Beiamana ouwa Bada da dao da gupevira awa.

## JOHN KOTOPU GE EWA TARI EMBO DA

IJI

*Pari*

**B**ADA doari embo, nakare tedo gotera, parara ito Butata awa Ekalesia ito da iai da parara aina, edo Aposetolo edo Ge ewa tari embo ito beiamana John Kotopu da dengoro baiari mi parara ari, awara da ge be ito parara ari de pepeta aina, ango edo amboda kavigari matawa itari da parara da vitaina; Iesu Keriso mi Bada natokare. *Amen.*

*Epistle. I John I. I*

**T**UTURO da isiuri, dengoro mi gotora awa, jisi nato-kare mi gotora awa, edo ingo natokare mi jijiora awa,

awa, kavigari da Ge mi, (ko kavigari idegesira edo nane-kare mi gera, edo nanekare mi onjiga teora, edo imonde-mane oru era, kavigari matawa itari awa, ae Mamo de daedo itevira awa, ko natokare iai idegetevira awa); jisi natokare mi gotora awa, ko dengoro mi gotora awa, ito-mane iai oru era; ko imomane iai oru era; ko imomane ango ae namondekare daedo kaen dada ane: dadautari kaenato ae Mamo de daedo ko ae ainda Mai Iesu Keriso de daedo itevira. Ko eiwa gagurera ko dubo ewa ari itomane petugarate awa tedo.

Ko oru eiwa ainda iai gotora awa itomane iai oru era, God parara rata, ko ainda iai munia itae. Kaen ae ainde daedo dadautena amone ge site, edo kaen munia da pepeta etena, ango kaen pitawa kakato, edo ge be kaen edo ae; tena parara da kaen temane, ami parara da itevira ango, ango edo kaen dada be eona, edo Iesu ainda Mai da ororo jimbo mi beiae berari kaena ewa evira. Kaen jimbo beiae kaenato iai itae ge tetena amo, kaen pitawa akuta tetena, ge be kaenato iai itae. Jimbo beiae kaenato onjiga tane, awara ta ko amo ge be kato rata dave, edo jimbo beiae kaenato kotembedo dowari, edo bebegae berari da ango kaena ari dave ana. Kaen jimbo beiae ae ge tano, amo kaen dao pitawa kato tetena, edo ainda ge kaenato iai itae.

*Ge Ewa Tari. John K. 21. 19*

**J**ESU mi Peter de sisina, Nato amboda amboda e. Peter overegedo ambodani Iesu dubo burevira awa gosisina, amboda amboda eiri, ouwa turo indari da ainda dubo da detegedo sisina, Bada indawara mi imo onjiga siri? Awa tedo Peter mi gido Iesu de sisina, Bada, edo embo emo nongo aini? Iesu mi ainde sisina, Jipapa ano sima eirari gumana, amo imo rori? Imo na amboda amboda e. Awa tedo ge eiwa nanonameji da iai wowo-sisina, ambodani emo mana betaina; edo gido Iesu mi tae, amo mana betaina; ko, Jipapa ano sima eirari gumana, amo imo rori? Ambodani emone ari eiwa bedeira, ko ari eiwa ove gaena; edo nakare kotembatora ainda bedari ge be. Edo ari jiwae nenei Iesu mi esisina, awamane itae gaiore tae, na be butu book gaiaro be da esira.



*Pari*

**G**OD, Goroba jiwae, amibebada da be da goroba ari esiteta, edo mamain siaka betetero eteto imo dasiga esitera; rorae bebegae berari nakare do da ato betara, edo tonembari ito mi ato goroba ara, ango de rorae beiamana edo, edo kotembari mi betara da, Dao ito kotopu dasiga ara, Iesu Keriso mi Bada natokare. *Amen.*

*Epistle Embo. Revelation 14. 1*

**K**O nane mi gena, gi, Arini jiri Sion da petesira, edo Kouwa ainde daedo 144,000, edo awamane da beo da ainda dao, edo ainda Mamo da dao gaewa. Ko ge utu da ango gena, be un jiwae da beu inge, ko be. dunana siakabadae da ge inge; ko ge gena awa be kitara tari da ge kitara eora ango; ko be ia teka inge anumbari do da tera, edo wo wasiri de da do da, edo embo ewokawo; ko ai mi ia amo gae rata ko 144,000 butu da ango toregotora awa. Eiwamane amo ae maingagara de dono ae rata; ta kakara awamane; amo Arini da amboda amboda eora berari da auntevira awa. Eiwamane embomai da iai piedo kuputera God ae Arini da gitago. Edo awamane da be da pitawa tuwae, ko awamane da jimbo beiae itae.

*Ge Ewa Tari. Matt. K. 2. 13*

**A**NGO edo aunsitera, ko gi, Bada da anela Joseph da Aiai idegedo aturo de sisina, Erido mai awa ae ai de kundo, Egypt da tumbu, edo ounda isirato tano gata; Herod mai kakoa ai eira ginain tedo. Edo erido mai ae ai de kundo, Egypt da aunsisina, edo ounda isinesina Herod da betari iji da; edo Bada mi peroveta da be mi tevira awa are tae sisina, Egypt da ango mai nato dao site tetena. Ango de Herod gido dubo embobo awa gadu-besitera edo duduno siaka ae edo etegesiri aundo mamai jianda berari Bethlehem da ainde ko tano ika ito da ito-  
ra awa detero aputera jienda ika tote da amboda, iji ango dubo embobo da iai be kotembetevira awa. Ango de Jeremiah peroveta mi tevira awa ore tae sisina,

Ge Ramah da gira  
Ji de ia bajina de  
Rachel mi mamai embo ji tevira;  
Ko dubo damo ari dosira, awamane itae gido.

SUNDAY DA CHRISTMAS AMBODA

*Pari*

**G**OD, Goroba jiwae, Mai ito dakaima namondekare Gpiato, tamo natokare omuna, edo ango de engo de Gagara Kakara mi kumuna. Ato nakare tekago warere-getera awa, edo undari mi ae kondade ari mi mamai ito esitera awa, iji da doae Asisi Kotopu mi kaviegari teka kumbara; dawa embo Bada natokare Iesu Keriso, imo de Asisi Kotopu da dawa ainde daedo, God dakaki isite, Dariga matawa itota. *Amen.*

*Epistle. Gal. 4. 1*

**N**ANE tena, ango de baiiau kumbari kato mai siaka Nevira, amo eve ae rata singa ango, awara ta berari da badari amo; edo uma egeregari de oro sima ari de da be burevira, ango de awa ainda mamoi mi oru evira awa. Kaena ango, ango de kaena mai babaingae eite kaena butu tutu da iai singa esitena. Edo iji itae esira ango de God mi ainda Mai etegesira wowosisina, eutu mi kupusina awa, ge da badari ari da kupevira awa, ko awamane ge da badari ari da itora awa piedo barate, edo kaena ainda mamai anate. Ko imomane mamai gido, awa embo God mi ainda Mai da Asisi dubo itomane da etegesisina, edo dao tedo site Abba, Mamo. Awara ta imo boroko singa ae, ae rata mai mi; ko mai, ango edo baiiau kumbari God mi.

*Ge Ewa Tari. Matt. K. 1. 18*

**J**ESU Keriso da kumbari engo. Ainda ai Mary awa Joseph de gerewa, ko amo ae da de itae, ko amo watou de Asisi Kotopu mi tuvisina. Edo Joseph, ainda iu, amo jimbo dave embo ko embo da jisi da ari jipapa ae, edo gae etegari jipapa esisina. Eiwa dubo mi sisina, ko gi, Bada da anela aturo da ainda iai bededo sisina, Joseph,

## PARI AE EPISTLE AE GE EWA TARI

imo David da mai, aro ito Mary ito iai kumbari adu eote; awa watou jijievira amo Asisi Kotopu mi. Edo ainda mai jianda kumaina; edo, ainda dao Iesu tata; edo amo ainda embo ainda jimbo beiae da ari kaviegore. Berari eiwa sisina, edo Bada peroveta mi tevira awa ore tae, sisina,

Gi, kakara mi watou jirido mai jianda kumaina,

Edo ainda dao immanuel tara,

amo teora, God kaenato iai. Edo Joseph aundo ruvegedo erido Bada da anela mi tevira awa angó esisina, edo aro ika ainda iai kupusina; ko ae da de awae edo ainda mai jianda kupusina; edo ainda dao Iesu sisina.

## KERISO DA JUGARI

*Pari*

**G**OD, Goroba jiwae, eteto Mai ito beiamana tamo jugewa edo ge beburevira embomai embo: namondekare piewasi Asisi mi be jugore; edo dubo natokare de ipatai natokare berari de bawari nasi de pisi de mi bavevira awa doworo, edo nakare ge ito dave be matawa budo ara; Mai ito mi dakaki Iesu Keriso Bada natokare. *Amen.*

*Epistle. Rom. 4. 8*

**D**AVE embore ainda iai Bada mi jimbo beiae mana ajigaina. Eiwa beiamana ari embo jugotora awa akuta da iai, ta embo jugae de da iai agori? Kaen teona, Abraham da iai kotembari ika dave ari ajigesisina. Ko nomi ajige sisina? Ango de jugewa, ta jugae ta? Ango de jugewa ae, rata angó jugae. Ko jugari kariwa kupusina, kotembari de dave ari da kariwa jugae angó de kotembetevira awa; edo kotembari berari da iai mamó arate jugae de rata, edo awamane angó dave tore tae; ko jugari awa ainda mamó arate, awara jugotora awa, edo awamane de daedo mamó kaenato Abraham, angó de jugae de da kotembari da dero da pepeta eite auntera. Awara ta matu tari Abraham da iai da ta tegi ika da iai da, ko butu ainda baiáu kumbore tae, Ge mi ae rata

## PARI AE EPISTLE AE GE EWA TARI

kotembari da jimbo dave mi. Ge embomai awa, ouwaa-mané baiáu kumbari itore tae, angó edo kotembari tepo esira, ko ge matu tari be edo ae esira.

*Ge Ewa Tari. Luke K. 2. 15*

**A**NGO edo anela awamane dodo utu da bambera, edo Asheep undari mi tari berari sitera, Engo de kaen Bethlehem da bamane, edo rorae evira awa kaen gane, Bada mi tesira gositenane. Edo burigiburigi gundo Mary ae Joseph de tuvitera, edo maine sinopu da indari da avevira awa. Edo gido sitera, mai emone ge tevira awa. Edo embo jiwae gere sheep undari mi teoro gotora awa kore esitera. Edo Mary ba teora awa sima esisina dubo da kotembedo. Edo sheep undari mi tekago baundo God dasiga esitera jiwae teuri gotora awa edo jisi mi gotora awa embo, egora tevira awa.

Edo iji 8 itae awa jugari, ainda dao sitera IESU, anela mi tevira awa amo sini da watou jirae isiri.

## EPIPHANY

*Pari*

**G**OD, dabori begata gisi esiri Mai ito dakaki etene da Giai karigesiteta, nakare kotembari mi imo kotembotora awa, kaviegari eiwa amboda imo God birikoku de be kotembara; Iesu Keriso mi Bada natokare. *Amen.*

*Epistle. Eph. 3.1*

**E**IWA tedo na Paul, imomane etene embomai embo Iesu Keriso ainda bundarimai, God da kondade ari da oru gotovi ta, imomane embo namonde pievira; Bedari mi ge botuda namonde pieuri gotona, angó matu ge tote gaguritena awa; ko eiwa ajijigewo, edo kotembari nato Keriso da ge botuda da gave; amo umo nenei da embo da mamai da iai bedae, ko boroko Asisi mi bedesira ainda aposetolo de peroveta kokotopu da iai; engo rare etene baiáu kumbari angó orote, edo tamo dakaki edo awamane tari gari Iesu Keriso mi, evanelia mi kumborote; ami mi na singa eona, God da kondade ari ainda piari mi namonde pievira awa angó de, ainda goroba ari de. Na,

## PARI AE EPISTLE AE GE EWA TARI

embo kokotopu berari da jisi da na siaka baingae, ra ta ko kondade ari namonde piesra, edo etene da iai Keriso da rorae embo mi kakoa gain etera, nane dengoro baianate; edo berari piano getera ge botuda ainda sima ari rora mi umo berari de God da iai onjijigotora awa, ami berari evira awa; ko God ainda dubo ari boroko dadariga de babadegari de iai utu da ango, Ekalesia de gore tae, tedo katari tutu da ango tedo katedo evira awa Keriso mi Iesu Bada kaenato; ami mi jiro kaenato dambu darari edo ainda iai kotembari kaenato mi kaen atutumbedo ena.

*Ge Ewa Tari. Matt. K. 2. 1*

**A**NGO de Iesu Bethlehem Judaea da kupusina Herod daotari da iji da, edo gi, embo dubo embobo tawari kena ami Jerusalem da gundo sitera, Amo inda kumbiri Judaea mai da Daotari? Ainda dabori tawari kena da gera, edo gumbera ainda do da tumondebain ai. Edo Herod daotari giri dubo vevera esisina, edo Jerusalem berari ainde daedo. Edo priest babain de ae embo ove egeregari de tesiri gupetera, edo atota esisina Keriso nonda kumbare tae. Ko sitera, Bethlehem Judaea da; ango peroveta mi ove edo sisina,

Ko imo Bethlehem, butu Judaea, nomi imo siaka-baingae ae Judah da dadariga da iai.

Imo ami mi Governor idegaina

Edo ami embomai nato Israel da iai badari aina.

Ango de Herod dubo embo dao gae tesiri edo amindemane awa be tedo gosisina dabori idegesisina ainda iji. Edo Bethlehem da etegedo sisina, Aimbuwo aundo mai kakoa be edo; tuvedo, gido, na oru awo, edo na ango gundo ainda do da tumondebain ane. Edo daotari awa gido, aunsitera; edo gi, dabori tawari kena da gositera awa, ainda do da aundo gupusina mando mai isiri ainda eno da peposisina. Edo awamane dabori goteri dubo dave esitera. Edo mando da torido mai gositera ae ainda ae Mary de daedo; edo durudo ainda do da tumondebain esitera, edo mana pirigedo rorae pietera, gold de, doino de, mura de. Edo God mi aturo de sisina tekago Herod da iai aimbore kae, tesiri begata eve da aunsitera nasi ika da.

## PARI AE EPISTLE AE GE EWA TARI

### SUNDAY DA EPIPHANY AMBODA

*Pari*

**B**ADA, tedo gotera, nakare do edo, embo ito dao teora Baina pari dengoro mi gido ewasi; edo piewasi orote awa kotembedo gore, ango edo kondade ewasi goroba edo ango ore; Iesu Keriso mi Bada natokare. *Amen.*

*Epistle. Rom. 12. 1*

**A**WA tedo tedo gotena, nanonameji nato, God da do ari Embo, ko tamo itomane piawa rorou wasiri de, kotpup, God da jisi da dubo ewa ari, awa buro itomane sia be ari. Edo imomane umo eiwa ango itove; ta dubo itomane teka mi wareregewo, edo God mi jipapa evira awa kotembedo gawo dave are, awa dave, dubo ewa ari rata sia be ari. Edo kondade ari mi namonde pievira awa, embo berari baami imondemane tena, ko imomane iawa akuta eove, amo dave ae; rata dubo embo ari mi akuta kotembewo, God kotembari tega embo baami de pievira ango. Ko tamo dakaki kaenato iai, rata patu indewa, ko papatu berari da buro da dawa ae; kaena ango, kaena berari, Keriso mi tamo dakaki, edo daradara patu mina ara edo ane tae.

*Ge Ewa Tari. Luke K. 2. 41*

**E**DO ai mamode Jerusalem da bauntora, jienda berari, Ebondo Darutegari da. Edo ainda jienda 12 ango de vivisitera, bondo da jimbo ango; edo iji itae, esiri tekago guputera, edo maine Iesu Jerusalem da amboda isiri, embo ikaito mi kotembae; edo be jisi ikaito da itarago, edo iji da teputera; edo jisi ikaito embo mi ae kotembotora awa ainda iai kakoa esitera; edo awa tuwae, edo gido egembedo Jerusalem gundo kakoa esitera. Ango edo iji ika tote da gagane de Tempela da tuvitera, atopapasigari toropu da anumbedo isite goteite tedo katedo eite isiri; edo embo jiwae gotora awa kore esitera amo dubo jiwae rare edo mina ro tarago esisina. Edo ami awa goteite kore esitera; edo ai mi ainde sisina, Mai, nongain tedo natokare iai ango etesi? Na ae mamode dubo beiae esiri imo kakoa etera. Edo amindemane sisina, Nongain

## PARI AE EPISTLE AE GE EWA TARI

tedo na kakoa eteu? Gotovi ta gaeri, na Maka da jimbo da itanate? Edo ge tevira amo gaera. Edo awamane de daedo wotedo Nazareth da guputera; edo ge da gido; edo ainda ai ge eiwa jiwae dubo da kotembesisina.

Edo Iesu dubo da ae tamo da de bajido esisina, edo God jisi da ae enembo jisi da de dubo beiamana eora.

## SUNDAY TOTE EPIPHANY AMBODA

*Pari*

**G**OD, Goroba jiwae, matawa isite, berari utu da ainde, Gbutu da ainde gisi jijiota; do edo embo ito da benunu giwasi; edo bega ito iji berari namondekare piewasi; Iesu Keriso mi Bada natokare. *Amen.*

*Epistle. Rom. 12. 6*

**A**NGO edo kondade ari kaenamonde pievira awa angoo, edo rorae evekara, ko peroveta, kotembari da tega angoo peroveta anate: edo singa, be singa anate; edo piari gari awa, be piari garate; edo dengoro baiari ge tari mi, baiari be tarate: edo piari ge, kando edo piarate; badari mi, inaka de arate; do ari embo da dubo edopa arate. Dubo bari amo pitawa de daedo isieuri. Beiae dowo; edo dave jido takimbewo. Nanonameji dubo bari mi dubo mina bara ewo; dasiga ari mi embo nenei imomane daginegore ta; inaka de ewo edo imomane beowo jisi eove; asisi itomane vevera arate; Bada da iai singa ewo; sima ari da dubo itomane dave are; edo mamato ari da sima eite; pari natopo tewo: kokotopu mi jipapa eora awa picwo; embo nei undewo; Usimbesei egeregari awa beiamana ewo; ewa ewo ko usimbesei eove. Awamane dubo ikaito ewa eora ainde daedo dubo itomane dave ewo; ji teora ainde daedo ji tewo. Imomane berari dubo itomane dakaki edo isiwo. Ari botu da dubo itomane iawa eu, ta ari burau ambo ambo ewo.

*Ge Ewa Tari. John K. 2. 1*

**I**Ji tamonde de Cana Galilee da jipusina; edo Iesu da ai Iounda isinesina; edo Iesu dao sitera, edo singa ika, rorou da. Edo wine itae esira, Iesu da ai mi ainde sisina,

## PARI AE EPISTLE AE GE EWA TARI

Ainda wine itae esira. Edo Iesu sisina, Eutu, nagenatote nongonongo ani? Iji nato gumbae. Ainda ai mi singabanga de sisina, Ro itomane iai tari gido, awa ewavi. Edo gi ounda pisina sigi ganuma mi 6, Judaea embo da jimbo angoo, amindamane da tega tote ta tamonde daradara. Iesu mi amindamane sisina, Sigi un mi nukewo. Edo nuketero be da esisina. Edo sisina, Borae jimundo bondo tutu da iai kundo aimbuwavi. Edo kundo aunsitera. Edo bondo tutu mi un wine jindevira awa injido gido, idago ra mi darisina, (edo singabanga mi jipora awa kotembesitera) bondo tutu mi teka jimbari jianda awa dao tedo, sisina, Embomai berari wine dave ainda gisi da piera; ko embo be indara edo amboda awa beiae; imo wine dave toreteta awa boroko kundo gumbeta. Eiwa ainda kariwa dakaki Iesu Cana Galilee da esisina, edo ainda parara esiri bedesiri; edo singa ika mi kotembesitera.

## SUNDAY 3 EPIPHANY AMBODA

*Pari*

**G**OD, Goroba jiwae, matawa isite, do edo siwari natokare jisi kambe da edo giwasi; edo angoo de mamato eiraro ipa be awa kaioio edo toregewasi; Iesu Keriso mi Bada natokare. *Amen.*

*Epistle Rom. 12. 16*

**I**MOMANE iawa siaka ae eove. Avera mi beiae gido Imina usimbesei eove. Kotembewo edo ari dasiga ari berari da jisi da ewo. Esiri ta ai ae ri, inakade ewo edo embo berari de daedo bega bave. Dubo babarigari, mina aro riroa buwove, edo duduno awa daginegewo; gaesirare, Bada mi tevira, Riroa nakanato; nane rorou ana. Ko itoro ito beji ambari, udewasi; un udoeiri gido, tu piato inaina; eiwa eio, niao mundu ainda kopuru da dada eio. Beiae nongain be gaieiko, tena beiae dave mi be gaiate.

*Ge Ewa Tari. Matt. K. 8. 1*

**E**DO angoo de jiri da angoo awa wowoteiri jisi siakabadae Emi amboambo esitera. Ko gi, tai koiara ainda iai

gundo do da tumondebain edo sisina, Bada, jipapa edo ato dave etena awa. Edo ingo kaioio edo tu jido sisina, Jipapa ena, dave e. Edo borae tai koiara ika dave esisina. Edo Iesu mi sisina, Ko gidogido ande tesiko; ko aundo, priest de tamo ito piato gore, edo piari Moses mi tevira awa pieio, amindamane da kariwa.

Edo ango de Capernaum da toriri kenturion ainda iai gundo benunu sisina, Bada, singa nato oro da aveira baoro bundari isimbesi be ari. Edo sisina, Aundo ano kaviegaina. Edo kenturion mi mina sisina, Bada, na ewara mi eno nato du da puresi ko ta; edo ge tepo tato singa nato kaviegare. Ko na badari da iai itena, ko nato iai itoro embobo itera; edo embo eiwa, Aimbu, teono, auntevira; edo nei, Puratate, teono, edo isipevira; edo singa nato, Eiwa e, teono, ko edo evira. Ko Iesu mi gido kore esisina, edo awamane amboambo eora amindemane sisina, Imondemane tena awara, kotembari ewowo engo tuwae eona ta, Israel da. Edo imondemane tena, Jiwaie tawari da ango, edo indari da ango gundo Abraham ae Isaac ae Jacob de daedo anumbara utu basileia da; ko basileia da mamai piaro munia da wotorote, ounde ji site ji boravegae site. Edo Iesu kenturion de site tesira, Bambu; kotembeteta awa ango ito iai arate. Edo singa ainda iji da esiri kaviegesisina.

## SUNDAY 4 EPIPHANY AMBODA

*Pari*

**G**OD, gotota adu ari indewakandewa rata bajina da do da pietero itora, ango de nakare burau iji berari dambudarari mana petara, ato goroba aro, adu ari berari da toregeyasi, edo bawari berari de be kumbuwas; Iesu Keriso mi Bada natokare. *Amen.*

*Epistle Rom. 13. 1*

**E**MBOMAI berari badari babain kera ore tae; ko badari Eari itae rata God mi; God mi babadegari oru esira. Awa tedo ai mi badari ari ge tevira awa, God da oru ari ge tevira; edo ge teora awa awamane da iai riroa kupara. Ko babadegari jimbo dave da iai adu ari ae rata jimbo beiae da iai. Jipapa esi ta, badari imo adu ai ae ra?

Dave ewasi, edo ami mi dasiga ari kumbate; awa God da singa ito iai dave awa tedo. Beiae edo, adu e; kasiwo kumbari darae; awa God da singa duduno ari de riroa mina kumbari jimbo beiae embo da iai. Awa tedo kera edopa ewo, duduno ari mi awa tedo, dubo itomane damo arate daedo. Awa tedo rorou de daedo piewa; Ko ouwamane God da singabanga, ko ari eiwa sima natopo eora. Embo berari de ainda rorou pieu; rorou ami rorou are tae; ombari ouwa ombari kumbare tae; adu ari ainde adu ore tae; dasiga ari ainde dasiga ore tae.

*Ge Ewa Tari. Matt. K. 8. 23*

**E**DO ma da sisirisina, edo ainda ambodani ambo da iawata mi apuregesitera, ko ami jitao aveiri. Edo ainda iai gundo ao udedo sitera, Toregewasi, Bada, nakare betain etera. Edo amindemane sisina, Imomane nongain adu eu, imomane kotembari siaka? Ango de erido, bisi de un de ge tesiri, binono dorisina. Ko embo kore esitera, tedo, Omo avera mi, bisi ae ung de kera eri?

Edo beipa nei da gumbiri Gadara mai da butu da, embo tote daimona itora ainda utotoru esitera embake jisi da wowositera awa, goroba jiwaie, ango de embo begata ainda aimbae. Edo gi, daositera, Nanekare imokena nogo ari, God da Mai, einda gundo ato be de mamato ari ta? Awara ta da aikamana pu jiwaie dada doregedo isite undero. Edo daimona mi ainde tedo gositera, tedo, Piato wotaro, tato pu da jisi da torara. Edo sisina, Bambuwo. Edo wotedo pu da do da totoritera. Edo gi, jisi matawa bengi da tumundo, ubutu da wotedo un da besitera. Edo undora ami adu edo nasi da aundo berari tetero gositera edo daimona mi itora ainda esisina awa. Edo gi, nasi berari wotedo Iesu utotoru esitera; edo awa gido, taro gano ikaito dodo aimbare tae.

## SUNDAY 5 EPIPHANY AMBODA

*Pari*

**B**ADA, tedo gotera Ekalesia ito ae oro be ito kiki be ito da toregeyasi; ango de tonembari ito utu topo da

detegotore awa goroba ari ito mi toregaina; Iesu Keriso mi Bada natokare. *Amen.*

*Epistle Col. 3. 12*

**A**WA tedo, God da sirigari ango, kokotopu mi rata dubo babarigari mi dubo do ari tamo dave ari, piari akuta wotari, burau ari, nupe ari ombuwo; sima dave mina ari eu, edo ambo nei da iai buria itare tae, kotembedo dodo mina ari eu; Bada mi jimbo beiae itomane kotembedo doturevira ango, imomane ango ewavi: edo berari eiwa da daginegari, dubo bari ombu, sia ari da kajigari. Edo Keriso da bega dubo itomane da iai badari are, ainda iai imomane daotetera, tamo da dakaki; edo ategewo. Keriso da ge do itomane da dave itare tae, dubo indewa berari da; mina atopasido edo mina dengoro baiaw, psalm mi, hymn, ia asisi da ami, edo God da iai ia teu, edo tone-mbari dubo itomane da itare. Edo ari rora eowa awa, ge mi ta ari mi, berari Bada Iesu da dao da ewo, edo God Mamo ami mi ategewavi.

*Ge Ewa Tari. Matt. K. 13. 24*

**P**ARABOLE nei awamane da do da bededo sisina; Basileia utu da amo be embo mi ve dave buro ikaito da urisina; edo avero; ko ainda itoro gundo wheat idapu awa indari wheat toropu da uredo, dodo aunsisina. Edo ango de be gaiedo be esisina, idapu wheat idegesisina. Edo oro tutu da singabanga gundo ainde sitera, Bada, ve dave amo buro da uretesi ta? ainda idapu wheat mo idagari? Edo sisina, Ito mi emo eiara. Edo singabanga mi ainde sitera, Imo nanekare aundo vive orote jipapa esi ta? Ko sisina, Aa; ango de wheat idapu awa vive eite, ko ae indari wheat de utawa; daedo dadaima erore sirigari da, edo sirigari de sirigari embo de tano, Gisi idapu wheat awa utedo sidedo niao da dungedo, ko indari wheat awa koara nato da sirigeu.

## SUNDAY 6 EPIPHANY AMBODA

*Pari*

**G**OD, Mai ito ewa idegena, diabololo da jimbo usimbese Gain tedo, edo nakare God da mamain ain tedo, edo

kaviegari matawa itari namondekare piain tedo; Tedo gotera piawasi, edo eiwa sima edo, nakare edo beiamana ara, awa beiamana ango; ango de engo de tekago goroba edo parara de idegaina, nakare awa ango ara, ainda basileia matawa itari da, ongo de imo ae da de Mamo, edo imo ae da de Asisi Kotopu, wasiri de gisi jijjowa, God dakaima natopo. *Amen.*

*Epistle. 1 John K. 3. 1*

**D**UBO bari rora Mamo mi kaenamonde pisina awa giu, edo God da mamai tare tae; edo ango kaen eona. Eiwa gido butu kaena kotembae, awa kotembae evira awa tedo. Dubo babarigari, boroko kaena God da mamai, ko kaena amboda ro eteni mana boroko idegesira; kaen gotona awa bedari re edo kaena awa ango etena: awa kaen dambu da gana. Edo embo berari ami engo sima eora amo, ewa akuta eora ami dave evira ango. Embo berari jimbo beiae eora amo, awamane ge jindora; ko jimbo beiae amo ge jindari. Ko giu awa bedena jimbo beiae kumain tedo; edo ainda iai jimbo beiae itae. Berari ainda doda isima era awa, jimbo beiae ae eora; embo berari ainda jimbo beiae ami jisi mi gae rata kotembae eora. Iarata, ai mi imomane etetema: ae; jimbo dave evira amo, embo beiamana, ouwa beiamana ango; jimbo beiae evira amo, binei de; binei mi tutu mi ainda jimbo beiae esira. Eiwa tedo God da Mai bedena, edo binei da ari gidare tae.

*Ge Ewa Tari. Matt. 24. 23*

**A**NGO edo embo mi imondemane tedo taro, Gi, Keriso ainda, ta, Evire, kotembove. Keriso pitawa kakato de peroveta pitawa kakato de mi erido, ko kariwa de kore ari babain piaro gore: ko sirigari etetembedo gain. Gi, imondemane be edo tetena. Awa tedo tara, Gi, amo dumo da ra ta; ko imomane wotove. Edo, Gi, amo oro doda, ko imomane ge be eove. Be tawari da ango utu birigi euri ko indari da gotora, ango embo da Mai da iari. Embake isima eira, ounda kisikisi doregara.

Edo iji dakaki de engo de iji awamane da dubo vevera amboda, iji munia ari, ko kariga ami ainda utata mana



## PARI AE EPISTLE AE GE EWA TARI

piaina, edo dabori utu da tokaro, ko utu da goroba jipe-gari; edo ango de embo da Mai da kariwa utu da bedaina; edo ango de butu da ewowo berari ji site, embo da Mai gara utu poraga gupeira awa ae goroba de ae parara de siakabadae de. Edo anela ika etegaina to da ge bajina de, edo sirigari ika bisi da ango nei tote nei tote dada aina, iji tutu da ango da gombu da.

## SUNDAY SEPTUAGESIMA TEORITA

*Pari*

**B**ADA, tedo gotera, embo ito da benunu dengoro mi Bgiwasi; edo jimbo beiae natokare embo mina eteta, ko imo beiamana, edo nakare do edo toregewasi, Dao ito parara awa embo; Iesu Keriso mi Ari Erari natokare, imo de Asisi Kotopu de daedo God dakaki isite, Dariga matawa itota. *Amen.*

*Epistle. 1 Cor. 9. 24*

**G**OTOVI ta, ko awamane ainto tupera awa berari mi tupera, edo dakaki mi rorou bureira? Ango tumundo, kumbuwavi. Edo berari teteia da inaka de eora awa berari de ge akuta teora. Awamane crown itarago ari awa kumbore tae, ko kaena crown natopo itari. Awa tedo tumena gaegae ango ae; na itoro ena, ko bisi na ango dae; rata tamo nato donena edo eono singa evira, edo gido embo nenei atopatano, ko na dowaro wotane tae.

*Ge Ewa Tari. Matt. K. 20. 1*

**B**ASILEIA utu da amo be embo oro tutu inge, ko sipo Batesiri, wotedo buro embobo ainda vine buro da kumain tedo. Edo ambodani de jijiritera ko penny dakaki iji dakaki da mina piari, edo vine ika buro da etegesisina. Edo ora ika 3 ango de wotedo nenei ori ari da tepo pepetegedo itero awa gosisina, amindemane sisina, Ae imondemane daedo vine buro da aimbawo, awara imondemane piana. Edo aunsitera. Ko iji nei de tekago wowosisina, ora 6 ango de, ko ora 9 ango de, ko da da ango esisina. Ko ora 11 ango de wotedo embo nenei pepetegedo itero tuvisina, edo sisina, Nongain tedo imomane einda tepo

## PARI AE EPISTLE AE GE EWA TARI

pepetegedo itewo turo eiri? Ainde sitera, Ko nakare ai mi kumbae. Sisina, Ae imondemane daedo vine buro da aimbave iu. Ko turo de vine buro tutu mi sima ari ika de sisina, Ambodani dao te, puraro, rorou plate, edo ambo de gupera awa daedo tuturo ave, edo gisi gupera awa. Ko awamane gumbera ora 11 kumbira awa, penny da kumba da kumba ctera. Edo gisi guputera awa kote-mbesitera nei kumbari ta tedo. Ko awamane ango penny da kumba da kumba esitera. Edo kumbero, ko awamane mi tutu de dumo edo sitera, Embomai emo amboda gupera awa iji dakaki itera ba, ko nakare ango etesi, nakare utu amboka vevera kupera. Edo mina tesiri dakaki de sisina, Otawo nato, na imo usimbesei ae rata, nage ge nagenato jirido penny ta ae? Ika ito kundo ainde aimbu; ambo da gupera ainde piari jipapa ena, imo ango. Nakanato gido jipapa eona awa eteni ta? O jisi ito beiae, na dave awa tedo? Ango edo amboda awa gisi da itara, ko gisi da awa, amboda; jiwae daoteoro, indewa avigotora.

## SUNDAY SEXAGESIMA TEORITA

*Pari*

**B**ADA God, goteiwoto ro eora awa tumo jirae; nakare do edo, goroba ari ito mi mamato ari berari da nakare toregewasi, Iesu Keriso mi Bada natokare. *Amen.*

*Epistle. 2 Cor. 11. 19*

**I**MOMANE dubo ewa rare, dauwa egeregari sima dave leowa. Ko sima eowa, ango de embo esiri singa edo evi ta, indeviri ta, dasiga akuta eviri ta, dombu itomane doreviri. Gaigari mi ge tena, be nakare burau era; ko nonda ra embo ave jiro dambu darare tae, (na dauwa mi tena) na ango jiro dambu darari. Awamane mo Hebrew embo ri ta? Na ango. Awamane mo Israel embo ri ta? Na ango. Awamane mo Abraham da mamai ri ta? Na ango. Awamane mo Keriso da ambodani ta? (Na dauwa rare ge tena) nane mi dodo daginegetena; buro nato jiwae dawae, bundari oro da iji jiwae, vedora ajigari tae-rae, betari iji jiwae. Iji ingo da Judaea embo mi na dedo



## PARI AE EPISTLE AE GE EWA TARI

40 esitera, ta dakaki ae. Iji tamonde na ikuta mi doritera, iji da na ganuma mi doritera, iji tamonde gadumbedo, munia da iji da ungono da itona; pepeta ari iji jiwa, aduari un da, aduari dadua da iai, aduari ewowo nato da iai, aduari etene da iai, aduari nasi da, aduari dumo da, aduari ewa da, aduari nanonameji sitari kakato da iai; beowo ari da mamato ari de, uma ari iji jiwa, beji awari da, un do ari da, kakara da iji jiwa, dademo awari da, ipu boroto da. Ari iai dambu itevira awa daedo, sino agopa iji berari bunona, dubo vevera ari ekalesia berari embo. Ai mi burau eiri, ko na burau ae ra? Ai mi esiri duriri, na dubo vevera ae? Iawa ane tae, awara ta ko burau ari nato embo iawa ai ena. Bada Iesu ainda God rata ko Mamo de dave natopo ami, geira na pitawa tae.

*Ge Ewa Tari.* Luke K. 8. 4

**E**DO jisi siakabadae dada doregedo itero, embo nasi jiwa da ami ainda iai gumbero, parable de sisina; Ve urari ve ika unain tede wotedo, ureiri, edo nei begata demo da duriri pasido dasitera, edo utu ni mi injitera. Edo nei ganuma da durudo, erido ginene esisina tatapu ae rare. Edo nei ni bebe da durudo; edo bebe de daedo erido ijitera. Edo nei butu beiamana da durudo, erido, ve 100 kupusina. Eiwa tevira awa, dao sisina, Ainda iai dengoro itera awara, gido gesira.

Edo ainda ambodani ika mi ainde tede gositera, parable emo rori. Edo sisina, Imondemane piesira God da basileia da ge botuda kotembeu; edo embo nenei parable da, gain edo gae orote, edo dengoro mi gain edo gae orote. Parable eiwa; Ve, God da ge. Edo amo begata demo da, ami gera, edo Satan isipiri, dubo ikaito da ge kupevira awa kotembae orote, edo kaviegae. Edo awamane amo ganuma da, awa gido, ge kumboro dubo ika dave evira, edo awamane tai ae, edo tepo kotembotora, edo bawari da iji da dudurora. Edo bebe da wowosisina, awa ba awamane gotora, edo tepumene bauntora edo dubo beiae ika ae rorae de, ae kaviegari dubo dave ari da adora, edo awamane be beiamana ae. Edo butu beiamana da, amo do kokopi, edo dave eora edo ge gido edo jido, edo sima eiworo be eora.

## PARI AE EPISTLE AE GE EWA TARI SUNDAY QUINQUAGESIMA TEORITA

*Pari*

**B**ADA, atopapositeta, jimbo ewa orote, edo dubo bari itae, mana ara: Asisi Kotopu ito pie gundo dubo bari, rorae beiamana awa, dubo natokare da dodegare, awa bega de jimbo ewa de da kaingari, edo awa itae embo wasiri de awa be betari ajijigarago edo eta; Eiwa namondekare piewasi, Mai ito dakaki Iesu Keriso embo. *Amen.*

*Epistle.* 1 Cor. 13. 1

**E**MBO de anela de da iwawa mi ge tano ko dubo bari itainae, na copper iavi de berari, ta cymbal barara. Edo peroveta nato iai itore tae, edo ari gae itari, edo kotembari berari kotemane tae; edo ge be ari berari nato iai isirari, peji gigitemane, edo dubo bari nato iai itae, na ro itae. Edo rorae nato berari kando edo atotokatoto unane tae, ko tamo nato piano avigare tae, ko na dubo bari itae, rora nakanato ae. Dubo bari sima edo paira eira; dubo bari dubo da ae; dubo bari dasiga akuta ae, iawa edo ae, ro ae dumbae ae, ikaito awa kakoa ae, duduno ae, beiae awa ajigedo ae; jimbo beiae embo dubo ika beiamana ae, rata ge be de daedo dubo ika dave evira; berari apuregetivira, berari ge be edo evira, berari sima euri, berari da netegedo itevira. Dubo bari doae; peroveta itae ore; ge dowore; kotembari itae aina. Siaka mi kaen kotembeteite, ko siaka mi kaen peroveta edo ena; edo sia evira awa gumbari ko siaka evira awa itae aina. Ango de na mai siaka isite mai siaka ge ango sitena, mai siaka ango kana buritena, mai siaka ango kotembedo takimbessitena; ko ango de embo edo, mai siaka da ari dotena. Ko boroko asisi da kaen gae dumbae ena; edo ango de dombu dombu da; boroko siaka awa kotembetena; edo ango de be kotemana ami na kotembetevira ango. Awara ta ge be ari, sima ari, dubo bari itera, tamonde eiwa; ko dubo bari bajina da.

*Ge Ewa Tari.* Luke K. 18. 31

**E**DO ainda iai 12 awa kundo amindemane sisina, Kaen Jerusalem da bamame, edo matawa peroveta mi gaena

## PARI AE EPISTLE AE GE EWA TARI

embo da Mai da iai are. Etene da piari edo ami tedo jirido usimbese edo kosiwa edo ore: edo vededo aro be-taina, edo iji tote da gagane de enaina. Edo emo ro gaerare, ge emo onjigedo edo tena ami ruvegarate.

Awara Jericho ainda atutumbedo, edo embo jisi akie-mbari begata demo da anumbedo benunu eiri; jisi da daginegetero gido, tedo gosisina, eiwa rori? Edo ami ainde site, Iesu Nazareth embo baunteira. Edo dao tedo, Iesu, David da mai, na do ewasi. Edo gisi guputera ami ge sitera ge doarate. Tena dao ikana de tedo, David da mai, na do ewasi. Edo Iesu petedo ainda iai kundo bamborote sisina; edo atutumbesiri ainde tedo gain sisina, Ro jipapa esi ito iai ane? Edo sisina, Bada, getena awa. Edo Iesu sisina, Gi; kotembari ito esiri kaviegeteta. Edo iji da gido ambo ambo edo, God dasiga esiri. Edo embo jiwae gido God dasiga esitera.

## LENT DA IJI DA, AEWAI IJI TEORITA

*Pari*

**G**EDO Goroba jiwae, matawa isite, eota awa ro dumo ae, Gedo embo dubo wareregatora ainda jimbo kotembedo doturota; dubo teka ae depeka ari de do natokare da ewasi; ato nakare jimbo beiae natokare embo ji tara, mamato ari natokare akuta kotembara; awara ta imo God do ari embo, edo udegari be de buria kotembedo doari be de ito iai kumbara; Iesu Keriso Bada natokare awa embo. *Amen.*

*Pari eiwa iji berari Lent da ajijigore Iji da Pari amboda.*

*Epistle Embo. Joel 2. 12*

**B**ADA mi tedo sira, Awara ta nato iai boroko atutu-mbedo isiwo dubo itomane berari mi, ko kakara ari mi, jiiu itomane mi, edo jitari mi; edo dubo itomane jido kereu, edo woru itomane itae, edo Bada God itomane da iai atutumbedo isiwo; amo tonembedo do ari kato ra, edo duduno babaiango evira, ko ainda do ari bajina, ko beiae embo dubo ika wareregetevira. Ai mi gotevira wareregaini ta, dubo ika wareregare, edo ewa ari gunda pisido domaina, bread da rorou de tu indari rorou de

## PARI AE EPISTLE AE GE EWA TARI

Bada God itomane da iai? To puteu Sion da, kakara ao eu; babadegari sirigeu, mamai de adesai de sirigeu edo amibebada; embo teka jimbari ainda oro ika dodo idegare, edo a teka jimbari ainda mando ika dodo idegare. Priest, Bada da singa, gaiga de tenemba de toropu da ji tedo tara, Bada, embo ito do ewasi, edo baiaw ito isimbari da piote, edo etene awamane da iai badari are tae; nongain tedo embo toro da tedo tare tae, Ainda God indari?

*Ge Ewa Tari. Matt. K. 6. 16*

**E**DO ango de kakara ewa awa, be awamane pitawa Ekakato ango dombu itomane piagauia eure: awamane dombu usimbese era, ko ebomai mi gara kakara era. Awara imondemane tena, Awamane da riroa kumbera. Ko imo, ango de kakara eta, datedo ko dombu ito teio; embomai imo giwore kakara eta, edo Mamo ito gae itari; edo Mamo ito gae itari de goteira awa imo de riroa are. Rorae itomane nasi da dada eove, uve ae ganuma de de mi injido eite, ko torari kakato ururugedo, beono edo eora: ko rorae itomane utu da dada ewo, uve ae ganuma de de mi injido ae, ko torari kakato ururugae, beono edo ae; rorae ito isima eira ainda dubo ito itare.

## SUNDAY 1 LENT DA

*Pari*

**B**ADA, nakare embo iji 40, tumba 40 rorae doturuteta; Tonembari piewasi, nakare rorae dowore, ango pisi mi Asisi da iai da ambodani edo, beiamana teota awa matawa kera edo, jimbo natokare awa kotopu ara; dasiga ito ae parara ito de embo, Mamo ae Asisi Kotopu de daedo God dakaki matawa itota ainda. *Amen.*

*Epistle. 2 Cor. 6. 1*

**N**AKARE ae God de buro eite, ko imomane tedo gotera, God da kondade ari mana kumbae dumbae awa (tedo sira,

Iji beiamana da imo dengoro mi gena,

Edo ari kaviegari da iji de imo kondade etena;

gi, boroko iji beiamana, boroko ari kaviegari da iji) nomi durari enikae, edo singa ari mana bekumba aina; ae rata

## PARI AE EPISTLE AE GE EWA TARI

berari da nakare dasiga akuta eora, God da singa ango, ko sima ari jiwae da, dubo vevera ari da, atoto ari da, do ari da, vedari da, egiregari da, gatara bundari da, buro ari da, sima ari da, kakara ari da; dave da, kotembari da, burau ari da, Asisi Kotopu da, dubo bari pitawa ae da, ge be da, God da goroba ari da; Jimbo ewa da, itoro ari ingo be da ingo anda da, dasiga ari, gadumbari mi, kana beiae mi kana ewa mi, be embo nei inge, ko nakare be kotembatora; be betoro arago, ko gi, nakare wasiri de; be dorora awa, edo nakare dae betae; nakare dubo beiae ari kakato, ko dubo natokare dave natopo evira; nakare atoto, embo jiwae rorae piora; nakare be ro itae arago, ko berari nakanatokare.

*Ge Ewa Tari. Matt. K. 4. 1*

**E**NGO de Iesu Asisi mi kundo dumo da baunsisina, diabololo bawarate tedo. Edo iji 40 munia 40 ro indae, edo itae beji apeiri. Edo bawari embo ainda iai gundo sisina, Imo God da maina ta, ganuma eiwa te bread jindare. Ko mina sisina, Ove ena, Embo da bread mi berari kavigainae, rata ge berari God da be da wowotora ami. Ango de diabololo nasi kotopu da kundo baundo, ko temple beuri da piedo ainde tesiri, Imo God da maina ta, einda kekepunia e; ove ena,

Ainda anela imo embo tari jijimbedo ara,

Edo ipa ikaito jiara dapata,

Edo imo tai ganuma da koegain ae.

Iesu mi ainde sisina, Tekago ove ena, Bada ito God bawote dowasi. Bebe, diabololo kundo jiri nongain badari da da pisido, iji da de basileia jiwae piesiri gosisina, edo ainda parara, edo ainde sisina, Eiwa berari ito iai plane, imo nato lai durudo tumondebain atate. Ango de Iesu mi ainde tesira, Bambu, Satan; ove ena, Bada God ito da iai tumondebain e, edo ainda iai berari kera edo e. Ango de diabololo awa dosiri, gio, anela gundo ainda iai singa esitera.

## SUNDAY 2 LENT DA

*Pari*

**G**OD Goroba jiwae, imo goteta nakare sivedo mana akuta kondade eora; pisi natokare ae asisi de sima edo,

## PARI AE EPISTLE AE GE EWA TARI

pisi ainda mamato ari de toregewasi, ae asisi ainda gitopo kotembari beiae de; Iesu Keriso mi Bada natokare. Amen.

*Epistle. I Thess. 4. 1*

**I**MOMANE, nanonameji, Bada Iesu de benunu tena, Iedo imomane dengoro baitena, nominomi pepeta etewa edo God dubo beiamana etewa, ango be pepeta ewa, ango de beiamana awate. Ge imondemane piora awa Bada Iesu de gotowa; eiwa God da jipapa, kotopu ari itomane, imomane avitari dowawate; imomane berari kotembedo, ainda rorae ikaito kumbawate kotopu ari de ae dasiga de, edo gigiari da ango ae, etene ango, God gae eora awa; edo embo engo de ainda nameji daginegain ae ta usimbese ain ae; gido Bada eiwa jiwae de riroa kumbari embo, nakare atopasido tetero gositewa ango; God kaena daosisina gigiari embo ae rata kotopu ari da. Ango de embo ge jindevira awa embo ge jindae rata God, Asisi Kotopu imondemane pipitevira awa.

*Ge Ewa Tari. Matt. K. 15. 21*

**J**ESU ongo aundo Tyre de Sidon de da iai da baunsisina. Edo gi, Canaan eutu tano awa de wotedo ainda iai dao sisina, tedo, Na do ewasi, Bada, imo David da Mai; gagara nato diabololo mi tanjido evira mamato jiwae eira. Tena ami mina tae be tae. Edo ambodani ainda gundo benunu ainde sitera tedo, Tato aimbare; kaena amboda daosira. Ko mina sisina, Na tetero gumbae rata Israel da oro be da sinopu maine da iai. Ango edo ami gundo tumondebain esisina, tedo, Bada, na tonembatate. Edo mina sisina, Mamai da bread kundo sino da iai da aungari beiamana ae. Ko ami sisina, Awara, Bada, do sino oieie indora, ainda embo babada da tenemba da dudurora awa. Ango de Iesu mina ainde sisina, Eutu, kotembari ito bajina; jipapa eta awa arate. Edo ainda gagara iji ango de erorisina.

## SUNDAY 3 LENT DA

*Pari*

**I**MONDE tedo gera, God, Goroba jiwae, singabanga ito ainda benunu awa jisi tu da edo, ipa be ito parara de

## PARI AE EPISTLE AE GE EWA TARI

kaioio edo gitopo natokare berari da toregewasi; Iesu Keriso Bada natokare awa embo. *Amen.*

*Epistle. Ephes. 5. 1*

**A**WA tedo God amboambo eu, be mamai dubo bari Ainge; edo dubo bari de pepeta eu, Keriso ango imomane dubo burevira, edo kaena embo akuta piena rorae rorou God da iai, mimbari muno de. A ipu da, dono berari, dubo da ari, itomane iai begai eove, embo kokotopu ari ango; ko ge beiae ae, ge dutari de, iro ge tari de, amo ewa ae; ae rata ategari. Ko eiwa be kotembedo ewa, ko embo berari a ipu da egeregari, ta dono, ta dubo da egeregari, amone ove kewari da do da tumondebain eora, amo baiau ro kumbae, Keriso de God de da basileia da. Edo imomane etetebeure ge pitawa mi; eiwa tedo God da duduno ge jindari da mamai da iai gupevira. Awa tedo imomane ouwamane de dada eove; matu imomane munia, rata boroko imomane utata Bada da iai; utata da mamai ango pepeta ewo (utata da be dambu da de jimbo beiamana de ge ari berari de itera) ko Bada dubo burevira kotembedo tumbu. Edo munia da buro, be gaiiae evira awa, ainde daedo dada itove, ae rata isimbeu; ari gae itari evira awa ge tari gido me gorote. Edo berari isimbotora awa utata mi bedesira; ango edo berari bedevira awa utata. Awa tedo sira, Jisi ito gunde, aundo ruvegari kato, edo betari da ango eri, erato Keriso mi ito iai datembare.

*Ge Ewa Tari. Luke K. 11. 14*

**I**ESU mi daimona piesiri wowoteira edo awa ge tae. Ango edo daimona wowoteiri ge tae mi ge ba sisina; jisi kore esitera. Ko nenei sitera, Beelzebub mi daimona da dariga, ami daimona pieuri wowotora. Edo nei bavitera, edo ainda iai iwata utu da kakoa esitera. Edo ami awamane dubo da kotembotora awa kotembedo sisina basileiare de ami itoro teda eite dungevira; edo itoro oro tedo oro tedo rare dudureira. Edo Satan itoro mina ani eiri, nominomi basileia ika petaini? Imomane tewa nane Beelzebub mi daimona piono wowotora. Edo nane Beelzebub mi daimona piono wowotora, edo mamai itomane ada anda mi ami pioro wowotora? Awara ami mi imomane katara. Edo na God da toro mi daimona piono

## PARI AE EPISTLE AE GE EWA TARI

wowotora, ango de God da basileia itomane iai gumbira. Goroba embore nuna eimango edo, oro ika sima euri, rorae ika bega da itora; edo goroba jiwae ainda iai purari, gaiari baundo ambarate tedo, itoro ari berari kotembe-tevira awa ba kundo, rorae ika kando evira. Embo nato iai itae, amo nato gitopo, edo namonde daedo sirigae, amo aunakauna evira. Asisi beiae, embo dodo wowotevira, edo iai paembari da pepeta emene baunteiri, kakoa evira oena apai: edo kakoa edo gae; tevira, Tenda bamain ena oro naka dodo wowositena ainda. Edo awa ba gundo, tuvevira iai wadeuri, edo gogumbetevira. Edo bauntevira asisi nenei 7 bebegae be bebegae awa kupevira amo ango ae, edo torido natopo itora; edo embo amo beiae gisi ango ae.

Awara ta eiwa sisina, jisi da eutu aoro jiri eriri sisina, Beiamana sini da iai imo kupevira awa, edo ami indota awa. Ko sisina, Awara awamane da iai beiamana, awamane God da gere gotora awa edo be burora.

## SUNDAY 4 LENT DA

*Pari*

**G**OD Goroba jiwae, piewasi tedo gera, edo nakare Gjimbo beiae natokare embo, awara riroa borote, ko ato, tonembari ito nakare dubo damo ari riroa dowore, Bada ae Toregari natokare de, Iesu Keriso embo. *Amen.*

*Epistle. Gal. 4. 21*

**T**AWO gane, imomane Ge da sima ari jipapa cowa, Ge gotovi ta gaeri? Ango de Ove ena, Abraham da mamai tote, nei da bundari ade mi, nei da eutu tepo mi. Awara bundari ade da mai pisi mi wowosisina, ko eutu tepo da mai tari gari mi. Edo eiwa enia; eutumane eiwa tari gari tote, nei peji Sinai da, singa ari da egevira awa, awa Hagar. Awara ta eiwa Hagar Sinai peji Arabia da, Jerusalem boroko isira awa da kariwa, awa bundari evira mamai ae da de. Ko Jerusalem ikane tepo isira, awa aiaka kaenato. Ove ena,

Imo ero, mai kumbae awa dubo beiamana arate;  
Ge jiato enaina, imo mai tuwae.

Eutu akuta ainda mamai jiwae iu de ango ae.

## PARI AE EPISTLE AE GE EWA TARI

Awara ta kaena, nanonameji, Isaac ango, tari gari da mamai. Ko matu pisi mi wowosisina ami asisi mi wowosisina awa esiri mamato evira, ango de boroko. Tena ove ge ro tesiri? Singa ade piato wotaina ae ainda mai ae da de. Singa ade da mai eutu tepo da mai ae da de bai'au kumain ae. Awa tedo, nanonameji, kaena singa ade da mamai ae, rata eutu tepo da.

*Ge Ewa Tari.* John K. 6. 1

**I**ESU Galilee da ubutu, awa Tiberias da ubutu da tepu-sina. Edo jisi siakabadae amboda amboda esisina, ainda kenatu kambo egeregari da iai esisina awa gositera awa tedo. Edo Iesu jiri da visido ongo ainda ambodani ae da de anumbesitera. Edo Darutegari, Judaea mai da Bonda, aikae evira. Awa tedo Iesu mi pangedo jisi siakabadae gumbari gido Philip de tesiri, Inda ango kaena rorae piedo kumano eiwamane indari? Edo eiwa tedo bavedo gosisina, nongonongo euri gotevira. Philip mi mina ainde tesiri, Mai einda isiri ainda barley bread 5, edo un wo tote; tena emo rori embo jiwae ango da iai? Iesu mi sisina, Embo eu anumbore. Awara ta manene jiwae nasi da: awa gido embo anumbesitera ajigari 5,000 ango. Awa tedo Iesu bread kundo ategedo ambodani da iai kando esiri, awamane anumbesitera ami de kando esitera, edo un wo ango jipapa esitera ango de. Edo osi etero gido, ainda ambodani de tesiri, Egegegari deposi sirigewavi, ioiowa core. Awa tedo srigetero kabia 12 be da esitera, bread 5 jiito indera awa injido do-tera awa. Awa gido embomai kariwa Iesu esisina awa gido sitera, Ge be eiwa peroveta nasi da gumbesira awa.

## SUNDAY 5 LENT DA

*Pari*

**T**EDO gera, God goroba jiwae, edo jisi tu da ewasi embomai ito da iai; edo beiamana edo, tamo natokare ae asisi de gisi jido toregewasi; Iesu Keriso Bada natokare embo. *Amen.*

## PARI AE EPISTLE AE GE EWA TARI

*Epistle.* Heb. 9. 11

**K**ERISO gumbira, ouwa ari dave gupevira ainda priest ewowo edo oro bajina mi dave mi, ko ingo mi ae, amo ari emi mi ae, ko goat de ox mamai da ororo mi ae, rata ororo ika ito mi, iai kotopu da iji da torira, ango de rorou matawa itari kumbira. Ko goat de ox jianda da ororo, edo ox mai ainda aewa, awamane da dono mi gutetera, daka era pisi da dave be dave, Asisi matawa itari mi, God da jisi da akuta pipisisina awa, buro betari mi dubo itomane ari dave aina edo God wasiri de itari da singa aini ta? Edo eiwa tedo awa ge tari gari teka Toregari ango edo ge tari gari dakaki da jimbo beiae da rorou embo betari dakaki kumbira, edo awamane dao tevira awa bai'au matawa itari da ge tari tari kumbore tae.

*Ge Ewa Tari.* John K. 8. 46

**I**ESU mi sisina, Imomane indawara mi ari beiae isi-imbeteu? Ge be teona awa edo nongain kotembae eteu? Embo God mi God ge be tevira; awa embo imomane gae eowa, imomane God mi ae. Judaea mai tetara, Ge teora awari ta, imo Samaria mai, edo daimona ito iai? Iesu mi sisina, Daimona nato iai ae, tena Maka kotopu eona, edo imomane na isimbotowa. Dasiga nato na kakoa ae; dakaki kakoa edo ge katevira. Ge be, ge be tena, embo ge nato jigamo evira amo betari mana gaina. Judaea mai sitera, Boroko kotembotora daimona ito iai. Abraham besisina, edo peroveta, edo imo teta, Embo ge nato jigamo evira amo betari mana gaina. Imo mamaka Abraham ainda badari ta, betena awa, edo peroveta betari? ave akuta esi? Iesu sisina, Dasiga akuta etena dasiga nato ro ae. Maka nato na dasiga eira, imomane teowa awa God itomane. Imomane kotembae eowa; na kotembetona, edo tetena awa kotembae edo imomane ango itenate, pitawa kato. Na kotembedo kera eona. Mamo itomane Abraham iji nato gain jipapa esisina, gido dubo beiamana evira. Awa tedo Judaea mai sitera, Duberi ito boroko 50 ae, edo imo Abraham gotosi ta? Iesu amindemane sisina, Ge be, ge be, imondemane teona, Abraham kumbae rata na itena. Awa gido ganumaginu-ma kundo dain etera; ko Iesu onjigedo tempela dodo wowosisina.



## SUNDAY 6 LENT DA

*Pari*

**G**OD goroba jiwae, matawa itota, inemi embo karupa Edo. Mai ito Toregari natokare Iesu Keriso teteto gundo, pisi natokare kundo, cross da betena, ango de embo berari ainda atoto ari gido, amboda amboda ore; Do edo piewasi, edo nakare ainda mamato ari amboda amboda ore, edo daedo ainda erari de erara; Iesu Keriso da dawa embo Bada natokare. *Amen.*

*Epistle. Philip. 2. 5*

**D**UBO eiwa itomane iai itare, Keriso Iesu da iai da Dango; awa God da tamo da isinesina, dao tae ari jido takimbatora awa ae God de daedo dada ore tae, tena akuta be itae esira, edo singa da tamo kumbira, edo embo ango esira; ko idegesira gari embo ango, edo burau esira, edo betari da kera esira, awara cross da betari. Awa tedo God be jiri erira, edo ainda dao mi dao berari daginegetevira awa piesira, ango edo Iesu da dao da baongo berari dadari ore tae, utu da de, edo butu da de, edo bufu du da; edo iwawa berari mi tedo Iesu Keriso Bada tore tae, God Mamo da parara da.

*Ge Ewa Tari. Matt. K. 27. 1*

**E**DO sipo atesiri, ko priest babain berari ae babadegari Ede mi ge jijiritera, Iesu daro betarate; edo bundedo, kundo aundo Pilate de pitera.

Ango de Judas, onjiga embo mi, gido bekumba esisina, edo dubo ika wareregesiri ko silver 30 priest babain de babadegari de da iai tekago kundo gundo sisina, Jimbo nato beiae rare ororo dave onjiga tetena. Edo sitera, Nakare ro kumbare? ine gi. Edo silver awa iai kotopu da aungedo, dodo aundo kikive esisina. Edo priest babain mi silver kundo sitera, Ge tevira awa, rorae mana da pia esira, eiwa ororo rorou. Edo awamane ge jirido ami mi ou ari da buro ori esitera, aike embo da kokoma. Awa tedo buro awa dao Ororo buro sitera, engo de. Ango de Peroveta Jeremiah mi tevira awa petugetevira, "Edo silver 30 kundo awa rorou ainda rorou begitera awa,

Israel da mamai nenei rorou begora awa; edo ou ari da buro embo pitera, Bada mi na oru evira ango".

Edo Iesu governor da do da petedo isiri; ko governor atota edo sisina, Imo Judaea embo da Daotari ta? Edo Iesu mina ainde sisina, Teteta awara. Ko priest babain de babadegari de mi bekumba esitera, ko ro mina tae. Ango de Pilate mi tedo sisina, Jiwae imo bekumba era amo imo gotesi ta? Ko mina ro tae, ge dakaki tae; ango edo governor mi kore esisina. Ango edo bondo da governor mi ainda ari bundari dakaki jisi da udeinesina, awamane mi jipapa eora awa. Edo ango de egiregari da bundari embo gotora awa isira dao teora Barabbas. Awa tedo ango de dada utero Pilate mi sitedo sisina, Indawa jipapa eu itomane iai undanate, Barabbas, ta Iesu teora Keriso? Ami gido jitari embo pitera. Edo atota ari **anumba da anumbedo** isiri, ko ainda aro ainda iai etegedo sisina, **Amone jimbo** dave embo ra nongo esiko; boroko engo de aturo edo awa embo na mamato ena ne. Ko priest babain de babadegari de mi jisi de sitera Barabbas tedo goteite, Iesu dari betarate. Edo governor mi mina amindemane site sisina, Ete tote rata, ko indawa itomane iai undanate jipapa eu? Edo sitera, Barabbas. Pilate mi site sisina, Edo Iesu teora **Keriso amo nongonongo** ani? Awamane berari mi sitera, **Cross da de**. Ko sisina, Edo rora ro beiae esiri? Edo aoro siaka gatae edo sitera, Cross da de. Cross da de. Edo Pilate mi gido goroba ae, edo gatara bundari ge **eroreiri**, edo **un kundo** embo-mai da jisi da ingo teisina, sisina, Embo eiwa jimbo dave embo da ororo ra na ai mi bekumba eiko; inemane giu. Edo embomai mi berari mina sitera, Ainda ororo natokare iai rata ko mamai natokare da iai. Ango de awamane da iai Barabbas undedo, ko Iesu awa vededo pisina cross da dorote.

Ango de governor da itoro embobo Iesu kundo Praetorium da **vivisitera** edo **jisijisi** berari ainda iai sirigesitera. Edo woru ika udegedo, ko woru ijimbari pietero aviri. Edo **crown** awa **bebe** engedo kopuru da piedo ko apua awa ingo be da; edo baongo dadari ainda do da edo gadumbedo sitera, Oro, Judaea mai da Daotari; edo kosiwa edo apua kundo kopuru da doritera. Edo tedo jijireite woru awa udegedo, ko woru topa ainda

awa pietero aviri, ko kundo aunsitera cross da dain tedo.

Edo wowoteute Cyrene embo tuvitera, ainda dao Simon, edo dumbero ainda amboambo edo ko ainda cross kumbare tae. Edo iai dao Golgotha teora ainda, amo, Kopuru akou da iai, gundo, wine pietero ijisina ae musi de daedo; ko injido gido gido doturisina. Ko cross da doreite woru ika kando eite edo keleru edo, ko anumbedo ounda jijimbesitera. Edo ainda bero ari ove esitera awa ikane piedo sitera, EIWA IESU JUDAEA EMBO DA DAOTARI. Ko ainde daedo dadua embobo tote cross da doritera, nei ingo be da, nei anda da. Edo pepeta eora awa gadumbesitera, edo kopuru govegove eite sitera, Imo tempela sitota awa edo iji tamonde de jijiota awa, akuta edo kaviege. Imo God da Maina ta cross da angowote. Edo angu priest babain, ove egeregari de, babadegari de daedo tedo jirido sitera, Kano awa euri kaviegotore; ko akuta edo kaviege eira. Amo Israel da Daotari; boroko cross da angu wotarate kaen kotemane. God tumo jijirevira; ko ami jipapa edo raro, boroko tore-garate; ami tedo sisina, Na God da Mai. Ko dadua ari embobo ainde daedo cross da doritera awa angu gadumbesitera.

Angu de ora 6 butu berari munia esiri ora 9. Ko ora 9 angu de Iesu ge bajina tedo aoro gatedo sisina. Eli, Eli, lama sabacthani? amomo, God nato, God nato, nongain na dodo taingetesi? Edo nenei ounda pepegedego isiute ami gido sitera, Elijah daosira. Edo awamane da iai mai da mi boeite tumundo puiba kundo vinegar dodesiri be da esiri, apua da piedo piesiri ijisina. Edo nenei mi sitera, Do, kaen gane Elijah gupeira ami ari kaviegaina ta. Ko Iesu beba ge bajina tedo aoro gatedo, asisi ika piesiri idegesisina. Ko gi, tempela da gagaregari keredo tote esisina, ikane angu begisi da; edo butu jipesiri, ganuma bededo, goiari jisi bejitera, ko kokotopu jiwae awora awa jiri eroritera; edo kokomo dodo wotedo ainda erari da amboda edo nasi kotopu da torido, berari da iai idegesitera. Angu edo kenturion mi ae awamane awa ae ainde daedo Iesu jijimbatora awa, jijira de ko ari eora awa gido adu be adu edo sitera, Awara emo God da Mai.

## MONDAY EASTER GISI

*Epistle Embo. Isaiah 63. 1*

**E**MO ai Edom angu gupeiri, edo woru ika iijimbari Bozra angu? Ai mi woru ika parara de, goroba ika bajina de pepeta eiri? Na, jimbo dave mi ge tena, goroba edo kaviegain tedo. Nongain woru ito iijimbesiri edo woru ito be wine dawari da patevira awa inge? Wine pasido depeka ari da na akuta patena; ko embo da iai ai mi namonde daedo itae; angu edo ae duduno de patena, edo na sini gambiri pasido depeka eteno, ko ororo mi woru nato da betegesira edo woru nato berari eteno gambira. Riroa iji dubo nato da isiri, ko toregatora awa nato da jienda gumbira. Ko gena, kondade ari itae rare; ko kore etena ko ai mi jie, awa tedo ingu nakanato mi esiri kaviegesitena, edo duduno ari jijisina. Ko na duduno de embo pasido depeka etena, edo na sini gambiri duduno un pieteno injido dusitera, edo awamane da ororo butu da dodegetena.

Bada da do ari begana, edo Badada dasiga ari, berari Bada mi kaenamonde pievira angu; edo jimbo dave bajina Israel da ewowo da iai, amindemane pievira ainda paira angu, edo ainda do ari jiwae angu. Awa tedo site sisina, Awara, ouwa embo nato, mai babaingae ko pitawa ge tain ae; ko awa ainda ari kaviegari. Ainda mamato ari berari da mamato ena, edo gisi ika ito da anela awamane esiri kaviegesitera; edo ouwa dubo bari ika de ko do ari ika toregena; edo jina, edo matu dembae iji jiwae kumuna. Tena ge jindedo; ko asisi ika kotopu awa esiri mamato esisina; awa tedo ami waregesira awamane da itoro, edo ami awamane da iai gagurisina. Edo iji dembae Moses, embomai ika de kotembedo sisina, Amo indari ewa da angu kupevira awa, ainda sinopu da sima ari de? amo indari, asisi ika kotopu awamane da toropu da pievira awa? edo ainda ipa parara mi esiri, ko Moses ingu be da aunsisina? edo un awamane da jisi da evekara esisina, ko ainda dao matawa itari akuta are tae? edo un gono da itero kupusina, horse dumo da angu, ko durae? Sinopu dedewa da wotora angu, Bada da asisi mi awamane esiri oena aputera; angu embo ito kuputeta, ko dao ito parara be parara akuta ate tae. Utu da angu jisi tu da



edo gi, edo kotopu ito de parara ito de da gi; ko dubo vevera ari ito de ari ito bajina de, indari? dubo beiae ito de tamo paira ito nato iai ge tesira. Imo mammo natokare, edo gido Abraham mi nakare dareiri, ko Israel mi nakare dodo eira; imo, Bada, Mammo natokare; rorou ari natokare natopo itari dao ito. Nongain tedo, Bada, inemi nakare eiwoto begata ito da bambae dumbae eite, dubo natokare eoto wawoegedo eiri adu ari ito da? Tekago pu singabanga ito embo, baiau ito da ewowo. Iji siaka embo ito kokotopu ikaito itevira; itoro natokare oro ito kotopu pasido dasitera. Nakare awamane ang'o nanjigo de awamane da iai badari ae; awamane da iai dao ito tae.

*Ge Ewa Tari. Mark K. 14. 1*

**A**NGO edo iji tote amboda bondo Darutegari, ko bread badae: edo priest babain ae ove egeregari de mi kakoa ewa nomi dubo embo kundo daro betaini tedo; sitera, Bondo da ae rata, ko embo da itoro ge eriure kae.

Edo ang'o de Bethany da Simon leper da oro da isite, anumbedo isite rorae indeiri, eutu gupusina doino kire naredi dave kundo ainde, money ika jiwae; edo kire desiri bedesiri kopuru da dodegesisina. Edo nenei mi duduno jisi edo sitera, Nongo edo gido doino aunakauna esiri? Doino emo ori edo penny 300 de nenei de, edo embo atoto de piare tae. Edo awa isimbetero, Iesu mi site sisina, Itare do, nongain tedo ainda dubo ewo vevera eiri? jimbo dave nato iai eira. Embo atoto itomane iai matawa itera, ko iji da doae dave ewo: ko na itomane iai matawa itae ra. Goroba ari ika ang'o esira; tamo nato goiain tedo be de datesira. Ko nane tena awara, Iai berari da evanelia butu berari da atopatore, eutu emi evira awa jirare, ainda kotembukotembu.

Edo Judas Iscariot awamane 12 ra ta ko awa dakaki mi aunsisina priest babain da iai, edo ouwa awamane de piain tedo. Edo awamane mi ang'o de gido, ko dubo dave esiri money piain sitera. Edo ami iji kakoa esisina piain tedo.

Ko bread badae da iji dakaki, ang'o de darutegari pasido, ambodani ika mi ainde sitera, Nonda jipapa esi aundo sin aro darutegari indasi? Edo ambodani ika

tote etegedo sisina, Aimbawo nasi da, ounda embo imomane tuwaina, un sigi kupeira, awa amboambo ewo; edo totoreira ainda, oro tutu de site tewo, Atopatari mi site, Sinopu oro indari, darutegari inane ambodani naka de? Edo ami oro siakabadae opeta de sia ari de awa piari gave; edo ounda kaena embo sia ewo. Edo ambodani wotedo, ko nasi da torido sisina awa tuvedo, darutegari sia esitera.

Ko turo jiriri, ko awamane 12 de daedo gupera. Edo anumbedo rorae indeite, Iesu mi sisina, Awara nane mi imondemane tena, Imomane dakaki mi na onjiga taina, embo namonde daedo indeira awa. Awamane mi tuturo edo dubo beiae esitera, edo daradara mi sitera, Na ni ta? Edo sisina, Imomane 12 rata dakaki awa ae namonde teo da papoteira awa. Embo da Mai aunteiri, awa embo ove evira ang'o; ko beiae embo ainda iai ami mi embo da Mai onjiga taina; embo ainda iai dave are ai naji kumbae arate.

Edo indero, bread kundo, beiamana edo, engegedo, piedo sisina, Kumbuwo; eiwa tamo nato. Edo akou kundo ategedo, piesiri berari mi injitera. Edo sisina, Emone ororo nato tari gari da ororo, jiwae embo dodegetevira awa. Awara nane mi imondemane tena, vine da be na tekago mana inana, edo gido ang'o de teka inana God da Basileia da.

Edo ia site, jiri Olive da wowositera.

Edo Iesu mi sisina, Imomane berari ari durawa; ove esira, Sima ari dano, ko sheep evekara ore. Edo erari nato da amboda do itomane da aimana Galilee da. Edo Peter mi sisina, Embo berari ari durara, ta ko na ae. Ko Iesu mina sisina, Awara imonde tena, imo boroko, munia eng'o de, kokora iji tote aoro tain ae, edo iji tamonde de na bero eio. Edo ge inakade sisina, Nage daedo betane, na imo bero ain ae. Ko berari mi ang'o sitera.

Edo butu da gupera Gethsemane teora ainda; edo ambodani ika de sisina, Einda anumbeu, na benunu tane. Ko Peter de James de John de daedo kupusina awa, edo tuturo edo dubo indadaita edo dubo vevera be esisina. Ko sisina, Asisi nato dubo vevera eira betari da; imomane einda isite jijimbeu. Edo siaka iarago edo butu da durudo tedo gosisina, are tae, ora dodo aimbarate tedo. Edo sisina, Abba, Mammo nato, berari ine ate tae; akou nato

## PARI AE EPISTLE AE GE EWA TARI

iai eiwa kumbu; ko na jipapa eona awa ae, rata ine jipapa eota awa. Edo gupeite, tuveira aundo ruvegetera, edo Peter de sisina, Simon, imo aundo ruvegetesi ta? iji dakaki de gaegae eteta? Jijimbodo benunu tawo ko bawari da torove. Asisi mi jipapa eiri, ko pisi mi siveira. Edo iji nei de aundo, benunu sisina, ko ge da dawa sisina. Edo iji nei de aundo tuvisina aundo ruvegetero, awamane awa jisi be akiembesitera; edo mina ro teikae daritera. Ko iji tamonde de gupeite, sisina, Boroko aundo ruvegeu, edo oena apave: awara; ora gumbira; gi, embo da Mai jimbo beiae embo da ingo da onjiga sira. Eriwo, kaen aimane; ko gi, na onjiga tevira awa isipeira.

Edo iji dakaki de, angoo de ge siri, Judas gupeira, awamane r2 rata awa dakaki, edo ae ainde daedo jisi kasiwo de kuta de daedo, priest babain de ove egeregari de babadegari de da iai angoo. Angoo edo onjiga tevira ainde kariwa piedo sisina, Embo munegana awa kumbuwo, edo beiamana edo kundo aimbuwo. Edo gundo, borae ainda iai gundo sisina, Rabbi; edo munegesisina. Ko jido kuputera. Dakaki awamane da iai petedo isiute, kasiwo ika worugedo kundo, priest siakabadae da singa awa dedo dengoro kautugesisina. Edo Iesu mi mina amindemane sisina, Wotetewa be dadua iai arago, kasiwo de ikuta de daedo, na dain ta? Iji berari imondemane daedo tempela da kaen isite atopapotona awa na dae cowa. Ko eiwa esira ko ove ore tae. Edo awamane berari dodo taingedo adu esitera.

Edo singa dakaki mi awa amboambo esisina, woru linen ainda iai jijirisina ainda tamo boroto da; edo jido iteroo woru linen dodo taingesisina, ipu boroto edo, adu esisina.

Edo Iesu kundo aunsitera priest siakabadae da iai, edo ainde daedo priest babain berari de babadegari de ove egeregari de dorebegedo iteroo ainda. Edo Peter awa betau ambo ambo esisina, oro do da, priest siakabadae da arapa da, edo ae ambodani de daedo anumbodo site ni aunsina. Angoo edo priest babain de ge tari berari mi Iesu da bekumba ari kakoo edo daro betarate tedoo; edo kakoo edo tuwae esitera. Jiwaek bekumba tepotapo esitera, ko bekumba amo ari amo da dawa ae. Edo nenei mi erido bekumba tepotapo edo sitera. Nakare gotero site sisina, Tempela eiwa ingo mi eora awa sitana,

## PARI AE EPISTLE AE GE EWA TARI

edo iji tamonde ko nei ingo mi ae awa nane mi ana. Ko angoo ae awamane da bekumba da dawa. Edo priest siakabadae mi toropu da erido Iesu atota edo sisina, Ro mina tae tae esi ta? emo rora mi embomai mi imo bekumba eri? Ko ge tuku edo mina ainde ro tae. Be ba priest siakabadae mi atota edo sisina, Imo Keriso ta, Dave da Mai? Edo Iesu mi sisina, Awara edo embo da Mai goteiawo goroba de ingo be da anumaina, edo utu poraga de daedo gumaina. Ko priest siakabadae mi woru ika kereite sisina, Nongain tedo gari nei kaen jipapa eni? Tari beiae gewa, ge itomane rori? Ko berari betarate bekumba esitera. Edo nenei mi tuturo edo kosiwa esitera edo ainda dombu doedo dedo sitero, Mina te; ko ambodani undedo ko awamane da ingo mi vejitera.

Ko ongo de Peter du da arapa da isiri, priest siakabadae da singa eutu dakaki mi gupeite, Peter gosisina ni aveiri edo gido sisina, Imo angoo Iesu Nazareth mai de daedo itota. Ko bero edo sisina, Teteta amone na dareite gae ena. Edo kasiri da wotesiri kokora aoro sisina. Edo singa eutu mi gido ko tuturo tekago esisina, awamane aikae pepetegedo iteroo ainde sisina, Nei dakaki re evire awamane da iai. Ko tekago bero esisina. Edo siaka amboda awamane aikae pepetegedo isiute ami sitera, Ge be imo awamane da; imo Galilee embo. Edo tuturo edo akuta usimbesei edo ge tedo sisina, Embo ge tewa amone na danena. Edo borae kokora iji nei aoro sisina. Edo Peter mi ge kotembesisina, Iesu mi tedo sisina, Kokora aoro iji tote tae isirari, gisi ine mi iji tamonde na bero eio. Edo awa dubo mi sitedo, ko ji sisina.

## TUESDAY EASTER GISI

*Epistle Embo. Isaiah 50. 5*

**B**ADA God mi dengoro nato apigesira, ko na ge jindae, Bko ainda amboda na dodo overegae. Vevedegari da gun nato pietena edo opo betoto utora awa da; dombu nato me de kosiwa de da na onjigae. Bada God mi na kondade aina ne; awa tedo na jiro takukura ae. Awa tedo be gadera mi dombu nato dabu takimbetena, ko kotembetena na me gain ae. Ami na beiamana tevira, demo nato da isira; ai mi nato iai gaiaini? kaen inono de

## PARI AE EPISTLE AE GE EWA TARI

enane tae; itoro nato averi? nato iai aikae purare tae. Bada God mi na kondade aina; ai mi na bekumba aini? gi, berari woru engo beiae ara, uwe mi inaina.

Itomane iai ai mi Bada adu eite ko singa ika da ge be budo eiri? embo munia da pepeta evira ainda parara itae, Bada da dao kotembedo, ko God ika da iai detegaina. Gi, imomane berari ni ewa, ko ni ao inemane iade jijiewa; niao ikamane da beriberi da pepeta ave, ko ni ao eowa awa toropu da. Eiwa ingo nato da kumbu; dubo beiae ari da jitao awave.

*Ge Ewa Tari. Mark K. 15. 1*

**E**DO iji dakaki sipo de priest babain de babadegari de love egeregari de ge tari berari de mi ge jirido, Iesu bundedo, kundo aundo Pilate de pitero. Ko Pilate mi ainde atota edo sisina, Imo Judaea embo da Daotari ta? Edo mina sisina, Teteta awara. Ko priest babain mi berari awa bekumba esitera. Ko Pilate mi beba ainde atota edo sisina, Ro mina tae eta ta? berari mi imo bekumba era gi. Ko Iesu mi iji nei de mina siaka ro tae; ango edo ko Pilate mi kore esisina.

Ango edo bondo da ari ko bundari de dakaki awamane da iai udeinesina awa, awa tedo gositera awa. Edo dakaki isiri jijirisina dao ika Barabbas, awamane de daedo erari evira bujitera awa embo erari da detero besitera. Edo jisi visido tuturo edo tedo gositera matu einesina awa awamane da iai are tae. Ko Pilate mi mina sisina, Judaea embo da Daotari itomane iai udeganate jipapa evi ta? Ami gido jitari embo, priest babain mi pitera. Edo priest babain embo jiwae etero dubo vevera esitera edo Barabbas awa awamane da iai udarate tedo. Ko Pilate mi be ba mina tedo amindemane sisina, Amo nongo ani Judaea embo da Daotari teowo amo? Ko aoro tekago gatedo sitera, Cross da de. Edo Pilate mi jipapa edo embomai ari dubo damo orote tedo, awamane da iai Barabbas udedo, ko ongo de Iesu awa vededo amindemane pisina cross da dorote tedo.

Ko itoro embobo mi kundo aunsitera arapa do da, amo Praetorium, edo jisi matawa daotera. Ko woru ijimbari pietero aunsina, edo crown ni bebe engedo, ainda kopuru da pipiteite; ko tuturo edo ategedo sitera, Oro, Judaea embo

## PARI AE EPISTLE AE GE EWA TARI

da Daotari! edo kopuru da apua dedo, kosiwa edo, baongo dadari edo ainda do da tumondebain esitera. Edo ango de tedo jijireite woru ijimbari awa udegedo ko woru ika ito awa pietero avira. Ko bundo idegetera cross da dain tedo.

Edo embo dakaki pepeta evira awa duperu, Simon Cyrene ango, butu da ango wowotevira awa, Alexander ae Rufus de da mamu, ko amboda amboda edo ainda cross kumbare tae. Edo butu Golgotha kundo auntera, Kopuru akou da iai teora, ainda. Edo wine ae doino dedo awa piedo gain pietero; ko doturisina. Edo cross da doreite; ainda tamo woru awo kando edo, keleru esitera ro dara dara kumbari tedo. Edo ora tamonde de, cross da doritera. Edo bekumba ari da ove ikane pisido sitera; JUDAEA EMBO DA DAOTARI. Ko ainde daedo dadua ari tote cross da doritera awa, nei be da, nei anda da: edo pepeta esitera awa ami gadumbeteite, kopuru govegove eite sitera, Ine tempela sitedo, ko iji tamonde jijiota, akuta edo kaviegedo, cross da ango wote. Edo ango priest babain de ove egeregari de mi tedo jirido sitera, Kano awa euri kaviegotore, ko akuta edo kaviegae eira. Keriso Israel da Daotari ra cross da ango wotarate, kaen gido ko kaen kotemane. Edo awamane ae ainde daedo cross da doritera awa gadumbesitera.

Edo ango de ora 6 gumbiri butu berari munia esiri ora 9 esisina. Ko ora 9 de Iesu ge bededo tedo aoro gatedo sisina, Eloi, Eloi, lama sabacthani? tevira amo, God nato, God nato, nongain na dodo taingetesi? Edo nenei aikae pepetegedo isiute ami gido sitera, Gi, Elijah daosira. Edo dakaki mi tumundo, puiba da vinegar dodesiri be da esiri apua da piedo, piesiri injiri, sisina, Dou, kaen gane, Elijah gupeite piari wotare. Edo Iesu ge bajina tedo aoro gatedo asisi ika pisina. Ko tempela da gagaregari awa keredo tote esisina tutu de gombu de. Edo ango de kenturion aikae petedo isiute ami gido ango asisi ika piesiri, sisina, Awara embo eiwa God da Mai.

## WEDNESDAY EASTER GISI

*Epistle. Heb. 9. 16*

**A**NGO de tari gari itevira awa, ounda ami einesina awa ainda betari itare tae; jiti gari goroba ango de betari

gisi isira; ko ango de ami einessina awa isira, goroba edo gain eiri ta? Awa tedo tari gari dakaki ororo ika mi ao esisina. Ango edo re ango de ge berari Moses mi embo berari de sisina, ge ango, ox mamai de goat de da ororo kumbira, un de tu edapatari, ae hyssop de daedo, ko book de embo berari de awa esiri betegesitera, sisina. Emone ge tari da ororo, ge tari gari God mi itomane iai tevira awa; ko ango oro de singa ari da rorae berari de ororo mi esiri betegesitera. Edo teteni kota, ge ango, berari ororo mi beiamana esisina. Ko ororo dodari itae, ko darari itae.

Awa tedo ari utu da ango mi awamane da asisi emi mi beiamana are tae; edo ari utu da ango amomo rorou dave mi eiwa ango ae. Keriso iai kotopu da ingo mi jiiievira da torae, kariwa ika ango evira awa, edo utu be da, ko God da gisi da kaena embo boroko idegae; ko iji jiwa de pia, priest bajina mi ango iai kotopu da totorevira dumberi berari de, ororo ikaito ae de daedo; ango edo iji jiwa de butu tutu da ango mamato are tae; edo boroko iji dakaki butu gombu da idegesira akuta rorou ari mi jimbo beiae gindare tae. Ango edo embo oru esira iji da de betarate, edo ainda amboda atota ari; ko Keriso ango iji da de pisina ko jiwa de jimbo beiae kumborote tedo, ko iji da da gagane de idegaina ta ko jimbo beiae itae, ari kaviegari embo awamane da iai sima evira awa.

*Ge Ewa Tari. Luke K. 22. 1*

**E**DO Bread badae da bondo atutumbeteira, Darutegari teora. Edo priest da embo badari ae ove egeregari de mi kakoa edo nomi daro beteikate. Edo amo embo adu esitera.

Edo Satan Judas da do da totorisina, Iscariot teora, awamane 12 edo awa da. Edo awa baundo priest da embo badari ae tutu de daedo ge dada tedo, nomi amo omi onjiga tesiri. Edo omo topa dubo beiamana esiri mane piari ge sitera. Edo tega esisina: edo iji kakoa edo omindaka mi onjiga tain tedo edo jisi itae.

Edo Bread badae da iji gumbiri, darutegari desira. Edo Peter de John de baborote sisina, Baundo darutegari kaena embo beiamana awa, edo kaen inane. Edo ami ainde sitera, Inda jipapa esi te beiamana ore? Edo

amindemane sisina, Nasi da torido, embo imomane tuvedo un sigi da kundo: da oro da baunteiari ainda amboda amboda ewo. Edo oro tutu de site tewo, Atopatari mi imo de site, Etegamai da oro indari, darutegari inane ambodani naka de daedo? Edo oro opeta siakabadae de piari gave, rorae de; ounda beiamana ewo. Edo baundo da amindemane sisina awa tuvitera; edo darutegari beiamana esitera.

Edo iji gumbiri anumbesisina, ae apostolo de daedo. Edo amindemane sisina, Darutegari emo imondemane daedo indari jipapa jiwa de ena, edo amboda mamato ana; edo imondemane tena, na mana inana, gisi God da basileia da itae edo petugari. Edo akou kundo, ategedo sisina, Eiwa kundo itomane iai kadoeu: edo imondemane tena, vine da ve mana eima inana edo gisi God da basileia purari. Edo bread kundo, ategedo, edo engegedo, amindemane picite sisina, Eiwa tamo nato imomane embo pipisisina awa; eiwa eu, kotembu kotembu nato. Edo itae injido edo akou ango, sisina, Akou emo tarigari teka ororo nato da, imomane awa tedo verougema. Ango edo na onjiga tesiri ominda ipare namo de daedo tenemba da isira. Embo da Mai baunteiri ango jirido, tena beiae ainda iai onjiga tesira awa. Edo omi be edo dada tedo katedo, amo ai mi indawara ari emo.

Edo ge omi da iai eriri, indawa embo badari nakakare teteri. Edo amindemane sisina, Etene da daotari ainda iai gisi jiari ika isira: edo omi da iai gisi jiari isima eira awa Paira embo tedo era. Tena imomane ango ae; ko itomane iai embo be amo be mai siaka mi itarago eiari; edo embo badari amo be kera ari inge. Edo indawara siakabadae, anumbari embo owa, ta buro eira owari? anumbari owa ta? edo na itomane toropu da itena be kera eona ango. Edo imomane namonde daedo bawari nato de itewo jirira; edo imondemane basileia tena, ango Maka mi namo de sisina, edo tenemba nato da injido, tu injido eu; edo anumba da anumbedo, Israel mai da jisi 12 katedo giu.

Simon, Simon, Satan imomane kumain tesira wheat be jiparago esiri sira; edo na imo embo benunu tetena, edo kotembari ito imo dodo bamain ae; edo imo wareregedo embototopo ika takimbedo ji. Edo amo ainde sisina,

Bada, imo de daedo bundari oro da ta betari da babetena. Edo sisina, Imo de tena, Peter, kokora boroko aoro tain ae, ed imo iji tamonde bero namonde eio, edo teio imo na kotembae eota.

Edo amindemane sisina, Teteno bamain eite, tepo ikamane money kaita ae rorae kaita ai tai woru de, kumain jipapa etevi ta? Edo sitera, Tepo. Edo amindemane sisina, Tena boroko, embo money kaita da mi da iai isirari gido, awa kumbare, ango rorae kaita de; edo embo itaere, apuregari ikaito piedo kasiwo kumbare teio. Edo imondemane tena, eiwa gagurevira nato iai ainane, Edo ainda beiae embo de daedo ajijigena; nato iai isira awa gombu isira. Edo omi sitera, Bada, ainda kasiwo tote. Edo amindemane sisina, Awara.

Edo idegedo, da evira da ango, peji Olivet da bambiri; ambodani awa amboda amboda esitera. Edo iai da gundo amindemane site, Benunu tewo imomane bawari da torove. Edo awamane dodo baundo, ganuma aungari da, baongo dadari edo benunu sisina, tedo, Maka, jipapa e, edo akou eiwa nato iai kumbate: edo gido na jipapa ae, rata imo, gido are. Edo anela utu da ango idegedo esiri oka esisina. Edo dubo beiae be beiae esiri, benunu ikana de tesiri, iworu ororo butu da wotarago esisina. Edo benunu da erorisina, edo ambodani ikaito da iai gundo tuvedo dubo beiae esiri, aundo ruvegedo, amindemane sisina, Nongain tedo aundo ruvegetevi? eriu benunu tave, imomane bawari da torove.

Ge sisina, edo jisi, edo Judas teora, awamane 12 edo awa da, ami gisi da baunsisina; awa Iesu da iai atutumbesiri munegesisina. Edo Iesu ainde sisina, Judas, embo da Mai munegeteite onjiga teta? Edo aikae isima esitera mi gido nongo arate sitera, Bada, kasiwo mi dare? Edo da priest badari da singa dedo dengoro be da kautugesisina. Edo Iesu mina sisina, Omo dou. Edo dengoro jiri dave esisina. Edo Iesu priest da badari de ae tempela tutu de ae begogobagogo de ainda iai gupora awa sisina, Idegeu, be beono de ingera, ae kasiwo ikamane de ae ikuta ikamane? Ango berari imondemane tempela da kaen itona, edo ipa itomane nato iai ududugae; tena eiwa iji itomane ae munia da goroba de.

Edo ami awa ba tanjido jido, priest badari da oro da

kundo guputera. Edo Peter da aikamana amboda amboda esisina. Edo ni arapa toropu da edo doregedo iteru, Peter awamane da toropu da anumbesisina. Edo parara anumbesiri, gagara gido da jisini edo sisina, Ae emi de daedo isiri jiriri. Bero edo sisina, Gagara, na awa kotembae. Edo siaka amboda, embo nei mi awa gido sisina, Edo ami da iai itota. Edo Peter sisina, Embo, na ae. Edo ora da itae esiri, edo embo nei mi ikana de tedo sisina, Awara embore emi de da ae ainde daedo iteru jirira; amone Galilee maina. Edo Peter sisina, Embo, ro tesi na gae. Edo iji da ge tesiri kokora aoro tesiri; Edo Bada wareregedo, Peter gido. Edo Peter Bada da ge kotembedo, tevira ango, Kokora boroko aoro tain ae, edo iji tamonde na bero eio. Edo idegedo, ji ikanade sisina.

Edo embo Iesu jido isite tedo jirido dedo ero. Edo jisi doedo gain tedo esitera, Nakare mina tewasi: imo ai desiri? Edo jiwae nei tedo edo tedo jirido.

Edo sipo atesiri enembo da begogobagogo jisi doregetero, priest da badari, ae ove egeregari de; edo ge jirari da kundo baundo sitera, Imo Keriso rata, nakare tewasi. Tena amindemane sisina, Tano mana kotembawa, edo imondemane ge tedo gain edo mana mina tetewa. Edo boroko manana eimango embo da Mai God da goroba da ipa be da anumaina. Edo jiwae omi sitera, Edo imo God da Mai ta? Edo amindemane sisina, Tedo ewa na ango. Edo omi sitera, Kaen nei ro gari jipapa ani? Kaena ainda beda gido ena.

## THURSDAY EASTER GISI

*Epistle.* 1 Cor. 11. 17

**K**O ge eiwa imondemane oru ena, na imomane dasiga Kae: imomane beiamana embo dada utae ra ta ko beiae. Edo gisi, ango de ekalesia da dada utewo, dengoro mi gena, sitari itomane iai; ko isiri ango ge be eona. Edo evekara ari itomane iai itare, edo embo dave mi itomane iai onjiga tare. Awa tedo imomane dada utewa, ko imomane Bada da turo indari injido gae; indeiri ko berari nenei da jisi da turo indari ika kupera; edo embo dakaki beji apeiri, ko nei da mi duteira. Ro! Oro itomane itae ra indowa ainda, ko tu indowa ainda? Ta God da



ekalesia beuto edo ewa ko awamane da iai ro itae awa cowo jiro damo edo eita? Na nongonongo imondemane tani? Eiwa embo imomane dasiga anate tano? Na imomane dasiga ae. Bada da iai kumena ami imondemane teteno tembukera esira, edo Bada Iesu munia ainde onjiga tevira, bread kundo ategedo tena, Emo tamo nato imomane embo; eiwa ewo kotembu kotembu nato. Ango edo injido dodo, akou awa, tena, Akou emo tari gari teka ororo nato da. Ango de injido eiwa ewo, kotembu kotembu nato. Ango de bread indeite ko akou tu indeite ewa, Bada da betari oru ewa, ko amboda gumaina. Awa tedo embo Bada da bread indae dumbae ai ta, ko akou tu indae dumbae ai ta, amone Bada da tamo de ororo de embo bekumba aina. Ko embo akuta katedo, anga bread awa injido, ko akou awa tu injido aina. Ko ami indeite, tu indeite eira, bekumba ari ika indeite eira, amo Bada da tamo kotembae. Eiwa tedo jiwae itomane iai sivedo, amundo era, edo tote ae aundo ruvegetera. Kaen akuta kotemane tae, edo kaen kateure kae. Ango de kaen kateuri, Bada mi kaen vededo eira, ko ae butu de daedo kaen bekumba ain ae. Awa tedo, nanonameji nato, anga de dada utedo inain tedo ewa, sima akuta mina ara ewo. Embo beji amundo, oro da inaina, ko dada utewo, katari da gumbove. Edo gumana anga de, nenei sia ana.

*Ge Ewa Tari. Luke K. 23. 1*

**J**IWAE ika doregari erido, Pilate da do da kundo guputera. Edo be bekumba edo sitera, Tuvetera ami jisi natokare doveregesisina, edo Caesar da rorou pieure kae tedo, sisina amone Keriso, daotari. Edo Pilate tedo gain sisina, Imo Judaea mai da Daotari? Edo ainde mina sisina, Teteta awa. Edo Pilate priest da badari ae jisi de site, Na beiae embo einda iai tuae. Edo ami nei ikana de edo sitera, Embo tedo ao gaiari embore Judaea da atopasido eira, edo Galilee be edore da iai einda. Edo Pilate awa gido, tedo gain sisina, amo Galilee mai ta? Edo gido, amo Herod da mi gisi jido eira ainda isima eira, edo Herod da iai tesiri baunsisina, amo iji engo de Jerusalem da isima eira awa.

Edo Herod Iesu gido dubo beiamana esiri, amone iji jiwae gain jipapa esisina: ainda ge gido: ae iwata nongori

gain jipapa esisina. Edo ge jiwae re tedo gain teuri: edo mina tae be tae. Edo priest da embo badari ae ove egeregari de petedo bekumba ikana de esitera. Edo Herod ae itoro embobo ika de dodo, tedo jirido, woru ijimbari petero ombiri, edo Pilate da iai tesiri tekago baunsisina. Edo Herod ae Pilate de engo de umo jijitera, edo gisi amo jiwa duduno mina ara eora.

Edo Pilate priest da badari ae embo badari de edo embo dao tedo amindemane sisina, Embo eiwa kundo guputewa, be embo doveregari inge, edo na jisi itomane da tedo gain site beiae embo einda iai bekumba etewa amo tuae: edo Herod anga: awa tesiri natokare iai tekago gupusina; edo ro ae mina topa betari. Na awa tedo vededo udegane. Edo jiwae dao inononde tedo sitera, Embo eiwa kundo baundo, natokare iai Barabbas udege: amone erari nasi da evira awa tedo torari oro da piawa re. Edo Pilate mi tekago amindemane tesiri, Iesu udegari jipapa esiri; edo ami aoro gatedo sitera, Cross da ewasi, cross da ewasi. Edo iji tamonde amindemane sisina, Nongain? ro beiae embo emo esiri? Na ainda jimbo tuae edo ainda mina topa betari; awa tedo vededo udegain ena. Edo omi ge ika ikana de bajina tedo sitera taro cross da dorote. Edo ge ika manamana esisina. Edo Pilate sisina teora awa ain tedo. Edo ami, erari ae daribetari awa tedo torari oro da piewa ba udegesisina jipapa eora tedo orote.

Edo kundo gumbiri, Simon Cyrene mai ami da nasi da gupeite jido gapo da cross pietero duriri, edo Iesu ambo edo kumain.

Edo amboda jisi siakabadae mi amboda amboda esitera, edo eutumai dubo daduretera ji tero. Edo Iesu mi wareregedo amindemane sisina, Jerusalem da adema, na ji teove, ta imomane, ae mamai ikamane da ji akuta tewavi. Gido iji gupera, engo tare, Ero da iai beiamana, edo osi mai kumbai eora, edo ami pia indae. Edo anga de be edo peji de site tore, Durudo nakare pasiu: edo pamo, Nakare bobokumbave. Edo eiwa ni awae da ari, edo ro mumunia da ari.

Edo nenei tote, beiae ari embobo, ainde daedo kundo daro betorote tedo.

Edo iai Kopuru. Akou teora ainda gundo, ounda, awa cross da doritera, edo beiae ari embobo, nei be da, nei

## PARI AE EPISTLE AE GE EWA TARI

anda da. Edo Iesu mi sisina, Maka, awamane kotembedo dowasi, omi eora amone kotembaera. Edo tamo woru topa dada' kando edo keleru aungesitera. Embo embo petedo isiute gido. Ae embo badari be de daedo tedo jijireite sitera, Embo nenei euri kavigetora: amo akuta edo kavigain eiri, amone God da Keriso namo avigarira. Edo itoro embobo de daedo tedo jijirero, ainda iai gumboro, vinegar piedo sitera, Imo Judaea mai da daotari ta, akuta edo kavigewasi. Edo ove ikane piedo, EIWA JUDAEA EMBO DA DAOTARI.

Edo beiae ari embore da oreko eira awa tedo jijireite sisina, Imo Keriso ae ra? imo kaena ato kavigana. Edo nei mina sisina edo ge tedo sisina, Imo God adu ae ra, edo imo bekumba da da awara? Edo nagenawara: beiae ingenato mina bunena inge: edo embo emone ro ae dumbae ae. Edo sisina, Iesu, na kotembe, basileia ika da gupeta ango de. Edo ainde sisina, Awara imo de tena, boroko imo nagenawara daedo Paradise da itana.

Edo boroko ora 6 gumbiri, munia nasi jiwae da pira edo iji munia esiri, ora 9 gumbiri, iji dosira; edo tempela da gagaregari toropu da kerisina. Edo Iesu dao siakabadae tedo, edo sisina, Maka, ipa ito da asisi nato piena: edo awa tedo api esisina. Edo kenturion mi evira awa gido, ami God da dasiga edo, sisina, Awara, emo beiamana ari embora. Edo jisi miwae mi gari iai eminda doregedo, esitera awa gido, opopo dedo, tekago baunsitera. Edo embo ika jiwae edo eutumai daedo Galilee de amboda amboda eute da aikamana petedo, eiwa gositera.

## GOOD FRIDAY

### *Pari*

**G**OD Goroba jiwae, tedo gera, oro be ito eiwa do edo Gjisi ito tu da ewasi, awa embo Bada natokare Iesu Keriso rorae beiae embobo da ipa da onjiga piewa awa, edo cross da betena, awa boroko wasiri de evira, edo imo ae Asisi Kotopu de daedo matawa gisi jijiowa, God dakaima natopo. Amen.

**G**OD Goroba jiwae, Matawa isite, Asisi ito mi Ekalesia berari gisi jido esiri beiamana evira; Benunu teora

## PARI AE EPISTLE AE GE EWA TARI

awa, embo berari Ekalesia ito kotopu da itera awa embo, budo ewasi, embo berari ainda jimbo da de ainda ari da de imo be kera orote; Bada ae Toregari natokare de, Iesu Keriso. Amen.

**G**OD, Do isite, embo berari esiteta awa, eota awa ro ge Gjindae, edo rorae beiae embo da betari jipapa ae, ango ae ra ta wareregedo wasiri arate; Judaea embo, Islam embo, kotembae eora awa, edo kotembae dumbae eora awa, berari do ewasi, edo gae ari, do okain ari, ge ito isisimbari ato doworote; edo oro be ito kundo gumbatate, Bada beiamana, ango Israel mai da deposi ae da de kavigore, edo pua dadaima da dada edo ara, ainda Tao ari dakaki, Iesu Keriso Bada natokare, awa imo ae Asisi Kotopu de wasiri de gisi jijiowa, God dakaima natopo. Amen.

### *Epistle. Heb. 10. 1*

**G**E, awa rorae beiamana amboda gumbari ainda asisi, Gko rorae be ae gido rorou dawadawa mi dumberi berari pipikapapika pipiora awa naji atutumbotora awa mana beiamana arate. Ango de piari doworote ta rori, gido tumondebain eora awa beiamana edo, buria kotembae doworote? Tena rorou piari ami mi rorae beiae kotembu kotembu dumberi berari eora. Ox ae goat de da ororo jimbo beiae mana kumbarate. Awa tedo nasi da gundo, tesiri,

Rorou de piari de imo ge tae

Ko tamo na embo sia esitera:

Rorou avigari de de jimbo beiae embo imo jipapa ae:

Ango de tena, Gio, gundo

Jipapa ito anate, God.

Gisi tesiri, Rorou de piari de rorou avigari de jimbo beiae embo imo ge tae, ko jipapa ae (ge ango pipiora awa), engo de tesira, Gio, gundo jipapa ito anate. Da kundo, da da gagane evira. Jipapa ami mi kaena kotopu etera Iesu Keriso da tamo iji da pipitevira ango de. Edo priest berari iji da doae petedo singa edo iji jiwae rorou da pipitora, ami mi jimbo beiae naji kumain ae: tena ami jimbo beiae da rorou da iji da pisido, God da be da anumbedo,



ainda gitopo ainda tai dapane orote sima esisina. Da pisido kotopu eora awa esiri petugesitera. Ango Asisi Kotopu kaena embo tutu gotevira; gisi tedo,

Eiwa tari gari awamane ae da de anate  
Iji awamane amboda, Bada mi tesira:  
Ge nato ainda do da piana  
Edo ainda dubo da gaiana;

engo de tesira,

Edo ainda jimbo beiae edo ainda jimbo bebegae iji nei kotemain ae.

Ko einda doari isiri, ounda jimbo beiae da rorou ae.

Awa tedo, nanonameji, goroba edo iai kotopu da Iesu da ororo mi tonanate, begata de ami mi kaena embo sia esisina awa, begata teka, wasiri de, gagaregari toropu da, ainda tamo: edo priest siakabadae God da oro da tamo da; do beiamana edo, ge be edo atutumanate, do kaenato ge beiae ae, edo tamo kaenato un beiamana mi teianate; sima ari da ge jido burau ain ae; ge sisina awa sima dave eira; edo mina kotembedo katedo, dubo bari de jimbo beiamana de da ge tana—dada utari domain ae, embo nenei da jimbo ango, ae rata ge jiwae tanate edo domain ae, iji gumbari gido.

*Ge Ewa Tari. John K. 19.1*

**A**NGO de Pilate mi Iesu kundo vejisina. Edo itoro embobo crown ni bebe engedo ainda kopuru da pipiteite woru ijimbari petero ombiri edo ounda iai gundo sitera, Oro, Judaea embo da Daotari! edo ipa mi doritera, Edo Pilate tekago wotedo amindemane sisina, Giwo, ito-mané iai kundo wotena, ko imomane kotembawa na buria ainda iai tuae. Awa tedo Iesu wowosisina, ae crown ni bebe, ae woru ijimbari de. Edo Pilate mi amindemane sisina, giwo, embo. Awa tedo: priest babain de baba-degari de awa gido dao sitera, Cross da de, cross da de. Pilate amindemane sisina, Imomane kundo cross da dewavi; nane ainda iai buria tuae. Judaea embo ainde mina sitera, Ge natokare isira, edo ge ami mi betarate, awa akuta God da Mai esisina. Awa tedo Pilate: ge eiwa gido adu be esisina, edo Praetorium da tekago torido Iesu de tesiri, Imo nonda esi? Ko Iesu ainde ge mina

tae. Awa tedo Pilate mi ainde tesira, Ge namonde tae esi ta? imo gae ta rori, nato iai badari isiri udeganate, edo badari isiri cross da danate? Iesu ainde mina sisina, Badari ito nato iai itae ra ta pamonde piorote: awa tedo na ito iai pipitevira ainda buria jiwae. Eiwa gido Pilate mi udegari jipapa esisina: tena Judaea embo dao tedo, sitera, Imo embo eiwa udegedo Caesar da nameji ae: embo berari akuta daotari eora awa Caesar da ge jindora. Awa tedo Pilate mi ge eiwa gido Iesu kundo wotedo katari da anumbesisina iai dao Gano, ko Hebrew ge Gabbatha. Darutegari da sirigari; ora 6 ango. Edo Judaea embo de tesiri, Giwo, Daotari itomane. Awa tedo daositara, Kundo aimbu, kundo aimbu, cross da de. Pilate amindemane tesira, Daotari itomane cross da danate ta rori? Priest babain mi mina sitera, Natokare iai Daotari ro ae ra ta Caesar. Awa tedo ango de amindemane pipisisina cross da dorote tedo.

Awa tedo Iesu kuputera: edo wotedo, ainda cross akuta jijisina iai dao kopuru akou da iai, ko Kebabrew ge, Golgotha ainda cross da doritera, edo awa ae da de nenei tote, kupo nei da da, edo Iesu toropu da. Edo Pilate mi ove gaiedo cross da pipisisina. Edo gagurisina, IESU NAZARETH MAI JUDAEA EMBO DA DAOTARI. Awa tedo ove eiwa Judaea embo jiwae ajijigesitera: iai Iesu doritera awa nasi aikae: edo Hebrew ge, Rome ge, Greece ge gagurisina. Awa tedo Judaea embo da priest babain Pilate de sitera, Judaea embo da Daotari gaiote, ae ra ta, Na Judaea embo da Daotari sisina. Pilate mina sisina, Gaietena awa gaietena.

Awa tedo itoro embobo, Iesu cross da dedo dodo, ainda woru kundo nei tote nei tote kando esitera, itoro embo da rorae da, dabua de daedo: dabua awa pirae ra ta pamo mi matawa gaedo esitera. Awa tedo ge mina sitera, Kaen kerigain ae ra ta kelero anate, andari: ko ove petugarate tesira awa,

Woru nato amindemane iai kando edo,  
Dabua nato embo kelero esitera.

Awa tedo eiwa itoro embobo mi esitera. Ko Iesu da cross da tuta da petetera ainda ai, edo ainda ai da dao, Cleopas da aro Mary, edo Mary Magdalene. Awa tedo Iesu ainda

## PARI AE EPISTLE AE GE EWA TARI

ai gido, edo ambodani karupa evira awa aikae petesiri, ai de tesiri, Eutu, gio, mai ito. Ango de ambodani de tesira, Geo, ai ito. Edo iji ango da ambodani ainda iai da kundo aunsisina.

Eiwa amboda, Iesu, berari itae gido, ove petugarate tedo, tesira, Na un udo eira. Ounda pietera sigi vinegar atoe: puiba vinegar atoe hyssop da pisido ainda be da kundo guputera. Awa tedo Iesu vinegar kundo sisina, Itae: edo kopuru gotugedo ainda asisi piesiri wowosisina.

Awa tedo Judaea embo Sirigari gido, ko tamo cross da sima eure kae sabate da (Sabate awa iji ewowo) Pilate de tedo gositera tai amindemane ierigorote edo awamane kundo aimorote. Awa tedo itoro embobo da da tai ierigedo edo ainda gagane ainde daedo doritera awa: ko Iesu da iai da gundo, matu betesiri gido ainda tai ierigae; tena itoro embo da gi mi dedegi gagurisina, edo borae ororo ae un de wowositera. Edo gosisina awa gari tutu esisina, edo ainda tutu ge be, edo ge be tedo kotembesira, imomane ge be awate awa tedo. Eiwamane esitera ove petugarate tedo, tedo, Ainda vetu da ierigain ae. Edo ove nei mi tesira, Gaguritera awa jisi mi gara.

## EASTER TEKA DE

### *Pari*

**P**IEWASI, Bada, edo nakare Mai ito beiamana Ari kaviegari natokare Iesu Keriso ainda betari da bapaito esitera awa, jipapa beiae pipikapipika aro betari, ango de awa ae da de goiara; edo embake jisi edo betari da manguro darutegarago, erari dubo beiamana ari da aimbara; awa embo, betena awa, edo goewa awa, edo nakare embo tekago enina awa, Mai ito Iesu Keriso Bada natokare. *Amen.*

*Epistle.* I Peter K. 3. 17

**B**EIAMANA, God mi jipapa ari, jimbo dave embo mamato ave tae, ko jimbo beiae embo ae. Keriso ango iji dakaki de jimbo beiae embo mamato ena, jimbo beiamana embo mi jimbo beiae embomai awa embo, God da iai da kaena kundo aimbore tae; pisi mi dewo betena, ko asisi mi enu kaviegena, ami mi aundo asisi bundari oro

## PARI AE EPISTLE AE GE EWA TARI

da itora awa awamane atopaposisina, awamane awa matu ge jindewa, ango de God da sima ari Noah da iji de sima eiri, ko ark sia edo eiri, ko ami mi idewago, awamane asisi 8 un mi kaviegega; ko be moka awa boroko esiri kaviegetewa, ko amone bapataito, pisi dono piedo dowari ae, ra ta dubo dave da atota ari God da iai, Iesu Keriso da erari mi; awa utu da visina, God da be da isira; edo anela de badarikadari de ko goroba ari de mi kera edo era.

*Ge Ewa Tari.* Matt. K. 27. 57

**E**DO munia jiriri rorae embo Arimathaea mai ango ami egupusina, Joseph teora ami, amo Iesu da ambodani, emi Pilate da iai aundo ko Iesu da tamo tedo gosisina. Edo Pilate mi sisina piain tedo. Edo Joseph tamo kundo, woru linen dave da doedo, ko ainda embake jisi teka da piesiri aunsina, ganuma da dorisina ainda; ko ganuma siakabadae embake jisi be da awa miminegedo ko aunsisina. Edo Mary Magdalene de Mary nei de ounda isitera, betari jisi ponda anunumbedo.

Edo sipo de, Sia ari amboda, priest babain de Pharisee de mi Pilate da iai da utedo isite sitera, Embaoba, nakare kotembetera, amo pitawa, wasiri de isite sisina, Iji tamonde da amboda tekago enana. Awa tedo ine teio tato embake jisi sima dave eiraro iji tamonde are, edo gido ainda ambodani mi gundo taimbaro, ko embomai de betari de tedo erari ge teore, edo amboda pitawa beiae eure gisi ango ae. Pilate mi tedo sisina, Sia ari itomane itera ta, aundo sima edo giu. Ango edo aunsitera, edo embake jisi sima dave ero, ko ganuma kariwa esitera, edo sima ari amindemane daedo itera.

## EASTER IJI

*Sipo de Psalm Puwavi, ia tanate tain ae, rata Anthem eiwa ia tara ta tepo tara.*

**D**ARUTEGARI kaenato rorou evira, Keriso awa: Awa tedo bondo anate.

Badari matu mi ae, badari bebegae beiae de mi ae: tena bread badae mi kokopi de ge be de. I Cor. 5. 7.

**K**ERISO betari da erorisina, ko amboda tekago betain kae: betari iji nei de ainda iai badari itae.

## PARI AE EPISTLE AE GE EWA TARI

Ko ango de betesira, jimbo beiae da iai betesira iji da: ko ango de kaviegesira, God da iai kaviegesira, God da iai kaviegesira.

Ango giwo, ko inemane mi, jimbo beiae da iai betetewa: edo God da iai kaviegetewa, Keriso mi Iesu. Rom. 6. 9.

**K**ERISO betari de etero erira: awora awa da gitago. Embo mi betari gumbiri gido: embo mi betari de erari.

Adam da iai berari betetera: ango Keriso da iai berari aro wasiri orote. 1 Cor. 15. 20.

Mamo de, Mai de, Asisi Kotopu de da iai: parara itesira.

Ango teka de: boroko, edo natopo itaina. Amen.

### *Pari*

**G**OD Goroba jiwae, Inemi Mai ito Iesu Keriso de, betari daginegedo, wasiri matawa itari da manguro natokare iai bejiteta; nakare burau tedo gera, edo tone-mbari ito gisi aundo, do natokare da jipapa beiamana pipitota, ango de kondade ato dawa beiamana ara; Iesu Keriso mi Bada natokare, awa Imo ae Asisi Kotopu de daedo, wasiri de gisi jijiowa, God dakaima natopo. *Amen.*

*Epistle. Coloss. 3. 1*

**A**NGO edo Keriso da daedo erewa gido, ari ikane kakoa Aeu, Keriso itevira awa, God da ingo be da anumbedo itevira awa. Ari utu da awa dubo mi siteu, ari butu da amo dou. Imomane betetewa, edo kaviegari itomane Keriso de daedo God da iai onjigesira. Keriso, kaviegari kaenato, idegaina ango de, imomane ae ainde daedo ae parara de idegawa. Awa tedo patu itomane butu da itera awa dawo betore; a ipu da, dono, dubo vevera, beiae jipapa ari, dubo da ari, amo ikuta kewari da tumondebain arira; awa tedo God da duduno ge jindedegari da mamai da iai gupevira; amimi matu pepeta esitewa, ango de ainde itewa.

*Ge Ewa Tari. John K. 20. 1*

**W**EEK da iji da, Mary Magdalene sipo atae, munia de, embake jisi da gumbira, engo ganuma jisi da apepegesiri gira. Awa gido ainto tumundo Simon Peter da iai

## PARI AE EPISTLE AE GE EWA TARI

da gundo, edo ambodani nei Iesu dubo bira awa, tesiri, Bada jisi da kundo aunsitera, edo inda ango pieteri nakare gae. Awa tedo Peter erido, edo ambodani nei, edo jisi da auntera. Edo daedo ainto tumbera, edo ambodani nei mi Peter daginegedo gisi jisi da isipevira, edo jino edo woru linen itera awa gosisina, tena torae. Ango de Simon Peter amboda amboda gundo jisi da torira. Edo woru linen avetera gosisina, edo gobe kopuru da itevira awa linen de daedo ae, rata akuta ruvesiri, ainde iai da. Awa gido ambodani nei gisi jisi da isipevira awa torido, gido, ge be esisina. Ko engo de ove gae eora, betari da erarate. Ango de ambodani ainde iai da tekago aunsitera.

### EASTER MONDAY

*Epistle Embo. Ari. 10. 34*

**P**ETER mi be angedo sisina, Awara kotembetena God Embo kotembae; edo ewowo berari adu eora awa edo dave eora awa ainde gisi dave. Ge Israel da iai etege-tevira awa, bega kana dave atopapotevira awa Iesu Keriso mi (awa berari da Badari) ge awa inemane gotowa Judaea berari da oru evira awa, edo Galilee tuturo edo, bapataito John mi dengoro baisina awa amboda; Iesu Nazareth mai, God amo Asisi Kotopu mi edo goroba mi datesira awa; tepeite da beiamana esira, edo binei usimbese eora awa esiri kaviegesitera: God mi awa ae da de. Edo nakare gari embobo esisina awa Judaea embo da nasi da, edo Jerusalem da; edo ami detero betena, edo ni da eke-gena. Amo God ainde iji tamonde de jinu enina, edo pienu idegega, embo jiwae da iai ae, edo gido gari embobo da iai God gisi sirigetevira awa, natokare Iai, ainde daedo injido tu injido ewa awa, ango de betari de jiuri erorevira awa amboda. Edo namondekare tesira nanekare embo-mai da jisi da dengoro bairote edo tari gorote, awa God mi oru esira, wawasiri de bebetegari de da Katari. Ami peroveta mi berari teora, edo ainde dao da embo berari awa ge be eora ainde jimbo beiae da rorou kumbara.

*Ge Ewa Tari. Luke K. 24. 13*

**A**NGO edo embo tote iji ango de nasi dao Emmaus bauntera, furlongs 60 Jerusalem ainde itevira ainde.

Edo ge dada tedom jiwae evira eiwa. Ango edo ge dada tedom gain tero, Iesu atutumbedo, daedo baunsitera. Tena jisi jiri ami awa kotembae esitera. Edo amindemane sisina, Ge rora dada isite site tepeu? Edo dadapengedo, jisi be beiae esitera. Edo dakaki dao Cleopas ainde mina sisina, Imo berari Jerusalem dara, edo imo jimbo iji angode edo era gae? Edo amindemane sisina, Jimbo rora? Edo ainde sitera, Iesu Nazareth mai da da jimbo, awa peroveta, edo ari ae ge de God ae enembo jiwae de da jisi da goroba esisina; edo priest da badari ae badari natokare de mi amo pietero betarate tesiri cross da doritera. Edo nakare re ami Israel mai udegari ge teora. Edo nei, ainda iji topa tamonde eiwa esisina. Edo eutumai nenei jisi nakanatokare da tetero kore esitera da sipo de embake jisi da itera awa; edo ainda tamo kakoa edo, pute sitera, ami anela gera, edo ami amo wasiri de ge sitera. Edo embo nenei natokare iai itero jijirisina ami embake jisi da baundo tuvitera da eutumai sitera angode ko ami amo gae.

Edo amo amindemane sisina, Daua imata, dubo dari-tewa, edo jiwae peroveta teora kotembae! Keriso emimi mamato ai ta ai aeri, edo parara ika da toresira? Edo Moses da iai be edo, ae peroveta jiwae de, ove jiwae de ge awa gorote sisina. Edo nasi da gupera awa atutumbetera: edo amo be aike babarago. Edo ami ge tedom sitera, Kaende daedo itane: turo jiriri, iji wotesira. Edo totoritera daedo itae. Ango edo ami de daedo anumbedo, bread kundo, beiamana edo, edo engegedo, amindemane pisina. Edo jisi ika gundedo ami awa kotembesitera. Edo awa ba majisina awamane iai. Edo ge dada sitera, Nagen a dubo do da aves i ta awaeri, kaenamonde begata da tevira ove paraugesira? Edo iji angode erido Jerusalem da tekago baunsitera, edo i i dada doregedo itero tuvitera edo aminde daedo itero jijirisina, ami sitera, Bada erira awa, Simon da jisi da idegesira. Edo ami sitera begata da evira awa, edo ami bread egegesiri kotembesitera.

## EASTER TUESDAY

*Epistle Embo.* Ari 13. 26

**E**MBOMAI nato, Abraham da tegi da mamai, edo itomane iai God adu eora awa, kaenato iai ari kaviegari

da ge etegesira. Jerusalem da oromando eora awa, ainda babadegari de mi awa daretera, edo peroveta da ge sabate berari ajigotora amo gae, edo awamane mi teora ore tae, edo awa bekumba esitera. Edo betari da ari kakoa be edo, Pilate tedom gositera daro betarate. Edo berari ainda ge ove eora awa esitera, edo ni da pietero wotesira, edo betari jisi da pietero aunsina. Edo God betari de jiri ororisina; edo iji berari awamane Galilee angode Jerusalem gupera ami gositera, awamane boroko ainda gari embobo embo da iai. Ko nakare kana dave atopapotora itomane iai mamono da iai matu teora awa, God angode esisina, kaenato iai ainda mamai, Iesu jiri erira ge angode; angode psalm tote de gaedo sisina, Imo Mai nato, boroko kumena. Ko ami jiri erira betari da, ko mana najigo betari da tekago bamaina, engode tedom tesira, Ari kotopu, David ari, imo de plane. Angode psalm nei da tedom tevira, Kotopu ito piato usimbessi ari giure. David ainda umo da God da buro da singa edo, jita auna, edo mamono da iai piewa edo usimbessi ari gina; tena God jiuri erorevira awa usimbessi ari gae. Awa tedom, nanonameji, kotembave tae, edo ami mi itomane iai jimbo beiae da rorou oru eira; edo ami mi embomai berari ge be eora awa dave evira, ari berari Moses da ge mi ewa mana aina. Awa tedom giu, awa dowawo itomane iai gumbure peroveta mi teora awa,

Giu, gadumbari kakato, kore eu, edo betawa;  
Buro awa buro edo ena iji itomane da,  
Buro mana nomi ge be awa, embo mi imondemane taina.

*Ge Ewa Tari.* Luke K. 24, 36

**I**ESU awa be ainda toropu da petedom sisina, Bega itomane iai itaina. Edo awa ba adu esitera, asisi gari tedom. Edo amindemane sisina, Nongain tedom imomane dubo beiae evi? Edo nongain tedom gain dubo da erurevi? Ipa nato ae tai nato de giu amone nana: na jiu, edo giu: asisi pisi ae, vetu de nato iai gotowa angode ae. Edo eiwa site ipa de tai de piesiri gositera. Edo ami dubo dave esisina tedom kotembae, edo kore esitera, edo ami amindemane sisina, Itomane iai ainda roraera? Edo wo ingari



## PARI AE EPISTLE AE GE EWA TARI

pitoko ari ainde pitera. Edo kundo awamane da jisi da injisina.

Edo ami amindemane sisina, Ge matu eiwa matu imondemane isiretena ango de imondemane teona, edo jiwa'e mi edo petugorote, Moses da ge ae peroveta de ae psalm de ge nato ove esisina ainde. Edo dubo ika bejisina, ove gain tedo: edo amindemane sisina, Engo ove esisina, Keriso mamato arate, iji tamonde de betari eresira awa: edo dubo kotembari ae beiae doari ainda dao de da ge tesira awa jisi jiwa'e da iai, da Jerusalem be edo. Imomane eiwa gari embobo.

## SUNDAY DA EASTER AMBODA

*Pari*

**M**AMO Goroba jiwa'e, Mai ito dakaki piata awa, edo rorae beiae natokare embo betedo, nakare dave tari tedo enina; namondekare piewasi, edo nakare dumo ari de rorae beiae ari de dodo, beiamana edo ge be de imo de natopo singa ara; Mai ito Iesu Keriso ainda jimbo embo. *Amen.*

*Epistle.* 1 John K. 5. 4

**G**OD mamai site butu da badari edo eira; edo badari eiwa butu da badari evira awa, kotembari kaenato. Ko amo ai mi butu da badari evira awa? ami kotembevira God da Mai Iesu ta rori? Ko emo un mi ororo mi gumbira, Iesu Keriso; ung mi berari ae rata ko ung mi ororo mi. Edo Asisi bedevira, Asisi Ge be awa tedo. Ko tamonde bededo era, Asisi de, un de, Ororo de; tamonde da bedari dadaima. Embomai da bedari kaen kumane tae, ko God da bedari ewowo; ango edo eiwa God da bedari, Mai da ge bededo eira. Embo God da Mai ge be evira awa bedari ainda iai isira; embo God ge be ae evira, amo esiri pitawa kato; amo God da bedari ainda Mai da ge bedevira awa ge be ae. Edo bedari eiwa, God kavigari natopo itari kaenamonde pisina, edo kavigari eiwa ainda Mai da do da. Embo Mai ainda iai itevira awa kavigari ainda iai; ko embo God da Mai ainda iai itae kavigari ainda iai itae.

## PARI AE EPISTLE AE GE EWA TARI

*Ge Ewa Tari.* John K. 20. 19

**A**WARA da turo de, iji da de, week da iji da, oro manguaro jijitera ambodani isima era awa, Judaea mai adu eora awa gido, Iesu gundo toropu da peposisina, edo amindemane tesiri, Bega itomane iai itare. Edo eiwa tedo ipa de dedegi de piesiri gositera. Edo ambodani dubo beiamana Bada gositera gido. Iesu awa gido tekago sisina, Bega itomane iai itare. Mamo mi na piesiri aunsitena, ango nane mi imomane piano aimbawa. Edo eiwa tedo ami da iai api esisina tedo, Asisi Kotopu kumbawo; embo ainda buria kotembedo doturowa awa, ainda iai kotembedo doturevira; edo embo ainda iai buria dubo jijiowa awa, ainda iai jijievira.

## SUNDAY TOTE EASTER AMBODA

*Pari*

**G**OD Goroba jiwa'e, Mai ito dakaki awa, ae rorae beiae natokare ainda mina, ae jimbo beiamana ainda kariwa: imo tonembatate, nakare piena awa ategeteite kundo, ainda dero kotopu da pipika papika amboda amboda ara; dawa embo, Iesu Keriso Bada natokare. *Amen.*

*Epistle.* 1 Peter K. 2. 19

**K**O emo dubo beiamana ari, edo kotembari God da kiai tedo, embo dubo vevera kumborote, edo ainda bekumba ae. Edo dasiga ari amo rori, ango de jimbo beiae embo imomane daina, edo sima eu? edo ango de jimbo itomane dave embo mamato ewo, edo sima ewo, eiwa God da iai dubo beiamana ari. Ango de eiwa embo imomane dao tevira: edo gido Keriso awa imomane embo mamato ena, edo kariwa itomane piedo dodo ainda ambo ambo ave tae; amo jimbo beiae ae, ko pitawa ainda be da tuwae; awa ango de embo isimbewa, mina isimbae; ango de mamato ena, duduno ae; edo awa atota be evira ainda iai ami piena; ami jimbo beiae kaenato tamo ikaito da kumuna ni da, ango edo kaena jimbo beiae mi betane tae, edo ewa da kaen kavigane tae; ainda tamo matu mi etero kavigetewa. Imomane dutedo ewa sheep ango, ko boroko asisi itomane da Sima ari de Bishop de da iai tekago guputewa.

## PARI AE EPISTLE AE GE EWA TARI

*Ge Ewa Tari.* John K. 10. 11

**N**A sheep taoari embo beiamana; sheep taoari embo beiaman topa omi wasiri ari pipitevira sheep embo. Rorou kumbari mai, sheep taoari embo ae, sheep ainda ae, wolf gupeiri gido, sheep dodo aimbira; ango tupeira, edo wolf tonena gitena eiri evekara etera; awa rorou kumbari mai, sheep dubo vivi ae. Na sheep tao ariembo beiamana, edo nakanato kotembetena, edo nakanato na kotembotora; ango Mamo na kotembetevira, edo na Mamo kotembetena; edo na wasiri ari nato sheep embo pipitena. Edo sheep nato nenei isima era, eiwa pua ae; ouwa aundo kumana, edo ge nato gara, edo sheep jisi da, taoari embo da itara.

### SUNDAY TAMONDE EASTER AMBODA

*Pari*

**G**OD Goroba jiwae, embo bambae dumbae ge be ito da parara pioto gotora, ango de jimbo dave da begata da tekago gumborote; Keriso da Ekalesia da dada utari de totorora ango de pie, edo jiwae ajijigotora awa amboda amboda edo, kiki eve dowore; Iesu Keriso Embo nato-kare. *Amen.*

*Epistle.* I Peter K. 2. 11

**D**UBO babarigari, imomane embo eve edo pepeta ari dango, imondemane tedo gotena, ko pisi mi jipapa evira awa dou, awamane asisi da iai itoro eora; edo ari itomane duroka arata Etene da iai; ango edo, awamane imomane jimbo beiae embo arago isimbetera, edo awamane mi jimbo itomane dave gotora awa, God gadara tedo katedo ari da iji de.

Ge berari embomai eora awa kera ewo, Bada embo; edo gido Dariga, amone badari bajina na; edo gido babadegari, ami etegetevira jimbo beiae embo da iai riroa kumbare tae, edo jimbo dave embo dasiga ore tae. God mi jipapa eira, jimbo dave edo dutetegari da gae ari ge tave tae; imomane embo tepo inge, edo embo itomane tepo ari mana awa beiae da apuregari ango, edo be God da ambodani. Embo berari kotopu eu. Dodoma dubo bu. God adu eu. Daotari kotopu eu.

## PARI AE EPISTLE AE GE EWA TARI

*Ge Ewa Tari.* John K. 16. 16

**I**ESU ainda ambodani de tesira, Iji siaka de, na giwove, Iedo iji siaka nei, gawa. Awa gido ainda ambodani nenei mina tara esitera, Ge eiwa rori, kaenamonde tesira awa, Iji siaka de, na giwove, edo iji siaka nei gawa; edo, Mamo da iai aimena? Awa tedo sitera, Eiwa ro tesiri, Iji siaka? Tesira awa kaen kotembae. Iesu awamane ge katai jipapa ero gido, amindemane sisina, Eiwa gido mina kata eowa ta rori, ge nato, Iji siaka de na giwove, edo iji siaka nei gawa? Ge be, ge be, tena, imomane ji tedo mamato awo, butu dubo beiamana aina. Imomane dubo beiae ara, ko dubo beiae itomane dubo beiamana da kapetegarate. Eutu ango de mai overegesira, dubo beiae eira, ainda iji gumbira awa tedo; ko ango de mai kupara, mamato ari kotembae eira, dubo beiamana gido embo butu da wowotevira awa tedo. Awara da awa gido itomane iai dubo beiae ari isira. Ko tekago gano imomane dubo beiamana ari; edo dubo beiamana ari itomane embo imondemane kundo aimbae.

### SUNDAY IPA AO PASIDO EASTER AMBODA

*Pari*

**G**OD Goroba jiwae, Imo akuta embo beiae da jipapa ari da iai gisi jijiota; embomai ito de piewasi, edo ge imo teteta awa karupa ara, edo rorae imo teteto gotera awa jipapa ara; ango de butu ainda jimbo jiwae da, nakare ito iai dubo ara, ainda dubo beiamana ari be tuwora; Iesu Keriso mi Bada natokare. *Amen.*

*Epistle.* James K. 1. 17

**P**IARI dave berari edo rorae ewagaewa berari ikane ango, edo Mamo parara kato da ami wowotevira, awa da dawa matawa itevira, edo ainda iai duga wareregetevira awa pieure kae. Akuta mi ge be mi kaena mamai esira, edo kaena awa be gitago arago evira ainda iai. Eiwa kotembotowa, nanonameji nato dubo babarigari. Ko embo berari eiage gorote, edo ge babaingo torote, edo duduno babaingo ara; embo da duduno God da jimbo dave ae. Awa tedo dono berari de beiae be da evira awa



## PARI AE EPISTLE AE GE EWA TARI

iai eve pieu, edo burau ari de daedo, ge urari awa kumbuwo, ami asisi itomane ari kavigore.

*Ge Ewa Tari.* John K. 16. 5

**I**ESU ainda ambodani de tesiri, Boroko aimena ainda iai tesiri gumena ainde; edo imomane ade namonde tedo gae, Inda ango aimbesi? Ko eiwa teono dubo itomane beiae atoa. Ko ge be imondemane tena, Beiamana imomane dodo aimena; na aimbae ra ta Dubo-damo-ari-  
embo itomane iai gumain ae; tena na aundo itomane iai tano aimbare. Edo awa gundo, nasi bekumba arate rorae beiae gido, rorae beiamana gido, edo katari gido: rorae beiae gido, awamane na ge be ae awa tedo; rorae beiamana gido, na Mamo da iai aimena, edo imomane tekago jisi mi gae awa tedo; katari gido, nasi eiwa da badari katetera awa tedo. Ge jiwae tanate, ko boroko kumbae dumbae eowa. Tena awa, ge be da Asisi gundo, ge be berari da iai imomane kundo bamaina; akuta tain ae, rata, dengoro mi gido tarate, edo jimbo amboda arate tari gawa. Na dasiga arate; nakanato kundo imomane tari gawa awa tedo. Berari Mamo da iai isira awa nakanato; awa tedo tetena, nakanato kundo imomane tari gawa.

## SUNDAY IPA DA EASTER AMBODA

*Pari*

**B**ADA, imonde rorae beiamana gupera awa; namonde-Bkare singabanga ito burau awa, piewasi, edo ato dubo natokare mi rorae beiamana, edo imo kondade ato nakare ango ara; Iesu Keriso mi Bada natokare. *Amen.*

*Epistle.* James K. 1. 22

**I**MOMANE ge awa edo eu, ge ingari tepo embore eove, pitawa akuta eove. Embo ge gido mana aina, awa be embo inge dombu dambu da asisi da gotevira awa; edo akuta goteite aunteira, edo iji da ami embo rora dubo ruvegedo eira. Edo embo tepo da ge dave gido eite, ko isima eira, edo amo gari tao ae dubo ruvegetevira awa, edo awa ari embo evira awa, embo eiwa dave aina jimbo

## PARI AE EPISTLE AE GE EWA TARI

ika da. Embo rora mi be kotopu inge, ko iwawa kanji-gae, ko dubo ika pitawa sira, embo eiwa ainda kiki ro itae. Kiki dave dono ae God ae Mamo de kaenato da dombu da eiwa, popoiwo de eutu rorigarori de da dubo beiae ari da iai etega aina, edo akuta sima eite nasi ari dono ain ae.

*Ge Ewa Tari.* John K. 16. 23

**G**E be, ge be imondemane tena, Imomane Mamo de tedo gawo, awa dao nato da imondemane piaina. Engo de imomane tedo gae dao nato da; tedo giwo, gido kumbawo, edo dubo itomane beiamana atoa. Eiwa imondemane enia de tetena; iji gumboro na enia ge tain ae, rata ge tepo Mamo da ge tana. Iji ango de dao nato da tedo gawa; edo Mamo imomane embo na tedo gana na ango tae; gido Mamo akuta imomane dubo bira, imomane na dubo buwa, edo na Mamo de idegesitena kotembetewa. Na Mamo de idegedo nasi da gumena; tekago nasi dodo, Mamo da iai aimena. Ainda ambodani sitera, Gio, boroko ge tepo teta, enia ge tae. Boroko nakare gera imo berari gotota edo embo imo tedo garate jipapa ae; ango de kotembetera imo God de idegesiteta. Iesu mina amindemane sisina, Boroko kotembeteve ta? Giwo, iji gumbiri, awara boroko isira, imomane evekara awa, embo berari ainda iai da, edo na dodo aimbawa; tena na akuta ae; Mamo na ae da de. Eiwa imondemane tetena edo nato iai bega itomane itare. Nasi da mamato ari itomane itaina, tena dubo itomane beiamana arate; na nasi eteno dadada apusina.

## VITARI IJI

*Pari*

**P**IEWASI, God Goroba jiwae, tedo gotora, edo nakare Mai ito dakaima Bada natokare Iesu Keriso utu da visiri ge be eora awa, ango daedo do natokare mi ae dubo natokare mi de ainda visido, daedo sima eiraro jinaina, awa imo ae Asisi Kotopu de daedo wasiri de gisi jijiowa, God dakaima natopo. *Amen.*

*Epistle Embo. Ari 1. 1*

**O**VE gisi pietena, Theophilus, berari Iesu mi tuturo edo esira edo atopasina, edo ainda iji gumbiri kundo visina, edo gisi Asisi Kotopu mi ge aposetolo sirigetevira awa piena; edo awamane da gisi da mamato ari itae enu wasiri de pienu giwa ae kariwa jiwae de, edo ainda iji 40 de awamane da iai idegena, edo God da basileia ge tena edo amindemane de daedo dada utewa, edo oru ena, Jerusalem dodo taingore kae, edo Mamo mi matu tena awa sia orote, tena, ango ge nato mi gawa; John un mi bapataito eira; ko imomane iji itomane indewa ain ae Asisi Kotopu mi bapataito awa. Awa tedo awamane dada utetera, edo tedo gain tedo tetero, Bada, boroko engo de Israel da basileia tekago piasi ta? Edo amindemane sisina, Imomane iji kotembove, Mamo ainda badari ari da pipitevira awa. Edo goroba ari itomane kumbawa, ango de Asisi Kotopu itomane iai gumbari; edo imomane gari tutu nato Jerusalem da, edo Judaea berari da ae Samaria de, edo nasi da mendo da. Edo eiwa tesiri, edo awamane gotora awa, ami kundo vivisisina, edo poraga mi onjigesisina. Edo awamane utu da pangedo jijimbedo gotero awa aunteira, edo embo tote awamane da iai petetero woru ike parara esiri sitera, Imomane Galilee embo, nongain petedo isite utu da pageu? Iesu emo itomane iai kundo visira utu da, gumbarate ango inemane gotewa topa utu da visira.

*Ge Ewa Tari. Mark K. 16. 14*

**E**MBO amboda Iesu idegena awamane 11 da iai ango de Eanunumbedo rorae indeite itero; isimbesisina awamane da ge be ari itae, ko awamane da dubo wawoegari embo, awamane mi ouwa gositera awa ainda erari amboda ge be ae. Edo sisina, Butu berari de aimbuwo, aundo Ge ewa tari atopatave evira awa berari da iai. Embo ge be edo bapataito eora awa kavigara ta, ko embo ge be ae eora awa bekumba ara. Edo kariwa eiwa ge be egeregari ambo ambo ara; dao nato da binei piaro idegara, ge mi teka ge tara, jimbago jiari erari, ko indapu indari, ko nomi raro dain; awamane da ingo abubugari da tamo da piaro kavigara.

Ango edo Bada Iesu amindemane tesiri, utu da ude-tera, ko God da ingo be da anumbesira. Edo awamane wotedo, iai berari da dengoro baitera, edo Bada awamane de daedo buro esisina, edo ge awa esiri goroba esitera kariwa mi ambo ambo eora awa.

## SUNDAY VITARI IJI AMBODA

*Pari*

**G**OD, parara da Daotari, imo Mai ito dakaima Iesu Keriso eteto berari daginegedo, Basileia ito da utu da visina; tedo getera, nakare popoiwo dote, awa ae ra ta Asisi Kotopu natokare iai piato gumaina, edo amo nakare kondade edo nakare jiari vitara iai Ari Kavigari natokare gisi aimbira, awa imo ae Asisi Kotopu de daedo wasiri de gisi jij Iowa, God dakaima natopo. *Amen.*

*Epistle. 1 Peter K. 4. 7*

**B**ERARI da gombu atuta eira; awa tedo imomane dubo Bembo ewo, edo badari akuta eu, edo benunu beiamana tewo: berari da gisi da dubo be mina bara eu; dubo bari jimbo beiae jiwae apuregedo eira; sinopu mina ara eu, guguma de daedo ae rata; rorae daradara burowa awa, itomane iai kando mina ara eu, God da kondade ari evekara da sima eowa agori; embo ge tare tae, edo be God da ge ango; edo embo singa ore tae, goroba mi ango God mi pievira awa; edo berari da God parara aina Iesu mi Keriso, ainda iai parara de badari ari de natopo itaina.

*Ge Ewa Tari. John K. 15. 26, edo 16 siaka*

**T**ONEMBARI gupeite, na Mamo de tano gumaina tawa, ge be da Asisi, Mamo de idegetevira awa, ge nato onjiga taina; edo imomane onjiga tawa, imomane namonde tutu de kaen itena.

Eiwa tetena, imomane aro durove. Sunagogo de imomane piaro idegawa, awara, iji gumbiri, embo imomane euri betowa awa be ami God da iai singa evira. Edo eiwa ara, ami mi God ae namonde gae eora awa tedo. Eiwa

tetena, edo iji gumbiri imomane na tetena awara kote-  
mbawate.

## PENTEKOST

*Pari*

**G**OD, iji engo de embomai lto da dubo, Asisi Kotopu  
Gito pieteto parara edo atopaposisina; Asisi dawa mi  
ato nakare rorae berari da be katara, edo iji berari nakare  
ainda dubo damo ari dave gido, dubo beiamana ara;  
Iesu Keriso Ari Kaviegari natokare embo, awa imo de  
daedo, ae Asisi dawa de wasiri de gisi jijiowa, God daka-  
ima natopo. *Amen.*

*Epistle Embo. Ari 2. 1*

**E**DO iji Pentekost boroko gumbira, edo awamane iai  
Edada utetera. Edo iji dakaki utu da ango ge gumbira  
be bisi siakabadae dunana de, edo mando berari da anu-  
mbetera awa be da esisina. Edo awamane da iai bejisina  
ni beriberi, edo evekara esisina be ni benibarago; edo  
daradara anumbesisina; edo awamane berari Asisi Koto-  
pu mi be da esitera, edo ge nenei sitera, Asisi be gari  
pievira ango. Ko Jerusalem da oromando esitera Judaea  
embo, embo kokotopu, nasi berari da gupora awa utu de  
da. Edo ge eiwa gositera edo jisi dada usitera edo dari-  
tera, embo berari mi gositera ainda ge sitera. Edo awa-  
mane mi kore edo sitera, Gi, embomai eiwa ge tera awa  
berari Galilee embo ta? Edo kaen nomi geni kaena  
berari ge kaenakanato mi wowotona awa? Parthia embo  
de, Media embo de, Elam embo de, Mesopotamia da  
jijiora awa, Judaea da Cappadocia da, Pontus da, edo  
Asia, Phrygia da ko Pamphylia, Egypt da, Libya Cyrene  
da demo da, ko Rome awa wowotora awa, edo Judaea  
embo edo embo tepora awa, Crete embo de Arabia embo  
de, ge kaenakanato goteimono edo God ari babain ge  
teora.

*Ge Ewa Tari. John K. 14. 15*

**I**ESU, ainda ambodani de sisina, Imomane dubo nato  
budo, ge nato kera awa. Edo na Mamo de benunu  
tana, edo awa Tonembari nei imondemane piaina, edo

awa imomane ae da de eite natopo itaina. Awa ge be  
Asisi, nasi mana kumbesira, gae evira, edo kotembae  
evira awa; imomane gotowa; imomane ge da de sima  
ewa, edo itomane do da sima aina. Imomane popoiwo  
dodo bamain ae; itomane iai da gupena. Sima siaka, edo  
nasi mi tu nato gae; imomane ge bino nato gotowa; na  
wasiri de, imomane ango wasiri awa. Iji ainde kotemba-  
wo na Mamo nato da do da itena, edo imomane nato do  
da, edo na itomane do da. Embo ge nato kumbira awa,  
edo kera evira awa, ami mi dubo nato bira; edo dubo nato  
burevira awa, ainda dubo Mamo nato baina, edo na ainda  
dubo bana, edo ainda iai idegana. Judas (Iscariot ae)  
ainde tesira, Bada, nongain tedo imo natokare iai idegata  
edo nasi da ae? Iesu ainde mina sisina, Embo dubo nato  
budo, ge nato kera aina, edo Mamo nato ainda dubo  
baina, edo nakare ainda iai gundo sima ara. Embo dubo  
nato bae, ge nato kera ae, edo ge gotowa awa nato ae, rata  
Mamo da, tesiri gumena awa.

Eiwa tetena, daedo itena ango de. Ko Tonembari,  
Asisi Kotopu, Mamo dao nato da tari gumaina awa,  
berari imomane atopataina, edo berari nane tetena awa  
ari kotembawa. Bega itomane iai dotunona; bega nato  
imondemane pipitona; na imondemane pipitona nasi  
pipitevira ango ae. Imomane dubo beiae ain ae, adu ain  
ae. Gotowa na tetena, Aundo tekago gumena. Imo-  
mane dubo nato budo, dubo beiamana arate, na Mamo da  
iai aimena awa tedo; Mamo na daginetevira. Edo boroko  
gisi tetena, edo ango de itarate imomane gawa. Iji nei  
de jiwae imondemane tain ae; nasi da badari gumbira,  
edo ikaito nato iai itae; edo nasi gaina na Mamo dubo  
bunona, edo Mamo namonde tesiri, ango eona.

## PENTEKOST DA MONDAY

*Epistle Embo. Ari 10. 34*

**E**DO Peter be angedo sisina, Ge be gena God embo  
kotembae; edo ewowo berari da awa adu evira awa,  
dave evira awa, ainda jisi dave. Ge Israel embo da gisi  
da etegetevira awa, bega kana dave atopapotevira awa,  
Iesu Keriso (amo berari da Badari)—ge amo imomane

## PARI AE EPISTLE AE GE EWA TARI

gotowa, Judaea berari da gupevira awa, Galilee da tuturo esira, bapataito John mi dengoro baisina amboda, Iesu Nazareth mai, God mi awa Asisi Kotopu mi esiri be da esiri edo goroba mi esiri dasisina; awa pepeta eite dave esisina, edo daimona usimbesevira awa esiri kaviagesitera; edo God ainde daedo isinesina. Edo nakare gari tutu awa evira awa Judaea embo da nasi da, ko Jerusalem da; edo awa detero betesiri, ni da kaingesitera. Awa God ainde iji tamonde de jiri erorisina, edo piesiri bejisina, ko embo berari da iai ae rata, gari tutu God mi sirigesisina awa, natokare iai, ainde daedo injido tu injido eora awa, ango de betari de jiri erorevira awa amboda. Edo namondekare tesira embomai da gisi da atopatore, awa God mi oru esira edo wawasiri de bebetegari de da katari. Ami mi peroveta berari teuri gotora edo ainde dao da embo berari awa kotembatora ainde jimbo beiae kotembedo doari kumborote.

Edo Peter mi ge eiwa begeiri, Asisi Kotopu embomai berari da iai ge eiwa gotora awa wowosisina. Edo jugari embobo mi kore esitera Peter de daedo guputera ami, Etene da iai rorae Asisi Kotopu vereugesisina. Gositera ge nei tede, God karupa esitera. Ango de Peter mi minasina, Un ge taini ta, ko embomai eiwa bapataito ae, ouwawa Asisi Kotopu kupora awa kaena ango? Edo tede bapataito ore tae Iesu Keriso da dao da. Awa tede tede gositera iji nenei itarate.

*Ge Ewa Tari. John K. 3. 16*

**G**OD ango nasi dubo budo, ainde Mai ao da piena, awamane berari mi ge be eora awa betain ae, ra ta wasiri de matawa itari kumbore tae. God ainde Mai butu da etegena, amo butu katain ae, ra ta, ko butu ami kaviegarate tede. Embo awa ge be eora awa katae; embo ge be ae, amo be de katena, God da Mai ao da da dao ge be ae. Edo katari eiwa, parara butu da gumuna; ko embo munia dubo bureite ko utata ae; awamane da jimbo beiae. Embomai berari mi beiae eora awa parara dumo eora, ko parara da gundo ae, edo gido ari ikaito bekumba are tae. Edo embo ge be eora awa parara da gupora, edo ari ika bedare tae, awamane God da iai ango eora awa.

## PARI AE EPISTLE AE GE EWA TARI

### PENTEKOST DA TUESDAY

*Epistle Embo. Ari 8. 14*

**A**NGO edo Apostelo Jerusalem da itora ami gositera Samaria embo God da ge kumbera, edo awamane da iai Peter de John de etegesitera; edo wotedo, awamane embo benunu sitara, Asisi Kotopu kumbore tae; ango de ai mi ainde iai wotae, rata Bada Iesu da dao da bapataito esitera. Ango de ingo kopuru da pitera, edo Asisi Kotopu kuputera.

*Ge Ewa Tari. John 10. 1*

**G**E be, ge be, nane mi imondemane tena, Embo sheep da gua da manguro be da ango vitae, rata demonda ango vivitevira, amo beono kato rata dadua kato. Ko be da ango totorevira amo sheep sima ari. Ainde iai gua be sima ari manguro bedevira; edo sheep ainde ge gotora; edo sheep ika da dao mi dao tede kundo idegetevira. Ikaito berari awa piesiri idegedo, ko awamane da gisi auntevira, edo sheep mi awa amboambo era; awamane mi ainde ge kotembatora awa tede. Ko embo nei awamane amboambo ain ae, dodo tumbara; awamane embo nenei da ge kotembae. Iesu mi enia eiwa sisina edo awamane mi ami sisina awa daritera.

Awa tede Iesu mi tenda tede sisina, Ge be, ge be, nane mi imondemane tena, Na sheep da manguro be. Berari gisi nato da gupera awa amo beono kakato ra ta dadua; ko sheep amo awamane gae. Na manguro be; nato iai da ango embo torido kaviagara, ko torido ko idegedo ara, edo indari ika tuara. Beono kato gundo ae, ko beono ae, edo dari betare tae, ko usimbesevira are tae; na gumena kaviagara kumbare tae, edo be kumbare tae.

### TRINITY SUNDAY

*Pari*

**G**OD, Goroba jiwae, Matawa isite, nakare singbanga Gito kondade esiteta, edo kiki be ajijigeteite Trinity matawa itari parara de awara ajijigedo eora, edo God, parara de goroba mi Dadautari tumondebain edo eora;

## PARI AE EPISTLE AE GE EWA TARI

Tedo gotera, nakare sima ewasi, edo Kiki eiwa matawa kotembara, edo beiae berari da nakare toregewasi, God dakaki isite ainde gisi matawa jijiota. *Amen.*

*Epistle Embo.* John K. da Tari Gari, 4. 1

**E**DO eiwa amboda gena, edo gi, manguro utu da bede-siri, ge gisi gena awa be to inge, ae namonde ge tesira, Engo visio, jimbo amboda gupeira awa piano gate. Boe-ite na Asisi da; edo gi, anumba ari utu da piesiri edo da mi anumba ari da anumbesira; edo anumbesira awa ganuma jasper ae sardine inge; edo eriri anumba ari da jinene-besiri gari be emerald inge; edo anumba ari anumba ari 24 jinenembetera: edo anumba ari da babadegari 24 itero gena, edo ainda woru parara, edo kopuru da crown gold mi. Edo keimo ni mi 7 anumba ari do da avetera, amo God da Asisi 7, edo anumba ari do da be ewa gadera mi, kristalo inge. Ko anumba ari toropu da wo wasiri de 4, anumba ari jinenembetera edo ouwa jisi mi be da ari gisi de ambo de. Edo wo dakaki be lion inge; ko wo nei ox mai inge; ko wo nei embo da dombu inge; ko wo nei bagai ainto ari inge. Ko wo daradara ae wasi 6 de ra ta jisi be da ari ra ta, ko do da. Edo da doae tede teora, Koto-pu, kotopu, kotopu, Bada God, Goroba jiwae, itevira, isira, ko itaina. Edo ango de wo wasiri de 4 parara de dasiga ari de ategari de ouwa anumba ari da anumbedo isirari ainde piara, ouwa wasiria de matawa itari, edo babadegari 24 ounda do da anumba ari da anumbedo era awa durudo edo ouwa wasiri de matawa itari da do da tumondebain edo, ko awamane da crown anumba ari da do da aungedo tara, Imo beiamana, Bada natokare, God natokare, parara de dasiga ari de badari ari kumbata; ine berari esiteta, jimbo ito awa tede isite, edo evira.

*Ge Ewa Tari.* John K. 3. 1

**E**MBO Pharisee isinesina, ainda dao Nicodemus, Judaea Embo da badari: ami Iesu da iai munia de gundo, ainda sisina, Rabbi, nakare gotora imo God mi atopatari; iwata ine ewiteta amo embo ae, edo gido God ainde daedo itesira. Iesu mi mina sisina, Ge be, ge be, imonde tena, embo teda wotain aere, edo God da basileia mana gaina. Nicodemus ainde tesira, Rora embo tenda wotari?

## PARI AE EPISTLE AE GE EWA TARI

**Ai** da sini da iji tote torido wotarate? Iesu mi mina sisina, Ge be, ge be, imo de tena, embo un de ae Asisi de wotain aere, edo God da basileia da tonain ae. Pisi de wowotora amo amo pisi; edo Asisi de wowotora amo amo asisi. Imo de tena kombo eote, tenda wotemo. Bisi avigedo isipevira, edo iavi gotowo, edo inda ango gupeiri o inda ango baunteiri, gaegae ewa. Ango embo jiwae Asisi de wowotora. Nicodemus mi ainde mina sisina, Nomi emo aini? Iesu mi mina sisina, Imo Israel da atopatari ta rora, eiwa imo gae eosi? Ge be, ge be, imonde tena, Kotembotora awa teora ko gotora awa de bedeora, edo bedari natokare doturewa. Nakare ari butu da ango awa tero, kotembae ewa ta, ko ari utu da ango awa taro, nomi kotembavi? Ko ai mi utu da vitae ra ta amimi utu da ango wowotevira awa, embo da Mai, utu da itevira awa. Moses jimbago dumo da jiri erira, ango embo da Mai jiaro enaina, edo embomai berari awa kotembotora ami mi kaviegari matawa itari kumbore tae.

## SUNDAY DA TRINITY AMBODA

*Pari*

**G**OD, berari imo tumo de eora awa ainda goroba ari, Gdo edo benunu natokare kumbuwasia, edo nakare embo rare burau eora, edo imo itae, nakare jimbo dave mana etera, awara ta kondade ewasi, edo nakare jipapa mi ango de ari mi ge ito kikiripa edo, dubo ito dave are; Iesu Keriso mi Bada natokare. *Amen.*

*Epistle.* 1 John K. 4. 7

**D**UBO bari embobo, kaen dubo mina bara ane; dubo bari embo God da ra; ko dubo bari embo God da mai edo eira, edo ami God kotembetevira. Embo dubo bae, awa God kotembae; God dubo bari. Engo God da dubo bari kaenato iai piesiri gositena, God ainda Mai dakaki butu da tenu wotena, ami mi kaen kavieganate. Eiwa dubo bari, kaen God da dubo bae eona; ko ami kaena dubo budo, ainda Mai tenu wotena, jimbo beiae kaenato da rorou. Dubo bari embobo, God dubo kaenato buna, ko kaena ango dubo mina bara ane. Mana embo



mi God jisi mi gotevira; kaen dubo be mina bara ane, God kaenato iai isite ainda dubo bari kaenato iai sia eira. Emi mi kaen gotona kaena ainda do da iteno, ko awa do kaenato da, ainda Asisi kaenamonde piena. Edo kaen gido onjiga tedo ena, Mamo mi Mai tenu wotena nasi da ari kaviegari. Embo ai mi gaina God da Mai Iesu, God ainda do da isiri, ko awa God da do da. God da dubo bari kaenato iai kaena gido ge be eona. God dubo bari; ko embo dubo bari da isima eira awa, God da do da isira, edo God ainda do da isira. Engo dubo bari kaenato iai sia arate, edo ge katari iji da goroba anate; ouwa itevira awa ango kaena nasi ainda itena. Dubo bari da adu ari itae; adu ari da iai mina ari isira. Ko embo adu evira ainda dubo bari sia ae. Ouwa gisigisi kaena dubo buri-sina, ko kaena bunona. Embo taina, God dubo bunona, amo nameji dumo eira, awa pitawa kato; embo gotevira awa dubo bae, ko God gae awa dubo be bae. Ko ge eiwa ainda iai kaen kuputena, embo God dubo burevira awa nameji da dubo daedo barate.

*Ge Ewa Tari.* Luke K. 16. 19

**A**NGO edo rorae embo da isinesina, edo woru ika Aijimbari turu de openesina, edo rorae ika beiamana injido evira iji berari; edo benunu tari da, awa dao Lazarus, ami ainda manguro da pietero durudo aveiri, tamo matu jiwa, edo rorae embo da tenemba da durari udarate jipapa esisina; ango edore sino gundo tamo matu taribo esitera. Ango edo benunu tari besisina, edo awa anela mi kundo baunsitera Abraham da do da; edo rorae embo betesiri, goitera. Edo Hades da pangisina tamo memesi jiwa, edo Abraham Lazarus amo betaun do da gosisina. Edo dao tedo sisina, Maka Abraham, na do ewasi, Lazarus te baundo ipa toro mendo mi un da pasido na iwawa patari damo are; ni beriberi eiri na ainda mamato ena. Ko Abraham sisina, Mai, kotembewasi, imo wasiri de beiamana ikaito kumbeta, edo Lazarus ango beiae; boroko ainda dubo damo eira, edo imo mamato eta; edo nei, nakare imomane toropu da ointo siakabadae piena isiri: edo ainda itomane iai tembari jipapa edo mana tembetera, edo embo ounda tembudo natokare iai gumain ae. Edo sisina, Awa tena, Maka, edo awa maka da oro da teio

bambare; ambojimi naka ipa da, ainda jisi da tare edo awawa nongain tamo memesi iai da gumberiko. Ko Abraham sisina, Moses ae peroveta de itera; amo getera. Edo sisina, Nongain, Maka Abraham, edo embo dakaki betari de awamane iai da bambesira, ari dubo kotembesira. Edo ainde sisina, Moses ae peroveta de gaerita, mana dave kotembara, edo gido betari da eraina.

## SUNDAY TOTE TRINITY AMBODA

*Pari*

**B**ADA, embo adu ito ae karupa ito de da babodora awa, Bimo kondade edo gisi jido doae; tedo gotera, nakare beiamana edo toregewasi, edo ewasi nakare Dao ito koto-pu adu edo karupa edo domain ae; Iesu Keriso mi Bada natokare. *Amen.*

*Epistle.* 1 John K. 3. 13

**B**UTU imomane dumo ari, nanonameji, imomane kore Beove. Kaen gotona betari da kaen dodo wotetena wasiri de da, nanonameji dubo budo ena awa embo. Embo dubo bae amo betari da isira. Embo ai mi ainda nameji dumo evira, amo ari betari embo ra; edo gotowa ari betari da do da wasiri de matawa itari itae. Emi mi dubo bari kaen gotona, ouwa ainda wasiri de kaena embo piena; ko kaena nanonameji awa embo wasiri de kaenato pietena. Edo embo avera mi nasi da rorae ainda iai itevira awa, nameji atoto goteite, do ari ikaito ainda iai wokiembedo eira, nomi God da dubo bari ainda do da isieri? Mai babaingae, ge mi ta iwawa mi dubo bain ae rata jimbo mi ae ge be mi daedo. Emi mi kaena gotona kaena ge be embo, edo nomi dubo kaenato bero eviri, dubo kaenato ainda jisi da kaen ano damo are; God dubo kaenato dodo daginegedo, ko berari gotevira. Dubo bari embobo, dubo kaenato bekumba ain ae, God da iai da goroba ara, edo kaen ro tedo gotona awa ami da iai kaen kumona, ainda ge kaen kera ona, ari ainda jisi da dave kaen edo ena. Ko ainda ge eiwa, ainda Mai Iesu Keriso da dao da kaen ge be anetae, edo kaen dubo mina bara anetae, da ango ainda ge kaenamonde pipitevira awa. Ko



## PARI AE EPISTLE AE GE EWA TARI

avera mi ainda ge burevira amo do da isira, edo awa ainda dao da. Edo emi mi kaen gotona do kaenato da isira, Asisi ikaito mi kaenamonde pipitevira awa.

*Ge Ewa Tari.* Luke K. 14. 16

**E**MBO da mi turo rorae siakabadae esisina; edo jiwae edao sisina; edo turo rorae indari iji da singa ika tesiri baunsisina edo jimbudo awa tari gorote, Itae beiamana esirata, puwo. Edo awamane arapu dubo da rare domain sitera. Da mi sisina, Butu kumena, edo baundo gain ena; ango domani ta tena. Edo nei mi sisina, Ox ipa da imata kumena, baundo bawain ena; ango domani ta tena. Edo nei mi sisina, Na eutu nato jimena, edo awa tedo na mana punana. Edo singa mi pute embo badari ika de eiwa sisina. Engo do oro tutu topa duduno eite singa ika de sisina, Burigiburigi bambuio begata bambain de babaingae de da nasi da edo sisibere de, ae gejimba isisimbari de, ae jisi akikiembari de, ae teisi dupasi egeregari de kundo gumbate. Edo singa mi sisina, Embo, teoto awa esira, edo iai nei isira. Edo embo mi sisina, Nasi begata da de pua demo da de woteio, edo teio tato torido, oro nato atoe ore. Imondemane tena, dao tetera awa aintari turo rorae naka, da injido geriko.

## SUNDAY TAMONDE TRINITY AMBODA

*Pari*

**B**ADA, tedo gotera, do edo dengoro mi ge natokare Bgiwasi, edo imo eteto nakare benunu tain be jipapa edo era, awara ta goroba edo nakare adu ari berari de toregewasi, edo dubo natokare ewasi damo are; Iesu Keriso mi Bada natokare. *Amen.*

*Epistle.* 1 Peter K. 5. 5

**B**ERARI burau bupuri jido singa mina ewo; God iawa Begeregari ge tevira, edo burau de kondade ari pipitevira. Awa tedo God da ingo goroba jiwae da du da burau ewo, edo ainda iji de beiamana jiari erave; edo mamato ari itomane berari ainda iai piedo dowavi, ami imomane kopa eira. Badari akuta edo jijimbewo; itoro

## PARI AE EPISTLE AE GE EWA TARI

itomane diabolos be lion aoro kato inge pepeta edo kakoa eira ave gamaini; ouwa ge tewo goroba mi ge be ari itomane da; edo gotowa mamato ari dawa isira nanonameji itomane nasi da itora ainda. Ko God kondade ari kato, ainda parara natopo itari da Keriso mi imomane daosira, awa mamato siaka awo, edo amboda ami imomane beiamana edo jiari ari goroba awo. Ainda iai badari ari natopo itaina. Amen.

*Ge Ewa Tari.* Luke K. 15. 1

**E**DO telona ae jimbo beiae ari embobo de jiwae atutumbetera awa gain tedo. Edo Pharisee ae ove egeregari de guguma tedo sitera, Embo emone beiae embobo undeite rorae injido era.

Edo amindemane parabole eiwa sisina, Embo indawara mi sheep 100 de nami, da dadoegeesisini, edo 99 dumo da dodo bambae, edo dadoejena ba kakoa emene isieimango baunteimango tuain tedo? Edo tuvedo, dosiritaviri gapo da piedo dubo dave esira. Edo nasi da gupeite, ami teotopo ika ae aikae isima eora ainde dao site tesira, Daedo dubo kaenato dave esira awa; sheep nato dadoe-gema awa tuvetena. Imondemane tena ango dubo beiamana ari utu da itaina, jimbo beiae ari embo da ami embo dubo mi kotembeteira awa, edo nenei rorae beiamana ari 99 embo amo embo ae ra ta, awamane topa dubo mi kotembari jipapa ae.

O eutu indawa ami, money ika 10 awa, da dadoegeesira mi, keimo ijimbedo mando wadedo, kakoa be kakoa edo, tuae eute? Edo tuvedo teotopo ika ae aikae isima eora ainda dao site tesira, Daedo dubo kaenato dave esira awa, money dadoejena awa tuvetena. Ango imondemane tedo ena, God da anela da jisi da dubo beiamana ari isira, jimbo beiae ari embo da ami embo dubo mi kotembeteira awa.

## SUNDAY 4 TRINITY AMBODA

*Pari*

**G**OD, berari imo tumo de eora ainda toregari, edo imo Gitae, nomi goroba mana esira, mana ro kotopu itesira; Do ito natokare iai ewasi bajina are, ango de imo badari

## PARI AE EPISTLE AE GE EWA TARI

natokare begata natokare gisi ewasi, awara ta jimbo itarago era awa gatededo, jimbo matawa itari domain ae; Eiwa piewasi, Mamo utu topo, Iesu Keriso, Bada natokare awa embo. *Amen.*

*Epistle. Rom. 8. 18*

**A**WARA ta ko na, parara kaenamonde onjiga taina ango de, einda iji da mamato ari daginegetevira. Edo evira amo ainda sima ari God da mamai da piari gari sima siaka ae evira. Ko evira amo tepo ari da singa pisina, akuta ae ra ta, ouwa esiri singa evira awa awa tedo. Edo evira amo usimbese ari da singa ari mi toregaina, God da mamai da parara ainda embo tepo ari da. Kaen gotona edo berari evira amo ji tedo aoro inonode gatedo eora edo engo de. Ko awa berari ae, ra ta, ko ae kaenamonde daedo, Asisi da gitago kaenato iai itevira ango, kaena dubo kaenato da ji teona, edo undari kaen sima edo ena tamo da rorou piari awa.

*Ge Ewa Tari. Luke K. 6. 36*

**D**O eu, ango Mamo itomane mi do eira. Edo mina katove, edo mina kateure; mina undeu, mina undare; mina pieu, mina piare; tega beiamana nunupugari dodedo wotari do itomane de piara. Edo tega tega eowa awa, itomane iai tega aina.

Edo amindemane sisina parabole, Embo jisi akiembari, edo jisi akiembari ainda begata gisi arate? ae da de tote ariwo da dureteri ta dunain aeri? Ambodani mi atopatari ika dodo daginegae; edo jiwae mi beiamana eora amo be atopatari inge. Edo nongain popo nameji da jisi da jisini esi edo ukuta jisi ito da gae? O nomi nameji ika de site, Nameji, popo jisi ito da pusigana, edo imo ukuta jisi ito da gae. Imo pitawa kato, gisi ukuta jisi ito da pie wotari, edo amboda beiamana gido, popo nameji da jisi da pusige.

## SUNDAY 5 TRINITY AMBODA

*Pari*

**P**IEWASI, Bada, tedo gotera, edo imo gisi jiato nasi eiwa bega de temaina; ango de Ekalesia ito dubo dave

## PARI AE EPISTLE AE GE EWA TARI

tepo isima eite ito iai da ewa singa are; Iesu Keriso mi Bada natokare. *Amen.*

*Epistle. 1 Peter K. 3. 8*

**I**MOMANE berari dubo itomane da dawa, edo do edo isiwo, edo nanonameji ango dubo buwo, dubo vevera edo dubo burau ewo; edo beiae da beiae mina tekago eove, ta isimbari da isimbari mina eove ta; ango ae ra ta beiamana ewo; omimi imomane dae sisina, beiamana ari kumbawate.

Embo kavigari dubo budo,  
Edo iji dave gari jipapa edo  
Iwawa ika beiae da ge tedo  
Edo begisi mi ge pitawa teure,  
Edo beiae da ango wareregedo beiamana aina;  
Bega kakoa edo, amboda amboda aina.  
Bada da jisi embo dave da iai,  
Edo dengoro ainda tedo gari da iai,  
Ko Bada da dombu jimbo beiae ari embo da iai da isira.

Edo amo avera mi imomane usimbese ari ango de dave inakade ewa? Awara ta jimbo dave awa tedo mamato awa, imomane dave; ainda adu ari awa adu eove, edo dubo itomane vevera eure ta; tena Keriso Bada dubo itomane da kotopu ao ewo.

*Ge Ewa Tari. Luke K. 5. 1*

**A**NGO edo jisi mi mimino mamino eite God da ge Agositera, amo Gennesaret umbutu da petedo isiri; edo ma tote umbutu da pekapeka ero gosisina, ango edo woiro embobo ainda wotedo, daune ika teitera. Edo ma da da sisirisina, Simon da ma da, edo ainde tesiri gosisina iai siaka da piari wotain. Edo anumbedo ma da isite jisi atopaposisina. Edo ge dosiri, Simon de sisina, Un gono da wotedo, daune ikamane barido iro eu. Edo Simon mina sisina, Embo, ae daune de itero atesira tedo, siaka ro kumbae gena; na daune piano wotarate teta. Edo eiwa etero, wo jiwae barido jinenebesitera, edo daune ika kapari katogo. Edo Simon Peter mi gido Iesu da baongo da durudo sisina, Na dodo bambu, na beiae embo,

Embo. Awa kore esisina, ae ba ainde daedo, wore dupu-tera awa; edo James de John de Zebedee da mamai ango awa Simon da otatawo. Edo Iesu Simon de sisina, Adu eote, eimango embo dato erido ara. Edo ma ika kora da dumbero gigitembetera, itae dodo baundo ainda amboda amboda esitera.

SUNDAY 6 TRINITY AMBODA

*Pari*

**G**OD, embomai imo karupa edo era awa tedo rorae Gewagaewa sia edo eta, ango edo embo mana kotembara; Nakare toregewasi, edo nakare imo karupa ara, jimbo nei ango ae, awara ta siteta eota awa kumbara, jipapa eora awa daginegotora awa; Iesu Keriso mi Bada natokare. *Amen.*

*Epistle. Rom. 6. 3*

**D**AREVI ta, kaena berari Iesu Keriso da bapataito Deona amo ainda betari da bapataito eona? Awa tedo awa ae da de bapataito mi goitena betari da; awara ta Keriso betari da erira Mamo da parara da ango, ango kaena pepeta anate kavigari teka da; kaena ainde daedo dada etena ainda betari da asisi da, awara ta kaena ainda erari mi ango ane; eiwa kaen gotona edo embo matu kaenakanato ainde daedo cross da detera, edo jimbo beiae ainto gindarate, ango edo kaena jimbo beiae da iai amboda kaen singa ain ae; embo betari mi jimbo beiae de udegarago esira. Ko Keriso de daedo betetena, awara kaen kotembotona ainde daedo kaen kavigana; edo kaen gotona Keriso betari de erorisina, ko amboda tekago betain ae; betari iji nei de ainda iai badari ari itae. Ko ango de betesira, jimbo beiae da iai betesira iji da; ko ango kavigesira, God da iai kavigesira. Ango giwo, ko inemane mi, jimbo beiae da iai betetewa, edo God da iai kavigetewa, Keriso Iesu mi.

*Ge Ewa Tari. Matt. 5. 20*

**I**ESU ambodani de sisina, Jimbo itomane dave mi ove Iegeregari ae Pharisee de dodo daginegainane, ko no mi mana basileia utu da torawa. Gawa, matu embo mi

tetera, Ango ato betore dowasi; ko embo ari betari atota ari adu aina. Ko nane mi imondemane tena, embo berari ae nameji de duduno edo, atota ari adu aina; edo embo nameji de taina, Raca, katari adu aina; edo embo taina, Dauwa, Gehena da niao adu aina. Awa tedo kando ari ito tenemba da piedo e, edo ounda imo bekumba eira kotembe, ounda kando ari ito tenemba da do da piedo do, edo aundo gisi nameji ito de umo jido, ko amboda gundo kando ari ika plate. Ito ito de umo burigiburigi jio, ango de begata de daedo itewa; ango ae ra ta atota ari de imo piaina, edo atota ari imo singa de piaina, edo imo bundari da augaina. Imo de tena, No mi ongo mana idegata, gisi kopa mina itae pieio.

SUNDAY 7 TRINITY AMBODA

*Pari*

**G**OROBA berari da Bada, inemi jimbo ewagaewa berari tutu, edo kando eota; Dao ito karupa ari do natokare da pie tembare, ito iai da singa dave ore, jimbo dave mi nakare undewasi, edo nakare do ato dawa da sima matawa ara; Iesu Keriso mi Bada natokare. *Amen.*

*Epistle. Rom. 6. 19*

**E**MBO ango ge tena pisi itomane da burau ari awa tedo. Imomane dono de beiae de da patu itomane pitewa ainda singabanga, edo boroko jimbo beiamana da singabanga patu itomane pieu, ao ari da. Ango de imomane jimbo beiae da singabanga, jimbo dave da embo tepo etewa. Edo ango de jimbo mi boroko me goteite be eite edo nongonongori? Awara ta ko jimbo eiwa da be betari. Edo boroko jimbo beiae embo tepo etewa, edo God da iai singa ewa, be itomane ao ari da be edo ewa, ko gombu kavigari natopo. Jimbo beiae da riroa mina betari, ko God da kando tepo pievira awa kavigari natopo Keriso Iesu mi Bada kaenato.

*Ge Ewa Tari. Mark K. 8. 1*

**A**NGO de embo jiwae etero, ainda rorae itae, edo ainda ambodani ainda iai daotedo amindemane sisina, Jisi

## PARI AE EPISTLE AE GE EWA TARI

do ena, boroko awamane namonde daedo iji tamonde itora, ko ainda rorae itae, edo rorae dowari awa piano aunteite, begata da jisivi betara. Ko nenei betau da awa gumbera. Edo ainda ambodani mi mina sitera, Inda ango embo eiwa bread injido osi ari dumo da? Edo tedo gosisina, Bread itomane iai nandogori. Edo sitera, 7. Edo embomai butu da anumborote tesiri anumbetero, bread 7 kundo, ategedo, engegedo, ainda ambodani de pisina, amindemane da jisi da piorote; edo ami mi embomai da jisi da pitera. Ko wo babaingae indewa ae awamane da iai isiri beiamana edo sisina ae emi de daedo jisi da piorote. Edo injido osi esitera. Edo egegerari dodo esitera awa kabia 7 sirigedo. Edo embomai 4000 ango; piesiri aunsitera.

### SUNDAY 8 TRINITY AMBODA

*Pari*

**G**OD, berari utu da butu da teoto kera matawa eora; Tedo gotera, beiae berari natokare iai kumbuwasia, edo beiamana namondekare piewasi; Iesu Keriso mi Bada natokare. *Amen.*

*Epistle. Rom. 8. 12*

**N**ANONAMEJI, kaena mina piari kakato amo pisi da raro, pisi da jimbo ango kaen eni; pisi da jimbo ango edo, ko betawa; ko Asisi mi tamo da jimbo awo betari, ango de kavigawa. Awara ta God da Asisi mi kundo gupeira, awamane God da mamai. Ko singa ari da asisi kundo raro, adu tekago eu; ko mamai ari da asisi awa kumbewa, emimi kaen daotena, Abba Mamo. Asisi ami asisi kaenato onjiga tevira, ko kaena God da mamai; edo mamai gido, baiiau kumbari; ko God da baiiau kumbari, ko Keriso de daedo baiiau kumbari; ainde daedo mamato eni ta, ango edo ami de daedo parara anate.

*Ge Ewa Tari. Matt. K. 7. 15*

**P**EROVETA pitawa kakato adu ewo, itomane iai gupera awa sheep tu ombari ami, edo ainda do da wolf tataimbari. Be evira awa kotembewo. Duru dogo bebe mi tokari, ta dombu ni bebe mi ta? Ango ni dave berari

## PARI AE EPISTLE AE GE EWA TARI

da be dave evira. Ko ni beiae da be indapu be evira; ni beiamana da be indapu mana aina. Ko ni beiae da be beiamana mana aina. Ni berari be beiamana ae coro, gido, dedo, niao da augotora. Awa tedo be evira ami kotembeu. Ai mi namonde tevira, Bada, Bada, basileia utu da mana tonaini; ae rata embo Mamo nato utu da itevira ainda jimbo evira ami.

### SUNDAY 9 TRINITY AMBODA

*Pari*

**N**AMONDEKARE piewasi, Bada, edo jimbo dave iji berari katedo edo ara, awara ta nakare, imo itae, mana ro dave etera, edo nakare kondade ewasi, teota ango ara; Iesu Keriso mi Bada natokare. *Amen.*

*Epistle. I Cor. 10. 1*

**N**A jipapa imomane darove, nanonameji, ko mamomo kaenato berari porago du da isiresiwa, edo berari ewa tembuwa; edo berari Moses da iai bapataito ewa poraga da ae ewa da; ko berari rorae asisi da da awa injiwa; ko berari tu indari da da awa injiwa; ganuma mi asisi mi amboda amboda evira awa tu injiwa; ko ganuma awa Keriso. Edo ouwa jiwae God awa dubo beiamana ae; edo ouwa betewa dumo da. Awara ta jimbo eiwa kariwa kaenato, ko beiae jipapa ain ae ouwa jipapa ewa ango. Edo ikuta ove ari da jisi da tumondebain eove, ango ove ena, Embo anumbedo injido tu injido, erido ia uriwa. Ko kaen a gigi ain ae, nenei mi a gigi ewa ango, edo iji da de embo 23,000 duriwa. Edo Bada kaen bawain ae, nenei mi bavewa ango, edo jimbago mi awa gambuwo betewa. Ko ge guguma teove, nenei mi ge guguma tewawa ango, edo gindari mi awa enu betewa. Jimbo eiwa amindemane da iai gumbiri kariwa arate; edo kaena atopatari tedo piesira, kaenato iai nasi da gombu gupevira awa. Awa tedo ouwa be petedo isira awa kotembedo dunain ae. Ko bawari rora itomane iai da gumbae, ko embo da bawari de daedo; edo God ge kato, ko ari bawari itomane mi goroba edo imomane daginegain ae, edo bawari de daedo wotari aina, edo imomane goroba edo ge tawa.

## PARI AE EPISTLE AE GE EWA TARI

*Ge Ewa Tari.* Luke K. 16. 1

**E**DO ambodani de sisina, Rorae embo da, edo ainda rorae sima ari; edo awa bekumba sitera, tedo, ainda rorae aunakauna einesina. Edo awa dao tedo ainde sisina, Eiwa ge ito ro goteni? Imo rorae sima ari jimbo ito ajige; amboda imo mana rorae sima ata. Edo rorae sima ari ge dubo da sisina, Nongo ani? embo nato rorae sima ari domanate sira; na okain edo raro duneni; benunu tari be meira. Eona boroko gena, rorae sima ari domanate taina, mando ikaito da na undore. Embo ika da piari embo nei da nei da jiwae dao tedo, da de sisina, Nandogo embo nato de mina piasi? Edo sisina, Gama tega 100. Edo sisina, Paper ito kundo eiage anumbedo 50 gaie. Edo nei de sisina, Edo imo nandogo mina piasi? Edo sisina, Wheat tega 100. Ainde tesira, Paper ito kundo 80 gaie. Embo ikaito mi rorae sima ari beiae dasiga esisina, ami dubo mi kotembedo esisina; eiwa nasi da mamai ainda rare dubo itevira, parara da mamai ango ae. Edo imondemane tena, beiae mamonane da umo jido dodo, ami oro da matawa itari mi imomane undore.

## SUNDAY 10 TRINITY AMBODA

*Pari*

**N**AKARE do ewasi Bada, edo dengoro ito singabanga ito da benunu ainda iai apigewasi; edo tedo gara awa kumbore, ato rorae imo jipapa edo eta awa benunu tara; Iesu Keriso mi Bada natokare. *Amen.*

*Epistle.* 1 Cor. 12. 1

**N**ANONAMEJI, na jipapa ae asisi rorae darove. Gotowa imomane etene, ikuta ove ari ge darari da iai gaegae kundo aimbira. Awa tedo, imondemane tena, ko ai mi God da Asisi mi ge tedo Iesu Anathema ge teiri; ko ai mi Iesu Bada teiri, da Asisi Kotopu mi.

Ko rorae nei de nei da edo Asisi da dawa. Edo singa ari evekara, edo Bada da dawa. Ko buro evekara rata ko God da dawa embo berari da iai buro evira awa. Edo embo berari Asisi da piari gari piena awa tedo. Edo embo nei Asisi mi dubo ari da ge pisira; edo nei kotembari

## PARI AE EPISTLE AE GE EWA TARI

da ge, Asisi mi da dawa; edo nei ge be ari, Asisi mi da dawa; ko nei ari kavigari rorae, Asisi mi da dawa; ko nei kariwa da jimbo; ko nei peroveta; ko nei asisi gari; ko nei ge evekara; ko nei tari gari; Ko Asisi da dawa eiwa berari edo dada da iai kando evira jipapa evira ango.

*Ge Ewa Tari.* Luke K. 19. 41

**E**DO atutumbedo nasi gido ji sisina tedo, Geteta awa Eiji engo de bega kumbari da jimbo; edo boroko jisi ito onjigetera. Iji ito iai gumbari edo itoro ito mi gua do ito da piedo imo jinenembara, edo demo jiwae imo daro takimaina, edo imo butu da aungedo, ae mamai ito do ito da; edo nongain ganuma da nei da tamo da isirari dodo bamberiko; imo tedo katedo ari iji ito gaera.

Edo tempela da torido, be esira edo rorae kumbari wotorote tesira, amindemane tedo, Ove esisina, Edo oro nato benunu orora; tena imomane torari mai da бага to etewa.

Edo iji berari tempela da atopapotevira.

## SUNDAY 11 TRINITY AMBODA

*Pari*

**G**OD, imo do eota, edo ango edo goroba ito be onjiga teota; kondade ari ito natokare iai tega atate, ango nakare ge ito da begata da tumbaro, teto gotera awa kumbara, edo rorae dave ito utu da awa namondekare piewasi; Iesu Keriso mi Bada natokare. *Amen.*

*Epistle.* 1 Cor. 15. 1

**N**ANONAMEJI, Ge ewa tari itomane iai atopapotena awa kotembu kotembu awate tena, inemane mi awa kumbewa, edo ainda do da itewa, edo amimi kavigetowa, ge awa nomi atopapoteni edo jido takimbedo evi ta aeri, ango ae ra ta kotembae dumbae evi ta rori? Edo gisi tekarae kuputena awa imondemane pieteno tembukera esira, awa Keriso jimbo beiae kaenato embo betena, ginuma ango; edo goewa, iji tamonde de enina, ginuma ango; edo Cephas da iai da idegena, edo awamane 12 da iai da; ainda amboda nanonameji 500 de nenei de da iai,

## PARI AE EPISTLE AE GE EWA TARI

ainda iji da de idegena, awamane berari engo de iteru, ko nenei aundo ruvegetero; ainda amboda James da iai da idegena; edo aposetolo berari da iai da; edo ambo be ambo nato iai da idegena, na be wotae dumbae eona ango da iai; na aposetolo siakabaingae, ko na ewa raro aposetolo teri kae; na God da Ekalesia usimbese eona. Edo God da kondade ari mi engo itona; edo ainda kondade ari namonde pievira topero ae, edo buro dave eona embo berari nenei ango ae, tena na ae, edo God da kondade ari nato iai itevira awa. Awa tede na ta ouwamane, engo atopasido, engo kotembotowa.

*Ge Ewa Tari.* Luke K. 18. 9

**I**ESU parable emone embo di site omi dave ika kotembeteiworo edo embo nenei beuto eora. Embo tote tempela da vivisitera benunu embo, nei Pharisee, edo nei Publican. Pharisee mi petedo benunu ango sisina, God, imo ategetena na embo nei ango ae, donenegedo, mina ae dumbae, a ipu da edo, Publican eiwa angora. Week da iji tote rorae dotunena, nakanato evekara eono ro euri da piedo eona. Edo Publican aike peposisina utu da pagae, opopo dedo sisina, God, na doewasi, na beiae embo. Imondemane tena, oro ikaito da wotesira, edo amo beiamana edo nei itae. Embo jiri akuta erorevira, dowari wotaina; edo akuta douri wowotevira jiari enaina.

## SUNDAY 12 TRINITY AMBODA

*Pari*

**G**OD goroba jiwae, Matawa itota, nakare benunu Gborere tetero, imo dengoro mi gain tede sima eta, nakare siaka jipapa etero, imo jiwae piain jipapa eota; do ito matawa natokare iai verougatate, edo jimbo natokare adu eora awa kotembedo dowasi, edo rorae ewa namondekare piewasi, imo de tede gari nakare me eira awa, Ge Tari natokare mi edo ainda jimbo dave awa tede, Mai ito Iesu Keriso, Bada natokare. *Amen.*

*Epistle.* 2 Cor. 3. 4

**E**NGO kotembari natokare isira, Keriso mi God da Eiai; be ro natokare iai rora nakanatokare ajigeri; ko

## PARI AE EPISTLE AE GE EWA TARI

goroba natokare God da iai; ango edo ami mi esiri tari gari taka da nakare singa orote; ove mi ae ko asisi mi; ginuma esiri ambira; edo asisi esiri kaviagesira. Edo betari ainda singa ari, ove evira awa, edo ganuma da kewari awa ae parara de daedo gumbira, ango edo Israel da mamai Moses da dombu gae etera, dombu da parara awa tede, parara madevira awa, ango edo asisi da singa ari parara de aini ta? Ko bekumba ari da singa ari parara de, edo jimbo da singa ari ainda parara dave.

*Ge Ewa Tari.* Mark K. 7. 31

**E**DO Iesu Tyre da gano dodo aundo, Sidon darutegedo, Galilee da umbutu da gupusina Decapolis da gano toropu da. Edo ainda iai embo kundo guputera dengoro dundari rata iwawa oregari; edo tu jiari gari sitera. Edo embomai da do da kundo eve aundo, ingo ingisi dengoro to da piesiri, kosiwa esisina, edo iwawa tu jijisina, edo utu da pangedo, oena apisina, edo ami tede sisina, Ephphatha, awa, Apige. Edo dengoro apigesisina, edo iwawa kaingari awa udesiri, ge beiamana sisina. Edo mai nei da teure kae sisina; edo ami inakade sisina, edo awamane mi oru inakade esitera. Edo kore ari siakabadae mi tanjido sitera, Berari dave esira; euri dengoro dududegari goteiworo, edo dadaregari ge teora.

## SUNDAY 13 TRINITY AMBODA

*Pari*

**G**OD Goroba jiwae, do kato, imo akuta pieteto embo- Gmai ito dave imo be kera eora, ango engo dasiga orote; Tede gotera, edo ato nakare einda butu da ito iai ambodani be ara, ango edo gombu da utu da teteto gotera awa mana kumbae dowara; Iesu Keriso Bada natokare da ari dave embo. *Amen.*

*Epistle.* Gal. 3. 16

**G**OD Abraham de sisina, ainda ve de. Ko ve, be Gidewago tae; edo gido da kaki, Ko ve ito da, awa Keriso. Engo teona; Ge jienda 430 amboda gupevira awa, tari gari God goroba evira awa itae ain ae, edo tari



PARI AE EPISTLE AE GE EWA TARI

gari awa manaina. Ko baiaw Ge mi ri ta, ango edo tari gari mi ae; ko God tari gari mi Abraham de pisina. Edo Ge nongo nongori? Jimbo beiae embo dada esira, itorote, ko ainda ve gumbare tae, ainda iai matu sisina awa; edo anela mi oru esitera, toro ari da ingo mi. Toro ari dakaki da toro ari ae; ra ta dakaki God. Ge God da tari gari bero esi ta? Ango ae; ko Ge ari kavigeari pia-rate, ge be jimbo beiamana Ge mi gumbisira awa. Ko ove embo berari rorae beiae da jinenebesisina, edo tari gari Iesu Keriso da kotembari mi ouwa kotembotora awa piesira.

*Ge Ewa Tari. Luke K. 10. 23*

**J**ISI da beiamana eiworo goteiwowo gotora awa; Jimondemane tena, peroveta ae daotari de jiwae gotowa awa gain jipapa edo, gae esitera, edo dengoro mi gotowa awa gain, edo gae esitera.

Ango edo ge embo erido awa bavedo sisina, Atopatari, nongo edo wasiri de matawa itari kumane? Edo ainde sisina, Nongain tedo ge gagurisini? ro ajijigedo esi? Edo mina sisina, Bada God ito jipapa ata, berari do ito da, berari asisi ito da, berari goroba ito da, berari gomo ito da; edo umo jiari ito jipapa ata imo ango. Edo ainde sisina, Awara mina teteta; eiwa e, edo kavigate. Ko ami dave akuta ari jipapa edo, sisina, Edo umo jiari nato averi? Iesu mina sisina, Embo da Jerusalem ango awa baundo Jericho wowoteira; edo torari da iai durisina ami da woru udegessitera edo detero nongo betesiri kota, edo dodo baunsitera. Ango edo priest da mi begata da ainda wotedo baunteiri; edo ami gido kupo nei da darutegesisina. Edo ango Levi mai da iai da gundo gido kupo nei da darutegedo baunsisina. Ko Samaria mai da mi tepumene baunsisina, nasi da ami isiri ainda gumbiri; edo ami awa gido dubo beiae esisina edo ainda iai gundo tamo matu doedo gavi mi ae wine de dodegedo, ass ika da sirido, tembari mai da oro da kundo baundo, tao esisina. Edo sipo de penny tote dumbiri idegesiri, oro sima ari de piedo sisina, Awa tao eite, edo nei kupeiato tenda gundo beba plane. Imo eiwamane tamonde geteta ami umo jiri embo torari da iai duriri ami? Edo sisina, Do esisina ami. Edo Iesu ainde sisina, Bambu baundo, ango ate.

PARI AE EPISTLE AE GE EWA TARI

SUNDAY 14 TRINITY AMBODA

*Pari*

**G**OD, Goroba jiwae, matawa itota, ge be ari ae sima Gari ae dubo bari de natokare iai ato bajina ore; edo nakare teteto gotera awa kumborote, ato nakare teteta awa jipapa ara; Iesu Keriso Bada natokare embo. *Amen.*

*Epistle. Gal. 5. 16*

**E**DO tena, Asisi mi tembuwo, edo pisi jipapa evira awa eove. Pisi Asisi ge tai jipapa eira, ko Asisi da pisi ango; edo eiwa itoro mina ara eora, ango de ari ai jipapa eowa awa ae eowa. Edo Asisi imomane kumbari ko imomane Ge da badari ari da mana itetewa. Awara ta pisi da buro dambu bedeira, gigi ari, dono, kamento ari, ove do da tumondebain ari, bibinei, dumo, itoro, gisi gatari, duduno, mina dara, evekara, kiki pitawa patawa, jitari, dutari, siaka indae, da ango, engo de teteno gotewa, teteno gotowa ango, ko awamane ari ango eora awa God da basileia kumain ae. Edo Asisi da ve dubo bari, dubo beiamana ari, bega, borere ari, kemo jiari, jimbo dave, kotembari, burau ari, indate ari; eiwa ro ge tae. Ko Keriso ikaito awamane pisi cross da do itera awa ainda jipapa ari ae iawa ari de daedo.

*Ge Ewa Tari. Luke K. 17. 11*

**A**NGO edo Jerusalem baunteite Samaria de Galilee de Atoropu da tepeite, nasi da da toreite, embo koiara ipa tote de mina tua edo, aike pepositera; edo ge jiero bedesiri tedo, Iesu, Embo, nakare do ewasi. Edo gido amindemane sisina, Bambu, priest da tamo itomane awo gare. Ango edo baunteite dave esitera. Edo da gido kavigedo, wareregedo ge bajina tedo God dasiga esisina; edo dombu mi ami tai da durudo, ategesisina; amo Samaria mai. Edo Iesu mi mina sisina, Embo ipa tote dave esitera ta aeri? ingo da nei ao pasido awawa indari? Embo tuwae ta rori, edo wareregedo, God da dasiga piaae, emo aike embo eiwa akuta? Edo ainde sisina, Eri, edo bambu; kotembari ito esiri kavigeteta.

PARI AE EPISTLE AE GE EWA TARI

SUNDAY 15 TRINITY AMBODA

*Pari*

**T**EDO gotera, Bada, Ekalesia ito do edo, iji da doae toregewasi; edo tonembari ito ae gido embomai burau durara, awa tedo kondade edo toregewasi, edo rorae beiae nakare usimbese ain ae, edo rorae berari beiamana kavigari natokare embo ainda iai nakare kundo gumbuwasi; Iesu Keriso mi Bada natokare. *Amen.*

*Epistle. Gal. 6. 11*

**O**VE siakabadae giu, ingo nato mi paper itomane da gagunona awa. Embo jipapa eora awa tamu mi dariga ai, ami mi imondemane tera tamu itomane jugain; ango edo mana usimbese ara Keriso da cross embo. Ko jugutora awa, ge be bae eora; edo gido jipapa era tamu itomane jugorote, edo pisi itomane embo iawa orote. Ko na iawa ain ae, ko Bada kaenato Iesu Keriso da cross da, ami mi nasi nato iai cross da dewa, ko na nasi da iai. Edo jugari goroba ae, jugae, rata ari teka. Ko embo tega ainda pepeta eora, bega awamane da iai, edo do ari, edo God da Israel da iai.

Boroko ta amboda na ai ari dubo beiae ain ae; tamu nato da Iesu da kenatu isira.

Bada kaenato Iesu Keriso da kondade ari asisi itomane da itarate, nanonameji. *Amen.*

*Ge Ewa Tari. Matt. K. 6. 24*

**A**I mi badari tote da iai singa eiko, edo nei dumo eite, nei dubo bureite, ko nei da amboda amboda eite, ko nei gisi gataina. God ae mamon da iai singa mana awa. Awa tedo imondemane tena, Kavigari itomane embo dubo vevera ain ae, ro indavi, ta ro tu indavi, edo ro tamu itomane da ombavi. Kavigari mi rorae daginegetevira ta ae ri? ko tamu woru? Utu ni giu, urae, ko kapae, edo koara da dada ae; ko Mamo itomane utu da ango ami undeira. Imomane be daginegetevi ta aeri? Ko imomane indawara ainda dubo vevera ari edo cubit dakaki dada ari riboriaina? Edo nongain woru dubo itomane vevera eiri? Keta ambe da awa giu erorera; ouwa buro

PARI AE EPISTLE AE GE EWA TARI

ae, ko arae; edo nane imondemane tena, Solomon da parara berari awamane da ango giro ae. Ko God ango uji ambe da awa pieuri opora, boroko itera awa, edo sipo de taiajiwa da aungesira awa, imomane be piari ombavi ta, imomane kotembari itomane baingae? Awa tedo dubo vevera ari teove, ko Kaen ro inani? ta, Kaen ro tu inani? ta, Kaen ro omani? Berari eiwa Etene mi kakoa era. Mamo itomane utu da ango ami kotembeteiri berari eiwa jipapa ewa. Ko gisi ainda basileia de ainda jimbo dave awa be de kakoa eu; edo berari itomane iai dada aina. Awa tedo sipo de imomane ari dubo vevera ain ae; sipo de dubo vevera akuta aina. Iji da beiae ainda iai awara.

SUNDAY 16 TRINITY AMBODA

*Pari*

**T**EDO gotera, Bada, Ekalesia ito do edo, te edo, toregewasi; edo imo awa kondade ae tepo sima ain ae, awa tedo ainda iai beiamana edo, toregedo, ato sima natopo arate; Iesu Keriso mi Bada natokare. *Amen.*

*Epistle. Ephes. 3. 13*

**I**MONDEMANE tedo gotena, edo mamato ari nato imomane embo imomane ari dubo beiae ain ae, ami dasiga itomane.

Eiwa tedo Mamo da gisi da baongo dadari eona, amimi mamu ari berari utu da butu da daotena, edo ainda parara dave be dave ango, piedo ainda Asisi do itomane ari goroba be awate; edo Keriso dubo itomane da kotembari mi nasi jiare; ango edo imomane dubo bari da kotembedo itave, edo kokotopu de daedo goroba edo gave aputembari edo ribori ari, edo gaisimbari edo gonini rori, edo Keriso da dubo bari, embo mana gara, kotembewo, ko berari God be da evira be da ave.

Ouwa berari teoro gae evira awa, edo dubo mi kotembae eora awa dave evira, ainda goroba mi do kaenato da buro evira awa ango, ainda iai parara ekalesia da ko Iesu Keriso mi umo berari da, edo matawa itaina. *Amen.*

## PARI AE EPISTLE AE GE EWA TARI

*Ge Ewa Tari. Luke K. 7. 11*

**A**NGO edo amboda aikae, nasi ainda dao Nain da baunsisina, ae ambodani ika de daedo baunsitera, ae jisi bajina de. Edo nasi be da gupeiri, gi, betena ainda wowositera, ai da mai dakaki, edo amo rori: edo nasi embobo berari ainde daedo itora. Edo Bada gido, do edo, ainde sisina, Ji teote. Edo atutumbedo, kakate jijisina; edo amboka ari isiute. Sisina, Singa, imonde tena, eri. Edo da besisina da anumbesisina, edo ge be esiri; ai de pisina. Edo aduari jiwae tadojisina, edo God dasiga edo sitera, Peroveta siakabadae kaenato iai erira; edo, God embomai ika da iai etega gupusina. Edo ainda ge eiwa ba wowosisina Judaea berari da, edo iai berari da.

### SUNDAY 17 TRINITY AMBODA

*Pari*

**B**ADA, tedo gotera, ato tonembari ito nakare gisi edo Amboda aina, edo ato nakare jimbo beiamana berari pipika papika jipapa ara; Iesu Keriso mi Bada natokare. *Amen.*

*Epistle. Ephes. 4. 1*

**A**WA tedo tena na Bada da bundari embo, tedo gotena Aoru ari itomane da dao tera pepeta dave ewo, akuta piari wotari berari de daedo, ko burau ari de, sima ari de, ae dubo bari mi sima akuta ara ewo; inakade ewo edo Asisi da dada utari bega da kaingari mi jiave. Tamo dakaki, Asisi dakaki, imomane oru itomane da sima ari dakaki teora ango. Bada dakaki, kotembari dakaki, bapa-taito dakaki, God dakaki, berari da Mamo, ouwa berari da badari, edo berari da iai buro evira, edo berari da do da isira.

*Ge Ewa Tari. Luke K. 14. 1*

**A**NGO edo Pharisee da embo badari da oro da totorisina sabate de, bread inain tedo, edo ami awamane jijimbessitera. Edo gi, aminda gisi da embo vibu mi tadujisina awa itevira. Edo Iesu ge embobo ae Pharisee

## PARI AE EPISTLE AE GE EWA TARI

de mina site sisina, Rorae beiamana, sabate de ari kavi-gari ta kaviogaeri? Ko awamane ge tuku esitera. Edo ami awa kupusina edo esiri kaviogesisina, edo dosiri baunsisina. Edo ami amindemane sisina, Imomane indawa ainda ass ta ox mi koto da duriri edo sabate de mana borae jiato vitaina? Edo awamane mina eiwa tae tae esitera.

Edo parabole jiputera awa de sisina, awamane mi anumba ari beiamana avigedo amindemane sisina, Embo a jimaina da iji awari da ainda jimbu, edo anumba ari beiamana da anumbote, ko daginegari ikaito mi dao tari gido, imo ae ainde dao taina ami pumango imonde tare, Embo einda iai daginege; edo imo ango de me gido-gido iai tutu da anumbeio. Ko jimbudo dodore, baundo iai tutu da anumbeio, edo imo dao taina ami pumango imo de tare, Umo jiari nato, ikane visi; ango dasiga ito itare anumbetera ainda jisi da daedo. Ami jiri akuta erorevira dowari wotaina, edo akuta douri wowotevira jiari enaina.

### SUNDAY 18 TRINITY AMBODA

*Pari*

**B**ADA, tedo gotera, embomai ito kondade ewasi, edo Bbawari nasi de, tamonde, diabololo de bavedo eora awa beuto ara, edo dubo de do de beiamana edo imo God dakaki amboda amboda ara; Iesu Keriso Bada natokare awa embo. *Amen.*

*Epistle. 1 Cor. 1. 4*

**I**MOMANE embo God nato iji berari ategetona God da Ikondade ari embo Keriso Iesu mi imondemane pievira awa; berari da amimi rorae embo eowa ge mi berari, kotembari mi berari; Keriso da bedari itomane iai goroba evira ango; ko rorae nomi imomane amboda amboda ain ae, edo Bada kaenato Iesu Keriso da gumbari sima ewa; Awa awara ari imomane goroba awa gombu da, edo Bada kaenato Iesu Keriso da iji de bekumba ari itomane itain ae.

*Ge Ewa Tari. Matt. K. 22. 34*

**E**DO Pharisee mi gositera Iesu Sadducee ge tesiri dodo, Edo dada usitera, Edo da amindemane da iai, ge embo,

## PARI AE EPISTLE AE GE EWA TARI

bavedo atota edo sisina, Atopatari, ge da indawa ge bajinani? Edo Iesu mi sisina, Bada God ito da dubo buio, do ito berari mi, asisi ito berari mi, edo dubo ito berari mi. Ge eiwa bajina ra ta ko dakaki. Ko nei ainda gagane anga evira, Otawo ito dubo buio imo anga. Ge eiwa tote de ge de peroveta de oreko era.

Anga edo Pharisee dada utetero Iesu mi atota edo sisina, Keriso ro dubo mi siteu? amo anda maini? Sitera, David da Mai. Tedo, nominomi David Asisi da Bada dao tevira, tedo,

Bada nato de Bada mi sira,

Ingo be nato da anumbe,

Edo itoro ito tai ito da dapari ane.

David mi amo Bada tevira, ko nominomi ainda Mai? Edo ai mi mina tae be tae, ko ai mi anga de amboda goroba edo raro akuta atota eri.

## SUNDAY 19 TRINITY AMBODA

*Pari*

**G**OD, Imo ae, nakare dubo ito beiamana mana ara; Gpiawasi do edo Asisi Kotopu mi jimbo berari da dubo natokare atopasido gisi jiari; Iesu Keriso mi Bada natokare. *Amen.*

*Epistle. Ephes. 4. 17*

**A**WA tedo eiwa tena, ko Bada da iai anga oru eona, imo-  
Amane pepeta eite aimbove, etene dubo tepo mi pepeta eora anga, ainda dubo munia esiri, ko embo eve etera God da kaviegari da, darora awa, dubo wawoegari; owamane kana bac eite, iawa ari da akuta pietera dona ari berari tepotapo ain tedo. Ko imomane anga ae Keriso ajigetewa; imomane awa gotovi ta, ko amimi imomane atopasira, ge be Iesu da iai itevira anga; engo embo matu dowo, awa beiae evira jipapa pitawa kato de; edo dubo itomane asisi ari teka aina, ko embo teka ombuwo, awa God anga jimbo ewa da edo ge be kotopu da esira.

Awa tedo pitawa dodo, berari mi ae embomai itomane de daedo ge be tewo; kaena papatu mina eona. Duduno

## PARI AE EPISTLE AE GE EWA TARI

edo, jimbo beiae eove; imomane duduno ae edo iji wotari; ko diabololo da iai potove. Beono kato tekago beono ain ae; ko buro edo ainda ingo mi buro beiamana arate, edo embo jipapa evira ainde piaina. Ko ge beiae be itomane da idegeure; rata beiamana atopatain tedo jipapa evira awa anga, edo dengoro mi gotora awa kondade aina. Ko God Asisi Kotopu awa dubo beiae eure, aminda rorou da iji da kariwa etewa. Isimbari berari de, duduno de, mina dara de, ge bundari de, gisi gatari de itomane iai doworote, edo dumo ari berari de daedo; edo gido beiamana mina ara ewo, edo do ewo, edo mina kotembedo dowo, da awa God mi Keriso embo jimbo itomane kotembedo dosira.

*Ge Ewa Tari. Matt. K. 9. 1*

**I**ESU ma da visido temundo nasi ikaito da gupusina. Edo gi, ainda iai embo baorobundari kundo guputera, besi da evevira awa. Edo Iesu amindemane da kotembari gido, baorobundari de sisina, Mai, dubo beiamana arate, jimbo beiae ito kotembedo dosira. Edo gi, ove egeregari nenei mi dubo da sitera, Embo eiwa gadumbesira. Edo Iesu mi dubo mi sitera awa kotembedo sisina, Nongain tedo beiae dubo itomane mi siteu? Indawa edopare, ge tari, Jimbo beiae ito kotembedo dosira, ta ge tari, besi ito kundo pepeta e? Awara ta kotembawo embo da Mai da iai badari ari butu da isira jimbo beiae kotembedo domaina (anga de baorobundari de tesira), Erido besi ito kundo, oro ika da aunsisina. Edo embo jiwae mi gido kore edo, God de dasiga esitera, ouwa badari ari anga embo de pisina.

## SUNDAY 20 TRINITY AMBODA

*Pari*

**G**OD Goroba jiwae, do kato, tedo gotera, edo natokare Giai beiamana ewasi, edo adu ari jiwae de toregeyasi; edo nakare tamo de asisi de sirigarago, dubo damo ari jimbo jipapa eota awa orote; Iesu Keriso Bada natokare awa embo. *Amen.*

## PARI AE EPISTLE AE GE EWA TARI

*Epistle. Ephes. 5. 15*

**G**IWO gido pepeta dave ewo, dutetegari ang'o ae ra ta, gido. Awa tedo dutove, ta Bada mi jipapa eira kotembe-wo. Ko wine injido sini gambure, ami mi tarawa, ko Asisi be da avi; edo psalm de hymn de ia asisi mi tedo katedo ewo, edo ia tedo Bada da iai da ia do itomane da jimbuwo; ko iji jiwae berari embo God Mamo matawa ategewo, Bada kaenato Iesu Keriso da Dao da; edo iji berari be mina bara ewo Keriso da adu ari da.

*Ge Ewa Tari. Matt. K. 22. 1*

**I**ESU mi sisina, Basileia utu da amone be dariga mi a Rorou ainda mai embo sia evira ang'o, edo ainda singa piesiri aundo dao tarate dao tevira awa rorou da gumborote; ko awamane aimbari beuto esitera. Ko iji nei de singa nenei piedo sisina, Jiputera awa tewavi, Gi, ox nato ae gavi de nato deteno, berari sia etera; puwo rorou da. Ko awamane beuto etero, ko aimbera, nei ainda eda da, nei ainda ori ari da; edo nenei ainda singa usimbese edo detero besitera. Edo dariga mi awa gido duduno edo, ainda itoro embobo piesiri gundo, dari embobo awa itae dedo re ainda nasi awa dugitera. Ang'o de ainda singa de sisina, Rorou sia etera ta, dao tevira awa dave ae. Awa tedo aimbuwo begata torari da berari tuvewo, rorou da dao tave. Edo awamane singa begata da wotedo, berari tuvitera awa sirigesitera, beiae de dave de; edo rorou sinopu be da esisina. Edo dariga totorisina sinopu gain tedo, edo embo gosisina, ko ainda rorou woru kumbae. Edo sisina, Umo jiari, nongo edo ainda toresi, rorou woru ito itae? Edo ge tuku esisina. Ang'o de dariga mi singa de sisina, Ingo de tai de bundedo, iai dambu munia da augeu, ounda ji site ji vegare. Jiwae dao tedo, indewago avigesitera.

## SUNDAY 21 TRINITY AMBODA

*Pari*

**T**EDO gotera, Bada, do ari embo, edo embo imo ge be eora, ainda iai rora'e beiae dowari de, bega de pisido,

## PARI AE EPISTLE AE GE EWA TARI

ato awamane jimbo beiae berari de teiarate, edo dubo damo ari, ito iai ambodani ara; Iesu Keriso Bada natokare awa embo. *Amen.*

*Epistle. Ephes. 6. 10*

**N**ANONAMEJI, Bada da iai goroba ewavi, edo ainda goroba bajina da. God da itoro ari berari omundo, goroba edo diabol'o ge tewo. Kaena ororo de pisi de da iai itoro ae, ra ta dadariga de babadegari de, munia ainda dariga butu da de, ko beiae da asisi iai utu da. Eiwa tedo God da itoro ari berari itomane iai kumbuwo, edo iji beiae da itoro ave, edo itae edo petave. Awa tedo petedo, gun itomane ge be iade jiave; edo jimbo dave pako itomane duredo, ko Ge be ari da bega da sia ari de tai itomane da piewo; edo nei da kotembari bere itomane iai kumbuwo, ami mi jimbo beiae da niao berari awo amaina; Edo gobe kavigari kumbuwo, Edo Asisi da kasiwo, God da Ge: edo pari de benunu tari de daedo Asisi da pari matawa site isiwo, ko eiwa tedo iji berari jijimbeteite, edo embo kokotopu embo berari pari tewo, edo na embo ge piari jiro nato dambudarari na be angedo, edo Ge be tari da jimbo gae itari onjiga tane, na awa tedo oru ari bundarira; edo amimi kanena kanena tane, buro nato ang'o.

*Ge Ewa Tari. John K. 4. 46*

**D**ARIGA da isinesina ainda mai amain einesina Capernaum da. Awa gosisina Iesu Judaea da ang'o Galilee da gupeite, edo ainda iai aundo wotedo mai ari erarate sisina; ouwa beteira. Awa tedo Iesu mi sisina, Kotembove ta, kariwa de kore ari de gotewa. Dariga mi ainde tesiri, Embo, mai nato beteure kae wotatate. Iesu mi sisina, Aimbu; mai ito kavigesira ta. Embo ami ge Iesu mi sisina awa kotembedo aunsisina. Ko boroko wowoteute singa ika utotoru edo sitera, ainda mai kavigesira. Edo tedo gosisina iji nonde kavigari tuturo eari. Awa tedo sitera, Matu iji 7 karu taingesira. Awa tedo mamo mi gosisina iji Iesu mi sisina ainde, Mai ito kavigesira: edo ae ainde oro ika berari kotembesisina. Iji nei eng'o de Iesu kariwa da da gagane esisina, awa Judaea da ang'o Galilee da gupeite.

## SUNDAY 22 TRINITY AMBODA

*Pari*

**B**ADA, tedo gotera, Ekalesia oro be ito kondade ato Bjimbo matawa dave aina; toregewasi, edo beiae ainda iai itae, jimbo dave edo ito iai ambodani ara, Dao ito dasiga orote; Iesu Keriso mi Bada natokare. *Amen.*

*Epistle. Phil. 1. 3*

**B**ADA nato ategeteite ango de, imomane kotembedo Bpari nato berari imomane berari embo, iji da doac pari tedo ena ae dubo ewa ari de daedo, dada utari itomane ge be tari da gido, gisi, awara ta boroko; eiwa be kotembetena, ko awa itomane iai buro dave tuturo evira awa Iesu Keriso da iji de itae edo petugaina; beiamana imomane berari embo eiwa dubo mi kotembetena, imomane dubo nato da itewa, ango ko bundari nato da ango ae ge be tari da benoka benoka ae ari goroba ari de, ae namonde da kondade ari kaen kundo ena. God gari tutu nato, na Iesu Keriso da do ari mi imomane jipapa ena. Edo eiwa pari tedo ena ko dubo bari itomane babodeirari kotembari mi gari mi berari; edo ari eve kotembedo giu; ko imomane dave ra ta buria itomane itae Keriso da iji da; ko jimbo ewa da be mi be da ewo, Iesu Keriso mi God da parara da ko ainda dasiga da.

*Ge Ewa Tari. Matt. K. 18. 21*

**P**ETER mi Iesu de sisina, Bada, iji nandogo umo nato da jimbo beiae nato iai ari kotembedo domani? iji 7 ta? Iesu mi sisina, Na iji 7 tae ra ta iji 7 de 70 tembukera edo eira. Awa tedo Basileia utu da be dariga dakaki, ae singa ika de ajigari jipapa esisina. Edo ajigari tuturo esiri, edo ainda iai dakaki kundo guputera talents 10,000 piarate. Ko ami nomi raro mina piei kae, badari ika ori arate sisina edo aro de mamai de, berari ikaito awa mina kumain. Awa tedo singa mi durudo benunu sisina, Bada na sima e eirato, berari imonde mina plane. Ko singa awa badari ika ito mi do edo pieure kate ge sisina. Edo singa awa wotedo singa nei tuvisina, edo penny 100 mina piarate; edo jido gitegedo sisina, Mina naka pie. Edo

singa umo ika mi durudo sisina, Na sima e eirato, mina ika plane. Ko doturisina; edo aundo egiregari da aunge-sisina edo mina piarate tedo. Edo singabanga otatawo evira awa gositera, edo dubo beiae esiri, gundo badari ika de berari evira awa sitera. Edo badari ika mi dao tedo ainde sisina, Imo singa beiae, riroa mina ge tetena, tedo gotota awa; singa ika umo jiari do etesi ta, nane mi imonde eona ango? Edo ainda duduno esisina, edo bubundegari da iai pisina mina ika berari piarate. Ko amo ango Mamo nato utu da ami aina, imomane berari embomai do itomane da kotembedo dove.

## SUNDAY 23 TRINITY AMBODA

*Pari*

**G**OD, imo natokare toregari goroba, jimbo beiamana berari da tutu; tedo gotera, edo sia ewasi, edo Ekalesia ito benunu teora awa giwasi; edo ewasi nakare ge be edo tedo gotera awa, be kumbara; Iesu Keriso mi bada natokare. *Amen.*

*Epistle. Phil. 3. 17*

**N**ANONAMEJI, name ena awa vevetain eu, edo ouwamane nakare kariwa itomane ango pepeta edo era awa kotembeu. Jiwa mi pepeta era, ko iji jiwa teona, ko boroko emo ae jijiu de imondemane tena, ouwa Keriso da cross da itoro; ouwa ainda gombu gindari, awamane da god osi, ko ouwa amindemane da iawa ari jiro tokukura ari da, ko ari butu da awa dubo mi kotembedo era. Utu nasi kaenato; ko ango Ari kaviegari kaen sima edo ena, Bada Iesu Keriso; ami tamo kaenato simbere ari teka arate, edo ainda tamo inge parara be parara aina, ainda badari ango, ko emimi ainda iai berari ainda badari ari da piedo evira.

*Ge Ewa Tari. Matt. K. 22. 15*

**A**NGO da Pharisee aundo ge jijiritera nomi ge ika da akikive eteri tedo. Edo ainda singabanga Herod da embomai de daedo ainda iai etegedo sitera, Atopatari, nakare gotora imo beiamana be, God da begata ato dave



## PARI AE EPISTLE AE GE EWA TARI

pasido eta, ko imo ave adu ae; ko imo embo da dombu kotembedo ae. Awa tedo namondekare te gore, ge ito rori? Beiamana Caesar da rorou pieten i ta piain aeri? Edo Iesu amindemane da jimbo beiae gido sisina, Nongain havevi, pitawa kakato? Rorou da money pieu gane. Edo ainda iai penny kundo gumbero, sisina, Emo anda asisi de ove de ri? Sitera, Caesar da. Ko sisina, Awa tedo Caesar da gido Caesar de pieu, ko God, God da. Awa gido kore esitera, edo dodo taingedo, aunsitera.

### SUNDAY 24 TRINITY AMBODA

*Pari*

**B**ADA, tedo gotera, embo ito ainda jimbo beiae de Budegewasi; nakare berari sivedo edo era, imo beiamana edo rorae beiae etera awa ainda kanjigari da toregevasi; Eiwa ewasi, Mamo utu topo, Iesu Keriso embo, Bada natokare de Ari kavigari de. *Amen.*

*Epistle. Coloss. 1. 3*

**G**OD Bada kaenato Iesu Keriso da Mamo ategetena, Gedo imomane embo benunu iji da doae tedo ena, kotembari itomane Keriso Iesu mi ko dubo bari kokotopu berari da iai gotona, sima ari embo imomane embo utu da pipitevira awa, awa matu dengoro mi gotowa ge be tari da ge be da ge da, awa itomane iai gupevira ainda; ko anggo nasi berari da be edo babodevira, itomane iai da anggo, anggo de God da kondade dengoro mi gido ge be kotembotora; ko anggo Epaphras mi teuri gotowa dubo bari embo, nakare singa otawo, Keriso da singa dave konda natokare; edo ami dubo bari Asisi mi itomane ge tesiri gotora.

Eiwa tedo nakare anggo, anggo de eiwa dengoro mi gera, benunu imomane embo tae doae, imomane embo tedo gotera ko jipapa evira awa kotembari be da awa, dubo bari de gari asisi mi berari de daedo, ko Bada da anggo pepeta dave edo be ave, edo God kotembedo baijiwo; edo goroba berari imomane jiari goroba ave, ainda parara da goroba anggo, sima ari de berari dubo ewa ari de daedo; ko Mamo ategewo, ami kaena ena kokotopu parara da itora ainde daedo baiiau kaen kumane.

## PARI AE EPISTLE AE GE EWA TARI

*Ge Ewa Tari. Matt. K. 9. 18*

**A**NGO de Iesu eiwa John da singa de siri, gio, badari Agumbiri do da benunu tedo sisina, Gagara nato boroko be boroko betesira; ko pu pumango ingo ito mi tu jiato kavigare: Edo Iesu erido amboda amboda esisina, edo ainda singa anggo. Ko gi, eutu ororo wowote inesina ainda jienda 12 ainda gunda gundo ainda woru begisi jido, dubo da sisina, Ainda woru begisi tu jido kavigane. Edo Iesu mi wareregedo gido sisina, Gagara, kopuru ito dambudario; kotembari ito mi esiri kavigeteta. Edo eutu iji da anggo kavigesisina. Edo Iesu badari da mando da torido, kimino embo de ko jisi ge gurora awa gido sisina, Woteu, pita amo betae ra ta aundo ruvegesira. Edo awamane mi iro jijiritera. Ko anggo de jisi piesiri idegetero, torido, ingo da jiri; pita erorisina. Edo bino eiwa wowosisina nasi ainda iai berari da.

### SUNDAY 25 TRINITY AMBODA

*Pari*

**E**MBOMAI ito ge be eora awa dubo ao udewasi, Bada, Eouwamane jimbo dave da be jiwae orote, edo ito iai jiwae kumborote; Iesu Keriso mi Bada natokare. *Amen.*

*Epistle Embo. Jer. 23. 5*

**B**ADARI mi sira, Gi, iji isipora, ko David da iai Patu Bdambudarari ano enaina, edo Dariga badari aina, edo dave be dave edo, ko atota ari de jimbo ewa nasi da aina. Ainda iji de Judah kavigedo, Israel tepo nasi jiata; edo dao eiwa tara, Bada jimbo dave kaenakanato. Ko Bada mi sira, Awa tedo iji isipora, ko mana tara, Bada isirari gido, ami mi Israel da mamai Egypt anggo kundo vivisisina awa, tena, Bada isite, animi Israel da ewowo da ve nasi bate de nasi berari nane onona awa kundo visido gumbira; ko butu ikaito da nasi jiorote.

*Ge Ewa Tari. John K. 6. 5*

**A**WA tedo Iesu mi pangedo jisi siakabadae gumbari gido APhilip de tesiri, Inda anggo kaena rorae piedo kumano eiwamane indari? Edo eiwa tedo bavedo gosisina, nongo

## PARI AE EPISTLE AE GE EWA TARI

nongo euri gotevira. Philip mi mina ainde tesiri, Rorae awa embo penny 200 mina piarate, awa ae ra ta berari siaka bara. Ainda ambodani da, Andrew, Simon Peter da nameji, ainde tesiri, Mai einda isiri ainda barley bread 5, edo un wo tote; tena emo rori embo jiwa'e ango da iai? Iesu mi sisina, Embo eu anumbore. Awara ta manene jiwa'e nasi da; awa gido embo anumbesitera ajigari 5,000 ango. Awa tedo Iesu bread kundo ategedo, ambodani da iai kando esiri, awamane anumbesitera ami de kando esitera, edo un wo ango jipapa esitera ango de. Edo osi etero gido, ainda ambodani de tesiri, Egegegari deposi sirigewavi, ioiowa eore. Awa tedo sirigetero, kabia 12 be da esitera, bread 5 ji ito indera awa injido dotera awa. Awa gido embomai kariwa Iesu mi esisina awa gido sitera, Ge be eiwa peroveta nasi da gumbesira awa.

*Sundays nenei itero gido, Kiki Epiphany da doturutera awa kumbo-rote. Ango ae ra ta nenei doworote: Awa ae ra ta Sunday da, Advent ainda gagane, Pari, Epistle, Ge Ewa Tari einda itera awa ajijigara.*

## ANDREW KOTOPU DA IJI

### *Pari*

**G**OD Goroba jiwa'e, Aposetolo ito Andrew Kotopu Gtonembari pieteto Mai ito Iesu Keriso da ge borae be budo, burigi burigi amboda amboda esisina; piewasi, edo nakare berari, dubo edopa eite ge ito kotopu nakare daotesiri gido borae akuta piedo ge ito kotopu kikiripa ara; Iesu Keriso da dawa Bada natokare embo. *Amen.*

*Epistle. Rom. 10. 9*

**B**E ito mi Iesu Bada be gata, ta dubo ito da kotembeio God betari da ango jiri erira, edo kavigate; dubo mi embo kotembedo eira jimbo dave da, ko be mi ajigedo eira kavigari da. Ove tevira, Embo awa kotembotora awa me mana gara. Ko Judaea embo de Greece embo de da sisikakaia ari itae: ko berari da Badari da dawa, edo kando ari embo jiwa'e ainda iai dao site teora: embomai berari Bada da dao tedo kavigara. Edo nomi garo awa dengoro mi gae eora amo? Ko nomi garo, atopatari itare taemo? edo nomi atopataro, edo gido etegaina? ove evira awa

## PARI AE EPISTLE AE GE EWA TARI

ango, Awamane da tai gari dave, bino dave da ge ewa tari atopapotera. Ko berari mi ge ewa tari dengoro mi gae. Isaiah mi site sira, Bada, bino natokaremo ai mi kotembe-teiri? Awara ta kotembari gari mi gupeira, ko gari amo Keriso da ge mi. Edo nane tedo tena, Gotori ta? Awara,

Nasi berari da ge wotesira,

Edo awamane da ge butu gombu da.

Edo nane tedo tena, Israel mi gotori ta? Gisi tekarae Moses mi sisina,

Nane imomane tano gegata awa awamane mi ewowo bajina ae,

Edo ewowo bajina dutari ko amimi imomane ano sini gamaina.

Edo Isaiah kopuru okain edo site sira,

Awamane mi na kakoa ae awa na tuvetera;

Embo nane mi na jirae awamane da iai na bedetena.

Ko Israel da ge tedo sira, Ipa nato kaioio eno turo esira ge jindedegari embo de benoka benoka ari embobo da iai.

*Ge Ewa Tari. Matt. K. 4. 18*

**I**ESU Galilee da umbutu kora da tepeite, nanonameji Itote gosisina, Simon, teora Peter, edo Andrew, ainda doma, ko daune un da baboritera; ko awamane ami iro embobo. Edo tedo sisina, na ambo ambo eu, edo nane ano embo iro embobo ave. Edo boeite daune dodo taingedo, ambo ambo esitera. Edo ongo iute nanonameji nei tote gosisina, Zebedee da mai James, ae doma John de, awa ma da ae mammo Zebedee de daedo, awamane awa daune pirero, dao tesiri; ko boeite ma de ae mammo de dodo taingedo amboda amboda esitera.

## THOMAS KOTOPU APOSETOLO

### *Pari*

**G**AIN tedo, Aposetolo ito Kotopu Thomas doteto, edo Mai ito da erari da dubo indadaita ena; namondekare pie-wasi Mai ito Iesu Keriso be ge be ore, edo ge be ari nato-

kare jisi ito da bekumba ain ae. Eiwa dengoro mi giwasi, Bada Iesu Keriso da dawa embo, ainda iai imo ae Asisi Kotopu de daedo, dasiga de parara de berari boroko edo matawa itaina. *Amen.*

*Epistle. Ephes. 2. 19*

**A**WA tedo inomane embo eve ae ra ta oia embobo ae Arata inomane kokotopu de daedo otatawo, edo God da mamonde mamainde da embo; esiri be da etewa aposetolo de peroveta tutu itomane, ko Keriso Iesu amo ganuma tapi tamo da, ami mi oro berari daradara inono eora awa bajido tempela kotopu Bada da iai eora; ami mi inomane ango da daima etewa God da oro da Asisi da.

*Ge Ewa Tari. John K. 20. 24*

**E**DO Thomas, awamane 12 rata awa dakaki, teora Edidymus, awamane de itae ko Iesu gupusina. Edo ambodani nenei mi sitera, Bada gera. Edo site sisina, Ko na ainda ingo da benuma da dero gido ko ingo toro nato mi benuma dero da piedo, ko ingo nato ainda dedegi da piedo anate, mana ge be ana.

Edo iji 8 itae esiri, ko iji nei de ambodani ika do da itero ko Thomas awamane de daedo. Iesu gupeira oro manguro de, edo toropu da petedo sisina, Bega itomane iai itare tae. Edo Thomas de sisina, Ingo toro ito engo kaioio e, ko ingo nato gi, ko ingo ito kaioio edo dedegi nato da piedo, kotembae eote edo kotembate. Thomas mi ainde mina sisina, Bada nato, God nato. Iesu mi sisina, Na gido kotembeteta; beiamana ainda iai avekavera mi gae awa kotembetera.

Ango edo kariwa nenei jiwae Iesu mi esisina ambodani da jisi da ko book ainda gaias rata; ko eiwa gaewa awa inemane mi kotembave tae, ko Iesu amo Keriso, God da Mai; awa kotembave tae, ainda dao da kavigari kumbave tae.

## PAUL KOTOPU DA DUBO WAREREGARI

*Pari*

**G**OD, Imo aposetolo beiamana Paul Kotopu da baiari mi eteto, Ge Ewa Tari da parara nasi berari da

datembesisina; namondekare piewasi, tedo gera, edo nakare ainda dubo wareregari kombo ari kotembara, edo eiwa embo imo ategara, edo kiki kotopu atopapotevira awa amboda amboda ara; Iesu Keriso mi Bada natokare. *Amen.*

*Epistle Embo. Ari 9. 1*

**A**NGO edo Saul duduno de ari betari awa pusisina Bada da ambodani da iai, edo priest bajina da iai aundo, ove tedo gosisina, Damascus sunagogo da, edo Begata embobo tuware tae, embomai ta eutumai, edo bundedo Jerusalem da kundo aimborote. Edo auntero, Damascus atutumbero, borae parara utu da ango ainda iai datembesira butu da dudurisina edo ge giri, sisina, Saul, Saul, nongain na usimbese eta? Edo sisina, Imo averi, Bada? Edo ami sisina, Na Iesu awa usimbese eta: ko eri, nasi da tori, edo ari atate tara. Edo embo ae ainde pepeta eiretera awa petedo, ge tuku esitera, edo ge gitera ta ko embo gae. Edo Saul nasi da eriri, jisi ika esiri gujisina, ko ro gae, edo begata gisi edo Damascus da kundo aunsitera. Edo ainda iji tamonde iai gae, edo injido tu injido ae. Ango edo ambodani dakaki Damascus da ainda dao Ananias; awa Bada da gari da ainde tedo sisina, Ananias. Edo sisina, Na evire, Bada. Edo Bada mi ainde sisina, Erido aundo begata dao Dambudarari teora ainda, edo Judas da mando da tedo gate embo ainda dao Saul, Tarsus mai: awa benunu sira; ko embo dao Ananias gido totore rare, edo ingo kopuru da pieite edo garate. Edo Ananias mi mina sisina, Bada, embo jiwae gena eiwa embo ge, ami kokotopu ito Jerusalem da usimbese edo eira; ko einda priest babain mi pitera berari dao ito teora awa bundara. Edo Bada mi sisina, Aimbu, awa ari sirigari nato iai edo dao nato jiari enaina Etene de dadariga da jisi da edo Israel embo; piano gido edo berari mamato are dao nato embo. Edo Ananias aundo, mando da torido, edo ingo kopuru da piedo sisina, Nameji Saul, Bada Iesu mi ito iai begata auntota awa bedevira awa, na etegedo piesira gatate tedo, Asisi Kotopu mi ari be da atate. Edo boeite ainda jisi da dudurisina be tata inge, edo gosisina; edo erido bapataito esisina; edo rorae injido oka esisina. Edo ainda iji nenei de ambodani de daedo Damascus da

## PARI AE EPISTLE AE GE EWA TARI

isiretera. Edo iji dakaki da Iesu bejisina, awa God da Mai. Edo embo berari dengoro mi gotora awa kore sitera, Eiwawa Jerusalem da dao eiwa teora awa gidesiri ta rori? einda gumbiri eiwa embo, edo bundedo priest babain da iai kundo bamain. Ko Saul nei goroba esisina, edo Judaea embo Damascus da nasi jijiora awa ge sisina, edo atopaposisina eiwa Keriso.

*Ge Ewa Tari. Matt. K. 19. 27*

**P**ETER mi mina Iesu de sisina, Gi, nakare jiwae dodo taingedo ito amboda amboda era; ko nakare ro kumbari? Edo Iesu amindemane sisina, Ge be nane mi imondemane nato amboda amboda ewa, tekago piari da anga de embo da Mai ainda anumbari da ae parara de anumaina, ae imondemane daedo anumba ari 12 da anumbedo Israel da ewowo 12 atota eu. Edo embo berari oro dodo taingeteri ta, nanonameji ta, ruaimono ta, mamota, ai ta, mamai ta, nasi ika ta, dao nato embo, edo ari 100 kumaina, edo kavigari matawa itari ika ito. Edo berari do da ponda isite, ponda itora awa do da itara.

KERISO TEMPELA DA PIARI GARI, TEORA,

MARY KAKARA KOTOPU DA TEIARI

*Pari*

**G**OD Goroba jiwae, matawa itota, burau parara ito de tedomo gotera, edo be Mai ito ao da engo de temple da pisi natokare de daedo pisina, anga de do natokare, dave ari, nakare gisi ito da piaina; Mai ito mi da dawa Iesu Keriso Bada natokare. *Amen.*

*Epistle Embo. Mal. 3. 1*

**G**I dodoma nato etegetena, na iari do nato da sia ari; Edo Bada kakoa ewa awa, borae tempela ika da gumaina; ko tari gari ainda dodoma, dubo burowa awa, gi, gupeira, Sabaoth da Badari mi sira. Ko ai mi ainda gumbari iji da jiro dambu danaini? edo anga de dambu bedari ai mi petaini? Amo be metal ewa ari da niao awari, ko be woru ewa ari da soap. Ko anumaina silver

## PARI AE EPISTLE AE GE EWA TARI

ewa ari teiari anga, edo Levi da mamai ari ewa ara, edo be gold de silver de anga ari beiamana ara; edo awamane mi Bada da iai rorae dambu darari da piara. Edo Judah de Jerusalem de da rorou God ari dubo beiamana aina, dembae koae anga, ko jienda matu anga. Edo atota ari embo itomane iai atutumane, edo gari tutu eiage eiage ane, kaen embobo da iai, ko awamane da iai mina piari da riroa embo eoro dubo vevera eora awa, eutu rori de, poiwo de, edo aike embo eoro wareregatora awa, ko na adu ae, Sabaoth da Badari mi sira.

*Ge Ewa Tari. Luke K. 2. 22*

**E**DO iji ika itae esiri sinain, anga Moses da ge, awamane E mi Jerusalem da kundo vivisitera, Bada da iai da piain tedomo (anga Bada da ge da ove esisina, Jianda pirigari re kotopu Bada da iai da tore) edo rorou piain tedomo, da Bada mi ge da sisina anga, Ribo ae aro de, ta gumbara mamai toteri. Awara ta embo Jerusalem da isinesina ainda dao Simeon; edo jimbo ika dave kotopu, edo Israel mai da dubo beiamana ari sima esisina; edo Asisi Kotopu ainda iai isinesina. Edo Asisi Kotopu matu ainda tesiri gosisina amo betari gaerae, gisigisi Bada da Keriso gesira. Edo Asisi mi tempela da pira; edo embo ika maine Iesu kundo totoritera orote ge da jimbo anga, edo ipa da kundo, God beiamana eite sisina.

Singa ito de te boroko bambare, Bada, ge ito anga bega de.

Jisi nato torari ito gira.

Embo jiwae jisi da eota awa.

Utata etene da kumbari keresira; edo embo ito Israel mai da parara. Edo mamota de ai de ainda ge tesiri awa kore esitera; edo Simeon mi beiamana esisina, edo Mary ainda ai de sisina, Ami piesira Israel mai jiwae durudo erara; edo iwata tedomo jijirora awa; awara kasiwo mi imo dubo da gaiaina; edo dubo ika da jiwae kotembatora awa idegara. Edo Anna isinesina peroveta eutura, Phanuel da gagara, Asher eutu, (begogo siaka ae, edo kakara dodo iu de daedo isinesina ainda jenda 7, edo rori itevira jienda 84) amo tempela dodo taegae edo kera enesina munia de iji de. Edo da anga de gundo God ategedo gere sisina embo jiwae Jerusalem da udegari sima esitera amo jisi

da. Edo berari Bada da ge ango edo dotera, edo Galilee guputera nasi ika ito Nazareth da.

Edo maine bajido goroba esisina; edo dubo kotembari be da esisina; edo God da tonembari ainda iai da itevira.

## MATTHIAS KOTOPU DA IJI

*Pari*

**G**OD Goroba jiwae, onjiga kato Judas da anda da singa Gito dave Matthias geriteto, edo Aposetolo 12 da doregari da itarate; tedo gotera, Ekalesia ito aposetolo pitawa kakato de awa matawa toregewasi, edo ato sima ari dave mi awa atopasido gisi jiara; Iesu Keriso mi Bada natokare. *Amen.*

*Epistle Embo. Ari. 1. 15*

**E**DO ango de Peter dodoma da toropu da peposisina, (jisi ewowo isitera, 120 ango,) itero sisina, Nanonameji, awara ta ko ove are tae, Asisi Kotopu mi matu tena, David da be mi, Judas da ge, ami Iesu bujitera amindemane da begata gisi esisina. Awa kaenato iai ajigesiri, edo anda ika buro ainda kumbira. (Embo eiwa tano ika bira jimbo ika beiae da rorou mi; ko gopedo, ko toropu da urugesiri de kaun itae idegesira. Edo embo berari Jerusalem nasi jido era awa eiwa kotembetera; ango edo re ge ika ito mi iai awa nombo sitera, Akeldama, amo ororo da iai) Psalm da book da gaedo tena,

Mando ika gindari,

Ko embo ounda nasi jiain ae;

edo,

Buro ika embo nei mi kumbare tae.

Ae embo de kaen dada utena awa ango de Bada Iesu torido ko idegedo eira kaenato iai, John da bapataito ari tutu, ko ango de kaenato iai kundo visira, awamane edo dakaki kaenamonde daedo itane ainda erari da gari tutu. Edo tote awa do da pietera, Joseph, tevira Barabbas, ainda dao Justus, ae Matthias de. Edo benunu tedo sitera, Imo, Bada, embomai berari da dubo kotembotota, namondekare pie gore indawa sirigetsi, anda potarate,

buro ainda edo aposetolo aini, Judas mi dodo taingesira awa anda ika da petare tae. Edo kelero esitero, ko kelero awa Matthias da iai duriri, edo awa ae aposetolo 11 de daedo ajigesitera.

*Ge Ewa Tari. Matt. K. 11. 25*

**A**NGO de Iesu mi mina tedo sisina, Imo dasiga ena, **A**O Mamo, utu de butu de da Badari, imo embo dubo embobo de gari embobo de da iai eiwa onjigedo, mai babaingae da iai pieteto gera; awara, Mamo, awa gisi ito da dubo ewa esira. Berari Mamo nato mi namonde piesira; ko ai mi Mamo kotembae, ra ta ko Mai mi, edo ainda jisi da piari gari jipapa eira. Nato iai puwo, buro eowa awa sino amboka itomane bajinanane, nane tonemano dango turave. Amboka nato kundo, edo ari nato gave, na edopa rare dubo nato burau edo eira; ko oena aparasi asisi itomane embo tuvewo. Amboka nato dave ra ta, ko sino amboka nato edopa.

## MARY DAVE KAKARA AINDA ORU ARI

*Pari*

**T**EDO gotera, Bada, edo kondade ari ito dubo natokare da jimbuwasi; edo nakare Mai ito Iesu Keriso da pisi kumbari anela da ge mi gotora, edo ango edo ainda cross de edo mamato ari de da ainda erari da parara da gumbara; Iesu Keriso mi da dawa Bada natokare. *Amen.*

*Epistle Embo. Isaiah 7. 10*

**K**O Bada Ahaz de iji nei de tedo sisina, Bada God ito kkariwa imo embo tedo gi; edo gido ungono da, edo gido utu da, tedo gate. Ko Ahaz mi sisina, Na tedo gain ae, ko na Bada bawain ae. Edo ami sisina, Giu, David da ewowo; itomane iai siaka ta rora, embo ewo beowo edo eri, ko ae God nato de ewo beowo edo eiri? Awa tedo Bada mi kariwa imondemane piaina; ko gi, gagara mi watou jirido mai jianda kundo ainda dao Immanuel tari. Butter ae pika de injido ko gaina edo beiae awa dodo dave awa sirigaina.

## PARI AE EPISTLE AE GE EWA TARI

*Ge Ewa Tari.* Luke K. 1. 26

**A**NGO edo kariga 6 esiri anela Gabriel God mi tesiri Agupusina nasi Galilee da ainda dao Nazareth, kakara gagara da iai embo de daedo geritera ainda dao Joseph, David da oro be da; edo kakara gagara ainda dao Mary. Edo ainda iai torido sisina, Iteta, beiamana eota awa; Bada ito iai isira. Edo ami ge gido dubo beiae esiri dubo mi kotembedo nominomi ategeteiri. Edo anela mi ainde sisina, Adu eote, Mary; God da iai dubo beiamana ari tuveteta. Awara ta sini ito da watou jirido jianda kumbuio, edo ainda dao Iesu taeio. Awa badari Ikane Matawa Itari da Mai tore. Edo Bada God mi ainda mamo David da anumba ari piaina; ari Jacob da oro da daotari edo matawa itaina: edo basileia ika gombu de. Edo Mary anela de sisina, Eiwa nominomi, na embo ae da de awae? Edo anela mi mina ainde sisina, Asisi Kotopu ito iai punaina, edo Ikane Matawa Itari goroba ari apuregaina; awara ta amboda wotari Kotopu, God da Mai tore. Awara ta Elizabeth ito dao, begogo edo watou jirido mai jianda, edo ainda kariga 6, awa matu ero teora awa. Ge ro God da iai domain ae. Edo Mary sisina, Gi, Bada da singa; teota awa nato iai esira. Edo anela awa dodo baunsisina.

## MARK KOTOPU DA IJI

*Pari*

**G**OD, Goroba jiwae, Ekalesia ito kotopu atopateto Evanelia ariembo ito Mark Kotopu da kiki mi utu da angoo; edo kondade ari namondekare piewasi, edo nakare be mai babaingae angoo ae, kiki tepo bisi angoo kundo bauntora awa, Evanelia ito kotopu da ge be de goroba ara; Iesu Keriso mi Bada natokare. *Amen.*

*Epistle.* Ephes. 4. 7

**K**O kaena berari de kondade ari piesira Keriso da rorae tega angoo. Awa tede sira,

Ango de utu da visina, bundari bunena,  
Edo embo rorou ena,

## PARI AE EPISTLE AE GE EWA TARI

(Ainda ge, visina, emo rori ae, rata gisi wotena butu kambeda? Ami wowotevira awa da da mi vivitevira awa utu berari da ikane kakane angoo ko berari ari be da esira). Edo ami nenei piesiri aposetolo: ko nenei peroveta; ko nenei evanelia egeregari; ko nenei sima egeregari edo atopaposigari; kokotopu da sia orote, singa ari ainda buro embo, Keriso da tamo da jiaia tede; angoo edo kotembari da dadautari da kaena berari gundo, kaen God da Mai kotemana, edo bajido ane, Keriso da badari berari da tega da; angoo de kaena iji nei de mai habaingae tekago ain ae, edo kaena kapeto kipeto ain ae engoo ongo, edo kiki da bisi jiwae mi kaena kundo aimain ae, embomai da dubo embo mi beiae da, amimi imomane etetebotona; edo kaena ae dubo bari de kaen ge be tede ane, edo iai berari da kaen badane ainda iai, awa kopuru, Keriso; ami mi tamo berari dave enu dada takimena pirari berari da kando ari mi, patu daradara ainda buro tega ari da buro edo era angoo; tamo ika euri bajiuri akuta eora dubo bari da.

*Ge Ewa Tari.* John K. 15. 1

**N**A vine be, rata Mamo nato buro ari embo. Patu berari nato iai be gain ae ari, awa kundo eira; edo patu berari be gaeuri, dave ari edo eira, be be gaiarate. Dave natopo etewa ge mi imondemane tena awa. Do nato da isiwo, ko na do itomane da. Patu akuta mana be aina, edo gido vine da isirari; angoo imomane ain ae edo gido nato do da itave. Na vine rata ko imomane patu; embo do nato da itevira awa ko na ainda do da, awa be jiwae evira; na ae re, ko mana ro etewa. Embo nato do da itain ae, ko patu angoo aungore, aveuri; embo mi siri-gedo niao da aungoro awora. Do nato da isiwo, edo ge na awa do itomane da isirari, jipapa eowa awa tede gawa ami imondemane are. Emi mi Mamo nato esiri parara esira, edo be jiwae gaedo ewa; angoo de imomane singa nato. Mamo mi na dubo bira, ko na angoo imomane dubo bena; edo dubo bari nato da isiwo. Ge nato kera edo dubo bari nato da itave; angoo Mamo nato da ge kera edo ena, edo ainda dubo bari da itena. Eiwa imondemane tetena dubo beiamana nato itomane iai itare tae, edo dubo beiamana ari mi be da ewo.



PHILIP AE JAMES DE KOKOTOPU DA IJI

*Pari*

**G**OD, Goroba jiwae, imo be kotembedo matawa kaviegotora; Namondekare piewasi, Mai ito Iesu Keriso, begata de, ge be de, kaviegari de kotembara; edo Apostolo kokotopu iti Philip de James Kotopu de da dero da amboda amboda ara, edo kaviegari matawa itari da begata da dambudarido pepeta ara; Mai ito mi Iesu Keriso da dawa Bada natokare. *Amen.*

*Epistle. James K. 1*

**J**AMES, God de Bada Iesu Keriso de da singa, ewowo 12 da iai Evekara ari da, isiwo.

Dubo dave be dave be tewo, nanonameji nato, ango de bawari berari da duruwo; kotembotowa kotembari itomane da bawari sima ari buro evira. Ko sima ari da buro itae edo, asite imomane dave ari ro jipapa ain ae.

Ko embo itomane iai dubo embo itae gido, God tedo garate, ami berari siaka piaevira ko isimbae awa ainde piaina. Edo kotembari mi tedo gari, edo dubo idadaita ain ae; embo dubo idadaita evira awa be ewa bouna bisi mi kundo auntevira awa deuri jipegetevira. Embo awa Bada da iai ro kumain teure; embo dubo tote, iji ika berari da takimbedo itae.

Ko nameji burau ainda dasiga ari da dubo dave aina; edo rorae embo burau ari ika da; ko iakara uji ango mainaina. Iji gupeuri, bisi vevera edo, iakara euri ginene evira; edo ainda uji durevira, edo gari dave betevira; ango rorae embo iari ika da binaina. Embo dave bawari sima eira; edo bavevira gido, kaviegari crown kumaina, Bada awamane dubo burora awa matu tevira.

*Ge Ewa Tari. John K. 14. 1*

**D**UBO itomane vevera eure; God ge be ewa, na ango ge be ewavi. Mamaka da oro da itari jiwae; ango ae, nane mi tetena. Auntena iai itomane sia ain tedo. Ko aundo iai itomane sia ana, edo tekago gumana edo nato iai imomane unana, edo na itona, ainda imomane itawa. Ko nonda ango auntona, begata kotembotowa. Thomas

mi site tesira, Bada, indago auntota awa darera; nomi begata kotembotori? Iesu mi sisina, Na begata, ge be de, ko kaviegari; ai mi Mamo da iai gundo ae rata nato mi. Na kotembedo Mamo nato kotembetewa; ko boroko kotembeteite, ko jisi mi gotewa. Philip mi site tesira, Mamo awa pie, nakare gido, awara natokare iai. Iesu mi ainde tesira, Iji jiwae na itomane iai itoni ta ko na kotembae eosi ta, Philip? Na gido Mamo gotevira. Nomi tata, Mamo nakare pie gore? Kotembotosi ta aeri, na Mamo da do da, ko Mamo do nato da; edo gido na kotembeu ari embo. Ge be ge be, nane mi imondemane tena, Embo na kotembetevira, ari eona awa ouwa ango aina. Ko ari babain eiwa ango ae aina, na Mamo da iai aimain ena. Ko dao nato da tedo giwo, awa ane, edo Mamo Mai da iai parara ore. Rora nato iai tedo gawa awa ane.

BARNABAS K. APOSETOLO

*Pari*

**B**ADA God goroba jiwae, Aposetolo ito kotopu Barnabas da, Asisi Kotopu da kando babain piata; tedo gotera, kando ito jiwae awa ge tedo dodo aimbote, edo kondade ari ito ango, awara ta nakare dasiga ari ito de parara ito de matawa jiara; Iesu Keriso mi Bada natokare. *Amen.*

*Epistle Embo. Ari 11. 22*

**E**DO ge gositera Ekalesia da dengoro Jerusalem da Eitora awa. Edo Barnabas etegetero Antioch gupusina; edo awa gundo God da kondade ari giri, dubo beiamana esisina; edo berari ge sisina, edo kotembedo takimbedo Bada da iai itare tae; awa embo dave, ko Asisi Kotopu de kotembari de be da esiri; edo embo berari Bada da iai dada esitera. Edo Tarsus da wotedo, Saul kakoa esisina; edo tuvedo, Antioch da kundo gupusina: Ango edo jienda da kaki ae ekalesia da dada usitera, edo jiwae atopapositera; edo ambodani Antioch da gisi Christian dao sitera.

Ango edo ango de peroveta Jerusalem ango Antioch da wowositera; edo da kaki erorisina, ainda dao Agabus, edo

Asisi mi tesiri gositera ko nasi berari da beji siakabadae da itarate; ango Claudius da iji da ena. Edo ambodani tede kasitera, daradara ango ore tae, edo kondade ari etegare tae dodoma da iai Judaea da nasi jijiora ainda. Ko etero, babadegari da iai etegesitera Barnabas ae Saul de da ingo mi.

*Ge Ewa Tari. John K. 15. 12*

**E**IWA ge nato, dubo mina bara eu, na ango imomane edubo budo ena. Eiwa dubo bari, bajina anda iai ango ae, embo kaviegari ika pieuri dudurevira embo ikaito embo. Nane tena awa eu, ko imomane otatawo nato. Ko iji nei de imomane singa dao tain ae; singa badari ika evira awa darevira; otatawo nato imomane dao tetena; berari Mamo nato da iai gotona awa imondemane onjiga tetena. Imomane na sirigae ra ta, ko nane mi imomane sirigetena, edo oru etena, aundo be awate, ko be gagurowa awa itare tae; edo Mamo dao nato da tede gotowa awa, imondemane piare tae.

## JOHN BAPATAITO ARI EMBO DA IJI

*Pari*

**G**OD, Goroba jiwae, eteto singa ito John Bapataito ari Embo kore ari de kumuna edo etegato Mai ito da iari sia ain tede dubo wareregari baiarate; edo ewasi nakare ainda kiki de jimbo kotopu da amboda amboda ara, edo dubo natokare be wareregaina, ami da baiari ango; edo ainda kariwa ango ge be sinasina tara, edo jimbo beiae kanena kanena ge tara, edo ge be embo mamato eite sima ara; Iesu Keriso mi Bada natokare. *Amen.*

*Epistle Embo. Isaiah 40. 1*

**E**MBOMAI nato awo dubo damo ari, awo dubo damo Eari, God itomane sira. Jerusalem da dubo tewavi, edo dao tewavi, ainda itoro ari itae, beiae ika kotembedo dosira; Bada da ingo mi jimbo beiae ika berari embo avedo tote kumbira.

Ge embo mi dumo da tevira awa, Bada da iari sia ewo dumo da; begata be God kaenato embo jiwo dambudarare dumo da. Ukoto berari adedo, edo peji babain

de babaingae de berari dowaro idegara, edo ogegoagego ari awa aro dambudarari, edo umbugo dabugo de awa aro bereia ari; edo Bada da parara bedaina, edo pisi berari inononde gara: Bada da be sisina. Ge mi tede tesira, Ge te. Ko tesira, Na ge ro taini? Pisi berari iakara, ko ainda gari dave berari ni uji buro da ango; iakara bideuri, uji wogiro euri; Bada da oena mi putevira: ge be embo-mai iakara. Iakara bideuri, uji wogiro euri; ko God kaenato da ge natopo petaina.

Imo Zion kana dave teota awa, jiri ewowo da visi; imo Jerusalem kana dave teota awa, ge jio inakade erare; jiato erare; adu eote; Judah da nasi de site ango te, Giu, God itomane! Ko gi, Bada God goroba kato ango gumaina, edo ingo ika awa embo badari aina; Ko gi, riroa ika ikaito iai isira, edo mina piari ika aindo do da. Sinopu ika sheep sima ari ango unaina, arini ingo da sirigedo, ko opopo da osinembedo, ko awamane ami gagurora awa babaingao kumaina.

*Ge Ewa Tari. Luke K. 1. 57*

**E**LIZABETH da iji gupusina gido mai kumbarate; edo Ejianda kupusina. Edo nasi ikaito embomi ae oro be ikaito de mi gositera Bada do jiwae esisina, ae ainde daedo dubo ika dave esitera. Awara ta ainda iji 8 ouwamane guputera mai jugain tede, edo Zacharias tain, mammo de daedo dado arate. Edo aimi mina sisina. Dou, John teu. Edo ainde sitera, Embo ito dao emo taera. Edo mammo da jisi da ipa ujiji edo ro taini tero. Edo ove tede gido gaedo sisina, Aina dao John. Edo jiwae mi kore esitera. Edo boite be angedo iwawa udegessiri ge sisina, edo God dasiga esisina. Edo embo jiwae aikae isima esitera ba adu esitera; edo ge ba eiwa sitera Judaea peji berari da. Edo embo jiwae gotora awa kotembesite sitera, Mai emo nongonongo aini? Bada da ipa ainda iai da itevira. Edo mammo Zacharias Asisi Kotopu be da esiri, ge gatedo sisina,

Beiamana Bada, Israel mai da God; awa etega edo, embo ika da iai da rorou piesira.

Edo torari korere kaena embo jiri erira; singa ika David da oro da.

## PARI AE EPISTLE AE GE EWA TARI

Ango tena peroveta kokotopu da be da; nasi teka de itoro ango;

Torari itoro kaenato da iai; ae ipa ikaito mi kaena ge jindetera awa.

Edo mamaka kaenato tenu giwa awa do arate; edo ainda tari gari kotopu kotembarate.

Ge tedo gain tena awa; mamaka kaenato Abraham da jisi da.

Engo edo itoro kaenato ami da ipa da toregesiri; ainda iai kaena ambodani, edo adu ain ae.

Edo amo gisi jimbo kaenato kotopu ari dave are; iji kaenato jiwae.

Ango edo, Mai, imo Ikane Matawa Itari da peroveta tedo ore; imo Bada da gisi da baunteite, ainda begata sirige.

Edo ainda embo torari ewasi gore; beiae ika ruvegari de.

God kaenato do evira awa embo; ango sipo atae ikane wowoteira, kaenato iai punaina.

Edo munia de, ae betari da dunga de anumbotora awa parara amaina; edo tai kaenato paposimene, bega da begata da bambara.

Edo mai bajido dubo goroba edo, dumo da iji ika sima enesina edo Israel mai da jisi da piari gorote.

## PETER K. DA IJI

### *Pari*

**G**OD, Goroba jiwae, Mai ito mi Iesu Keriso Aposetolo Gito Peter Kotopu da kando ewagaewa jiwae piteta, edo sinopu ito undarate teteta: ewasi tedo gotera, edo Bishops ae Sima ari de berari mi Ge ito kotopu baiaro, edo embomai ango kikiripa edo, parara matawa itari da crown kumbara; Iesu Keriso mi Bada natokare. *Amen.*

### *Epistle Embo. Ari 12. 1*

**A**NGO edo ango de Herod dariga mi ingo ika kaioio esisina, nenei ekalesia embobo usimbese ain tedo. Edo James John da doma awa kasiwo mi desiri apusina.

## PARI AE EPISTLE AE GE EWA TARI

Ko gido Judaea embo awa dubo beiamana esiri, ko dada edo ae Peter de daedo bujisina. Edo awamane iji bread badae. Ko awa tanjido bundari oro da pisido, gari nei tote nei tote itoro embobo de pipisisina sima orote site, ko Darutegari itae ari embomai da iai piari idegaina ta tedo. Awa tedo Peter bundari oro da sima eite: benunu inakade sitera ekalesia da God da jisi da awa embo. Ko ango de Herod mi piari idegari siri, munia ango de awa Peter itoro embobo tote da toropu da aunsina asi ika tote; ko sima ari awa manguro be da dumbari oro sima esitera. Ango edo Bada da anela awa ainda iai petesiri, parara iai datembesiri; ko Peter da dedegi dorisina, edo ao udedo sisina, Eiage eri. Edo asi ika ingo da awa durero. Edo anela mi ainde sisina, Iade jido tai atu bunde. Edo esisina. Ko ainde sisina, Woru ika omundo nato amboda amboda e. Edo idegedo ambo ambo esisina; ko darisina anela mi evira awa, ko imo gari gari ge sisina. Ko sima ari dakaki de ko nei de awa darutegesitera, edo manguro ganuma mi ari awa nasi de gupero, akuta bedesiri. Ko idegesitera, edo begata dakaki da aunsitera, edo boeite anela dodo taigesisina. Edo Peter mi kana bundo sisina, Boroko be gena, Bada ainda anela piesiri wotodo na Herod da ingo da toregesira, ko embo Judaea embomai berari sima eora awa.

### *Ge Ewa Tari. Matt. K. 16. 13*

**A**NGO edo Iesu Caesarea Philippi da nasi da gupusina, edo ambodani ika de tedo sisina, Embomai embo da Mai averi siteri? Edo sitera, Nenei John Bapataito ari embo; nenei, Elijah, ko nenei Jeremiah, ta peroveta dakaki. Tedo sira, Ko imomane, ro teu, na averi? Edo Simon Peter mi ainde mina sisina, Imo Keriso, God wasiri de da Mai. Edo Iesu ainde mina sisina, Imo dave, Simon Bar-Jonah nanato; pisi de ororo de mi imo piaae gae, rata, Mamo nato utu da itevira awa. Ko nane imo de tena, Ko imo Peter; ko ganuma ainda ekalesia nato jiano; ko Hades da manguro ainda iai mana goroba aina. Basileia utu da key imonde piano: ko butu da jijiota awa utu da jiaina, ko butu da udegotota awa utu da udegaina.

## PARI AE EPISTLE AE GE EWA TARI

JAMES K. APOSETOLO

*Pari*

**G**OD, Do kato, Aposetolo ito James Kotopu ainda mamamo ae rorae berari de dodo taingena, edo Mai ito Iesu Keriso da ge burigi burigi kikiripa edo, awa amboda amboda ena; namondekare piewasi, jipapa ari nasi da ami, pisi da ami, berari dodo taingara, edo ge ito kotopu matawa amboda amboda ara; Iesu Keriso mi Bada natokare. *Amen.*

*Epistle Embo. Ari. 11, 27, de 12 tutu da*

**A**NGO edo angoo de peroveta Jerusalem angoo Antioch da wowositera. Edo da kaki erorisina, ainda dao Agabus, edo Asisi mi tesiri gositera ko nasi berari da beji siakabadae da itarate; angoo Claudius da iji da ena. Edo ambodani tedo kasitera, daradara angoo ore tae, edo kondade ari etegare tae dodoma da iai Judaea da nasi jijiora ainda; ko etero, babadegari da iai etegetesitera Barnabas ae Saul de da ingo mi.

Angoo edo angoo de Herod dariga mi ingo kaioio esisina, nenei ekalesia embobo usimbebesi ain tedo. Edo James John da doma awa kasiwo mi desiri apusina. Ko gido Judaea embo awa dubo beiamana esiri, ko dada edo ae Peter de daedo bujisina.

*Ge Ewa Tari. Matt. 20. 20*

**A**NGO de Zebedee da mamai da ai ae mamai de daedo ainda iai gundo benunu tedo gosisina. Ko ainde sisina, Ro jipapa esi? Ainde sisina, Te tato mamai tote nato ei anumboore, nei ingo be da, nei ingo anda da, basilicia ito da. Ko Iesu mi mina sisina, Tedo gotewa awa darewa. Akou inano indetevi ta? Ainde tera, Indetera. Amindemane tesira, Akou nato be injiwo; tena anumbari ingo be nato da, edo ingo anda nato da ko nato raro pieni; ko awamane embo Mamoo nato mi awa sia eira. Edo awamane ro mi gido, nanonameji dumo esitera. Edo Iesu mi ainda iai dao tedo sisina, Gevi etene da dadariga ainda iai iawa eora, edo ainda babain ainda iai birikoku kumbera. Itomane iai angoo ae; ko

## PARI AE EPISTLE AE GE EWA TARI

babain ari jipapa eora awa singa itomane orote, edo gisi ari jipapa eora awa singa itomane orote; angoo embo da Mai gumbira ko ainda iai singa ae, ko awa singa edo, ainda kaviégari piarate, berari da rorou ari.

BARTHOLOMEW K. APOSETOLO

*Pari*

**G**OD, Goroba jiwae, edo matawa itari, Aposetolo ito Bartholomew kondade ari piato, edo ge ito be kotembedo baiarate; Imo tedo gotera, Ekalesia ito de piato ge awa ami mi ge be ena awa karupa edo, da dawa baiare edo kumbare; Iesu Keriso mi Bada natokare. *Amen.*

*Epistle Embo. Ari 5. 12*

**E**DO Aposetolo da ingo mi kariwa jiwae kore ari Embomai da iai esitera, ko berari dubo dakaki Solomom da Gaiga isite. Ko nenei mi kanenakanena edo ae awamane de daedo dada iteri; edo gido embo dasiga esitera: ko Bada da iai kotembotora awa dada esitera, embo jiwae, embo eutu de angoo; edo abubugari begata da kundo wowositera, edo besi da ko topi da pietero auntera, ko Peter gundo duga mi embo nei duga arate. Edo embo jiwae dada usitera nasi Jerusalem angoo, edo abubugari kundo guputera edo asisi bebegae mi usimbese eora awa itae kaviégesitera.

*Ge Ewa Tari. Luke K. 22. 24*

**E**DO ge ominda iai eriri, indawa embo badari nakakari Eteteri. Edo amindemane sisina, Etene da daotari ainda iai gisi jiari ika isira; edo ominda iai gisi jiari isima eira awa Paira embo tedo era. Tena imomane angoo ae; ko itomane iai embo be amo be mai siaka mi itarago eiari; edo embo badari amo be kera ari inge. Edo indawara siakabadae, anumbari embo owa, ta buro eira owari? anumbari owa ta? edo na itomane toropu da itena be kera eona angoo. Edo imomane namonde daedo bawari nato de itewo jirira; edo imondemane basilicia tena, angoo Maka mi namonde sisina, edo tenemba nato da injido, tu injido

## PARI AE EPISTLE AE GE EWA TARI

eu; edo anumba da anumbedo, Israel mai da jisi 12 katedo giu.

## MATTHEW KOTOPU APOSETOLO

### *Pari*

**G**OD? Goroba jiwae, Mai ito mi paira Matthew tax kumbari da daotato, Aposetolo edo Evanelia ari embo arate tedo; kondade ari namondekare piewasi, dubo da ari jiwae dodo taingore, edo rorae jipapa inaka de ain ae, edo da dawa Mai ito Iesu Keriso da amboda amboda ara, awa imo ae Asisi Kotopu de daedo wasiri de gisi jijiowa, God dakaki matawa itota. *Amen.*

### *Epistle. 2 Cor. 4. 1*

**A**WA tedo singa ari eiwa natokare iai, do ari kumbera Ango, ko nakare siwae: rata isimbari ainda ari gae itari dotera; edo beiae da pepeta ae, ko God da ge vivi site jiae, rata ge be da bedari mi akuta edo gari awa ambo jiwae God da jisi moka da. Ango edo evanelia ika apuregore tae, ko awamane da iai betora awa apuregetera; awamane da iai ango butu ainda God awamane kotembari da dombu doetera, edo Keriso awa God da asisi ainda evanelia parara be parara ainda utata awamane da iai ae utata ae. Ko nakare akuta atopatae, rata ko Iesu Keriso amo Bada rata ko nakare singa itomane Iesu embo. God mi site sira, Utata munia da mi ari utata aina, ami dubo natokare utata esira, ko God parara be parara kotembari ika mi utata are tae, Iesu Keriso da do da.

### *Ge Ewa Tari. Matt. K. 9. 9*

**E**DO Iesu ango tepeute, embo gosisina, dao teora Matthew, rorou ari da anumbedo isira awa; edo sisina, Nato ambo ambo e. Edo erido, ambo ambo esisina.

Ango edo oro da anumbedo rorae injisina, ko gi, telona ae jimbo beiae egeregari embobo jiwae awa gundo ae Iesu de ae ambodani de daedo anumbesitera. Edo Pharisee gido, ambodani ika de sitera, Nongain tedo Atopatari ikamane telona de jimbo beiae embobo de daedo rorae indeiri? Edo gido sisina, Wawasiri de

## PARI AE EPISTLE AE GE EWA TARI

abubugari da badari jipapa ae, rata abubugari. Tena aimbuwo aundo eiwa kotembave, Do ari jipapa ena, ko rorou ae; rata ko na gumena jimbo dave embo dao tae rata jimbo bebegae embo.

## MICHAEL KOTOPU AE ANELA BERARI DE

### *Pari*

**G**OD Matawa itari, anela de embo de da buro dederi dave da piteta; ae do ari de namondekare piewasi, edo be anela ito kokotopu ito iai sima matawa edo era utu da, ango oru ari ito mi nakare kondade edo butu da toregara; Iesu Keriso mi Bada natokare. *Amen.*

### *Epistle Embo. Bedari 12. 7*

**E**DO itoro utu da eninu; Michael de ae anela ika de ae edragon de daedo itoro gaewa; edo dragon de ae anela ika de itoro gaguneute; siutera, edo iai ika utu da awa iji nei de tuwae. Edo dragon siakabadae awa aungetero wowosisina, jimbago matu, awa teora Diabolo de Satan, butu dede pitawa tari; butu da aungetero wowosisina, ae anela ika awa ainde daedo aungetero wowosisina. Ko ge siakabadae utu da gena, tedo tesira, Boroko gumbira kavigari de, goroba de, edo God natokare da basileia, edo ainda Keriso da badari ari; nanonameji kaenato da bekumba ari aungetero wotesira, awamane God kaenato da gisi da iji de munia de bekumba edo eira. Awamane mi detero baundo ambarate Arini da ororo mi, ko onjiga tari ika da ge mi; edo kavigari ika karupa ae rata betari da. Awa tedo utu, edo imomane awamane da do da isima ewa awo, dubo itomane dave are. Bebegae butu da iai ko ewa da iai; binei itomane iai ae duduno siaka ae de wotesira gido eira, iari tepo tupo da isira.

### *Ge Ewa Tari. Matt. K. 18. 1*

**A**NGO de ambodani Iesu da iai gundo sitera, Indawa Ami badari edo eiri, basileia utu da da? Edo mai siaka ainda iai dao sisina, edo toropu da piedo sisina, Awara nanemi imondemane tena, Wareregedo, mai babaingae eu, edo gido basileia utu da torove. Embo



## PARI AE EPISTLE AE GE EWA TARI

burau evira awa mai siaka eiwa ango, awa badari eira basileia utu da ango. Ko embo mai dakaki mai engo dao nato da unaina, amo na undedo eira; ko embo mai dakaki ami na kotembedo eira ari dubo vevera aina, beiamana ainda iai mi da ewowo tumo tutu da kanderiri, edo ewa ungono da kaiare tae. Bebegae butu da iai dubo vevera ari embo. Ko dubo vevera ari gumaina; edo beiae embo ainda iai ainda iai ango dubo vevera ari gupeira! Ko ingo ito ta tai ito ta rami ari durate tae, jugedo, augatate; beiamana ito iai keikeiari ta baoro bundari kavigari da tori, ko ingo ito tote ta tai ito tote ra mi ni aveira ainda imo aungeriko. Ko jisi ito da aro durari, tokumbedo auge; beiamana ito iai jisi ito dakaki ko kavigari da tori, ko jisi ito tote ra mi gehena da niao da aungeriko. Kotembeu mai babaingae dakaki eiwa awa dubo vevera eure; imondemane tena, utu da awamane da anela re Mamo nato da jisi be utu da isite iji da doaé gido era.

## LUKE KOTOPU EVANĒLIA ARI EMBO

*Pari*

**G**OD, Goroba jiwae, Luke Gao ari embo da dasiga Evanelia da itevira awa, dao tato evanelia ari embo ena, edo embomai da asisi da siwo piena: Namondekare piewasi, tedo gotera, edo kiki pipitevira ainda siwo dave mi asisi natokare da karu berari kavigaina; Mai ito Iesu Keriso Bada natokare da jimbo beiamana embo. *Amen.*

*Epistle. 2 Tim. 4. 5*

**B**ERARI da imo badari akuta e, mamato ari kumbu, evanelia ari da buro awa buro e, singa ari ito dave be dave e. Na boroko piesira, ko na aimbari iji gumbira. Itoro dave gaedo ena, tumbari nato itae etena, kotembari jido takimbetena; boroko ta amboda jimbo dave da crown na embo pisira, Bada, katari dave ango de namonde piaina: ko na akuta ae ra ta berari mi ainda idegari dubo bora.

Inaka de edo nato iai eiage purate; Demas na dodo taingesira, butu eiwa dubo bira, edo Thessalonika da aimbira; Crescens Galatia da, Titus Dalmatia da. Luke awa akuta ae namonde isira. Mark kundo, ae imonde

## PARI AE EPISTLE AE GE EWA TARI

puio; awa kondade ari nato iai singa ari da. Tychichus awa Ephesus etegetena. Ko puio apuregari Troas da Carpus de daedo dodo gumena awa kundo puio, ko ae book de daedo, jisi awa paper ainto mi. Alexander copper singa awa usimbese be esira; Bada mi buro ika ango riroa baina: ouwa imo ango adu eio; ge natokare ge be ge tesira.

*Ge Ewa Tari. Luke K. 10. 1*

**E**MBO nenei 70 dao tedo tote tote teuri baundo esitera Eainda jisi da, nasi da ae iai berari de da amo amboda gumbesira. Edo amindemane sisina, Kumbari indewa, ko buro embobo indewago; kumbari da Gisi jiari de tedo giu buro embobo nenei kumbari ika da awa tari gumbore. Bambu; teteno bamain ewa be sheep mamai wolf toropu da. Money kaita kumbove, rorae kaita ae, tai woru ae; edo begata da embo ategeove. Edo mando nongo ari da torido gisi temo, Bega mando einda itesira. Edo bega da mai ounda itesirare, edo bega itomane ainda iai itaina; ango ae rata itomane iai tenda punaina. Edo mando da ainda isirawo piari awa injido tu injido eu. Buro embo beiamana rare mina kumain.

## SIMON KOTOPU AE JUDE KOTOPU APOSETOLO

*Pari*

**G**OD, Goroba jiwae, Ekalesia ito ato Aposetolo ae Peroveta de ainda tutu, Iesu Keriso awa ganuma tutu be: namondekare piewasi, edo ainda kiki mi nakare dubo da dawa edo, temple kotopu gisi ito da dave ara; Iesu Keriso mi Bada natokare. *Amen.*

*Epistle. Jude K. 1*

**J**UDAS awa Iesu Keriso da singa, edo James da doma, Jawamane da iai dao sisina, God Mamo da iai dubo babarigari, edo Iesu Keriso embo beiamana edo pisina; Do ari itomane iai da edo bega de dubo bari de indewa are.

Dubo babarigari, na inaka de edo papaer itomane



gaetena tepo kavigari da ge, ko na dumbira kotembari de imondemane tano, borae kokotopu mi pipitora awa tedo itoro inaka de gaiawate. Embo nenei ririkedo torera gae, awamane awa matu bekumba ari einda bino natopo tara, awamane awa jimbo beiae embobo, God kaenato da kondade ari wareregetero dono etera, ko Tutu kaenato dakaki ko Bada Iesu Keriso bero era.

Ango edo na matu ge tain jipapa ena, ko imomane berari iji itomane dakaki gotowa, edo Bada mi embo nasi Egypt enu kavigewa, edo ambo da awamane awa kokotembari ae rare ginena. Edo anela ainda badari dowa, ko oro be ika dodo taingewa, bundari matawa itari da munia da iji siakabadae ainda katari da bundewa. Sodom ae Gomorrah ae nasi aikae de ang, awamane de daedo ang; a ipu da, ko pisi nei da amboda amboda ewa, edo piesiri gera kariwa, awamane da matawa itari da riroa kundo era. Edo ang eiwamane aturo embobo pisi eoro dono edo evira, ko badari ami dotureite, ko parara awa isimbedo cora.

*Ge Ewa Tari.* John K. 15. 17

**E**IWA nane mi imondemane tena, dubo mina bara eu. Butu imomane dumo eira, ko kotembotowa gisi na dumo eira, ko imomane dumo eira. Imomane butu da ang, ko butu da ang mi awamane da dubo mi bore tae; imomane butu da ang ae, rata nanemi sirigesitenane, awa tedo butu imomane dumo eira. Ge nane tena awa kotembeu; Ambodani mi badari ika dodo daginegae. Na usimbese ore tae, ko imomane ang usimbese ara; ge nato kera edo asite, ang ge itomane kera ara. Ko berari eiwa ara dao nato embo, na etegevira darora. Na gundo tae, awamane da jimbo beiae itae; ko boroko jimbo beiae ika da apuregari itae. Embo na dumo eira amo Mamo nato dumo eira. Ari nei ai mi ae awamane da iai na ae, ko jimbo beiae ika itae; ko boroko awamane na ae Mamo nato de gido dumo etera. Eiwa, edo ge ore tae ge ika ito da ove edo sisina, "Na dumo esira ro tedo ae ra ta." Dubo damo ari gumbari Mamo da iai ang etegana itomane iai, ge be da Asisi, Mamo da iai ang wowotevira awa, ami namonde onjiga taina; ko imomane onjiga tewa, imomane ae namonde daedo tutu de mi kaen itena.

EMBO KOKOTOPU BERARI DA IJI

*Pari*

**G**OD Goroba jiwae, avigari ito dada utari dakaki da dada esiteta awa, Mai ito Iesu Keriso Bada natokare ainda tamo botu da; kondade ari namondekare piewasi, edo kokotopu ito beiamana egeregari da jimbo ewagaewa berari amboda amboda ara, edo ang dubo beiamana, ge mana tesira, kumbara, ouwa imo karupa edo era awa embo sia eteta awa; Iesu Keriso mi Bada natokare. *Amen.*

*Epistle Embo.* Bedari 7. 2

**K**O anela goteno iji gupeiri ainda viviteira, edo God wasiri de da kariwa jira; edo ge inaka de tedo anela 4 dao sisina, awamane de pievira awa butu de ewa de usimbese orote, sisina, Butu de ewa de ae ni de usimbese ove ta, gisi God kaenato da singa beo da kariwa ana. Edo awamane mi kariwa eora awa gena, 144,000, Israel da ewowo da mamai mi kariwa esitera.

Judah da ewowo 12,000 kariwa esitera  
 Reuben da ewowo, 12,000;  
 Gad da ewowo, 12,000;  
 Asher da ewowo, 12,000;  
 Naphtali da ewowo, 12,000;  
 Manasseh da ewowo, 12,000;  
 Simeon da ewowo, 12,000;  
 Levi da ewowo, 12,000;  
 Issachar da ewowo, 12,000;  
 Zebulon da ewowo, 12,000;  
 Joseph da ewowo, 12,000;  
 Benjamin da ewowo, 12,000 kariwa esitera.

Edo einda amboda gena, ko gi, jisi ewowo embo ajigae dumbae etera, butu berari da iai ko ewowo de embo da ge jiwae de, anumbari da do da ko Arini ainda do da petetera, woru ika parara de ko date gi ingo da edo ge bajina tedo aoro gatedo tera. Ari kavigari God natokare iai anumba ari da anumbetevira awa, edo Arini da iai. Ko anela berari anumba ari de embomai de wo wasiri de 4 petedo jinenembetera; edo anumba ari da do da dombu

## PARI AE EPISTLE AE GE EWA TARI

mi durudo, edo God da jisi da tumondebain site sitera, Amen; Dave ari, parara de, ko dubo embo ari de, ko ategari de, dasiga ari de, badari ari de, goroba ari, God kae-nato natokare da iai natopo itare. Amen.

*Ge Ewa Tari. Matt. K. 5. 1*

**I**ESU mi jisi gido jiri da visido anumbesisina, edo singa ika ainda iai guputera, edo be angedo atopasido sisina, Dave awamane da asisi mi atoto eora; basileia utu da awa ikaito.

Dave awamane ji teora awa; ari dubo damo aina.

Dave awamane jimbo beiamana embo beji amundo ung udo apora awa; undari osi ara.

Dave do egeregari awamane do ari kumbara.

Dave awamane do ika beiamana eora awa; awamane awa God gara.

Dave awamane bega burora awa; dao tara, God da mamai.

Dave awamane jimbo dave embo usimbese eora; basileia utu da awa ami damane da.

Dave imomane embomai isimbedo, ko usimbese eite, beiae berari imomane bekumba tepotapo ara amone na embo. Dubo itomane dave ari, ia tewo; rorou itomane bajina utu da; peroveta gisi itomane ango usimbese esitera.

## BADA DA TURO INDARI KANDO ARI, TAMO

### DOREGARI KOTOPU

*Embo Doregari Kotopu kumain jipapa evira awa priest da iai oru ari sipo de gumbare tae.*

*Ko jimbo beiae embo itare tae, ta embo embo ika usimbese are tae, ge mi ta ari mi, edo fisi mi dumo ore tae; awa priest mi kotembare tae, edo dao tede oru are, edo ko Bada da Tenemba da aimbure kae; edo gido gisi tare tae edo dubo ika wareregari edo jimbo beiae ika matu ena awa doware tae, edo fisi da do da dumo eora awa dubo ika damo are; edo ami matu embo usimbese ena awa rorou are tae, edo gido tare tae edo ge jirido ango are tae.*

*Ango Priest mi are ae embo de daedo toropu da dumo mina ara awa ge tare, edo Bada da Tenemba da kumain ae edo gido kotembare tae edo bega bare tae. Ko embo dakaki mi duduno mina ara eira awa, awara otawo ika da buria iai awa kotembedo doware, edo ae dumbae evira awa rorou are tae; ko otawo mi bega bari beuto ari ae dumo de itare tae; Priest mi ango embo dubo vevera ari de awa Doregari Kotopu da undare tae edo do wawoegari itae. Edo Kera ari mi ango evira awa Bishop da iai oru aina. Edo Bishop aina Canon ango.*

*Tenemba, Doregari iji de woru aparara, ko Ekalesia toropu da itaina, edo gido Chancel, Sipo de Turo de Tumondebain ajijigetevira awa ango. Edo Priest mi Tenemba indari kena petedo Bada da Pari ajigaina, ae Benumu nei de, edo embomai baongo dadari aro.*

**M**AKA natokare, utu da isima eta awa, Dao ito kotopu Metera, Basileia ito puresira, Jipapa ito etera awa, butu de utu de ango. Boroko edo iji da doae, rorae natokare piedo ewasi; Edo buria natokare kotembedo dowasi, Ango nakare embo nenei da buria natokare iai kotembedo doturora. Edo bawari da nakare kundo aimbote; Ko beiae da nakare toregewasi. Amen.

## PARI

**G**OD, Goroba jiwa, jisi ito da dubo berari udegatora, Jipapa berari idegetora, da tema ae; Asisi Kotopu dubo natokare da pie torare, edo kotembari beiamana ewasi, ato nakare imo be jipapa edo. Dao ito kotopu gandore, Keriso mi Bada natokare. Amen.

## DOREGARI KOTOPU

*Edo Priest mi jisi da wareregedo Ge io ajijigare, edo embo baongo dadari eite Ge nei da nei da amboda ainda buria matu embo God da iai doari tedo gara, edo tonembari iji amboda edo kera orote, engo.*

*Kera ari*

**G**OD ge eiwa tena tedo; Na Bada God ito; God nenei nato do da dowasi.

*Embo.* Bada, nakare do ewasi, edo dubo natokare jiato, ge eiwa kera ore.

*Kera ari.* Ove kewote dowasi, ko asisi be utu da ikane itevira awa, ta butu da kambe da, ta ewa da butu du da. Tumondebain eote dowasi, awamane kena singa eote dowasi: na Bada God ito God gegata eona, edo mamono da rorae beiae mamai da iai rorou kupona, umo tamonde ta umo ingo ao pasido da namonde ge jindora, edo embo tausana jiwae do edo ena, awamane mi na jipapa eite, ge nato gido era.

*Embo.* Bada, nakare do ewasi, edo dubo natokare jiato, ge eiwa kera ore.

*Kera ari.* Bada God ito da Dao tedo jirote dowasi. Bada beiamana kotemain ae, embo ainda Dao tedo jijireira.

*Embo.* Bada, nakare do ewasi, edo dubo natokare jiato, ge eiwa kera ore.

*Kera ari.* Sabate kotembedo kotopu ewasi. Iji ipa nei da gisi de buro edo, berari eteta awa ewasi; iji ipa nei da toro de amo Bada God ito da Sabate. Ainda buro ro esiko dowasi, imo, ta mai ito jianda, ta mai ito ai, ta singa ito jianda, ta singa ito ai, ta sinopu ito, ta embo nei ito manguro be do da isira awari. Iji ipa nei da gisi, amone Bada utu de butu de ena, ewa, ae jiwae do da itora ainde; iji ipa nei da toro de dango tununa; awa tedo Bada Sabate beiamana edo, kotopu ena.

*Embo.* Bada, nakare do ewasi, edo dubo natokare jiato, ge eiwa kera ore.

*Kera ari.* Mamo ae ai de kotopu ewasi; edo iji ito ribori arate, iai ito mi pipitevira awa.

*Embo.* Bada, nakare do ewasi, edo dubo natokare jiato, ge eiwa kera ore.

## DOREGARI KOTOPU

*Kera ari.* Ango ato betore dowasi.

*Embo.* Bada, nakare do ewasi, edo dubo natokare jiato, ge eiwa kera ore.

*Kera ari.* Nembu nei da aro ta, nembu nei da iu vidote dowasi.

*Embo.* Bada, nakare do ewasi, edo dubo natokare jiato, ge eiwa kera ore.

*Kera ari.* Beono eote dowasi.

*Embo.* Bada, nakare do ewasi, edo dubo natokare jiato, ge eiwa kera ore.

*Kera ari.* Nembu ito ge butote dowasi.

*Embo.* Bada, nakare do ewasi, edo dubo natokare jiato, ge eiwa kera ore.

*Kera ari.* Nembu ito da mando jipapa eote dowasi; nembu ito da aro, ta singa ika jianda, ta singa ika ai, ta ox ika, ta ass ika, ta ikaita rora mi, jipapa eote dowasi.

*Embo.* Bada, nakare do ewasi, edo ge ito eiwa berari dubo natokare iai gaiewasi, tedo gera.

*Benunu Queen embo ajigaina, Priest mi gisi anga petedo taina.*

Kaen benunu tana.

**G**OD, Goroba jiwae, Basileia ito matawa itevira, goroba Gito gombu de; Ekalesia berari do ewasi; edo ELIZABETH, ambodani ito avigesiteta, Queen natokare de Governor natokare de awa dubo jiwasi; edo (ito iai ambodani evira awa gira) dasiga ari ito de parara ito de kakoa are, nenei anga ae; edo nakare ambodani ikaito berari de daedo (badari ikaito iai ba kotembedo) be ainda ambodani eite, kotopu eite, burau kera ara jisi ito da dave Ge ito de jimbo ito de anga de da; Iesu Keriso mi Bada natokare, imo de Asisi Kotopu de isite Dariga matawa itota. *Amen.*

*Edo gido eiwa.*

**G**OD, Goroba jiwae, Matawa isite, Ove ito kotopu da Gpioto gotora edo Dadariga da dubo kapetegari ito de gisi jiari ito de itera ito jipapa da anga. Burau mi tedo gotera, edo Singa ito ELIZABETH, Queen natokare ae Governor de, ainda dubo gisi jiatate,

## DOREGARI KOTOPU

ango dubo mi, ge mi, jimbo mi, berari ito dasiga de ito parara de kakoa aina; edo embo ito piena awa sima ari rorae de bega de jimbo beiamana de itara. Eiwa piewasi, Mamo natokare, Mai ito Iesu Keriso Bada natokare awa embo. *Amen.*

*Iji da Benunu ajigaina.*

*Benunu itae ari Epistle ajigedo taina, Epistle (ta Ginuma Epistle embo sirigetevira), einda piesira, Chapter —, Verse — tuturoeira. Edo Epistle itae ari, taina, Einda Epistle itae.*

*Embo eraro, Ge ewa tari ajigedo taina, Ge Ewa Tari Kotopu . . . da piesira, Chapter —, Verse — tuturoeira.*

*Ge ewa tari itae ari, Kiki engo tari ta ajigari embo da ango petedo isiraro.*

**N**A GOD dakaki ge be eona, Mamo, Goroba jiwae, Utu de butu de, edo berari idegotora awa ae gae eora de awa, Ariembo.

Edo Bada dakaki Iesu Keriso, God da Mai ao da, Mamo mi kumuna, butu berari sinenembae, God God mi, Parara Parara mi, God awara awara God mi, Kumuna rata ae, Ae Mamo de tamo da dawa, Ami berari ena; Ouwa kaena embomai, edo ari erari kaenato embo Utu da ango wotena, Edo Asisi Kotopu de Mary Kakara da iai pisi kundo, embo ena, Edo kaena embo Cross da dewa Pontius Pilate gisi jina ango de. Mamato euna, goewo, Iji tote da gagane de tenda erido Ove ango, Utu da visina, Mamo da ipa be da anumena isira, Edo parara de tenda gundo, wawasiri de bebetegari de kataina: Basileia ika gombu ae.

Edo Asisi Kotopu ge be eona, Bada, Wasiri piari Tutu, Mamo de Mai de idegedo eira awa, Ouwa Mamo de Mai de daedo kaende tumondebain eite dasiga eona, Ouwa Perovita da be mi ango ge tena.

Edo Ekalesia, Dakaki Kotopu Katoliko ae Aposetolo de, ge be eona. Bapataito dakaki jimbo beiae da ko-tembedo doari embo ajijigotona. Edo bebetegari da Erari sima ena, Edo butu amboda gumaina awa ainda kavigari. *Amen.*

*Ango de Priest mi Jisi da oru are, Iji Kokotopu ta iji rorae dowari, Pura ainda amboda orote. Edo ango de (ainda iji da) Doregari da Oru tare. Edo Bishop da Ge ajijigare. Edo embo nei ge ro tain ae ta oru ain ae Ekalesia da, Tumondebain da iji de, ango ae rata Kera ari mi. Edo ami tain ae rata ge tetera awa, einda Book da, ta Queen mi tevira awa, ta Nasi ainda Bishop mi.*

## DOREGARI KOTOPU

*Amboda Dengoro baiari, ta Ajijigari pietera awa ta amboda piorote. Edo Priest mi Bada da Tenemba da tekago aundo Offertory arate, edo Ge einda dakaki ta nenei tare, jipapa evira ango.*

Parara itomane embomai da jisi da parara aina, edo jimbo beiamana itomane gido, Mamo itomane Utu da itevira awa dasiga ara. *Matthew K. 5.*

Moka rorae itomane butu da dada eove, toro ae uve de mi indora awa, edo beono kakato ururugedo beono eora awa; ae rata moka rorae itomane Utu da dada ewavi, toro ae uve de indae eora awa, edo beono kakato ururugedo beono ae eora awa. *Matthew K. 6.*

Rora jipapa eowa embomai itomane iai orote, da ango awamane da iai ewavi; eiwa Law de Peroveta de.

*Matthew K. 7.*

Awamane berari mi namonde teora, Bada, Bada, mana berari mi basileia Utu da torara; ae rata embo Mamo nato Utu da itevira ainda jipapa ari evira ami.

*Matthew K. 7.*

Zacchaeus mi petedo Bada de sisina, Giwasi, Bada, rorae nato kupo nenei atotokatoto de pisido ena; gonendegane tae, ipa ao pasido tembukera edo tekago pisido ena.

*Luke K. 19.*

Ito ai mi eiri gido mina ainda? ai vine uredo be injido ae? ta ai mi sinopu undedo, sinopu amimi injido ae?

*I Cor. 9.*

Asisi itomane da rorae itomane iai uretera, jimbo bajina ta rorae itomane nasi da awa vederi kae?

*I Cor. 9.*

Gotovi ta gaeri edo awamane rorae kokotopu da kera eora awa temple da rorae indora. Edo awamane altar da sima eora awa altar de daedo kando ika kupora? Da ango Bada mi tevira, edo awamane Ge Ewa Tari baiora awa, Ge Ewa Tari de kavigara.

*I Cor. 9.*

Ami siaka urevira awa siaka aiaina; edo ami jiwae urevira awa jiwae aiaina. Embo dara dara akuta ainda dubo da ge katevira awa arate; ae de ain ae, ta dourekae ain ae: God mi dubo beiamana de piari embo karupa evira.

*2 Cor. 9.*

Ami ge atopoasiuri gotevira awa ami atopapotevira

## DOREGARI KOTOPU

ainda iai rorae beiamana berari da kera arate. Mana imondemane ge pitawa torote; God gandubari bain ae: embo urevira awa da awara ai aina. *Galatians 6.*

Iji isirari gido, beiamana embo berari da iai kaen buro anate, edo awara awamane da iai ge be ari da oro be da.

*Galatians 6.*

Jimbo beiamana giuri awa dubo damo evira awa rorae jiwae; ro ae butu da kundo gumbera; ro ae wotedo kumain. *1 Timothy 6.*

Rorae embobo eiwa nasi da tewasi, piari kakato orote, kando edo dubo beiamana orote; rorae beiamana ainda koara da piorote, ango de iji gumbari gido kaviegari be jido kumbara. *1 Timothy 6.*

God beiae mi raro jimbo itomane edo karupa ari ainda Dao da pietewo gosisina awa, dumo edo ruvegain, imomane kokotopu da iai kera esitewa awa, ko awara boroko kera cowa awa. *Hebrews 6.*

Rorae beiamana ari, edo kando edo ruvegeove; rorou awa gido dubo beiamana evira. *Hebrews 13.*

Ainda iai butu da rorae rarea itevira awa, edo nameji atota eiri gido, edo ainda do ari ainda iai motou evira, nongo edo God da dubo bari ainda do da iteviri?

*1 John K. 3.*

Rorae ito kando ewasi, edo atoto da iai da dombu ito eve piote; ango de God da dombu ito iai eve pieure dae.

*Tobit 4.*

Do ewasi jimbo ito ango. Ito iai jiwae gido, jiwae piewasi; siaka gido, siaka awa ango pisido adu eote; ango de rorou beiamana imo embo piatate, iji de jipapa eota awa.

*Tobit 4.*

Atotokatoto do evira awa Bada de pievira; edo ainda jimbo beiamana ainde mina piaina. *Proverbs 19.*

Embo atotokatoto undevira awa dave. Iji beiae de Bada mi toregaina. *Psalms 41.*

*Ge eiwa ajijigore, edo Deacon, Ekalesia da Sima ari, ta embo nei beiamana tevira awa, rorae atoto embo kumaina, teo beiamana da, Nasi*

## DOREGARI KOTOPU

*pipitevira ango de; edo Priest da iai kundo gumaina, edo awa burau m Tenemba kotopu da piare.*

*Edo Doregari itare, Priest mi Tenemba da Bread ae Wine de piarate. Itae awara, Priest mi tare.*

Keriso da Ekalesia de de nasi ainda itoro edo era awa embo kaen benunu tana.

**G**OD, Goroba jiwae Wasiri de matawa, Aposetolo ito Kotopu da be mi atopapositeta benunu site tede goteite ategorote embomai berari embo; Atoto eite imonde tede gotera, doari ito de (\*tepo piari natokare ae rorou ito de kumbuwas, edo) benunu natokare eiwa kumbuio, nakare parara ito da jisi de pipitera awa; tede gotera Ekalesia ito de de, ge be ari, dada ari, edo bega da asisi pie matawa torare: Edo ato embo berari dao ito kotopu ajijigotora awa ge ito kotopu da ge be ari da dada ore, edo dubo vivi da edo dubo bari da itore. Edo tede gotera, Dadariga de embo babadegari de Governors Christian berari de toregewasi, ango de ambodani ito *ELIZABETH* Queen natokare, ouwa jimbo ewa mi babaingo aina: ainda katari berari piewasi, edo awamane berari badari ari ainda iai kupora awa kondade ewasi, edo ge be ari mi edo katari dambudarari mi katore, ango edo jimbo bebegae ae iawa ari de da riroa piore, edo ge be ari ito, ae ari beiamana de, matawa dundan edo itorote. Edo, Mamo Utu Topo, Bishops ae Sima ari embo berari de da iai tonembari piewasi, ango edo ari ika mi ae kiki dambudarari de mi Ge be ito wasiri de karigore, edo Sacraments ito Kokotopu da ge ewa mi edo iji ika be de kando ore. Edo embomai ito berari da iai tonembari ito utu de piewasi; edo awara doregari eiwa eminda itera awa da iai; ango edo, atoto eite ge ito kotopu gido kundo kotopu ore; edo iji ika berari de ito iai singa be eite ari ika dave ore. Edo nakare atoto eite tede gotera, O Bada, tamo gavi ito mi awamane berari eiwa kaviegari etete da dubo beiae eri ta, ko mamato eri ta, ko beji aperi ta, ko amburo eri ta, ko nei ro dubo vevera eri gido, dubo damo ari piedo toregewasi. Edo Dao ito kotopu ategetera, ambodani ito berari embo, ge be eite ae kotopu eite imo nasi eiwa dodo auntora awa; tede gotera, namondekare piato nakare ainda dero da amboda amboda ore, ango ae ainde daedo

\* *Rorae ta rorou itae are, ge eiwa teure.*

## DOREGARI KOTOPU

basileia ito utu da kumbore. Eiwa piewasi, Maka natokare, Iesu Keriso Ge kato dakaki embo. *Amen.*

*Ango de Kera ari mi Doregari Kotopu orote oru evira, (Sunday, ta Iji Kotopu awa teka de) Dengoro baiari itae, Ge eiwa tarate.*

**D**UBO embobo, . . . day nei da, God da tonembari de daedo, embo berari awa tedo sia eora awa, Keriso da Tamo de Ororo de da Sakarament awa oena aparti piana; edo awamane mi kumbara ouwa Cross ika de Mamato ari de da kotembu kotembu; da da ami jimbo beiae kaenato da rorou piari kaen kupona, edo Basileia utu da angoo awa kaenakanato. Awa tedo buro kaenato, ko God Goroba jiwae, Mamo kaenato utu da angoo awa kaen ategane, ami Mai ika kaenamonde pisina, Ari kavigari kaenato Iesu Keriso, ko kaena embo betena, angoo edo amo asisi kaenato da rorae, rare euri kaen goroba eona, awa Sakarament kotopu da. Awara ta ko eiwa embomai mi be kumborote edo dubo ika damo be are; edo gido iawa eite bae dumbae ara, ko adu ari siakabadae. Buro nato rare ge tena engo de Jimbo botuda kotopu awa be kotembewo; ko kumbae dumbae ari awa adu ewo; angoo edo dubo itomane katewo, ko katae dumbae eove, be pitawa kakato inge God da jisi da, edo gido kokotopu de beiamana de mi utu Ijiawari da puwavi, woru itomane ijiawari da woru, angoo God mi Ove kotopu da tevira awa, ko Tenemba kotopu ainda imomane ewa edo bari awa unaina.

Buro itomane eiwa; Gisi, ari itomane berari katewo, tega itomane God da Ge; ko nomi dubo mi ta ge mi, ta ari mi, buria itomane isiri, awa tedo jimbo itomane ji teu, edo God, Goroba jiwae da jisi da ajigeu, edo ge ikamane jirido ko jimbo teka da itave. Awara ta jimbo beiae itomane embomai itomane mi dumodumo era, God mi dumo evira angoo, imomane awamane de daedo bega budo, ko beiae berari embo nenei da iai eowa awa rorou eu; ko angoo, embo nenei dumo eite, awamane da jimbo beiae kotembedo dou, jimbo beiae itomane embo kotembedo dowari God da iai da jipapa eowa angoo; edo gido Doregari Kotopu kumbawo re bekumba ari itomane bajina. Ai mi itomane iai isite, God tedo jirido eiri, ta ainda Ge tedo eiri, ta a ipu da edo eiri ta gadumbedo eiri, ta otawo ika dumo edo eiri, ta jitedo eiri, ta ro nei beiae eiri, imo angoo dubo ika wareregare tae, edo jimbo beiae

## DOREGARI KOTOPU

beuto ewasi, edo gido Tenemba kotopu ainda gumbote; angoo Sakarament kotopu awa kumbote kaen, ko Satan do ito da torare tae, Judas da do da angoo, ko beiae berari mi do ito da gerigaina, edo tamo ito de asisi ito de gindare tae.

Awara ta kotembeu, embo ai mi Doregari kotopu da gumbeikae edo gido gisi God Do ari kato kotembare tae, edo dubo ika damo are tae; awa tedo itomane iai ave isiri ta, dubo ito ato damo ae aina, ko dubo damo ari ta piari gari jipapa esi, nato iai purasi ta, God da Ge mi kotopu udegari kumbata, piari gari angoo edo dubo ika damo edo, ko mana idewa aina.

*Ko kotemborote embo Doregari kotopu da aimbari beuto gido, Ge engo tare.*

**E**MBOMAI nato, oru ena ko . . . Bada da Turo indari Eain ena, bondo ainda imomane daotena, imomane berari ainda itewa awa. Awara ta ko God mi imomane daosira, edo Bada Iesu Keriso embo imondemane tedo gotena iari dove. Embo bondo siakabadae sia are tae, ko tenemba ika giro are tae edo rorae jiwae pitare tae, edo dao tevira awa gundo anumbore tae, angoo edo awamane awa dauwa edo, iari beuto ara, amo ari beiae tamo? Imomane awa embo sini gambesiri ta? Angoo mamato avetae. Angoo edo imomane engoo Turo indari Kotopu eiwa dowave tae. Ko imomane awo sini gambare tae. Dubo babarigari, imomane God dumo eove. Iji nei de embo mi tedo tare tae, Ge tari nato isira; na atutumain ae; buro nato eve isira, benokabenoka edopa. Ko benokabenoka eora ami God ge tari tamo ai aeri? Embo mi tedo taina, Na buria nato beiae rare, iari adu ena; borae dubo itomane wareregare tae, edo buria itomane dodo taingave tae. Angoo de God mi imomane dao tevira, beuto ari me ave tae ta? Angoo de God da do da atutumbedo itave tae, ko benokabenoka avi ta, tedo tave, Nakare sia ae? Amo pitawa God mi kotembedo era; nominomi imomane ruvegaini? Ge ewa tari da, embo benokabenoka ewa, nei buro ika ori ena, nei ox asini de bawain jipapa ena, nei a jimuna; Awamane awa amboda dowae; bondo da ge tewo ko do da torae. Nane mi sia edo, imomane sima ana; ko buro nato angoo God da Doa da imondemane tena, ge tena, ko kavigari awa embo Doregari kotopu eiwa kumbawa. Eiwa dubo mi siteu;



God da Mai Cross da betena, edo asisi ika piena kaviégari itomane embo; awa tedo buro itomane Doregari kumbave tae, ainda betari rorou ari da matu ge tari; ango kaenamonde oru ena. Awara ta ko beuto ave tae, edo imomane akuta Bada da Tenemba dodo taingave tae, edo embomai ikamane da iai rorae utu da ango awa inain tedo gupera awa evekara ewa, dubo mi siteu ko God usimbesei ewa; awa tedo rirowa siakabadae ikane oreko eira. Eiwa dubo itomane mi be sitewo, ko God mi imomane kondade edo dubo itomane jiari wareregaina. Awa tedo God Goroba jiwae Mamo kaenato utu da ango de natopo tedo gana.

*Doregari Ari da iji de, atutumbotora awa kumain tedo sia orote edo, Priest mi engo tare.*

**B**ADA da jisi da dubo babarigari, imomane ge itomane jijirewa ko Doregari kotopu da puwavi, amo Keriso Ari kaviégari kaenato da Tamo de Ororo de; imomane dubo siteu, ge Paul Kotopu mi embo berari de tevira awa, ko atota be are tae, edo akuta katara tae, edo amboda jiro ika jiari erari Bread awa indore tae, edo Akou awa indore tae. Dubo kaenato be wareregare tae, edo kaen be kote-mane tae edo Sakrament Kotopu awa kumane tae, awawa awara kaenato iai dave be dave are tae; (ango, asisi kaenato mi Keriso da pisi kaen injido indeite ko ainda ororo kaen injido eona; Keriso da do da kaen isimonono, ko ouwa do kaenato da; kaena Keriso de daedo dada eimono, ko Keriso kaenamonde daedo); edo gido kaen kumbae dumbae etenane, ko adu ari kaenato siakabadae awa. Ango de Keriso Ari kaviégari kaenato da Tamo de Ororo de atota ari kaenato; bekumba ari kaenato indeite, ko kaen tu injido eona, ko Bada da Tamo kaen kotembae; God kaenato iai sini gapevira; ievi eve de betari eve de etegeiteiri, ko kaena mamato ena. Imomane akuta kateu, embomai nato, ko God imomane atota ain ae; jimbo beiae itomane eowa awa embo dubo itomane beiae be beiae aina; Keriso Ari kaviégari kaenato iji berari ge be eu; jimbo itomane dave eu; edo embo berari dubo bu; ango edo Jimbo botuda kotopu eiwa be kumbu. Ango edo re ko gisi imomane burau, God be ategewo, Mamo de Mai de Asisi Kotopu de, butu rorou embo, Ari kaviégari kaenato Keriso betedo mamato edo ena awa; amone God,

rata ko awara embo, atoto eute, kaena, jimbo beiae embobo, rare kaen mamato eona awa, edo munia da duga da kaen jitao amona awa; ango God mi kaena mamai are tae, edo kaviégari natopo da jiari enane tae. Ango edo Bada kaenato de Ari kaviégari ao da, Iesu Keriso mi kaena dubo buna, ko ororo averegari mi ari dave jiwae kaena embo piedo burisina, berari eiwa kaena iji da doae kote-mane tae, ko awa tedo Jimbo botuda kokotopu tuturo edo pisina, ko dubo kaenato natopo damo be damo are tae. Ango edo ouwa, Mamo de Asisi Kotopu de daedo, kaen iji da doae ategane tae; edo kaen ainda ge kotopu kera edo, edo inaka de ano jimbo kaenato awara ave are tae, edo kaen ainda iai ambodani ane iji kaenato berari da. *Amen.*

*Edo Priest mi embo atutumbedo Doregari kotopu kumborote da iai engo tare.*

**I**MOMANE awara jimbo itomane bebegae embo dubo sitowa, edo embo ikaitomane de dubo mina bara eite, jimbo teka ari jipapa ewa, God da Ge ango udugeteite, edo boroko ri ta amboda ainda begata kokotopu da pepeta ain ewa; edo Sacrament Kotopu eiwa kumbawo dubo itomane damodamo ari; edo baongo itomane dadari edo atoto eite God Goroba Jiwae da iai jimbo bebegae itomane ajijigave.

*Edo Onjiga tari eiwa Doregari kotopu kumain jipapa eora awa da dao da, Kera ari dakaki mi tare, awa embo de daedo burau baongo dadari edo, tore.*

**G**OD Goroba jiwae, Bada natokare Iesu Keriso da Mamo, Berari Ari embo, Embo berari Katari kato; Jimbo bebegae natokare jiwae kotembedo ji teora, Iji nei eora awa, Kotembari mi, tari mi, ae jimbo de mi, Imo God Birikoku ito da do da, Awara jimbo natokare mi eoro duduno eota. Nakare be dubo siteworo, edo jimbo beiae natokare eiwa embo mamato eora; Awa kotembeteite dubo vevera era; Sino amboka kumbari bouga. Nakare do ewasi, Nakare do ewasi, Maka do ari kato; Mai ito Iesu Keriso embo, Berari eora awa kotembedo dowasi; Ato nakare jimbo teka ari de ito iai matawa singa eite aro dubo ito dave are, Dao ito de dasiga ae parara de embo; Iesu Keriso mi Bada natokare. *Amen.*

## DOREGARI KOTOPU

*Priest (ae rata Bishop mi isima eira ango de) erido embomai da ia wareregedo, Udegari eiwa taina.*

**G**OD Goroba Jiwa, Maka kaenato utu da ami, ainda Gdo ari bajina da jimbo bebegae kotembedo do ari tenu giwa awamane berari da iai wareregotora awa; Imomane do esira; jimbo bebegae berari da awa imomane udegeteite toregesira beiamana berari da jiari goroba etewa; edo kaviegari matawa itari da kumbesira; Iesu Keriso mi Bada kaenato. *Amen.*

*Priest mi taina*

Ge dubo damo ari giwo, ari kaviegari kaenato Keriso mi berari de tevira, ainda iai be wareregedo eora awa.

**N**ATO iai berari puwavi, imomane buro eowa awa, Nsino amboka itomane bajina awa, edo nane mi kumano dango turave. *Matthew K. 11. 28.*

God ango butu dubo budo, ainda Mai ao da piena, edo avera mi berari ainda iai kotembedo cvira awa betain ae, rata kaviegari matawa itari kumbarate. *John K. 3. 16.*

Giwo, Paul Kotopu mi tevira awa.

Ge eiwa be sira, edo embo berari mi kumborote, Keriso Iesu butu da gumuna jimbo bebegae embomai ari kaviegorote tedo. *I Tim. 1. 15.*

Giwo, John Kotopu mi tevira awa.

Embo da jimbo beiae ari, kaenato Ge kato Mamo da iai isira, Iesu Keriso dave ari embo; edo ouwa jimbo beiae kaenato da rorou arira. *I John K. 2. 1.*

*Amboda Priest mi engo tare.*

Dubo itomane jiwavi erore.

*Mina tari.* Bada da iai jiero erorera.

*Priest mi.* Bada kaenato kaen ategane.

*Mina tari.* Awa ari beiamana.

*Priest Bada da Tenemba da wareregedo taina.*

**A**WARA ari beiamana, edo jimbo natokare be, iji berari de, iai berari da imo ategorote, Bada,\* Mamo Kotopu, Goroba Jiwa, God natopo itota. *\* (Ge "Mamo Kotopu" Trinity Bondo da ajigeore.)*

## DOREGARI KOTOPU

*Einda Iji Ajijigari, pipitevira ango, edo gido iji dakaki taina.*

**A**WA tedo ae Anela de Anela da Babadegari de, jisi utu da berari de daedo, Dao ito beiamana be awa borega eite gandeite; iji berari imo dasiga eite tedo era, Kotopu, Kotopu, Kotopu, Bada Sabaoth da God, utu de butu de parara ito be da esira; Parara ito iai, Bada ikane topo. Amen.

*IJI AJIJIGARI*

*Christmas da, edo iji 7 amboda*

**I**ESU Keriso Mai ito ao da piata iji ango de nakare embo lwotarate, awa tedo; Edo awa Asisi Kotopu da jimbo rare awara embo ena Mary Kakara ainda ai da tamo mi; edo beiae dono ari mi ro ae, ango edo beiae berari da awa nakare dave arate. Awa tedo ae Anela de, etc.

*Easter da, edo iji 7 amboda*

**E**DO awara imo dasiga orote Mai ito Iesu Keriso Bada Enatokare ainda Erari parara de embo: Ouwa awara Darutegari da Arini nakare embo piena awa, edo butu da jimbo beiae kumuna awa: Ainda betari mi betari gindegena, edo ainda tenda erari kaviegari natopo itari namondekare tekago piena. Awa tedo ae Anela de, etc.

*Vitari iji da, edo iji 7 amboda*

**M**AI ito dubo bari be, Iesu Keriso Bada natokare mi awa ainda Erari be parara de amboda ainda Aposetolo berari da iai awara be idegena, edo awamane da jisi da utu da visina iai natokare sia ain tedo; edo awa isima eira ainda, ounda nakare engo vitetera, edo ainde daedo parara da dariga etera. Awa tedo ae Anela de, etc.

*Pentecost da, edo iji 6 amboda*

**I**ESU Keriso mi Bada natokare: Awa ainda Vitari utu ikane kakane da amboda, edo Parara ito da ipa be da anumbeteite: Iji eiwa ango da Ekalesia de de kena Asisi ito Kotopu, Wasiri Piari tutu, vekougesisina: Ainda goroba parara de mi Ge Ewa Tari da dubo dave butu arapu da idegarate tedo: Ango edo nakare tumba de

bambae dumbae ari de da awa parara be da piesiri idegesitera, edo ito ge be ari da, edo Mai ito Iesu Keriso, Bada natokare, da ge be ari da. Awa tedo ae Anela de, etc.

*Trinity da Bondo da akuta*

**I**MO Mai ito ao da ae Asisi Kotopu de daedo God Idakaima, Bada dakaima itota, Persons ae Trinity de, rata Tamo Dakaki: Awara awa Parara ito ge be eora, Mamo, da ango Mai ito ae Asisi Kotopu de ge be eora, nomi eve ae, da awara. Awa tedo ae Anela de, etc.

*Ajijigari amboda engo de tare,*

**A**WA tedo ae Anela da Babadegari de, jisi utu da berari de daedo, Dao ito beiamana be awa borega eite gandeite; iji berari imo dasiga eite tedo era. Kotopu, Kotopu, Kotopu, Bada Sabaoth da God; utu de butu de ito be da esira; Parara ito iai, Bada ikane topo. Amen.

*Priest Bada da Tenemba da baongo dadari edo embo berari atutumbetera ainda dao da Pari engo taina.*

**J**IMBO ewa natokare kotembeteite eiwa tenemba ito da Jatutumbae, Bada Doari kato, tena ito do ari jiwae babaingamana de rare. Nakare ewa raro tenemba ito du da gigisi sirigeri. Imo Bada dakaima, do ari kato eota: Awa embo ewasi, Bada tonembari kato, nakare Mai ito dubo embo Iesu Keriso da Tamo injido, Ororo injido arate, ango edo tamo natokare eora dono eora awa Tamo aminda ami ewa aina, edo asisi natokare ainda Ororo beiamana mi teiaina, edo nakare ainda do da matawa itara, edo awa do natokare da. Amen.

*Priest Tenemba do da petedo, Bread de Wine de sia aina, Bread embomai da jisi da dambu da engaina, edo Akou ipa da kumaina; edo Aoari Benunu engo ajigaina.*

**G**OD Goroba Jiwae, Mamo natokare utu da, imo doari Gito dave mi Mai ito ao da Iesu Keriso piato cross da dewo betana rorou piarate nakare embo; ouwa ainda (ainda akuta piari da mi iji dakaima piena awa) rorou piari ae ari de de dave de be de butu berari da jimbo beiae awa embo ena; edo awa ainda betari dave natopo kotembu kotembu ari tuturo ena, edo ainda Ge Ewa Tari da namondekare tena matawa eiara, amboda tenda gumaina;

Nakare giwasi, Maka Doari kato, atoto eite imonde tedo gotera; ato nakare piari ito eiwa Bread ae Wine de kundo, Mai ito Iesu Keriso ainda tuturo ari kotopu ango, ainda betari ae mamato ari de da kotembu kotembu ari, ainda Tamo ae Ororo dave de kumbara. Ouwa, awa munia da ainde, onjiga tena awa, <sup>a</sup> Bread kumuna; edo ategedo, <sup>b</sup> engegedo, ambodani ika de pisido, tena, Kundo injiwo, <sup>c</sup> Tamo nato eiwa imomane embo pipitevira: Eiwa ewo kotembu kotembu nato. Ango de itae injido dodo <sup>d</sup> Akou kumuna; edo ategedo, awamane kena pisido, tena Berari mi emone injiwo; <sup>e</sup> Ororo nato eiwa tarigari teka ainde imomane ae nenei jiwae de embo dodegetevira jimbo bebegae da udegari: Ango de injido eite, eiwo ewo, kotembukotembu nato. Amen.

<sup>a</sup> *Einda Priest mi Paten ipa da kumaina.*

<sup>b</sup> *Einda Bread egaina.*

<sup>c</sup> *Einda ipa Bread berari da piaina.*

<sup>d</sup> *Einda Akou ipa da kumaina.*

<sup>e</sup> *Einda ipa piaina Akou berari da Chalice eiri ta Flagon eiri ta wine isira awa aoi.*

*Kera ari gisi Doregari tote kundo, Bishop, Priest de, Deacon de (itaro) piaina, amboda nenei de piaina, ipa da berari baongo dadari aro. Ango de Priest Bread pipiteite engo taina.*

**B**ADA kaenato Iesu Keriso da Tamo, imo embo piena Bawa, tamo ito de asisi ito de kaviegari matawa itari da toregaina. Eiwa kundo injido kotembeio Keriso imo embo betena, edo dubo ito da amimi sini cio, ge be ari mi, ategari de daedo.

*Edo Kera ari mi Akou tegeri pipiteite, taina,*

**B**ADA kaenato Iesu Keriso da Ororo, imo embo dodegena awa, tamo ito de asisi ito de kaviegari matawa itari da toregaina. Eiwa injido kotembeio Keriso da Ororo imo embo dodegena, edo ategio.

*Bread ae Wine de itae berari, edo embo nenei indae, Priest mi nei aarate, Jimbo gisi tetera ango; edo Bread beiamana edo, ge (Ari Kaviegari kaenato munia de) tuturo are, edo ge (Ango de itae injido dodo) Akou beimana edo.*

*Berari itae indaro, Kera ari mi Bada da Tenemba da tenda aundo, Rorae aoari isima evira awa ainda pisido, woru linen parara mi apuregaina.*

*Priest mi Bada da Pari ajigare, ae embomai de daedo.*

**M**AKA natokare, Utu da isima eta wa, Dao ito kotopu Metera. Basileia ito puresira, Jipapa ito etera awa,

## DOREGARI KOTOPU

butu de utu de ango. Boroko edo iji da doae, rorae natokare piedo ewasi. Edo buria natokare kotembedo dowasi, Ango nakare embo nenei da buria natokare iai kotembedo doturora. Edo bawari da nakare kundo aimbote; Ko beiae da nakare toregewasi: Imo de basileia, ae goroba, ae parara de, matawa. Amen.

*Ambodo eiwa ajigare.*

**B**ADA Mamo natokare utu da, nakare singabanga Batotokatoto ito, imo be tedo gotera, Mamo, tamo ito gavi aina, edo ito doari mi, eiwa rorou natokare, dasiga de ategari de, kumbatate; edo atoto be eite imonde tedo gotera, Mai ito Iesu Keriso da ari dave de edo betari de embo, ge be ari mi anda ororo da, nakare, edo Ekalesia ito dede, jimbo natokare bebegae kotembedo doari kumbara, edo tepo kumbari nenei berari, ainda mamato ari da awa, ami nakare embo kumuna awa. Edo einda, Bada, nakare akuta imonde pipitera, asisi natokare edo tamo natokare, edo jisi ito da rorou kotopu de wasiri de itarate: atoto eite imonde tedo gotera: edo nakare berari mi Doregari Kotopu eiwa kupera awa, tonembari ito mi edo dave ari Utu da ami be da ara. Edo awara nakare ewa ae, jimbo bebegae natokare jiwae rare, rorou rora pieri, ae rata imonde tedo gotera, edo eiwa buro natokare ae singa ari natokare de kumbuwas; jimbo natokare dave tega eota ta, jimbo natokare bebegae kotembedo dowasi, Iesu Keriso mi Bada natokare amimi, ae ainde daedo, Asisi Kotopu da dada utari da, dasiga ae parara berari de iti iai, Maka Goroba Jiwae, natopo itaina. Amen.

*Edo gido eiwa,*

**G**OD Goroba jiwae, Matawa itari, nakare Sakrament Kotopu eiwa kupera ami imo be ategetera, asisi natokare da rorae, Mai ito Iesu Keriso da Tamo de Ororo de dave be dave mi, nakare undeta awa embo; edo tamo gavi ito natokare iai ango teoto gotora; edo Mai ito da tamo botu da patu eora, awa sima gaingainde ae embo berari da dada utari dave; edo daedo, sima ari mi, basileia ito matawa itari da baiaw kumbari embomai, Mai ito dubo bari mi ainda betari ae mamato ari de dave be dave da ari beiamana embo. Edo atoto eite imo tedo gotera. Mamo Utu Topo, ango tonembari ito mi nakare

## DOREGARI KOTOPU

kondade ato, edo awa utari dave da isima arate, edo jimbo ewagaewa ore, nakare embo pepeta orote sirigotota awa; Iesu Keriso mi Bada natokare, Ainde, imo ae Asisi Kotopu de daedo, dasiga ae parara berari de, natopo itaina. Amen.

*Ajigariri ta ia tari.*

**G**OD ikane itari da iai parara itare tae, edo butu da bega, embomai da iai da dubo ewa evira. Imo dasiga eora, imo beiamana eora, imo tumondebain eora, imo gandora, parara ito bajina awa gido imo ategetera, Bada God, Dariga utu topo, God Mamo Goroba Jiwae.

Bada, Mai ao da Iesu Keriso; Bada God, God da Arini, Mamo da Mai, butu da jimbo bebegae kupota awa, nakare do ewasi. Imo butu da jimbo bebegae kupota awa, nakare do ewasi. Imo butu da jimbo bebegae kupota awa, benunu natokare kumbuwas. Imo God Mamo da ipa be da anumbotota awa, nakare do ewasi.

Imo akuta kotopu; imo akuta Bada; imo akuta, Keriso, Asisi Kotopu de daedo, ikane itota God Mamo da parara da. Amen

*Priest (ta Bishop, isima eira ango de) Beiamana emimi tari aimbara.*

**G**OD da bega gari tao berari mana getera awa, dubo Gitomane kotembari de edo karupa ari de God da iai, edo ainda Mai Iesu Keriso Bada kaenato da iai, toregaina; Edo God Goroba jiwae, Mamo de, Mai de, Asisi Kotopu de, da dave ari itomane iai are, edo matawa itaina. Amen.

*Benunu, Offertory amboda ajigare tae ango de Doregari ae dakaki ta nenei; ko ango iji nei de ajigare tae Benunu amboda Benunu tari Sipo de ta Turo de, ta Doregari ta Litany de, Kera ari sirigetevira awa ango.*

**N**AKARE do ewasi, edo toregewasi, Bada, benunu natokare da tedo gari da, edo ambodani ito da begata sia ato kavigari matawa itari kumbore tae; ango edo kavigari natokare einda ari evekave jiwae are, edo imo paira be edo kondade edo toregewasi; Iesu Keriso mi Bada natokare. Amen.

**B**ADA, imo Goroba jiwae God matawa itari, imo de tedo gotera, dubo natokare de tamo natokare de da iai badari ewasi, edo tai natokare kundo ge ito da begata da aimbuwas ae ari de da; nakare be ine toregewasi,

einda edo iji berari, tamo natokare de asisi natokare de kaviegiore; Bada natokare edo Ari kaviegiari natokare awa embo, Iesu Keriso. *Amen.*

**I**MO de tedo gotera, God Goroba jiwae, kando ewasi ko ge nanekare boroko dengoro mi gotera awa kondade ari ito mi do natokare piari erido be gaedo jimbo beiamana be gaiari edo Dao ito parara edo dasiga ore; Iesu Keriso mi Bada natokare. *Amen.*

**B**EIAMANA ari ito mi ari natokare berari da begata bgisi ewasi Bada, edo natopo kondade ewasi; ango edo ari natokare gisi ito da tuturo edo, tepo edo, itae ore edo, Dao ito kotopu beiamana are, edo amboda kaviegiari matawa itari kumbara; Iesu Keriso mi Bada natokare. *Amen.*

**G**OD, Goroba jiwae, imo dubo embo tutu, nakare tedo gae jipapa eora awa gotota, edo tedo gari darora awa gotota; Imo da tedo gotera edo siwari natokare do ewasi; ko nakare bebegae rare tedo gari me edo eira, ko nakare dauwa rare tedo gari daredo era, awa namondekare pie-wasi, Mai ito Iesu Keriso da ari awa embo. *Amen.*

**G**OD, Goroba jiwae, matu tari da Mai ito da Dao da gbenunu teora awamane da benunu gate tae; Nakare do ewasi, tedo gotera, ko nakare boroko benunu natokare de tedo gari de jisi ito da ajigetera awa, natokare iai wareregewasi; edo kando ewasi, edo kotembari mi tedo gotera awa ko inemi ge tae, be kundo oena aparo, parara ito bedaina, Iesu Keriso mi Bada natokare. *Amen.*

*Sunday de iji Kokotopu nenei de, (ko Doregari Kotopu ae) Doregari da Ari ajigigaina, edo Benunu gombu da doware (Keriso da Ekalesia embomai berari einda itoro edo eora awa embo) ko benunu nenei einda pipitora awa dakaki ta nenei de Beimana ari da itae aina.*

*Ko Bada da Turo indari ari jipapa edo Priest da embo ika ajigedo are jipapa evira ango.*

*Edo nasi ainda embo 20 isite raro, Doregari kumberi kae, ko Doregari itain ae endo gido 4 tamo 3 mi ae Priest de daedo kumbara.*

*Edo Cathedral da College da, ko Priest de Deacon jiwae itera awa Sunday iji da doae berari mi Doregari kumbara ae Priest de daedo, edo gido kotembetevira awa gumbae.*

*Ko Bread embo mi tepo indevira ango dave imata kumaina awara; ko embo kotembae dumbae eure.*

*Ko Bread ta Wine isirari ao eore, amo topa Priest da itare; edo doari*

*tare tae, ko Ekalesia da kundo idegeure kae, edo Priest de embo nenei, Doregari da itera awa dao tore tae, embo Beiamana ari itae, edo kokotopu mi injido tu injido ore.*

*Bread de Wine de Doregari embo Priest mi ko Ekalesia oro sima ari de piaina edo nasi rorou aina.*

*Ko gi, embo berari ainda iji tamonde atutumbara dumberi berari Easter awa awara ko nenei de. Ko Dumberi iji da doae Easter de embomai berari money ika ae Badari ika de daedo ajigedo rorou ara.*

*Tumondebain ari itae ari money pietera awa piaina, Kera ari de Ekalesia sima ari de mi teora awa; edo gido Bishop mi tare.*

*Book einde, Bada da Turo indari kando ari, sisina embo atutumbedo baongo dadari edo kumbore tae (awa beiamana ko rare Keriso kumbari ain mi berari pievira awa sisimbere mi kaen ajigane tae edo kaen ategane tae, edo Doregari kotopu da embo ae dumbae eore) ko awa embo dareure kae, tamo dauwa edo ae dumbae eure. Awa tedo einda tera ko Ango Bread de Sakarament tamo mi kupora awa, ta Keriso da Pisi be ta Ororo de be Tamo mi ounda itevira awa, kaen tumondebain edo ae. Bread de Wine de Sakarament de tepo isira, awa baido eore kae (amo Baido ae dumbae ra, ko Christian berari mi beuto ore tae) Ari kaviegiari kaenato Keriso da Tamo be de Ororo be de amo Utu da isira, ta ko einda itae; ko Keriso da Tamo be nomi iai nei itae, edo gido iai dahaki da.*



## MAMAI DA BAPATAITO JIMBO,

DOREGARI DA JISI DA,

EKALESIA DA ETERA

*Embo kotembedo gido, Ekalesia jipapa edo gido mamai Sunday, ta iji kotopu nenei de bapataito etera, embo jiwae dada doregetera engo de; edo embo itera awa taro gara awamane bapataito eorare Keriso da Ekalesia da kundo gumbera; edo ango de Mamai bapataito eora awa jiwae mi gotora awa awamane God da jisi da Bapataito ika da teoro gotevira awa kotemborote. Awa tedo Ekalesia jipapa gido mamai ge tepo mi Bapataito ari jimbo etera. Edo gido jipapa etera, edo mamai iji eve da bapataito ore.*

*Kotembeu, mai jianda bapataito ain eira engo de Babadegari jianda tote edo ai da awa embo taro gaina, edo mai ai gido, Babadegari jianda da, ai tote.*

*Embo mamai bapataito orote jipapa edo gido turo teka ta sipo de sipo Tumondebain de gisi Priest ika de tore. Edo Ajigari da da gagane Sipo Tumondebain, ta Ajigari da da gagane Turo de ri Tumondebain, Priest mi jipapa evira ango, itae aina, edo iji da Babadegari mi mamai embo teoro gotevira awa, edo embo nenei mai de daedo Bapataito ari da purara. Edo Priest Bapataito ari da gundo (edo un awa beiamana vereugaina) edo petedo engo, tare;*

Mai emo dembae bapataito enu ta aeri?

*Engo tare, Ae; edo Priest engo tare.*

**E**MWOTORA, edo Ari kaviegari kaenato Keriso mi tesira, Embo God da Basileia da tonain ae, edo gido tenda wotaina, Un de ae Asisi Kotopu de mi; awa tedo, imonde-mané tena, edo God Mamo dao teu Bada kaenato Iesu Keriso awa embo, edo awa umo dave edo Mai (Gagara) eiwa piare, tepo mana kumaina awa, edo Un de ae Asisi Kotopu de mi bapataito are, edo Keriso da Ekalesia kotopu da torare, edo embo ika de daedo wasiri aina.

*Engo Priest engo tare.*

Kaen benunu tana.

**G**OD Goroba jiwae, Matawa isite, do.apota, edo Noah Gae teotopo de daedo ark da toregesita, edo ewa daro ae; edo iji nei de, teotopo ika Israel mai Ewa Ijimbari da kundo guputeta, edo amo ito Bapataito kotopu da iwata;

## BAPATAITO JIMBO, DOREGARI DA JISI DA

edo Mai ito imo dubo evira awa Iesu Keriso Un Jordan da bapataito ena edo ango un aoena, rorae beiae teiarate; Imo tedo gotera, edo nakare do ewasi, edo Mai (Gagara) eiwa jisi tu da edo, te ewasi, edo Asisi Kotopu mi dodegewasi, ainda iai duduno ito itae aina, edo Keriso da Ekalesia da be ark da dada doredarago are; edo emo kotembari mi goroba aina, edo sima ari mi dubo dave aina, edo umo beiamana mi matawa itaina, edo iai emo dubo beiae ari iwata darutegaina, edo amboda iai wasiri de da matawa itari gumaina, edo imo de daedo gisi jiaina, iji ika gombu de; Iesu Keriso Bada natokare awa embo. *Amen.*

**G**OD Goroba jiwae, wasiri de, Matawa isite, dubo beiae egeregari Tonembari, ito iai tumbari Toregari, edo embo kotembotora awa Kaviegari ika, edo bebetegari ika; Mai (Gagara) eiwa embo imo tedo gotera, edo emo ito Bapataito kotopu da pumango, rorae beiae ika udegaina, edo Asisi mi tenda wotaina. Udewasi, Bada, Mai ito iai dubo evira awa nakare teteto gero inge, tena, Tedo gido kumbuwo, kakoa edo tuvewo, geugeu dawo, itomane iai bedare; Nakare boroko tedo gera, piawasi; kakoa era, tuain tedo; geugeu dorera, natokare iai bedarate; edo Mai (Gagara) emone teiari ito utu de jiwae kotembedo, edo Basileia ito matawa itari da gumaina, imo nakare teteto gositera awa, Keriso Bada mi natokare. *Amen.*

*Erara Priest mi engo tare.*

Ge ewa tari giu, gere Mark Kotopu piena awa,

Chapter 10, verse 13.

**M**AMAI amibeda Keriso da iai kundo putera, tu jido garate; edo kundo isipera awa ambodani ika mi ge sitera. Edo Iesu ango de gido, duduno esisina, edo amindemane sisina, Mamai nato iai puraro, ge teove; awamane amone God da basileia. Ge be, imondemane tena, Embo God da basileia be mai siaka mi kumbarago ain ae, amo ounda do da tonain ae. Edo osinembedo, ipa jido gido, beiamana esisina.

*Ge ewa tari itae are, edo Kera ari mi dengoro baiari tupo eiwa ajigare, edo Ge ewa tari ge awa tare.*

**E**MWOTORA, Evanelia ainda Ari kaviegari kaenato Keriso da gere gotowa, edo mamai tesiri ainda iai



## BAPATAITO JIMBO, DOREGARI DA JISI DA

kundo punain eoro; ge sitera ba isimena; edo siri embo jiwae mi awamane amboda amboda ain. Kotembewo, edo amone ingo mi beiamana ari awamane da iai enu gera, ipa mi tanjido, ipa jido gido, awamane beiamana ena. Imomane adu eove ta, kotembeu, edo Mai (Gagara) eiwa anggo undare; ipa mi tanjido, edo kavigari matawa itari piedo, edo Basileia ika matawa itari da piari tonaina. Anggo edo kaen gotona awara Mamaka kaenato utu topo piedo, edo Basileia ika matawa itari da piari tonaina. Anggo edo kaen gotona awara Mamaka kaenato utu topo Mai (Gagara) ainda iai umo dave, ainda Mai Iesu Keriso ge tena awa; edo kotembotona jimbo kaenato beiamana ge tain ae, kaena boroko Mai (Gagara) eiwa Bapataito kotopu da betena, kaen ategedo engo tane,

**G**OD Goroba jiwae, Wasiri de Matawa, Mamo utu topo, imo ategetera, nakare kundo gumbeto tonembari ito geteite imo kotembedo era; Kotembari natokare eiwa ewasi bajina matawa. Asisi ito Kotopu Mai (Gagara) emi de piewasi, tenda wotaina, edo wasiri de matawa itaina; Iesu Keriso mi Bada natokare, aminde imo de ae Asisi Kotopu de daedo boroko matawa itewa awa edo matawa gisi jido ewa. *Amen.*

*Edo mai ainda Babadegari de Priest mi tare.*

**E**MBOMAI nato, Mai (Gagara) eiwa kundo pewa Bapataito embo, benunu teteu Bada kaenato Iesu Keriso ami udarate, edo rorae beiae ika udegarate, edo Asisi Kotopu mi beiamana edo, edo utu basileia piari, edo kavigari matawa itari. Edo imomane gotowa Bada kaenato Iesu Keriso ainda Ge ewa tari da tenu kaen gima edo benunu tede ewa awa berari imondemane piaina; awara ami awa beiamana aina. Awara ta Mai (Gagara) eiwa be itomane mi tari gaina, imomane awa konda edo, edo teu, (edo amo eimango bajido tekago tari gaina) amo diabololo da beiae jiwae de daedo beuto aina, edo God da Book kotopu kotemaina, edo ainda gere kere edo aina.

Awa tede imondemane tena,

**I**MO, Mai, (Gagara) eiwa da dao da, diabololo da beiae jiwae de daedo beuto asi ta? Imo iai da dariga ari de giro ari de, edo ae sini gambari topa de berari beuto asi

## BAPATAITO JIMBO, DOREGARI DA JISI DA

ta? Imo pisi ika da dubo beiae beuto asi ta? edo eimango amboda amboda ain aera, awamane mi imo kumain aera?

*Mina tari. Itae beuto eona.*

*Kera ari*

**I**MO God ge be eosi ta, Mamo, Goroba jiwae, utu de butu de Ariembo?

Edo Iesu Keriso ainda Mai dakaima, Bada kaenato? Edo Asisi Kotopu esiri watou jirido, Mary Kakara mi kumuna; mamato ena, Pontius Pilate gisi jina anggo de; Cross da dewo, betenu, goewo, Hades da wotena; edo iji tamonde de tenda erido, utu da visina; edo God Mamo Goroba jiwae da be da anumena isira; anggo de nasi gombu da wotedo wawasiri de bebetegari de kataina?

Edo Asisi Kotopu ge be eosi ta; Ekalesia kotopu Kato-liko; Embo kokotopu da Dadautari; rorae beiae kotembedo doari; pisi Erari; edo kavigari matawa itari betari amboda?

*Mina tari. Berari emo jiwae ge be eona.*

*Kera ari*

**G**E eiwa kotembedo bapataito jipapa asi ta?

*Mina tari. Awa jipapa ena.*

*Kera ari*

**A**WARA ta God da ge kokotopu goteite edo emo tembudo asi iji ika jiwae?

*Mina tari. Anggo ana.*

*Priest mi engo tare.*

**G**OD, Do kato, ewasi Mai (Gagara) eiwa Adam ika matu goedo, edo embo teka ainda do da jiar erare. *Amen.*

Ewasi dubo beiae ika jiwae bebegae do da betore, edo berari Asisi da mi kavigedo erore. *Amen.*

Ewasi edo awa goroba edo itoro beiamana are, edo diabololo de, iai de, pisi de itoro are. *Amen.*

Ewasi edo awamane nanekare eima ainda imo de piera utu jimbo ombore, edo piari ito matawa kumbore, imo do kato, imo Bada natokare God, imo wasiri de, matawa gisi jijiota awa. *Amen.*

## BAPATAITO JIMBO, DOREGARI DA JISI DA

**G**OD, imo Goroba jiwae, Wasiri de matawa, Mai ito Gimo dubo evira awa, Iesu Keriso, rorae beiae natokare kotembedo dowari embo, demo da un ae ororo de kepu ena; edo ambodani ika de tena ami baundo embo jiwae atopataro gorote, edo bapataito orote Mamo de Mai de Asisi Kotopu de da Dao da; Doregari einda ategari topa giwasi, imo ategetenane; Un eiwa ao ewasi edo rorae beiae te edo aungare, ewasi Mai (Gagara) eiwa boroko einda bapataito aina awa tonembari ito dave edo kumbare, edo mai atoto ito kera ema edo avigema da doregari da matawa itare; Iesu Keriso Bada natokare awa embo. *Amen.*

*Priest Mai osinembedo, Babadegari de engo tare,*

Mai (Gagara) eiwa Nombo teu.

*Edo awa amboda dao tare, edo Babadegari mi taro Mai goroba eira, Un da be pasido tare.*

**E**I . . . imo bapataito ena, Mamo de Mai de Asisi Koto-  
Epu de da Dao da. *Amen.*

*Ango ae rata Mai burau teoro; tepo Un kopuru da dodegedo, ge matu tarate,*

**E**I . . . imo bapataito ena, Mamo de Mai de Asisi Koto-  
Epu de da Dao da. *Amen.*

*Priest mi taina.*

**M**AI (Gagara) eiwa kupena Keriso da udari vetari mdoregari topa da, edo ainda\* Cross iwata ena, awara ta eimango adu ain ae edo Keriso Cross da dewa ge taina sinasina, *\* Einda Priest Cross Mai da beo da iwata aina.* edo doregari ika da itoro aina, itoro ika rorae beiae, iai ae diabololo de, edo iji ika jiwae Keriso da itoro ari ae kera ari de matawa itaina. *Amen.*

*Edo Priest mi engo tare.*

**E**MBOMAI nato, Mai (Gagara) eiwa boroko tenda Ewotesira, edo Keriso da Ekalesia da da doregari da piesiri torira, God Goroba jiwae kaen ategane, edo kaen benunu inono de tano amo engo matawa itaina.

*Jiwae mi baongo dadari edo tore;*

**M**AKA natokare, Utu da isima eta awa, Dao ito koto-  
pu etera. Basileia ito puresira. Jipapa ito etera

## BAPATAITO JIMBO, DOREGARI DA JISI DA

awa butu de utu de ango. Boroko edo iji da doae, rorae natokare piedo ewasi. Edo buria natokare kotembedo dowasi, Ango nakare embo nenei da buria natokare iai kotembedo doturora. Edo bawari da nakare kundo aimbote; Ko beiae da nakare toregewasi. *Amen.*

*Edo Priest mi engo tare.*

**M**AMO do kato, imo ategetera, Mai (Gagara) eiwa Masisi Kotopu ito mi tenda wotesira, awa mai udari eteta, edo Ekalesia kotopu ika da dada eteta. Edo tepo ategeteinano gido ewasi, awa rorae beiae mi betena, edo rorae beiamana mi kaviyena, edo Keriso de daedo goewa betari de, Adam matu cross da dore, edo rorae beiae jiwae dowari be doware; edo amo Mai ito de daedo betena betesira, ango edo eimango enina awa daedo enaina; ango edo gombu da Ekalesia ito da embo nenei itera ami de daedo, basileia ito matawa itari baiu kumaina; Keriso Bada mi natokare. *Amen.*

*Jiwae mi eraro, Kera ari mi Babadegari de engo taina.*

**M**AI (Gagara) eiwawa imomane ainda Babadegari ge Mitomane mi tesiri gira gido diabololo ae rorae beiae de beuto are, edo God kotembare, edo ainda iai singa are, kotembewo Mai (Gagara) bajido, jimbo itomane da ami kotembedo einda ge itomane mi tari gari kotopu esira. Edo eiwa be kotembesira, awa dao tawo Baiari gesira; awara ta Bada da Pari, ae Ge ro de, ainda ge mi, edo jimbo nenei jiwae Christian mi kotembaro asisi kaviyena atopasiu; edo buro eu, Mai (Gagara) eiwa rorae dave de Christian da jimbo de matawa edo are; edo matawa kotembedo eu Bapataito iwata kaenato; edo Bada kaenato Ari kaviyari Keriso kaen amboda amboda etena, awa ba betedo enina kaena embo; edo kaena bapataito eonane rorae beiae mi kaen betetena, edo rorae dave da kaen eretena, edo dubo kaenato bebegae jiwae kaen dano betore, edo iji berari rorae kaenato dave ore.

*Edo dada edo tare;*

**K**OTEMBEU Mai (Gagara) eiwa Bishop da iai kundo Kpurare goroba edo are, edo be de temo gido ainda ge mi Ajijigari ajijigedo are, Bada da Pari de, ae God da Ge ro de, edo Ekalesia da kiki nei pipisitera awa kotemain sima kotembare.

## MAMAI DA ONJIGA BAPATAITO ARI MANDO DA

*Kera ari mi berari embo iji jiwae taro gorote, ainda mamai bapataito orote Sunday da ta Sunday da da gagane, kumbari amboda, ta iji Kotopu toropu da, edo gido ge tari bajina Kera ari mi gotevira awa, itare.*

*Edo taro gorote, mamai mando da bapataito eore kae, edo gido jimbo bajina itare. Ango ae ra ta jipapa orote, engo de orote.*

*Gisi, Kera ari embomai ae da de God benunu tore, edo Bada da Pari torote, edo pari nenei, Bapataito ari da pietera awa, Edo embo da mi isima eira awa mai dao tare, edo Kera ari ainda tamo da un dodegaina edo ge eiwa tare,*

**E**I . . . imo bapataito ena, Mamo de Mai de Asisi Koto-  
Epu de da Dao da. Amen.

*Baongo dadari aro, Kera ari mi God ategedo tare,*

**M**AMO do kato, imo ategetera, Mai (Gagara) eiwa  
Asisi Kotopu ito mi tenda wotesira, awa mai udari  
eteta edo Ekalesia kotopu ika da dada eteta. Edo tepo  
ategeteinano gido amo Mai ito de daedo betena awa  
betesira, angoo edo eimango enina awa daedo enaina; angoo  
de gombu da Kokotopu ito de daedo, basileia ito matawa  
itari baiaw kumaina; Iesu Keriso mi Bada natokare.  
*Amen.*

*Edo be gorote, mai awa angoo bapataito ari, be bapataito eiri, edo tekago bapataito eure kae. Edo gido Mai engoo, bapataito eite, amboda Ekalesia da kumbaro torari, edo jisi mai da Bapataito be gorote; Edo Kera ari mi engoo tare.*

**I**MOMANE teno gotewa, Ekalesia da jimbo angoo, iji  
(engoo de) edo iai (engoo de) mai eiwa bapataito  
esitena.

*Kera ari nei mai bapataito arate, angoo de Nasi da Kera ari ge kaitaina, mai be bapataito eteri ta rori. Mai Ekalesia da kundo gumbera awa taro gore, mai matu bapataito eiri, edo Kera ari tekago ge kaitaina, engoo de.*

**M**AI eiwa ai mi bapataito esisini?  
Embo ave da jisi da, mai eiwa bapataito esisini?  
Mai eiwa rora mi Bapataito esisini?  
Ge ro teoro mai eiwa bapataito esisini?

## ONJIGA BAPATAITO ARI MANDO DA

*Kera ari mina teoro gido awara esitera; angoo de Mai tekago bapataito ain ae, rata Christian da jisi da kumaina engoo de,*

**I**MOMANE teno gotewa, awara esitera, mai eiwa da  
Bapataito da ge; amo beiae da wowotevira, edo God da  
duduno da, boroko tenda wotedo Bapataito da God da  
mamai da jisi da kumbira, kavigari da baiaw kumbari  
embo; Bada kaenato Iesu Keriso ainda do ari mamai engoo  
da iai ge tae, rata dubo budo ainda iai dao tevira, Ge ewa  
tari kotopu dubo kaenato damo edo evira engoo de.

*Mark K. 10. 13*

**M**AMAI amibeda Keriso da iai kundo putera, tu jido  
Marate; edo kundo isipera awa ambodani ika mi ge  
sitera. Edo Iesu angoo de gido, duduno esisina, edo  
amindemane sisina, Mamai nato iai puraro, ge teove;  
awamane amone God da basileia. Ge be, imondemane  
tena, Embo God da basileia be mai siaka mi kumbarago  
ain ae, amo ounda do da tonain ae. Edo osinembedo,  
ipa jido gido beiamana esisina.

*Ge ewa tari itae ajigaro, Kera ari mi ge borere engoo tare.*

**E**MBOMAI nato, Ge ewa tari ainda Ari kavigari  
Ekaenato Keriso da gere gotowa, edo mamai tesiri  
ainda iai kundo punain eoro; ge sitera ba isimena; edo  
siri embo jiwae mi awamane amboda amboda ain. Ko-  
tembewo, edo amone ingoo mi beiamana ari awamane da  
iai enu giwa; ipa mi tanjido, ipa jido gido, awamane  
beiamana ena. Imomane adu eove ta, kotembeu, edo  
mai eiwa angoo ujisina; ipa mi tanjido, edo (ainda Ge  
kotopu da tevira angoo), kavigari matawa itari piedo, edo  
basileia ika matawa itari da piari tonaina. Angoo edo kaen  
gotona awara Mamaka kaenato utu topo mai ainda iai  
umo dave, ainda Mai Iesu Keriso ge tena awa, kaen ategedo  
Pari Bada akuta kaenamonde atopapotevira awa  
tane:

**M**AKA natokare, Utu da isima eta awa, Dao ito koto-  
Epu etera. Basileia ito puresira. Jipapa ito etera  
awa butu de utu de angoo. Boroko edo iji da doae, rorae  
natokare piedo ewasi. Edo buria natokare kotembedo  
dowasi, angoo nakare embo nenei da buria natokare iai

## ONJIGA BAPATAITO ARI MANDO DA

kotembedo doturora. Edo bawari da nakare kundo aimbote; Ko beiae da nakare toregewasi. Amen.

**G**OD, Goroba jiwae, Wasiri de matawa, Mamo utu topo, imo ategetera, nakare kundo gumbeto tonembari ito goteite imo kotembedo era; Kotembari natokare eiwa ewasi bajina matawa. Asisi ito Kotopu mai emi de piwasi, tenda wowotevira awa, edo wasiri matawa itari da baiaw kumbari, edo singa ito matawa sima arate, edo teteto gotora awa kumaina, Iesu Keriso mi Bada natokare, aminde imo de ae Asisi Kotopu de daedo boroko matawa itewa awa matawa gisi jido ewa. Amen.

*Edo Priest mi Mai da Dao tede gare, edo Babadegari taro, Kera ari mi ainde tare.*

**I**MO, Mai ainda dao da, diabololo da rorae beiae jiwae de idaedo beuto asi ta? Imo iai da dariga ari de giro ari de, edo ae sini gambari topa de berari beuto asi ta? Imo pisi ika da dubo beiae beuto asi ta, edo eimango amboda amboda ain aera, awamane mi imo kumain aera?

*Mina tari. Itae beuto eona.*

*Kera ari*

**I**MO God ge be eosi ta, Mamo, Goroba jiwae, utu de butu de Ariembo?

Edo Iesu Keriso ainda Mai dakaima, Bada kaenato? Asisi Kotopu esiri watou jirido, Mary Kakara mi kumuna; mamato ena, Pontius Pilate gisi jina ango de; Cross da dewo, betenu, goewo, Hades da wotena; edo iji tamonde de tenda erido, utu da visina; edo God Mamo Goroba jiwae da be da anumena isira; ango de nasi gombu da wotedo wawasiri de bebetegari de kataina?

Edo Asisi Kotopu ge be eosi ta; Ekalesia kotopu Katoliko; Embo kokotopu da Dadautari; rorae beiae Kotembedo dowari; pisi Erari; edo kavigegari matawa itari betari amboda?

*Mina tari. Berari emo jiwae ge be eona.*

*Kera ari*

**A**WARA ta God da ge kokotopu goteite, edo emo atembudo asi iji ika jiwae?

*Mina tari. Awara.*

## ONJIGA BAPATAITO ARI MANDO DA

*Priest mi tare,*

**M**AI (Gagara) eiwa kupena Keriso da udari vetari doregari topa da, edo ainda\* Cross iwata ena, awara ta eimango adu ain ae edo Keriso cross da dewa ainda ge taina sinasina, edo doregari ika da itoro aina, itoro ika rorae beiae, iai, ae diabololo de, edo iji ika jiwae Keriso da itoro ari ae kera ari de matawa itaina. Amen.

*\* Einda Priest Cross Mai da beo da iwata aina.*

*Priest mi tare,*

**E**MBOMAI nato, Mai (Gagara) eiwa tenda wowosisina, edo Keriso da Ekalesia da da doregari da piesiri torira, God, Goroba jiwae kaen ategane, edo kaen benunu inono de tano amo engo matawa itaina.

*Priest mi tare,*

**I**MO ategetera, Mamo do kato, Mai (Gagara) eiwa Asisi Kotopu ito mi tenda wotesira, awa mai udari eteta, edo Ekalesia Kotopu ika da dada etera. Edo tepo ategeteinano gido ewasi, awa rorae beiae mi betena, edo rorae beiamana mi kavigegana, edo Keriso de daedo goewa betari de, Adam matu cross da dore, edo rorae beiae jiwae dowari be doware, edo ami Mai ito de daedo betena awa betesira, edo ango eimango enina awa daedo enaina; ango edo gombu da Ekalesia ito da embo nenei itera ami de daedo, basileia ito matawa itari baiaw kumaina; Iesu Keriso mi Bada natokare. Amen.

*Jiwae mi eraro, Kera ari mi Babadegari de engo taina.*

**M**AI (Gagara) eiwawa imomane ainda Babadegari ge itomane mi tesira gira gido Diabololo ae rorae beiae de beuto are, edo God kotembare, edo ainda iai singa are, kotembewo Mai (Gagara) bajido, jimbo itomane da ami kotembedo ge itomane mi tari gari kotopu esira. Edo eiwa be kotembesira, awa dao tawo Baiari gesira, awara ta Bada da Pari, ae Ge io de, ainda ge mi, edo jimbo nenei jiwae Christian mi kotembaro asisi kavigegara atopasiu; edo buro eu, Mai (Gagara) eiwa rorae dave de Christian da jimbo de matawa edo are; edo matawa kotembedo eu Bapataito iwata kaenato; edo Bada kaenato Ari kavigegari Keriso kaen amboda etena, awa ba betedo enina kaena

## ONJIGA BAPATAITO ARI MANDO DA

embo, edo kaena bapataito eonane rorae beiae mi kaen betetena, edo rorae dave da kaen eretena, edo dubo kaenato bebegae jiwae kaen dano betore, edo iji berari rorae kaenato dave ore.

*Ango ae rata mai Ekalesia da kundo gupora awa Priest ge kateiri mina beimana tae, edo mai bapataito eri ta, Un mi, edo Mamo de Mai de Asisi Kotopu de da Dao da, gae evira; anga de Priest mi Mamai da Bapataito Doregari da jisi da jimbo arate, edo gido mai un da piari da ge eiwa tare.*

**I**MO bapataito ae ra ta, Ei . . . imo bapataito ena, Mamo de Mai de Asisi Kotopu de da Dao da. Amen.

## BAPATAITO IKA DA JIMBO

### EMBO BABUDORA AINDA EDO AWAMANE DA GE IKA MI TEORO GOTOR AWA

*Embo babudora awa anga de bapataito jipapa eora awa, mamo de ai de ta embo nenei dubo embodo mi Bishop ta embo Bishop mi tevira ami tore 7 ta iji nenei gisiri; edo embomai tedo gare Kiki Christian jiwae kotembotori ta kotembaeri; edo tari Pari mi rorae dowari mi akuta beiamana orote Sakarament Kotopu eiwa kumain tedo.*

*Engo de beiamana be beiamana ara, (embo Sunday ta Iji Kotopu de teora awa doregaro), edo Ajigari da da gagane sipo de Tumondebain ta Turo Tumondebain de Priest jipapa evira anga itae are, edo Babadegari ainde daedo bapataito ari da purara.*

*Edo Priest ounda petedo taina engo, embo emo matu bapataito enu ta aeri; Mina tesira, Ae; Priest mi engo tare.*

**E**MBOMAI nato, embo jiwae rorae beiae de watou Ejirido wowotora, (edo pisi de wowotevira amomo pisi) edo pisi mi embo God dubo beiamana ain ae, edo beiae da itora, edo rorae ika jiwae beiae, anga Ari kaviegari kaenato Keriso tena, Embo God da basileia da tonain ae, edo gido tenda wotara un de ae Asisi Kotopu de mi; awa tedo imomane tena, edo God Mamo dao tewo, Bada kaenato Iesu Keriso embo, edo amo umo dave jido *embomai* einde piare, tepo mana kumbara awa; edo un de ae Asisi Kotopu de mi bapataito ore, edo Keriso da Ekalesia Kotopu da torore edo embomai ika de daedo wasiri ore.

*Edo Priest mi engo tare,*

*Kaen benunu tana.*

*(Edo Doregari ba ami baongo dadari ore.)*

**G**OD, Goroba jiwae, Matawa isite, Do apota, edo Noah Gae teotopo de daedo ark da toregesita, edo ewa daro ae; edo iji nei de teotopo ika Israel mai Ewa Ijimbari da kundo guputetea, edo amo ito Bapataito Kotopu da iwata; edo Mai ito imo dubo evira, Iesu Keriso Un Jordan da bapataito ena, edo anga un ao ena, rorae beiae teiarate;

Imo tedo gotera, edo nakare do ewasi, edo *singabanga* eiwa jisi tu da edo; te ewasi, edo Asisi Kotopu mi aoewasi; ainda iai duduno ito itae aina, edo Keriso da Ekalesia da be ark da dada doregarago *ore*; edo emo kotembari mi goroba *ore*, edo sima ari mi dubo dave *ore*, edo umo beiamana mi matawa *itara*, edo iai emo dubo beiae ari iawata *darutegara*, edo amboda iai wasiri de da matawa itari *gumbara*, edo imo de daedo gisi *jiara*, iji ika gombu de; Iesu Keriso Bada natokare awa embo. *Amen.*

**G**OD, Goroba jiwae, Wasiri de, Matawa isite, dubo beiae egeregari tonembari, ito iai tumbari toregari, edo embo kotembatora awa Ari kavigari ika, edo bebetegari erari ika; *embomai* eiwa embo imo tedo gotera, edo emo ito Bapataito kotopu da pumango, rorae beiae ika udegaina, edo Asisi mi tenda *wotara*. Udewasi Bada, Mai ito iai dubo evira awa teteto gero inge, tena, Tedo gido kumbuwo, kakoa edo tuvewo, geugeu dewo, itomane iai bedare; Nakare boroko tedo gera, piewasi; kakoa edo tuain tedo; geugeu dorera, natokare iai bedare; edo *embomai* emone teiari ito utu de jiwae kotembedo, edo basileia ito matawa itari da *gumbara*, imo nakare teteto gositera awa, Keriso Bada mi natokare. *Amen.*

*Embo eraro, Priest mi tare.*

Ge ewa tari giwo John Kotopu mi gaena awa,

Chapter 3, verse 1.

**E**MBO Pharisee isinesina, ainda dao Nicodemus, Judaea embo da badari: ami Iesu da iai munia de gundo, ainde sisina, Rabbi, nakare gotora imo God mi atopatari; iwata ine esiteta amo embo ae, edo gido God ainde daedo itesira. Iesu mi mina sisina, Ge be, Ge be, imo de tena, embo tenda wotain aere, edo God da basileia mana gaina. Nicodemus ainde tesira, Rora embo tenda wotari? Ai da sini da iji tote torido wotarate? Iesu mi mina sisina, Ge be, ge be, imo de tena, embo un de ae Asisi de wotain aere, edo God da basileia da tonain ae. Pisi de wowotora amo amo pisi; edo Asisi de wowotora amo amo asisi. Imo de tena kombo eote, tenda wotemo. Bisi avigedo isipevira, edo iavi gotowo, edo inda ango

gupeiri o inda ango baunteiri, gaegae ewa. Ango embo jiwae Asisi de wowotora.

*Amboda ge tari gari eiwa ajigana.*

**E**MBOMAI nato, ainda Ari kavigari kaenato Keriso ge be gido ewa, goteiwowo ami tedo eira embo un de ae Asisi de wotain aere, amo God da basileia da mana tonaina. Awara ta nongain Sakament eiwa doveviko. Ango edo iji nei de awa utu da vitesirare (emo Mark Kotopu da Evanelia da, Chapter 16, kaen ajijigotona) ambodani ika de site tena, iai berari da baundo, Evanelia tawo gore jiwae mi eora ainda. Embo kotembedo bapataito eora awa, kavigara; edo embo kotembae eora awa bekumba ara. Edo jimbo beiamana eiwa esira awa atopotevira. Edo eiwa tedo Peter Kotopu Aposetolo, gisi Evanelia tenu giwa edo embo jiwae dubo beiae enu, edo ainde ae Aposetolo nenei de tenu, Embomai natokare, nongo ari? mina tena, Dubo mi kotembedo bapataito ewavi edo rorae beiae itomane doware, edo Asisi Kotopu kumbave. Imomane tesiri gotewa, ae mamai itomane de, ae jiwae aike da Bada God kaenato ainda iai dao taina. Edo ge nenei jiwae site tena. Umo ogegogigego ari ainda iai akuta toregewo. Edo (iji nei de Aposetolo dada ami kaena engo teuri gido esitena), Bapataito boroko kaena euri kavigotona, (pisi dono teiari ae ra ta mina beiamana tari God da jisi da) Iesu Keriso da erari awa embo. Nongain dubo idatedawate edo, kundo jigamo euko, edo Bada kaenato *embomai* eiwa anaina, ami dubo jiwae kotembatora awa, edo ainda iai kotembari mi *gupora* awa, rorae beiae ika udegaina, edo Asisi Kotopu piedo, kavigari matawa itari beiamana piedo ari, edo ainda basileia matawa itari da *torara*.

Awara ta kaen gotona awa Mamaka kaenato utu topo *awamane* da iai umo dave, Mai Iesu Keriso tena awa, kaena ategedo tane,

**G**OD, Goroba jiwae, Wasiri de matawa, Mamo utu topo, imo ategetera, nakare kundo gumbeto tonembari ito goteite imo kotembedo era; Kotembari natokare eiwa ewasi bajina matawa; Asisi ito Kotopu *embomai* einde piewasi, tenda *wotore*, edo wasiri matawa *ore*, Iesu mi



## BAPATAITO IKA DA JIMBO

Keriso Bada natokare, ami de imonde ae, Asisi Kotopu de daedo boroko matawa itewa awa edo matawa gisi jido ewa. *Amen.*

*Edo Priest embo Bapataito orote engo tare.*

**EMBOMAI** nato, bapataito embo *pewa* ami doregari benunu tero *gewa* awa, Bada kaenato Iesu Keriso mi *imomane* udari vetari, edo beiamana aina, edo rorae beiae *itomane* udugedo, utu basileia piaina, ae kavigari matawa itari de. Edo *gewa*, Bada kaenato Iesu Keriso da Ge kotopu da tenu kaen gima kaen benunu tedo ena awa berari piaina; ami edo netegaina. Awa tedo, *imomane* be *tewo*, embomai emo badari *itomane* da jisi da, edo doregari berari ainda jisi da, edo *imomane* diabololo da rorae beiae jiwae de daedo dotureite, edo God da Ge kotopu kundo jigamo eite, ainda ge gido emo.

*Edo Priest embomai de engo datara aina.*

*Tedo gari*

**IMO** diabololo da rorae beiae jiwae de daedo beuto asi ta? Imo iai da dariga ari de giro ari de, edo ae sini gambari topa de berari beuto asi ta? Imo pisi ika da dubo beiae beuto asi ta, edo eimango amboda amboda ain aere, awamane mi imo kumain aera?

*Mina tari.* Itae, beuto eona.

*Tedo gari*

**IMO** God ge be eosi ta, Mamo Goroba jiwae, utu de butu de Ariembo?

Edo Iesu Keriso ainda Mai dakaima, Bada kaenato? Edo Asisi Kotopu esiri watou jirido, Mary Kakara mi kumuna; mamato ena, Pontius Pilate gisi jina ango de; Cross da dewo, betenu, goewo; Hades da wotena; edo iji tamonde de tenda erido, utu da visina, edo God, Mamo, Goroba jiwae da be da anumena isira; ango de nasi gombu da wotedo wawasiri de bebetegari de kataina?

Edo Asisi Kotopu ge be eosi ta; Ekalesia kotopu Katoliko; Edo kokotopu da dadautari; rorae beiae Ruvegari; pisi Erari; edo Kavigari matawa itari betari amboda?

*Mina tari.* Emo jiwae ge be eona.

## BAPATAITO IKA DA JIMBO

*Tedo gari*

**GE** eiwa ge be edo bapataito jipapa asi ta? *Mina tari.* Awa jipapa ena.

*Tedo gari*

**AWARA** ta God da ge kokotopu edo emo tembudo asi iji ika jiwae?

*Mina tari.* Edo gano, God mi tonemaina.

*Priest mi engo tare,*

**GOD**, Do kato, ewasi a *embomai* ainda Adam ika matu goedo, edo embo teka ainda do da jiari erare. *Amen.*

Ewasi dubo beiae ika jiwae bebegae do da betore, edo berari Asisi da mi kavigedo erore. *Amen.*

Ewasi edo *awamane* goroba edo itoro beiamana ore, edo diabololo de, iai de, pisi de itoro ore. *Amen.*

Ewasi edo *awamane* nanekare eima ainda imo de piera utu jimbo ombore, edo piari ito matawa kumbore, Imo do kato, **IMO** Bada natokare God, Imo wasiri de, matawa gisi jijiota awa. *Amen.*

**GOD**, imo Goroba jiwae, Wasiri de matawa, mai ito Gimo dubo evira awa, Iesu Keriso, rorae beiae natokare kotembedo dowari embo, demo da un ae ororo de kepu ena; edo ambodani ika de tena ami baundo embo jiwae ato pataro gorote, edo bapataito orote Mamo de Mai de Asisi kotopu de da Dao da; Doregari ainda ategari topa giwasi, imo ategetenane; Ung eiwa aoewasi edo rorae beiae te edo aungare; ewasi edo *embomai* eiwa boroko ainda bapataito ara awa tonembari ito dave edo *kumbore* edo mai atoto ito kera ema edo avigema da doregari da matawa itore; Iesu Keriso Bada natokare awa embo. *Amen.*

*Priest embo bapataito are da be dajido, Bapataito ari aikae piaina, edo Babadegari ainda Nombo tedo gare; edo un da be pataina, ango ae ra ta da dodaina, tare.*

**EI** . . . imo bapataito ena, Mamo de Mai de Asisi Kotopu de da Dao da. *Amen.*

## BAPATAITO IKA DA JIMBO

*Priest mi taina,*

**E**MBO eiwa kupena Keriso da udari vetari doregari  
topa da; edo ainda \* Cross iwata ena, awara ta ei-  
mango adu ain ae edo Keriso  
Cross da dewa ainda ge taina \* *Einda Priest Cross embo  
da beo da iwata aina.*  
sinasina, edo doregari ika da itoro  
aina, itoro ika rorae beiae, iai, ae diabololo de, edo iji ika  
jiwae Keriso da itoro ari ae kera ari de matawa itaina.  
Amen.

*Edo Priest mi engo tare,*

**E**MBOMAI nato, *embomai* eiwa tenda *wotetera*,  
Edo Keriso da Ekalesia da doregari da piesiri *torera*,  
God, Goroba jiwae kaen ategane, edo kaen benunu inono  
de tano ami engo matawa itara.

*Jiwae mi baongo dadari edo, Bada da Pari tore.*

**M**AKA natokare, Utu da isima eta awa, Dao ito kotopu  
Metera, Basileia ito puresira, Jipapa ito etera awa butu  
de utu de ango. Boroko edo iji da doae rorae natokare  
piedo ewasi. Edo buria natokare kotembedo dowasi;  
Ango nakare embo nenei da buria natokare iai kotembedo  
doturora. Edo bawari da nakare kundo aimbote; Ko  
beiae da nakare toregewasi. Amen.

**I**MO ategetera, Maka utu topo, nakare kundo gumbeto  
Itonembari ito goteite edo imo kotembedo era; Kotemba-  
ri natokare eiwa ewasi bajina matawa; Asisi ito Kotopu  
*embomai* einde piewasi; edo engo tenda *wotera*, edo kavi-  
gari matawa itari ainda, Bada natokare Iesu mi Keriso,  
ewasi *singabanga* ito matawa itore, edo teoto gotora awa  
*kumbore*; Bada mi da dawa Iesu mi Keriso Mai ito, ainde  
imo de ae Asisi Kotopu de boroko matawa isite gisi  
matawa jijiewa awa. Amen.

*Jiwae mi eraro, Priest mi ge engo taina; edo Babadegari de gisi engo  
tare.*

**E**MBOMAI eiwa itomane jisi da tedo gera, edo diabololo  
da rorae beiae jiwae de daedo dodo, edo God  
kotembedo, ainda iai kera edo *ara*; Imomane kotembeu,  
jimbo ikamane eiwa tedo kotebewavi *eiwamane* mi be  
tedo gotora awa, doregari einda jisi da, edo imomane  
ainda Badari avigari jisi itomane da. Edo inemane

## BAPATAITO IKA DA JIMBO

tembari mi badore, edo Bada kaenato Iesu Keriso kote-  
main sima *kotembore*, edo iai einda ro itarago *eiaro*, rorae  
ika dave are.

*Edo bapataito orote ainde engo taina,*

**E**DO *imomane*, boroko engo de bapataito *ewa*, edo  
Keriso *opewa* awa, jimbo *itomane*, *imomane*, God da  
*mamai*, parara da, *mamai*, Iesu Keriso kotembari mi  
Christian ango tembudo eu, be parara da *mamai* arago;  
kotembeu, edo Bapataito iwata kaenato; edo Ari kavi-  
gari kaenato Keriso kaen amboda amboda etena edo awa  
kaen ango etena; awa betedo, enina kaena embo; edo  
kaena bapataito eonane, rorae bebegae da kaen betedo, ko  
rorae dave da kaen cretena; edo dubo beiae ari kaenato  
kaen dano betesirare, edo ango berari rorae kaenato dave  
esira.

*Embo jiwae bajido bapataito eora amo, iji ika indewae Bishop mi  
goroba edo aina; edo Dada utari Kotopu de atutumbedo ara.*

*Embo awamane mai siaka bapataito ae, edo badari, embo Badari ika  
mi kundo gumbero Bapataito embo edo dubo ika mi kotembedo awamane  
da ge mi taegae ra ta; Priest mi Mamai da Bapataito ika Doregari Jisi  
da Jimbo ika, ta (kamba be eterare), Bapataito mando da ari da Jimbo  
ajijigesira; (mai) ae tesira, edo gido (embo).*

## ATOPATARI

EMBO JIWAE MI KOTEMBETERA EDO  
AMBODA BISHOP DA IAI DA KUNDO  
GUMBARO GOROBA ARI EMBO

*Tedo gari*

**D**AO ito averi?

*Mina tari* Ei . . . ta Ei . . .

*Tedo gari.* Ai mi imo dao emo pisini?

*Mina tari.* Babadegari nato mi, na bapataito esitena ango de, ango de Keriso de daedo patu esitena, God da mai esitena, edo utu da Basileia baiau kumbari esitena.

*Tedo gari.* Iji ango de Badari ito mi imo embo ro esiteri?

*Mina tari.* Tamonde na embo tetero gositera. Da diabololo da rorae beiae jiwae de daedo beuto anate, iai ainda beiae ipu itari de, giro ari ika de, ae pisi kaenato da dubo bebegae jiwae de; Totere, Christian da Kiki da gano berari kotemanate; Edo tamondere, God da Ge kotopu kera eite, da ango iji nato jiwae tembudo anate.

*Tedo gari.* Berari imo embo tetero gositera awa, jimbo ito ango atate kotembedo etesi ta ain aeri?

*Mina tari.* Awara, edo God mi kondade ari ango ana. Edo Mamaka kaenato utu topo jiwae ategedo ena, ami na iai ainda kaviegari da kundo gupusina, Iesu Keriso mi Ari kaviegari kaenato. Edo God benunu tena ainda tonembari ika namonde piarate, dawa da itanate iji nato berari.

*Atopatari.*

Kiki ito da Gano ajijige.

*Mina tari.*

**N**A GOD ge be eona, Mamo, Goroba jiwae, Utu de butu de Ariembo.

## ATOPATARI

Edo Iesu Keriso ainda Mai dakaima, Bada kaenato; Asisi Kotopu esiri watou jirido, Mary Kakara mi kumuna, Mamato ena, Pontius Pilate gisi jina ango de, Cross da dewo, betenu, goewo, Hades da wotena; Iji tamonde betari de tenda erido, utu da visina, edo God Mamo, Goroba jiwae da be da anumena isira; Ango de wotedo wasiri de bebetegari de kataina.

Asisi Kotopu ge be eona, Ekalesia Kotopu Katoliko; Embo Kokotopu da Dadautari; Rorae beiae Kotembedo dowari; Tamo Erari; Edo Kaviegari matawa itari. Amen.

*Tedo gari.* Kiki ito da Gano emo imo ro atopapoteviri?

*Mina tari.* Dakaki na atopapotevira, edo God Mamo ge be eona, na ena awa, ae butu berari de.

Da da gagane, God Mai ge be eona, na toregeesisina, ae embo berari de.

Tote da gagane, God Asisi Kotopu ge be eona, na beiamana evira, ae embo berari God mi sirigetevira awa.

*Tedo gari*

Matu teteta, Babadegari ito mi imo embo tetero gositera, imo God da Ge kero atate. Awamane nandogori? tato gana.

*Mina tari.* Ipa tote.

*Tedo gari.* Indawara?

*Mina tari.*

**A**WAMANE God mi tena awa Exodus da Chapter 20, Atena, Na Bada God ito, nasi Egypt da ango kundo wotema, bundari oro da ango.

1. God nenei nato do da dowasi.

2. Ove kewote dowasi, Ko asisi be utu da ikane isira awa, ta butu da kambeda, ta ewa da butu du da. Tumondebain eote dowasi, awamane kena singa eote dowasi; Na Bada God ito God gegata eona, edo mamono da rorae beiae mamai da iai rorou kupona, umo tamonde ta umo ingo ao pasido da namonde ge jindora, edo embo tausana

## ATOPATARI

jiwae do edo ena, awamane mi na jipapa eite, ge nato gido era.

3. Bada God ito da Dao tedo jirote dowasi; Bada beiamana kotemain ae embo ainda Dao tedo jijireira.

4. Sabate kotembedo kotopu ewasi. Iji ipa nei da gisi de buro edo, berari eteta awa ewasi; iji ipa nei da toro de, amo Bada God ito da Sabate. Ainda buro ro esiko dowasi, imo ta mai ito jianda, ta mai ito ai, ta singa ito jianda, ta singa ito ai, ta sinopu ito, ta embo nei ito manguro be do da isira awari. Iji ipa nei da gisi, amone, Bada utu de butu de ena, ewa, ae jiwae do da itora ainde; iji ipa nei da toro de dango tununa; awa tedo Bada Sabata beiamana edo, kotopu ena.

5. Mamo ae ai de kotopu ewasi; edo iji ito ribori arate iai ito da Bada God ito mi pipitevira awa.

6. Ango ato betore dowasi.

7. Nembu nei da aro ta, nembu nei da iu vidote dowasi.

8. Beona eote dowasi.

9. Nembu ito ge butote dowasi.

10. Nembu ito da mando jipapa eote dowasi; nembu ito da aro, ta singa ika jianda, ta singa ika ai, ta ox ika, ta ass ika, ta ikaito rora mi jipapa eote dowasi.

### *Tedo gari*

God da Ge eiwa ro teuri gotosi?

*Mina tari.* Tote teuri gotona; jimbo nato God da iai, edo jimbo nato Nembu nato da iai.

*Tedo gari.* Jimbo ito God da iai rori?

*Mina tari.* Jimbo nato God da iai, awa ge be ana, adu ana, edo awa dubo bana, do nato berari mi, dubo nato berari mi, asisi nato berari mi, goroba nato berari mi; ainda iai benunu tedo ana, ategedo ana, matawa sima edo ana, dao tedo ana, edo ainda Dao kotopu edo, Gere kotopu edo ana, edo ainda iai be kera edo ana, iji nato jiwae.

*Tedo gari.* Jimbo ito Nembu ito da iai rori?

*Mina tari.* Jimbo nato Nembu nato da iai, awa dubo

## ATOPATARI

bana na ango, edo jimbo embo nenei nato iai orote jipapa ena, ango awamane da iai ana. Maka de aiiaka de awa dubo budo, kotopu edo, tonemana. Queen kotopu edo, ge da gido ana, edo embo jiwae ainda amboda gisi jido era; Governors nato, atopatari, edo babadegari Ekalesia da ge da gido ana: Embo badari nato jiwae da iai atoto ana, Kotopu ana: Avera mi ge nato mi ta jimbo nato mi mana usimbese ana: Jimbo nato jiwae awara dambudarari aina: Dubo nato da avera mi ge jinain ae: Ipa nato mi siaka kumain ae, edo iwawa nato mi ge beiae tain ae, pitawa tain ae, ta detakawa ae: Tamo nato tepo itaina, dutain ae, edo dave aina: Embo nenei da rorae kumbari jipapa ain ae, edo kotembedo buro be edo rorae nato kumana, edo jimbo nato ana iai ainda God na piari jipapa aina.

### *Atopatari*

**M**AI nato, eiwa gi, ta jimbo emo inemi berari ae ae Meteta, edo God da Ge da mana tembeteta, edo awa mana kera eteta, edo gido God mi ainda tonembari imonde piaina; awa gido iji berari eiwa ikana de tedo giwasi. Bada da Pari gotosi ta gaeri? awa ajijige, gane.

### *Mina tari*

**M**AKA natokare, Utu da isima eta awa, Dao ito kotopu etera; Basileia ito puresira; Jipapa ito etera awa butu de utu de ango. Boroko edo iji da doae, rorae natokare piedo ewasi. Edo buria natokare kotembedo dowasi; Ango nakare embo nenei da buria natokare iai kotembedo doturora. Edo bawari da nakare kundo aimbote; ko beiae da nakare toregewasi. Amen.

*Tedo gari.* Pari ainda God ro arate jipapa eosi?

*Mina tari.* Jipapa ena, ta Bada nato God, Mamaka kaenato utu topo, ami beiamana berari piari kato, tonembari nato iai da, embo jiwae da iai piari gumaina; edo kaena awa tumondebain ane, kera ane, edo awa kaen ge gido ane, buro kaenato ango. Edo God tedo gena, ta berari kaen jipapa etena awa tamo da ami asisi da ami kaenato iai piari gumaina; edo kaena doedo, rorae beiae kaenato kotembedo domaina; edo berari beiae asisi da ami ae tamo da ami de daedo kaena ari kavigano sima

## ATOPATARI

edo aina; edo rorae beiae ge taina edo itoro kaenato ae betari matawa ango. Edo kotembotona amone aina do ika awa tedo, Bada kaenato mi Iesu Keriso. Awa tedo tena, Amen, itarate.

*Tedo gari*

**S**AKARAMENT nandogo Ekalesia da Keriso mi tenu?

*Mina tari.* Tote akuta, tepo embo da kaviegari. Bapataito, ae Bada da Turo rorae de.

*Tedo gari.* Sakarament teota amo rori?

*Mina tari.* Iwata dambu da gari de, do da asisi mi tonembari kaenamonde pievira awa; Keriso mi oru ena ami mi tonembari kumane, edo iwata awa kumane awara ganetae.

*Tedo gari.* Sakarament da jimbo nandogori?

*Mina tari.* Tote; iwata dambu da gari, ae do da asisi da tonembari de.

*Tedo gari.* Bapataito da iwata dambu da gari roro?

*Mina tari.* Un; edo emi mi bapataito eora Mamo de Mai de Asisi Kotopu de da Dao da.

*Tedo gari.* Do da asisi mi tonembari rori?

*Mina tari.* Rorae bebegae da betari, edo rorae ewagaewa da wotari teka; rorae bebegae de kaen tepo wotema, edo duduno da mamai eite, edo kaena engo tonembari da mamai evira.

*Tedo gari.* Nominomi embo sia orote Bapataito embo?

*Mina tari.* Dubo mi sitedo, rorae bebegae beuto orote, edo Ge be ari, God mi Sakarament ainda teuri gotora awa ge be orote.

*Tedo gari.* Nongain tedo amibebada bapataito eori, awamane babaingae edo emone aeae etera?

*Mina tari.* Awamane tote eiwa Babadegari ika da ge mi teoro gotevira; edo babodora, buro ika tevira awa ain tedo.

*Tedo gari.* Nongain tedo Sakarament Bada da Turo rorae ge tenu?

## ATOPATARI

*Mina tari.* Keriso betena ainda Rorou piari, kaen matawa kotembeteite itane, edo jimbo ewagaewa kaen engo kupona.

*Tedo gari.* Bada da Turo rorae iwata dambu da rori?

*Mina tari.* Bread ae Wine de, Bada mi tevira awa kaen kumbetena.

*Tedo gari.* Do da rori?

*Mina tari.* Keriso da Tamo ae Ororo de, awa embo kotembotora awa Bada da Turo rorae da kupora awara.

*Tedo gari.* Emi mi tonembarire kaen ro bunoni?

*Mina tari.* Keriso da Tamo ae Ororo de mi asisi kaenato eoro goroba evira, edo kaen oena apona, ango Bread ae Wine de tamo kaenato da ango.

*Tedo gari.* Embo Bada da Turo rorae da isipora amo, nominomi sia orote?

*Mina tari.* Akuta katara, awamane dubo ika jiwae sitori ta, edo rorae beiae ika beuto eori ta, edo jimbo ika teka ari jipapa eori ta; God Keriso mi do ari kotemain sima kotembeteri ta, edo ainda betari gido ategeteri ta, edo embo jiwae de daedo umo jijiori ta.

*Nasi jiwae da Priest Sunday ae Iji Kotopu berari Tunondebain Turo de da Ajigari nei da da gagane itae ari, edo Ekalesia da Doregari jisi da, nasi ika da Mamai nenei awamane da iai teuri bauntora awa, Kiki eiwa atopapoteite tedo gaina, ango ami mi jipapa evira awa.*

*Edo ango de Mamono de Aimonio de, Babadegari jiwae de ainda mamai de singabanga de (Kiki darora awa) Ekalesia da tari babara, edo jiwae garo Priest mi atopataina, edo berari Kiki ainda pipitora awa tari gido ara.*

*Mamai badara, ango de ge ikaito mi Kiki de, Bada da Pari de, Ge ipa tote ajijigare; edo kiki nei ainda pisina awa jiwae kotembari; Bishop da iai kundo purara. Edo da berari Bada jianda ta ai ra mi Goroba ari da gari tutu arate.*

*Ango de Bishop ge tari, Mamai kundo puraro Goroba ari embo, Nasi jiwae da Priest ika Embo ika jiwae Goroba ari ain tedo sia eora awa Dao ika piedo, edo Bishop da iai kundo gumbari ta piaro gumbaro. Edo Bishop jipapa edo, ari goroba ore engo.*

## GOROBA ARI DA JIMBO

### TA IPA KOPURU DA PIARI EMBO BAPATAITO EORA AINDA

*Kera arimi tare.*

**E**KALESIA kaenamonde sisina, edo goroba ari da Jimbo ai mi ain aere gisi Aposetolo da Kiki de, Bada da Pari de, God da Ge ipa tote de ajijigetera; edo kiki nei kotembara, ango goroba edo ara, edo beiamana be beiamana ara; amone Ekalesia da ge dave; edo mamai babudora amo, Babadegari ika mi awamane embo teoro gotevira Bapataito da kotembotora awa, be topa awamane da ami tekago tetera, Ekalesia da do da; edo taro gesirare, edo jimbo ajijigotora awa amboda amboda ara.

*Bishop mi tare,*

**I**MOMANE einda, God da jisi da, edo Doregari einda jisi da, Bapataito itomane da, tetewo gosisina awa, tekago tavi ta; edo berari babadegari itomane mi imomane embo sitera awa, kotembedo edo avita?

*Edo dara dara mi berari ge bajina tedo mina engo tore,*

*Awara.*

*Bishop.* Tonembari kaenato Bada da Dao da;

*Mina tari.* Utu de butu de ena awa.

*Bishop.* Bada da Dao beiamana esira;

*Mina tari.* Boroko, edo matawa itaina.

*Bishop.* Bada, pari natokare giwasi.

*Mina tari.* Edo ji tari natokare ito iai vitesira.

*Bishop.* Kaen pari tana.

**G**OD, imo Goroba jiwae, wasiri de matawa, embomai Geiwa un ae Asisi Kotopu de mi tenda wotetera, edo ari beiae ika jiwae kotembedo dotureteta; Imo tedo gera, Bada, edo Asisi Kotopu dubo damo ari mi ewasi goroba ore, edo iji da doae tonembari ito jiwae eiwamane da do

## GOROBA ARI DA JIMBO

da ewasi bajina are; dubo kotembari ae gari de da asisi; jirari ae goroba ari de da asisi; gari dambudarari ae ari kotopu be de da asisi; edo adu ari ito kotopu da asisi ato be da orote, Bada, boroko edo natopo de. *Amen.*

*Edo awamane berari dara dara Bishop da do da baongo dadari aro Bishop mi ainda ipa awamane da kopuru da da pipiteite, tare.*

**M**AI (Gagara) ito eiwa Tonembari ito utu da ami toregewasi Bada, edo ikaito iai matawa itaina; edo iji da doae Asisi Kotopu ito mi bajido aina, edo Basileia ito matawa itari da kumaina. *Amen.*

*Edo Bishop mi engo tare,*

Bada itomane iai itare.

*Mina tari.* Edo dubo ito da ango.

*Bishop.* Kaen pari tana.

**M**AKA natokare, Utu da isima eta awa, Dao ito kotopu etera; Basileia ito puresira; Jipapa ito etera, butu de utu de ango. Boroko edo iji da doae, rorae natokare piedo ewasi. Edo buria natokare kotembedo dowasi, Ango nakare embo nenei da buria natokare iai kotembedo doturora; Edo bawari da nakare kundo aimbote; Ko beiae da nakare toregewasi. *Amen.*

*Edo pari eiwa.*

**G**OD, Goroba jiwae, Wasiri de Matawa, Jimbo ewa-gaewa; edo avigotota awa inemi eota, edo nakare jipapa edo eora; Tepo tedo gera, singabanga ito eiwa embo, nakare boroko (Aposetolo ito kokotopu ango) ipa natokare kopuru da piena awa, edo emimi iwata ena edo tamo ito eiwamane da iai paira evira. Imo tedo gera, edo imo Mamo, ipa ito eiwamane da kopuru da matawa itare; Asisi ito Kotopu eiwamane da iai matawa itare, edo gisi jiarate, edo Ge ito ango kotembedo da gido ore, edo gombu da kavigari matawa itari kumbore, Iesu Keriso mi Bada natokare, ainde Imo de ae Asisi Kotopu de daedo, God dakaki isite, edo matawa gisi jiedo ewa awa. *Amen.*

**B**ADA Imo Goroba jiwae, edo Imo God matawa itota. Imo tedo gera, edo dubo natokare ae tamo natokare da iai gisi jiwasi, ge ito da begata da ae ari ito de da; edo



## GOROBA ARI DA JIMBO

nakare matawa toregewasi edo tamo natokare de edo asisi natokare de kavigore; Iesu Keriso mi Bada natokare ae Ari Kaviegari de. *Amen.*

*Bishop awamane beiamana edo engo tare,*

**G**OD Goroba jiwae Mamo Mai ae Asisi Kotopu de Jimbo ika beiamana itomane iai pumango, edo itomane iai matawa itaina. *Amen.*

## JIMBARI KOTOPU DA JIMBO

*Gisi embo berari jimbari jipapa eora awa Oru Ekalesia da Sunday tamonde oru ore Sipo de Tumondebain ango ae ra ta Turo Tumondebain edo, Ajigari tote itae.*

*Priest engo taina.*

**J**IMBARI Oru ena Ei . . . de ae Ei . . . de da. Embo torari kotembedo gido jimbore kaen, tewo. Eiwa tari gari iji da, (da da gagane, ta tamonde)

*Embo jimbari jipapa era nasi eve da nasi eve da jijiora, Oru nasi ikaito da oru ore. Nasi nei Priest nasi nei Priest awa atopataro, Oru ari iji tamonde ajigore, edo amboda Priest nei mi piari jimbore.*

*Jimbari iji de, Embo jimbari jipapa ara awa Ekalesia toropu da, ae embo nenei de daedo; ounda petara Mai ipa be da ari, Gagara ipa anda da ari, Priest mi taina.*

**E**MBOMAI nato, einda kaende doregetena God da jisi da, jisi einda; Mai einde Gagara einde piano jimborote ena; eiwa jimbo kotopu, embo Eden da isiretera awa God mi atopasina, kenatu Keriso da Ekalesia da dadautari pienu giwa: jimbo eiwa Cana de Galilee de Keriso mi beiamana ena ouwa aimuna kenatu da ena; Paul Kotopu mi tenu embo berari da beiamana; embomai mana ara, ainda ge katari itae iarada iarada ae, benunu de raro kotembei kae, be abu wo dutari inge; ango ae rata kotopu ari kotemaina, edo God da adu ari da aina; Embo kotembo-rote nongain jimbari piena.

Da, piena mai babaingae kumbari embo, awa bajido God da adu ari da, Dao kotopu da dasiga ore.

Da da gagane, jimbo beiae ge tari, tandari ge tari, edo mateo itari beuto edo, Keriso da Ekalesia da jimbudo beiamana itara.

Toro da gagane, Jimbari mi atutumbedo kondade ara ore ewa ri ta, beiae ri Awa embo embo tote eiwa einda jimbari jipapa edo gupera. Awa tedo torari embo awa piari gore jimain ae domaina awa, boroko rate, gido ge dodo tepo natopo itare.

*Mai jimbari jipapa era awa ami taina.*

**I**MOMANE tote awa tena, imomane tote awa ango Ikatari iji bajina de mina tawa, embo jiwae ango de do

## JIMBARI KOTOPU DA JIMBO

da onjijigetevira awa bedari, imomane torari kotembae nongain Jimbaro torarate, boroko tewavi. Be giwo, edo jipora awa God da ge ango ae, amone God mi pia jimbai, jimbai dumbae eora.

*Torari taro, sima orote, amboda ge katorote.  
Torari itae ra ta, Priest mi Mai ounde taina,*

**E**I . . . imo Gagara eiwa jimbari jipapa esi ta, jimbari mi matawa itawa God da ge ango? Karupa ato karupa mi dubo damodamo aina, edo kotopu edo sima ato apeira ri ta, erido eirari, mai nei dodo, da ainda iai itata iji itomane berari nasi da?

*Mai mi mina taina,  
Ango ana.*

*Priest mi Gagara de taina,*

**E**I . . . imo Mai eiwa jimbari jipapa esita, jimbari mi matawa itawa God da ge ango? Kera edo, ainda ambodani edo karupa edo kotopu ata, sima ato apeira ri ta erido eirara, mai nei dodo, ainda iai iji itomane berari nasi da?

*Gagara mi mina taina,  
Ango ana.*

*Kera ari mi taina,*

Ai Gagara eiwa pieiri Mai emi jimbarate?

*Kera ari Gagara da mamu da iai da ta otawo da iai kumaina, edo ari Mai awa ipa be da Gagara awa ipa be da kundo, kera ari amboda emi mi ajigaina.*

**N**A Ei . . . imo Ei . . . aro nato jimbari mi bunena, boroko engo de, imo jijiena jido domain ae, beiamana ri ta beiae ri, rorae iji de ri ta atota iji de ri, ambato ri ta erido airato, karupa ana, sima ana, batari de evekara ana, God da ge ango; Be de tena.

*Dodo; Gagara ipa be da Mai ipa be da jido kera ari amboda taina,*

**N**A Ei . . . imo Ei . . . iu nato jimbari mi bunena, boroko engo de, imo jijiena jido domain ae, beiamana ri ta beiae ri, rorae iji de ri ta atota iji de ri, ambato ri ta erido eirato, karupa ana, sima ana, kera ana, betari de evekara ana, God da ge ango; Be de tena.

## JIMBARI KOTOPU DA JIMBO

*Iji nei de dodo; Mai ami Ipa bubuko awa Gagara de piari book da pianina, Priest ae Kondade ari de da rorou de daedo, Priest mi. Ipa bubuko kundo Mai ainde piari, Gagara ainda ipa toro ao da gagane ipa anda da piare, edo Mai awa ainda jiri, Priest mi atopatari taina.*

**I**PA bubuko emi mi jipena, tamo mi kera ena, rorae nato Iberari pipitena, Mamu de Mai de Asisi Kotopu de Dao da. Amen.

*Mai ami Ipa bubuko Gagara da ipa toro ao da gagane ipa anda da dodo, ae da de baongo aro; Kera ari mi taina,*

Kaen benunu tana.

**G**OD, Matawa ango itota, embo berari Ariembo, Toregari embo, ewa jiwae piari embo. Kaviegari matawa itari da tutu; Ambodani ito Mai de Gagara de eiwa beiamana ewasi, nakare boroko beiamana era Dao ito da; matu Isaac ae Rebecca de matawa jimbua ango omimi siretera awa jimbo ariwo ore (Ipa bubuko nei piedo nei kumbira ikaito kenatu da) ouwa dubo mina bara ore, bega ainda iai matawa itaina, ge ito ango siteta, Iesu Keriso mi Bada natokare. Amen.

*Priest mi ipa be takimbedo taina,*

Awawa God mi dada eira, nongain evekara eriko.

*Kera ari mi jisi da taina,*

**E**I . . . ae Ei . . . de boroko jimbera God da jisi da, jisi einda jisi da, engo tetera Ipa bubuko piedo kumbira kundo ipa jiera; ango tena eiwa Embo de Aro da daedo, Mamu de Mai de Asisi Kotopu de Dao da. Amen.

*Kera ari Beiamana ari eiwa ajigaina.*

**G**OD Mamu de, God Mai de, God Asisi Kotopu de mi Gimomane beiamana esira, torido, sima aina. Bada kaenato Doari embo jisi tu da aina; edo imomane kondade ari, itomane nasi da itawa, nasi nei da erari matawa itawa. Amen.

*Bada da Tenemba da aundo Psalm eiwa ajigore ta ia tore Kera ari edo Kondade ari.*

Psalm 128

**E**MBO beiamana awawa Bada adu eora awa: edo ainda begata da tepora.

2. Ipa ito jijiteta awa indata: beiamana ato dubo beiamana aina.

## JIMBARI KOTOPU DA JIMBO

3. Aro ito be duru be de: mando ito da dedemo da inge.

4. Mamain ito be olive patu inge: tenemba ito da jinenemberiko.

5. Ango edo beiamana arate: Bada adu evira awa.

6. Bada Zion de wotedo imo beiamana aina: edo Jerusalem woba de giwasi iji ito berari.

7. Awara da mamain ito da mamain giwasi: Bega Israel da itesira.

Mamo de, Mai de, Asisi Kotopu de da iai: parara itesira;

Ango teka de: baroko, edo natopo itaina. Amen.

*Edo gido Psalme eiwa,*

*Psalm 67*

**G**OD nakare do aina, edo beiamana aina: namondekare daedo dombu utata aina.

2. Edo nasi da begata ika kotembara: edo ari kaviegari ito etene jiwae da iai.

3. Jisi imo dasiga ara, God: jisi jiwae mi imo dasiga ara.

4. Embo dubo dave ari ia tara: jisi be tedo gi, edo embo nasi da kundo gumbuwasu.

5. Jisi imo dasiga ara, God: jisi jiwae mi imo dasiga ara.

6. Nasi be esira: God, natokare God beiamana aina.

7. God nakare beiamana aina: edo nasi gombu jiwae awa adu ara.

Mamo de, Mai de, Asisi Kotopu de da iai: parara itesira.

Ango teka de: boroko, edo natopo itaina. Amen.

*Psalm dodo, Mai ae Gagara de Bada da Tenemba do da baongo dadari aro, Priest mi Tenemba da petedo, ainda iai wareregedo, taina.*

Bada, nakare do ewasi.

*Mina tari.* Keriso, nakare do ewasi.

*Kera ari.* Bada, nakare do ewasi.

## JIMBARI KOTOPU DA JIMBO

**M**AKA natokare, Utu da isima eta awa, Dao ito koto-  
pu etera; Basileia ito puresira. Jipapa ito etera  
awa butu de utu de ango. Boroko edo iji da doae, rorae  
natokare piedo ewasi. Edo buria natokare kotembedo  
dowasi, Ango nakare embo nenei da buria natokare iai  
kotembedo doturora. Edo bawari nakare kundo aimbote,  
Ko beiae da nakare toregewasi. Amen.

*Kera ari.* Bada, singa ito mai, edo singa ito ai toregewasi.

*Mina tari.* Imo awa tumo da eora awa.

*Kera ari.* Bada, iai ito koptopu da tonembari ainda iai tato bamaina.

*Mina tari.* Edo natopo toregewasi.

*Kera ari.* Ainda iai beuri okain atate;

*Mina tari.* Ainda itoro ari da jisi da.

*Kera ari.* Bada, benunu natokare giwasi;

*Mina tari.* Edo ji natokare ito iai gumbarate.

*Kera ari*

**A**BRAMHAM da God, Isaac da God, Jacob da God,  
Aiarata ito eiwa beiamana ewasi, erari matawa ve do da  
urewasi, ouwa ge ito Kotopu ajijigore, kondade ewasi jimbo  
ewa ore. Utu da Bada, jisi tu da ewasi, edo beiamana  
atate. Imo Abraham de Sarah de beiamana ato, dubo  
damo ena, ango iarata ito beiamana ewasi; emi mi Imo  
kera ore, ito iai beiamana itore, edo dubo ito be bore,  
Iesu Keriso Bada natokare embo. Amen.

*Eutu dewari gido Benunu eiwa ajijigain ae.*

**B**ADA do ari embo, Mamo utu topo, pipitota embo  
nasi da idewago era; Ategetera, embo tote eiwa beia-  
mana ewasi, ato mai kundo, ouwa dada takingedo itore,  
edo dubo mina bara ore, edo mamai Christian ango badaro  
gore, edo Imo dasiga ore, Iesu Keriso Bada natokare awa  
embo. Amen.

**G**OD, Imo goroba edo, edo ro ae kundo berari ata,  
nenei gisi piteta, edo amboda tato gisi embo isinesina  
(Asisi ito ango evira) gagara embo mi be arate, dada edo  
atopatata embo tote jimborote edo dada orote evekara ain

## JIMBARI KOTOPU DA JIMBO

ae; God, jimbari ato asisi awa Keriso ainda Ekalesia da asisi mi jimbudo takingetera gore; Embo eiwa ambodani ito jisi tu da ewasi, Do ari embo, mai ainda aro dubo bare, Ge ito ango (Keriso ainda aro Ekalesia dubo buna awa embo tekago pisina, be ainda pisi dubo budo tao esisina) edo gagara eiwa kore are tamo beiamana edo kera aina; edo burau eutu kokotopu ajiwo aina. Bada, tote eiwa beiamana ewasi, piato basileia matawa itari bara, Iesu Keriso Bada natokare embo. *Amen.*

*Priest mi tare,*

**G**OD, Goroba jiwae, gisi gisimbadari kaenato Adam ae Eve de ena awa, edo ao edo enu jimbudo takimbewa; Umo jiari berari ikaito piaina, ao aina, beiamana aina, inemane mi tamo mi asisi mi ewa, edo dubo bawa itomane gombu da. *Amen.*

*Dengoro baiarate, edo gido Kera ari mi engo ajigare.*

**I**MOMANE berari jipowa awa, ta Jimbari Kotopu jipapa eowa awa, Ove Kotopu da ge giwo, embo ainda asini da iai da jimbo, edo asini ainda embo da iai.

Paul Kotopu, ainda Epistle Ephesus embo da iai, Chapter 5, jimbari embo berari de tedo tena; Iarata asini dubo buwo Ekalesia Keriso mi dubo burisina ango, edo ouwa awa embo betena, ao edo beiamana are tae ko un da ge mi piare gotore tae; edo Ekalesia ae parara de da ari dono de ta gano ro itae; rata amo kotopu, ainda beiae ro ae. Iarata mi asini dubo bore tae tamo ikaito ango. Embo aro ika dubo burevira awa ika imo dubo burevira; aimi pisi be mi dumo ae, rata udedo euri goroba evira, Bada Ekalesia ango; kaena ainda tamo de, pisi de, ae vetu de da patu. Awa tedo embo mammo de ai de awa dodo taingedo, aro da iai takimbedo itare; edo awamane awa ainda pisi dakaki. Emo ari botu da; Keriso Ekalesia de da ari ge tena. Awara ta ko imomane berari asini dubo buwo imomane ango.

Ango Paul Kotopu da da mi Colossae embo da iai ove gaena, iarata berari a jipora ainde site tena; Iarata, asini dubo buwavi, isimbove.

Ko Peter Kotopu awa, Keriso da Aposetolo awa a jimbari rare, a jijimbugari de tevira awa gawate tedo tena, Iarata, ae asini de daedo isiwo, dubo embo ango; asini

## JIMBARI KOTOPU DA JIMBO

ikamane dasiga ewavi, rorae siwari ango, ae imondemane daedo kavigari da tonembari ikaito mane kumbawo, ango de benunu itomane ge mana taina.

Engo de mai ainda buro aro da iai gewa. Ko boroko, eutumai, buro itomane ibono da iai Ove Kotopu da pipitevira awa, giwo gido kotembewo.

Paul Kotopu ainda Epistle Ephesus embo da iai, engo imomane atopasido tena; Eutumai, Ibono kera ewo, Bada ango. Embo eutu da kopuru, Keriso Ekalesia da kopuru ango; edo awa tamo ika da ari kavigari. Awa tedo Ekalesia kera evira ango, eutumai mi ibono kera be itae orote. Ko iji nei de tedo tena, Eutu mi kotembarate iu kotopu are tae. Edo ainda Epistle Colossae embo da iai, Paul Kotopu mi ge eiwa tupo kaima imondemane site tena, Eutumai iu ibono kera ewo beiamana ango Bada da jisi da.

Peter Kotopu mi imondemane ato be pasido tena; Eutumai iu ibono itomane kera ewo; edo embo Ge awa kera ae eora awa Ge mi ae rata ko eutumai da ari awa awamane mi kiki jirara; ango de jimbo itomane dave, adu ari de dada evira awa, gotevira. Giro ari itomane, iai dambu isirari raro kouru tu itomane tendavi kae, ko gold durevi ta tamo woru kumbevi; edo gido embo do itomane da natopo itari mi asisi burau adada itari, eiwa dave be dave God da jisi da. Matu eutumai kokotopu mi God kotembedo ango giro ewa, edo iu ibono kera ewa; Sarah mi Abraham kera ena ango, awa dao Bada tena: imomane ainda mamai ango de jimbo itomane dave ari, tamo itomane boroboro mana esira.

# PRIEST DA BENUNU EMBO AMBUBUGARI DE DAEDO AWAMANE DA ORO BENUNU TEORA

*Ango de embo amain eirari, Priest de oru ari; ko embo awa apeirari totoreite site taina,*

**B**EGA oro ainda ko embo berari ainda nasi jijiora awa.

*Ambari embo da iai gundo, baongo dadari edo tare,*

**B**ADA, rorae bebegae natokare ae mamono natokare da Brorae bebegae kotembote; nakare dowasi, Bada, teo-  
topo ito ororo mi dave jiwae kumbata awa.

*Mina tari.* Nakare dowasi, Bada.

*Kera ari tare,*

Kaen Benunu tana.

Bada, nakare do ewasi.

*Keriso, nakare do ewasi.*

Bada, nakare do ewasi.

**M**AKA natokare, Utu da isima eta awa, Dao ito koto-  
pu etera, Basileia ito puresira, Jipapa ito etera awa  
butu da utu da ango. Boroko edo iji da doae, rorae  
natokare piedo ewasi. Edo buria natokare kotembodo  
dowasi, ango nakare embo nenei da buria natokare iai  
kotembodo doturora. Edo bawari da nakare kundo  
aimbote, Ko beiae da nakare toregewasi. Amen.

*Kera ari.* Bada, singa ito e kavigare.

*Mina tari.* Ami Imo tumo da evira awa.

*Kera ari.* Ito iai kotopu da ango kondade ari pie  
wotare.

*Mina tari.* Ko matawa torege.

*Kera ari.* Ito ika mi deure.

# BENUNU EMBO AMBUBUGARI DE DAEDO

*Mina tari.* Ko beiae atutumbedo usimbese eure.

*Kera ari.* Ainda iai beuri okain atate.

*Mina tari.* Ainda itoro ari da jisi da.

*Kera ari.* Bada, benunu natokare giwasi.

*Mina tari.* Edo ji natokare ito iai gumbarate.

*Keri ari*

**B**ADA, Imo utu da ango jisi tu da edo, singa eiwa gi,  
Betegedo, ainda dubo ato damo are. Do ito da jisi  
mi jisini edo, ato dubo damo ari Imo tumo da arate, itoro  
ika da adu ari da jijimbe, edo sima eirato, bega de kavi-  
gari natopo da itaina Iesu Keriso mi Bada natokare.  
*Amen.*

**N**AKARE dengoro mi giwasi, God, Ari kavigari  
natokare, Imo Goroba jiwae edo Do ari embo; Ari  
ito dave embo eiwa apeira ainda iai kaioio ewasi. Ewasi  
ambari eiwa, vedari mi beiamana are, tedo gotera. Si-  
wari da eato kotembari ika goroba ari, dubo ika be warere-  
gare. Jipapa ato kavigare tae, edo butu ainda Imo adu  
edo parara ito kakoa are; edo gido kondade ari ito piato  
einda tamo memesi dowari, ae imonde daedo itave kavi-  
gari matawa itari da; Iesu Keriso mi Bada natokare.  
*Amen.*

*Kera ari atopatari eiwa ajijigain, ta engo ge taina.*

**D**UBO embo, imo kotembeio, God Goroba jiwae,  
Damone kavigari de betari de Badari; awa tedo awa  
singabanga, ae embo goroba de, wasiri de, owo, sisi-  
vegari de ambubugari da Badari. Awa tedo ambari ito  
rora itare tae, ko imo be kotembeio, God ango ito iai tepo  
gupeira; God gauga eiwa piesiri wotesira imo bawain  
tedo, edo embo nenei sima ari ito kotembore tae, edo  
kotembari ito Bada da iji parara da dasiga ari ito itare, ko  
parara ito bajina ari dubo beiamana ari ito gombu ae;  
edo gido piari wotare tae, edo imo vedare, Mamo ito utu  
da ango awa sini gapeira awa ge tare tae; imo be kotembodo  
dubo ito wareregare jimbo ito beiae embo amundo ko  
beiamana itato God da do ari ainda Mai dubo bari Iesu  
Keriso embo kotembe imo vedeira, ko ine ategedo kera

be, edo ate, edo ami imo kondade edo kavigari natopo da kumaina.

*Embo ambari awa beiae be ari, Atopatari ainda atopatari ika itae aini ta nei ajigaini.*

**B**ADA da vedari kundo edo netegedo isio; Paul Kotopu da Epistle Hebrew embo da iai gagurevira awa ainda Chapter 12 site sira, Awa Bada da dubo burevira awa mina riroa evira, edo mamai ika berari udevira awa vedevira. Vedari kundo edo netegedo, isiwo, God da mamai mi ango imondemane eora; mai rora mi ko mamomo mi riroa mina ae? Riroa, ainda mai atoto berari mi kupora awa imomane kumbae, ko imomane ainda mamai be ae, rata tarawa kakato da mamai. Awara ta kaena ae tamo de, mamono kaenato, isite, awamane mi kaenamonde riroa mina esitera, ko kaen kotopu edo ena, asisi da Mamo kaen kera edo kavigani ta? Awamane iji indewa ae kaena riroa mina esitera ari jipapa eora awa embo, amo kaena riroa mina edo eira beiamana ain tedo edo kaen ari kotopu kumanate. Embo nato, ge eiwa Ove Kotopu da pisina kaena ari dubo damo ari, ko kaena piari ganeta; edo ango de Mamo kaenato utu da ami jipapa evira dubo vevera ari rora kaen kumanate, ainda vedari da kaen kumane tae, edo kaen ategane tae, edo kaen beiamana edo itane. Edo ango de embo Christian, ari beiae, dubo vevera ari, ta ambari kupora edo beiamana edo ito ra awamane da dubo beiamana evira, awamane awa Keriso ango. Gisi ami tamo memesi ari kupusina, edo amboda dubo beiamana ari da vivisisina; cross da detero amboda parara ika da totorisina. Awara ta ainda kaen Keriso de daedo mamato ane; amone begata kaenato dubo damo ari natopo itari ra; ko Keriso de daedo kaen betane, amone be kaenato kavigari matawa itari da; ko kaen berari da tenda enana, edo ae ainde daedo kavigari matawa itari da kaen itana. Awa tedo, God da Dao da imo atopapotena ambari ito ewa eira, kundo edo netegedo itatate, ko matu tari God da jisi da Bapataito ari ito da esiteta awa kotembeio. Edo kavigari ainda amboda awa, Atota ari beiamana embo berari katari ko embo kotemain ae, ajigari kaenato ainda iai be gain tedo, Ouwa embo imo atopatena edo imo akuta katatate, buro ito God da iai da embo da iai embo; ko boroko imo akuta

bekumba eio jimbo beiae ito embo, edo Mamo kaenato utu da ami imo do are Keriso embo, ko amone katari da adu kato imo bekumba ain ae edo riroa ito imo de mana piaina. Awa tedo kotembari kaenato dengoro ito da ajigain ena, ko tembeio Christian da Kiki imo kotembotosi ta?

*Einda Kera ari kotembari ge ajigedo taina,*

**I**MO God ge be eosi ta, Mamo Goroba jiwae, Utu de Butu de Ariembo?

Edo Iesu Keriso Ainda Mai dakaima, Bada kaenato. Asisi Kotopu esiri watou jirido, Mary Kakara mi kumuna Mamato ena Pontius Pilate gisi jina ango de; Cross da dewo betenu, goewo, Hades da wotena, edo iji tamonde de betari de tenda erido utu da visina; Edo God Mamo Goroba jiwae da be da anumena isira, ango de wotedo butu gombu da, edo wawasiri de bebetegari de kataina?

Edo Asisi Kotopu ge be eosi ta? Ekalesia Kotopu Katoliko? Embo kokotopu da Dadautari, Rorae bebegae kotembedo doari Pisi kaenato da Erari, edo Kavigari Matawa itari betari amboda?

*Edo ambari mi ainde mina taina.*

Berari eiwa be kotembotona.

*Kera ari mi atota ari dubo ika be wareregaina, jimbo beiae ika embo tae ae, ko embomai dubo budo ei ta aeri; tari embomai ainda jimbo ainda iai beiae etera awa itae kotembedo doware; embo nei sini gambari, kotembedo dowari tedo gaina; jimbo beiae umo ika da iai da esira, jimbo dave be aina. Gisi ainda rorae kando ae isirari. Kera ari mi kando arate tari, ko begedo tare aimi money kumbiri ko aimi money piesieri; ko ainda dubo odaina, edo rorae Kando ari ika tepo itaina. Ko, embo wasiri de mi be de tara, edo tedo doae ore nomi rorae ikamane kando ari.*

*Ge eiwa gaguritera awa Kera ari mi jipapa edo Pari ika gisi ajigare.*

*Kera ari mi rorae embo tedo doae eirari, rorae atota de piore tae.*

*Embo ambari mi dubo ika beiae are tae jimbo beiae siakabadae embo, Priest mi tedo doae eirari jimbo beiae ika onjiga tare tae. Onjiga tari ainda amboda burau de be tedo gare Priest mi engo Kotembedo doware.*

**B**ADARI kaenato Iesu Keriso, badari Ekalesia ika da Bpipitevira awa, amone jimbo beiae embobo dubo ikamane be wareregetevira awa edo ouwa dubo eora awa, kotembedo doaware tae; ainda do ari ika bajina mi jimbo beiae ito kotembedo domaina. Ainda badari ari awa kumena, ko emi mi jimbo beiae ito berari kotembedo



## BENUNU EMBO AMBUBUGARI DE DAEDO

dotena, Mamo de Mai de Asisi Kotopu de da Dao da. Amen.

*Edo Priest mi Pari eiwa ajigaina.*

**G**OD, Imo do kato, do ari ito jiwae ang'o embomai da dubo be wareregetevira awa awamane da jimbo beiae siredo ko kotembedo dodo eta. Jisi ito do kato singa ito ainda iai, kotembedo dowari jipapa evira awa. Mamo dubo bari embo, ari dave diabol'o da etetembari ta ainda dubo vevera ari beiae usimbese evira awa ainda do da tekago pie; karu ari eiwa Ekalesia da dada utari da jido takimbeio: ainda dubo wareregari kotembeio, jijiu gido, ainda tamo memese e kavigare, jipapa eota ang'o. Ouwa do ari ito tumo be jijirevira; awa t'edo ainda jimbo beiae matu awa bekumba eote, ta asisi ewa ito mi e goroba are; edo ang'o de jipapa ato ainda eng'o kundo aimbate tae, dubo ewa ari ito da kundo aimbate. Mai ito dubo bari kato Iesu Keriso Badari natokare da ari embo. Amen.

*Edo Kera ari mi Psalm eiwa ajigare.*

*In te Domine, speravi. Psalm 71*

**I**MO Bada tumo jirido ena: nanjigo mana na usimbese iaina.

2. Jimbo dave ito da na toregewasi, edo e kavigane: dengoro ito mi giwasi, edo ewasi kavigane.

3. Nato iai isiwas'i ganuma goroba jiwae ang'o, ang'o aimana iji nato berari: na kaviganate teteta, Imo ganuma nato ra ta oro nato goroba jiwae.

4. God nato, jimbo beiae embo da ingo da na torege: jimbo beiae embo, duduno de ainda ingo da.

5. Imo jipapa ena, Bada God: na baingae Imo tumo jijinona.

6. Osi da ang'o na jido eta: aiaka da owa da pieteto udegositena, Imo dasiga ana.

7. Na be kore ari jiwae da iai: Imo nato tumo darari goroba de.

8. Dasiga ari ito be nato be da aina: edo parara ito ia sinano turo are.

9. Ang'o de owo ane, Imo na dote: ang'o de goroba nato itae are, Imo na dodo aimbote.

## BENUNU EMBO AMBUBUGARI DE DAEDO

10. Gitopo nato mi ge nato ge tera: edo embo asisi nato embo sima eora awamane ge ika jijirera.

11. Sira, God mi dodo taingesira: ondedo dewasi, ainda toregari itae.

12. God, Imo aikamana itote: God nato na eiage torege.

13. Asisi nato da gitopo usimbese edo gindore: gandubari de isimbari embobo mi na usimbese eora awa apuregare.

14. Na sima akuta iji da doae ana: edo dasiga ito bajina be bajina ajijigana.

15. Be nato jimbo ito dave edo kavigari ito ajigeteiario turo aina: ajigari na danena.

16. Bada God da goroba da punana: jimbo ito dave akuta ge tane.

17. God, na siaka, ine na atopateta: dembae de boroko de kore ari ito onjiga tetena.

18. Edo ang'o de na owo ano kopuru tu nato wo gumaina, God, na dodo aimbote: edo ipa ito da ari umo nei de onjiga tane, goroba ito embo jiwae gupera aindebedane.

19. Jimbo ito dave, God, ikane isira; ari babain eteta, God, Imo ang'o ain isiri?

Mamo de, Mai de, Asisi Kotopu de da iai: parara itesira, Ang'o teka de: boroko, edo natopo itaina. Amen.

*Ajigare.*

**N**ASI Ari aviegari, Cross ko Ororo dave ito da ang'o rorou natokare piata awa, nakare ewasi kavigore, edo kondade ewasi, burau mi t'edo gotera, Bada.

*Kera ari mi tare,*

**B**ADA, Goroba jiwae, embo berari mi tumo da eora Bawa da goroba ari be, ainda iai ari berari utu da, butu da ko butu du da tumondebain eora awa, edo kera eora awa boroko da ang'o imo jijimbara; edo imo piari gate, dao nei utu du da embomai mi piora awa ami mi kavigari kumbate tae, ae ra ta Bada kaenato Iesu Keriso ainda Dao akuta. Amen.

## BENUNU EMBO AMBUBUGARI DE DAEDO

*Edo amboda tare,*

**G**OD da do be ari da jijimbari da imo pipitena. Bada mi imo ewa edo sima aina; Bada mi ari ainda dombu ito iai utata aina edo ito iai paira aina. Bada da dombu ito iai jiari erari, ko boroko bega be de natopo piana. *Amen.*

### BENUNU MAI SIAKA KARU ARI EMBO

**G**OD, Goroba jiwae, Mamo natokare, Do embo, kaviegari de betari de da ari ito iai berari isira; Utu da ango jisi tu da engo gi, nakare burau mi tedo gotera, edo mai siaka eiwa karu edo aveira awa do ewasi; Bada, kaviegari ito piewasi; ango de Ine jipapa edo, ainda tamo memesi ari tamo da ango awa e itae are, edo ainda asisi e kaviegare do ito embo. Ine jipapa ato butu ainda iai idewa are yae, ari ito edo, parara ito kera edo ito iai singa be are, edo umo ika da jimbo dave are; edo gido itari utu da ango da ude, ounda embo Bada Iesu da dubo da awora awa awamane da asisi oena apeite dubo beiamana natopo eora. Eiwa kando e, Bada do ito embo Mai ito mi Bada natokare Iesu Keriso Ouwa Imo de Asisi Kotpupu de daedo God dakaki isite, badari natopo eota. *Amen.*

### BENUNU EMBO KARU ARI EMBO, KAVIEGAIN AE GE

*TETERA AWA*

**M**AMO natokare, Do embo dubo damo ari berari da God, tedo gari da iji da Ine akuta kondade edo eta; eteto embo eiwa singa ito ainda karu eiri ainda tamo siveira, edo ito iai tupena Ine nakare kondade atate. Do kato jisi tu da e, Bada; ko ango de ainda tamo siveira, kondade ari ito de Asisi Kotpupu ito de ainda do da piedo ewasi goroba are. Dubo wareregari dave jimbo ika beiae matu esisina awa embo piedo e, ato Mai ito Iesu dubo be are; edo ainda jimbo beiae teiewasi, edo ainda dubo ewa ari utu da kariwa e, ango edo aundo ko iji nei de bedain ae. Kotembatora, Bada, ari berari ate tae; ko Ine jipapa edo boroko ato kaviagedo natokare iai butu ainda itare tae; Edo gido, ge natokare ainda betari atuta eira, awa tedo sia e, tedo gotera, betari embo, edo bega da ko dubo ewa ari Bada aimbare, edo ainda asisi basileia natopo itari da ude, Iesu Keriso Mai ito ao da, Bada natokare de Ari kaviegare da ari de benunu ika embo. *Amen.*

## BENUNU EMBO AMBUBUGARI DE DAEDO

BENUNU EMBO KARU ARI DA ASISI GOD DA INGO DA

*PIEVIRA AWA, BETARI IJI DE*

**G**OD, Goroba jiwae, jimbo dave embobo sia eora awa awamane da asisi awamane da bundari oro ango butu da ango toregesiteta edo ito iai itera awa; Ingo ito da, Ari embo dave rata Ari kaviegari do ari da ingo da ango, singa ito nameji natokare dubo bari burau mi Imo de piana; edo burau mi tedo gotera, jisi ito da ewa are. Arini dave be dave, Cross da dewa awa butu jimbo beiae kumbara te, ororo mi teie; edo berari pisi da dubo vevera ari ta Satan da betuma piari mi butu ainda eoro dono evira awa teiewasi, edo jisi ito da petari ainda beiae itae. Edo ewasi ato iji berari betora awa awamane da betari nakare itora awa piari gore tamo natokare sivera, edo iji natokare ajigedo butu ainda itore, edo utu da ari kokotopu dubo natokare mi sitaro edo dubo embo are, edo amboda kaviegari matawa itari da bambara; Iesu Keriso Mai ito ao da Badari natokare da ari embo. *Amen.*

### BENUNU EMBO DUBO VEVERA EVIRA AWA EMBO

**B**ADA Imo dave, Mamo do kato, edo dubo damiota Bari berari da God; Tedo gotera, Imo do kato singa ito ato dubo vevera evira awa jisi tu da edo gido do ewasi. Ge dokaka ari ainda iai gaedo eta edo eoto jimbo ika beiae matu jido takimbetevira; duduno ito ainda iai bouga eira edo ainda dubo mamato eira; Edo gido, God, Imo do kato, Book ito kotopu ove ata, nanekare gorote, edo ge ito kotopu mi dubo natokare ari damo are tae; edo pie gare edo ari ika de isimbari ika de ge ito matu tari awa be kotembedo, Imo doure, edo tumo jireiko edo gido Imo akuta. Ewasi goroba are bawari ika berari da iai, edo ambari ika berari ewasi kaviegare. Apua datoro ari ato erigeure, edo keimo imbosi de ato ambure. Imo duduno edo do ari ito dote ta, e ato ia dubo dave ari gari edo ainda vetu deteto datoro esisina awa awamane da dubo dave are. Ko torege gitopo ika adu eure, edo dombu ito parara de ainda iai ji erare: bega plate, Iesu Keriso Badari natokare da ari da benunu ika de embo. *Amen.*

## KARU EGEREGARI DA DADAUTARI

*Adu ari de da ko karu jiwae embo berari iji da ainda tamo da vivitora, edo betari da iji kotembedo ae; awa tedo akuta sia arate, betari embo, edo God, Goroba jiwae dao tare ainda iji de; Priest mi embomai de tedo doae eirari, (awara ievi siakabadae adu ari da iji da,) ko Ari kavigari kaenato Keriso da Tamo de da Dada utari kotopu iji jiwae kumbore tae; ango de Ekalesia da kando eora awa; eiwa ari, ievi siakabadae borae daina, edo awamane da dubo vevera ain ae. Ko embo karu ari burau edo mana Ekalesia da puresira, ko jipapa ari gido Dada utari oro ika ito da kumbesira; Priest mi tari ko piari gaina aimi ainde daedo kumaini, (embo tote ta tamonde ta nenei), edo embo karu ari ainda oro sia dave ari, ko Priest mi benunu tare, Edo ounda Priest mi Dada utari eite, ko tuturo awa Pari einde, Epistle einde, ae Evanelia einde awa ajigaina.*

*Pari*

**G**OD, Goroba jiwae Matawa itari, embo berari Ari-  
embo, embo dubo budo eta awa riroa mina edo eta,  
edo embo berari udota awa vededo eta; Tedo gotera,  
embo eiwa eige ito ingo ito mi dorevira awa, do ewasi, edo  
e ato pida ambari be kumbare; edo (jipapa ato) amboda  
kavigare; edo ango de ainda asisi eve dodo taingedo ito  
iai dono ae aiari gumbare; Iesu Keriso mi Bada natokare.  
*Amen.*

*Epistle. Heb. 12. 5*

**M**AI nato, Bada da riroa nongain dovesiko, edo ango  
de imo isimbeteiari nongain adu esiko. Embo Bada  
dubo burevira awa riroa mina evira; edo mamai ika berari  
udevira awa vedevira.

*Ge Ewa Tari. John K. 5. 24*

**G**E be, ge be, imondemane tena, Embo ge nato gotora  
Gawa ko ami na etegetevira awa kotembotora awa  
kavigari matawa itari topa ainda, ko ge katari da tonain  
ae: rata betari dodo wotesira kavigari da.

*Eiwa amboda Priest mi Dada utari Kotopu da pari ajigain eite  
tuturo engo are, (Imomane awara jimbo beiae itomane embo, etc.)*

*Ango de Sakarament Kotopu kando ain eite, gisi Priest mi Doregari  
kumaina, edo amboda embo karu ari da embomai de piedo, ko amboda  
embo karu ari de piare.*

*Embo karu be ari ta matu Priest de tedo gae gido, ta embo edo gido*

## KARU EGEREGARI DA DADAUTARI

*ainda daedo kumbare tae, ta ainda ge tari nei itare, awa tedo Keriso da  
Tamo de Ororo de da Sakarament kumbure kae, Priest mi piari gido  
dubo ika wareregaina jimbo ika beiae embo, edo be kotembare tae Iesu  
Keriso Cross da mamato ena ouwa embo, ainda Ororo vekougena rorou  
ain tedo, ko ari ewagaewa engo kupevira awa be kotembarate, edo be  
ategarate, edo ango de Sakarament ainda be mi indare tae, edo gido  
Ari kavigari kaenato Keriso da Tamo indeite ko Ororo injido eira.*

*Priest mi iji dakaki Benunu embo karu ari de daedo ajigedo, Doregari  
Kotopu are, Psalm, (Imo Bada dubo eona), ajigaina, edo ango de  
Doregari da Benunu tuturo aina.*

*Ango de karu siakabadae butu da isiri, embo berari adu era, awa  
tedo kumbari embo karu ari de daedo oro ikaito dotureite, edo embo karu  
ari mi inaka de tedo gare, edo Kera ari akuta ami de daedo kumbare.*

## BEBETEGARI DA GOIARI

*Embo betari bapataito ae, ta Ekalesia da pietero wowotora awa ta iwoka esitera awa, ainda iai Tumondebain eiwa ajigain ae.*

*Priest mi ia embobo de daedo betari tuaina edo gisi aundo Ekalesia da anga ae rata jisi da ge eiwa taina,*

**N**A Erari da Edo wasiri, Bada mi tevira; embo na ge be evira awa betedo wasiri aina; edo embo wasiri de ge be evira awa nanjigo betain ae. *John K. 11. 25, 26.*

**K**OTEMBOTONA Toregari nato wasiri evira edo iji kgombu da nasi da petedo aina. Edo ainto nato angodugara, tena pisi da na God gana; na akuta gano, edo jisi nato gara, nei itae. *Job 19. 25, 26, 27.*

**N**ASI ainda da kaen ro kundo gumbae, edo ge be, kaen ro wotedo kumain ae. Bada pipisisina, edo Bada kumbira; beiamana Bada da dao.

*1 Tim. 6. 7; Job 1. 21.*

*Ekalesia da torido, Psalm eiwa da ta tote ajigore.*

*Dixi custodiam. Psalm 39*

**T**ETENA, begata nato sima edo: iwawa nato mi ge beiae tain ae.

2. Be nato bogama dana: anga de jimbo beiae embo jisi nato da isira.

3. Be daretena, ge dotena: ge dave beuto etena; tamomamato ari nato bajina.

4. Dubo do nato da vevera esira, dubo mi sitetena, edo ni tepo avesiri: amboda iwawa nato mi ge tetena.

5. Bada, gombu nato atopasiwasi, edo iji nato ajijigari rori: siwari nato pie gane.

6. Gi, iji nato ipa da tega anga eteta, edo jisi ito da tuvira nato ro itae: awara embomai berari wasiri de awamane oena akuta.

7. Awara, embo dunga tepo tepara: awara embo da dubo vevera evira tepo embo: rora dada evira edo daredo ave kumaini.

## BEBETEGARI DA GOIARI

8. Ko boroko, Bada na ro tumo da eni: tumo jirari nato ito iai.

9. Jimbo beiae nato berari da na toregewasi: pitate na embo dutari da gandumbari.

10. Daretena, be nato angae etena: ari ikaito.

11. Dari ito nato iai kundo aimbu: ipa ito da vedari na usimbese eira.

12. Anga de embo isimbotota jimbo beiae embo, berari dubo burevira awa gindota be baiwa enge: awara embo berari awamane awa oena akuta.

13. Benunu nato giwasi, Bada, edo ji nato giwasi: ji tena awa imo ge dote.

14. Na embo eve ito iai: etega embo tepo, mamomane berari anga.

15. Na do ato goroba ane tae: edo aimano, na gae aina.

Mamo de, Mai de, Asisi Kotopu de da iai: parara itesira;

Anga teka de: boroko, edo natopo itaina. Amen.

*Domine, refugium. Psalm 90*

**B**ADA, Imo tumo jirari natokare: umo natokare berari.

2. Peji wotae, nasi de butu de Imo God natopo itota.

3. Embo eoto popo jindora: teota, Tekago puwavi, embo da mamai.

4. Duberi tausana jisi ito da be matu inge itae eira: be utura ari munia da.

5. Papoteite aunteta awamane awa aundo ruvegari anga; sipo de manene anga erorera.

6. Sipo erido isite euri: turo de vedoro bidevira.

7. Nakare duduno ari ito da betedo era: edo sini gambari ito da dubo natokare vevera eira.

8. Jimbo beiae natokare jisi ito da pieteta: edo ari natokare gae itari dombu ito utata da.

9. Iji natokare berari duduno ari ito da itae edo era: jienda natokare itae era ge gemata ango.

10. Duberi natokare da iji dubera 70; edo gido goroba aro duberi 80 are tae: ango edo iawa natokare buro de mamato ari de; borae aimbura nakare tumbudo dodo taingedo eora.

11. Aimi duduno ari ito goroba ari gotevira: adu ari ito, ango sini gambari ito.

12. Nakare pie gido iji natokare ajigore: edo dubo natokare dubo embo ore.

13. Tekago puwasi, Bada iji nandogo: ambodani ito embo dubo ito wareregare.

14. Sipo de do ari ito mi nakare undewasi osi ore: edo ia taro dubo natokare dave are iji natokare berari.

15. Dubo natokare dave e iji eteto dubo vevera esisina ango: ko duberi ango ango de beiae gera.

16. Buro ito ambodani ito da iai bedaina: edo parara ito awamane da mamai da iai.

17. Ko Bada God natokare ainda dubo ewa ari natokare iai itaina, edo ipa natokare da buro ari natokare iai Ine mi sia ewasi: awara, ipa natokare da buro Ine mi ewasi.

Mamo de, Mai de, Asisi Kotopu de da iai: parara itesira;

Ango teka de: boroko, edo natopo itaina. Amen.

*Edo Ajigari ajigara, Paul Kotopu da Epistle dakaki Corinth embo da iai da kupevira awa.*

I Corinthians 15. 20

**B**OROKO Keriso betari de erira, edo aundo ruvegatora Bamo awamane da gitago. Embo da iai ango betari gumbira, embo da iai ango betari de erari gumbira. Embomai berari Adam da iai betora, ko ango Keriso da iai embo berari aro kavigara. Ko embo daradara ainda dederi da; Keriso gitago, amboda awamane. Keriso ikaito, ango de gumaina. Ainda gagane gombu gupeira ango de basileia God Mamo de piaina; ango de badari ari berari de birikoku de goroba ari berari itae aina. Dariga edo itoro ika berari ainda tai du da piaina. Ito

ambo dugarate awa betari awa. Tesira, Ari berari ainda tai du da piena. Ango de tedo tena, Ari berari ainda tai du da piena, kaen be gotona ami ari berari du da piena awa, du da itae. Ko ango de ari du da piaina, ango de awa Mai mi ari berari ainda du da pievira awa, du da itaina, edo God badari be aina. Edo gido, awamane bebetegari embo bapataito eora awa nongonongo ari? Bebetegari nanjigo de erae, nongo ari awamane embo bapataito eora awa? edo nongain tedo iji da doae kaena adu ari da isima eni? Nanonameji, Keriso mi Iesu Bada Kaenato imomane embo iawa edo tena, na iji da doae betedo ena. Embo ango duduno wo de daedo Ephesus ainda itoro gaema, edo na nongo eure kae? Bebetegari erae, kaen injido edo, sipo kaen betane. Imomane mana etetemaina; jimbo beiae mi are dave awa usimbese evira. Eriu edo jimbo dave ave, edo jimbo beiae beuto ewavi; embo nenei mi God ruvegedo era; eiwa teno jiro itomane damodamo arate.

Embo tedo taina, Nongonongo be betegari jioro erorori? edo tamo nongo edo gido gupori? Dauwa, ve ine uritena awa kavigae rata gisi betarate; rata uriteta awa amboda erari amo ine urae, rata tegi tepo, wheat, tamo ro eve; rata God mi tamo jipapa evira awa pievira, edo tegi daradara tamo ikaito. Pisi berari amo pisi dawa ae: embomai da pisi eve rata, abu wo da pisi eve, edo ni da pisi eve, edo ewa wo eve rata; ko tamo utu da ango, edo butu da ango; rata tamo utu da ango amo ainda parara eve, edo tamo butu da ango ainda parara eve. Iji da parara eve, kariga da parara eve, dabori da parara eve; dabori nei da parara dabori nei da parara mi dodo daginegetevira. Ango bebetegari da erari. Madari da urevira; kavigari dave matawa da jiuri erorevira: jiro damo ari da urevira; parara da jiuri erorevira: burau ari da ureuri; goroba ari da jiuri erorevira; tamo tamo mi ureuri; tamo asisi mi jiuri erorevira. Tamo tamo mi itare tae, tamo asisi mi itevira ango. Edo ango ove gaedo tena, Adam dakaki dubo wasiri de; Adam ambo asisi kavigari piari kato. Awa ae rata tuturo da ari asisi mi itae rata tamo mi, amboda asisi mi. Edo dakaki butu da ango be butu inge; embo da da gagane utu da ango. Butu da ango awamane awa butu da ango; edo utu da ango awamane

## BEBETEGARI DA GOIARI

awa utu da ango. Kaen butu da kenatu kumuna, ko ango utu da kenatu kumana.

Eiwa tena, nanonameji, pisi de ororo de mi God da basileia mana baiiau kumbara, edo mandari kavigeari dave matawa da ari baiiau kumain ae. Gi, ari botu da jiwae imondemane tena; kaena berari aundo ruvegain ae, rata ko borae, jisi popoki da ango, ango de to ambo pusite, kaena eve ana; to putedo, bebetegari awa ari kavigearo jiari eraro kaena eve ana. Emo mandari awa kavigeari dave matawa omaina, edo eiwa betari awa kavigeari matawa itari omaina. Ko ango de mandari eiwa kavigeari dave matawa omaina, edo eiwa betari awa kavigeari matawa itari omaina, ove gagurisina awa petugaina, Betari itae gaiari mi nutugesira. Betari, badari ari ito indari? Betari, gi ito indari? Betari da gi jimbo beiae; ko jimbo beiae da goroba ari ge; ko God kaen ategedo ane, ami badari ari Iesu Keriso Bada kaenato mi kaenamonde pievira. Awa tedo, nanonameji dubo babarigari, petedo takimbewo edo takimbedo itave; Bada da buro natopo edo ewo, kotembotowa buro itomane Bada da iai mana ae awa.

*Jisi da atutumbaro, edo betari sia eora uro da piorote Priest mi tare, ango ae rata Priest ae Ia embobo de ta tara.*

**E**MBO eutu mi kupevira ainda iji indewae, edo mamato Eira Eruri, ni uji ango jugotora; ainto duga mi tupevira ango, edo dada sima ae.

Wasiri toropu da kaen betona. Inda ango toregeni kaen ango ae rata Imo, Bada, edo rorae beiae natokare embo duduno eota?

Ango ae, Bada, God Kotopu be, Bada goroba be, Toregari kotopu doari, betari natopo da mamato ari nakare piote kae.

Do natokare da onjigari, Bada, Imo gotosi; dengoro ito dundae eote, pari natokare da. Ko nakare dowasi, Bada kotopu be, God goroba be, Toregari kotopu, doari kato. Ge katari embo natopo iji natokare gombu da betari da mamato ari gido, ato Imo dodo dunain ae.

*Butu embo betari da embomai aungaro, Priest mi taina,*

**G**OD, Goroba jiwae akuta, do edo, nameji kaenato Geinda asisi ainda iai kumbira, ango de ainda tamo butu

## BEBETEGARI DA GOIARI

da pipitona, butu da butu, aewa da aewa, popo da popo; ango de wasiri natopo da erari sima eona Iesu Keriso mi Bada kaenato. Awa tamo beiae kaenato ari eve ainda jimbo ango de animi berari euri kera eora.

*Tari ta ia tari,*

**G**E utu de ango gotona, tesiri, Gaie, Iji boroko engo de Bada da iai da betora awa beiamana eora; awara, Asisi mi tesira, ainda jimbo dodo oena apora.

*Priest mi tare. Bada, nakare do ewasi.*

*Keriso, nakare do ewasi.*

*Bada, nakare do ewasi.*

**M**AKA natokare, Utu da isima eta awa, Dao ito koto-pu etera, Basileia ito puresira, Jipapa ito etera, awa butu de utu de ango. Boroko edo iji da doae, rorae natokare piedo ewasi. Edo buria natokare kotembedo dowasi, Ango nakare embo nenei da buria natokare iai kotembedo doturora. Edo bawari da nakare kundo aimbote, Ko beiae da nakare toregewasi. Amen.

*Priest mi*

**G**OD, Goroba jiwae, ito iai da asisi Bada de daedo Gauntora awa, pisi gigitembedo, oena apedo, dubo ewa eora awa, Imo ategetera, nameji natokare eiwa einda nasi beiae mamato ari de dodo toregeteta, edo benunu teora edo burigi burigi avigena ito ajigatate edo basileia ito ato borae gumaina; ango de nakare embo jiwae ae da de Dao ito kotembotora awa eiwa nasi dodo, tamo de ae asisi de parara ito da beiamana orote, Iesu mi Keriso Bada natokare. Amen.

*Pari*

**G**OD, Do kato, Bada natokare Iesu Keriso, Erari de Wasiri de, da Mamo, awa tumo de eora awa betedo wasiri de orote; edo embo wasiri de edo awa tumo da eora awa natopo betain ae; awa Paul ainda Aposetolo Kotopu mi tenu giwa, edo embo awa ae da de awa embo nakare dubo beiae ain ae, sima dore kae. Nakare burau atega era, Mamo, nakare ato rorae beiae ainda betari



## BEBETEGARI DA GOIARI

dodo, rorae beiamana da wasiri da erara, ango de nakare eiwa wasiri dodo ainda iai da oena apain, nameji natokare eiwa ango: edo Erari da, iji gombu da, nakare ito jisi da beiamana orote; edo natokare iai Mai ito, embo berari imo dubo budo eora awa da iai ango beiamana ari engo taina, Puwavi, Mamo nato da mamai beiamana edo basi-leia imomane embo sirigetevira awa nasi tutu da kumbave. Eiwa ewasi, ategatora, Mamo do kato, Iesu Keriso mi Toregari natokare. *Amen.*

**B**ADA Kaenato Iesu Keriso da tonembari, edo God da Bdubo bari, edo Asisi Kotopu da dada utari, kaena berari da iai matawa itorote. *Amen.*

## EUTU MAI KUMBARI AINDA ATEGARI

*Eutu mai kumbira awa Ekalesia da torido, baongo dadari are; edo Priest ainde tare.*

**A**NGO de God, Goroba jiwae beiamana edo imo AKondade esiri kaviegeteta, edo mai kumbari ainda memesi da tonembesisina, awa tedo God ategedo tewasi.

*(Priest mi Psalm 116 tare.)*

*Dilexi quoniam*

**N**ANE mi dubo bunena: Bada ge nato de benunu nato de gido eira.

2. Dengoro nato iai eira: edo nane dao tana iji nato berari.

3. Betari da asi mi na engesira: edo Sheol da tamomegesi mi na tu jiri;

4. Dubo vevera de mamato ari de tuvetena, ko Bada da dao tetena: Bada, asisi nato torege, imo de tedomena.

5. Bada kondade ari kato, rata dave: awara, God kaenato do kato.

6. Bada mi dutetegari sima edo eira: mamato eteno, ko esiri kaviegetena.

7. Dango turari da tenda aimbu, asisi nato: Bada ito iai paira esira.

8. Asisi nato be tari da Jisi nato jiji da: edo tai nato durari da toregesira.

9. Bada da do da pepeta eite aimana: wawasiri de da butu da.

10. Kotembetena, ge tana: na dubo vevera be ena.

11. Adu be eite tetena: Embo berari pitawa kakato.

12. Bada de tekago ro piaini: ainda dave ari berari nato iai embo?

## EUTU MAI KUMBARI AINDA ATEGARI

13. Kaviegari da akou kumana: edo Bada da Dao dao tana.

14. Matu tari nato Bada da iai ana: awara embomai ika berari da jisi da;

15. Bada da oro arapa da: toropu ito da, Jerusalem. Mamo de, Mai de, Asisi Kotopu de da iai: parara itesira;

Ango teka de: boroko, edo natopo itaina. Amen.

*Edo gido Psalm 127,*

*Nisi Dominus*

**B**ADA mando ae evira: eora awa ae dumbae eora.

2. Bada nasi sima ae evira: sima ari embo tepo jisi gundesira.

3. Dauwa imomane, sipo de erido, turo de anumbedo: ango de ainda dubo bari da awari pipitevira.

4. Gio, mamai Bada da baiau: edo sini da be rorou.

5. Be unini giga goroba ari embo da ipa da inge: ango singa da mamai.

6. Beiamana ainda iai ainda kaita ami mi atoe: me mana gara iji de ainda itoro ae da de manguro da ge teora.

Mamo de, Mai de, Asisi Kotopu de da iai: parara itesira;

Ango teka de: boroko, edo natopo itaina. Amen.

*Priest mi tare,*

Kaen benunu tane.

Bada, nakare do ewasi.

*Keriso, nakare do ewasi.*

Bada, nakare do ewasi.

**M**AKA natokare, Utu da isima eta awa; Dao ito koto-  
pu etera; Basileia ito puresira; Jipapa ito etera awa  
butu de utu de ango. Boroko edo iji da doae, rorae nato-  
kare piedo ewasi. Edo buria natokare kotembedo dowasi,  
Ango nakare embo nenei da buria natokare iai kotembedo  
doturora. Edo bawari da nakare kundo aimbote, Ko  
beiae da nakare toregewasi. Imo de Basileia, ae Goroba,  
ae Parara de matawa. Amen.

## EUTU MAI KUMBARI AINDA ATEGARI

*Kera ari.* Bada, eutu eiwa singa ito tonembewasi.

*Mina tari.* Imo kotembetevira awa.

*Kera ari.* Ainda iai beuri okain atate.

*Mina tari.* Ainda itoro ari da jisi da.

*Kera ari.* Bada, benunu natokare giwasi.

*Mina tari.* Edo ji natokare ito iai bambarate.

*Kera ari*

Kaen benunu tana.

**G**OD, Goroba jiwae, Imo ategetera, Imo eutu eiwa  
singa ito mai kumbari da memesi de eteto kavie-  
gesira. Maka, do kato, tonembewasi, edo ango de  
wasiri de kotembedo pepeta aina, Imo jipapa eta ango de,  
wasiri de amboda gumbari da parara natopo kumaina:  
Iesu Keriso Bada natokare embo. Amen.

*Eutu ategetevira awa ainda rorou piarate; edo Doregari itare, Dore-  
gari Kotopu kumbarate.*

## COMMINATION

GOD DA DUDUNO ARI EDO RIROA  
KUMBARI EMBO TA BEBEGAE DA IAI  
TARI GARI, EDO BENUNU NENEI LENT  
DA IJI GISI DA TOTOTE, EDO IJI NENEI  
DE BISHOP MI TAERATE ANGO

*Sipo tumondebain dodo, Litany itae, Priest Ajigari da iai petedo tare,*

**E**MBO mai nato, dembae Ekalesia da ari dave isine-  
Esina, Lent tuturo da, Christian mi jimbo beiae eora  
awa jisi berari da jisi da riroa mina kumbua, edo butu  
einda riroa esitera ango de iji ge katari da, awamane da  
asisi awa kavigorote; edo embo nenei mi awamane da  
riroa gido, beiae ari adu orote.

Ari emo boroko edo ae (rata ko tekago piari kaenane  
jipapa eona awa) ango de Ekalesia mi tevira boroko imo-  
mane berari jisi itomane da God da ge jimbo bebegae  
embo da iai dubo wareregari doturora awa ajigore tae;  
Ge emone Deuteronomy da Chapter 27 da ko Ove  
Kotopu mi nei da kumbira. Edo ainda ge daradara itae  
aina, edo inemane Amen tave; ango de inemane eiwa  
awo God da duduno siakabadae jimbo bebegae embo da  
iai erorevira awa kotembeu, edo dubo itomane awara be  
wareregare; edo engo de imomane sima akuta ewo:  
edo jimbo beiae be itomane mi God mi riroa mina arete  
tevira awa dodo tumindo taingewo.

**A**MI ove kejeviri ta taievira awa tumondebain ai ainda  
bekumba isira.

*Embomai mina tara, Amen.*

*Kera ari.* Ami Mamo ta Ai tedo jijirevira, ainda  
bekumba isira.

*Mina tari.* Amen.

## COMMINATION

*Kera ari.* Ami umo ika da buro gano kupevira, ainda  
bekumba isira.

*Mina teri.* Amen.

*Kera ari.* Ami jisi akiembari tesiri detakawa arate  
evira awa ainda bekumba isira.

*Mina tari.* Amen.

*Kera ari.* Ami aike embo ta poiwo ta rori da katari  
usimbesevira, ainda bekumba isira.

*Mina tari.* Amen.

*Kera ari.* Ami umo ika ge deuri betevira ainda be-  
kumba isira.

*Mina tari.* Amen.

*Kera ari.* Ami umo ika da aro de avevira awa, ainda  
bekumba esira.

*Mina tari.* Amen.

*Kera ari.* Ami rorou burevira jimbo dave embo dari  
betarate tedo, ainda bekumba isira.

*Mina tari.* Amen.

*Kera ari.* Ami embo kotembetevira awa, edo embo da  
ge jirari sima evira awa, edo dubo ika da Bada dodo  
taingetevira, ainda bekumba isira.

*Mina tari.* Amen.

*Kera ari.* Embo dowae kakato, tarawa kakato, edo a  
ipu da egeregari ove kewari tumondebain ari kakato,  
butari kakato, wine jinaga, donenegari, ainda bekumba  
isira.

*Mina tari.* Amen.

*Kera ari*

**K**AEN kotembotona embomai berari God da ge dodo  
Kaundo dutora ainda bekumba itevira, (Peroveta David  
da ge ango) Ge katari adu ari kato kopuru kaenato da  
kanjigetevira awa gido, dubo kaenato bededo, burau ari,  
Bada kaenato God da iai kaen tenda gumane; ari kaenato  
dono kakato awa kaen ji inaka de tane; jimbo beiae kae-  
nato kaen onjiga tedo dubo wareregari da ji budubudu

## COMMINATION

ane. Boroko oto ni tutu da piesiri durira; ko ni be dave gain ae rare doreira, edo niao da aungedo eira. Ari adu kato re God wasiri de da ingo da kaen dunane tae. Jimbo bebegae embobo da tamo dawa, kikive, niao de teio, bisi siakabadae iawata de piari wotaina; eiwa awamane da tu indari. Gi, Bada iai ikaito da angoo wowoteira embo-mai butu da itora ainda jimbo beiae riroa mina ain. Ko aimi ainda gumbiri da kanenataini? Ko angoo de dambu bedari aimi itaini? Ainda bisi ondari ingo ika de edo ainda opeta giro be edo, bread ika da be koara da sirigedo; ko oieie dugaina ta ko ni mana akiemana. Bada da iji gupeira, beono kato mi munia de gupevira angoo; ko angoo de embo mi tedeo taina, Bega, berari wasiri de, angoo de gindari awamane da iai borae gumaina, tamo memesi eutu mi mai kupevira ami da iai gupevira angoo, ko dodo tumundo aimain ae. Angoo de God da duduno riroa da iji dambu bedaina, emo jimbo bebegae embobo de dauwa imata awamane da iai dada esira. God iji jiwae dao sisina awamane da dubo wareregarate tedeo, ko ainda jimbo dave de sima ari ika jiwae doturitera. Angoo de na dao tara, (Bada mi sira) ko na gain ae; sipo de na kakoo edo ko na gae ara; awamane awa dubo embo ari dumo etera, edo Bada da adu ari beuto etera, edo ge nato dumo etero ko mina roroa nato isimbetera. Angoo do oro manguro jiari embo mi geugeu daro mana bedaina; angoo de katari iji de embo na dao taro mana do anate. Katari dave be dave ainda ge adu ari kato angoo de God mi kateite tedeo taina, Na dodo aimbave iu, imomane bebegae, niao da natopo itari, binei da anela de embo sia eora awa. Awa tedeo embomai nato, kaen boroko sima akuta ane angoo de kavigari da iji isira; munia atutumbeteiri, ko embo buro mana ara. Angoo de utata kaenato iai isira awa, kaen utata kotembedo, kaen pepeta ane, utata da mamai angoo; edo munia da butu da kaena augain ae, ounda ji tedeo awamane da ji tedeo awamane da ji gambae. God amo paira kaen domain ae, do ari mi natopo itari ami, kaenamonde tevira matu, jimbo beiae kaenato eona awa ami kotembedo domaina, angoo de dubo kaenato berari mi ainda iai kaen atutumbedo itane. Jimbo beiae kaenato ijimbedo be woru ijimbari aia edo be snow inge, awamane amo ororo de aia ara be sheep da tu inge. Jimbo beiae itomane

## COMMINATION

dodo taingeu, (Bada mi sira) beiae mi imomane ginain ae. Ari itomane dono kato eowa awa itomane iai dodo taingeu; Dubo itomane teka de ko asisi teka eu. Nongain edo betavi, Israel embo? embo betevira ainda betari na jipapa ae. Bada God mi sira. Imomane wareregedo kavigeu. Kaena jimbo beiae eona, edo gido ge kato kaenato, Iesu Keriso dave, ae Mamo de daedo isira, ko ami jimbo beiae kaenato da rorou ari. Ari kaenato dono de awa embo vejitera, edo jimbo beiae kaenato embo dewo betena. Awa tedeo ainda iai kaen tekago gumane, ami jimbo bebegae embobo da dubo be wareregetevira awa udevira; kaen kotembotona sia esisina kaen unain tedeo, ko ami jipapa evira jimbo beiae kaenato kotembedo domain tedeo, angoo de dubo kaenato be wareregeuri. Ko gisi kaen burau eona amboda ainda begata kaen pepeta ane, edo ainda amboka dave de ainda sini angoo edopa kaen kundo ane, edo burau ari da ko sima ari da dubo bari da kaen ambo ambo ane, edo ainda Asisi Kotopu do kaenato da badari aina, edo kaen ainda parara kakoo edo doae ane, edo buro kaenato da ainda iai kaen singa eite ategane. Eiwa kaen ano Keriso God da ge da bekumba mi edo embo ainda ingo be da pipitevira awa awamane da ge beiae tari da mi kaena toregaina; edo kaena ainda ingo be da ami piare, edo ami kaenamonde tari re ko ainda basileia parara de kaenakanato kumuna; Ounda kaena berari kumbare tae ainda do ari natopo itari embo. Amen.

*Angoo de berari baongo dadari aro Priest ae Ia embobo de baongo dadari ara, iai da Litany teora awa, edo Psalm eiwa tara.*

*Miserere mei, Deus. Psalm 51*

**N**A do ewasi, God, paira ito bajina angoo: do ari ito jiwae angoo jimbo beiae nato sitewasi.

2. Beiae nato de na teie: edo jimbo beiae da na beiamana ewasi.

3. Ae dumbae edo gotena: edo jimbo beiae nato do nato da matawa isima eira.

4. Ito isi akuta jimbo beiae nato etena, ko beiae jisi ito da etena: edo angoo de ge tedeo dambudarari ata, edo beiamana angoo de atota eota.

## COMMINATION

5. Gi, na beiae da kumbera: ko jimbo beiae da aiaka mi watou jinina.

6. Gi, ge be do da jipapa eta: edo onjigedo dubo embo ari namonde pie gane.

7. Ae hyssop da daedo na ewa e, ato dave ane: teiato na ainia ane snow angoo ae.

8. Ewasi ato dubo ewa ari gane: edo vetu, erigeteta awa dubo dave are.

9. Jimbo beiae nato da dombu ito onjigewasi: edo beiae nato berari sitewasi.

10. Do nato dave ari ewasi, God: edo dubo dambudarari do nato da teka ewasi.

11. Dombu ito mi na augeote: edo Asisi ito Kotopu nato iai kumbote.

12. Kaviegari ito da dubo dave ari namonde tekago pie: edo asisi wasiri de daedo na ji enane.

13. Ango de bebegae begata ito piano gido: jimbo beiae embo ito iai overegore.

14. Buria ororo da awa na toregewasi, God, kaviegari nato da God: edo iwawa nato jimbo ito dave tare.

15. Bada, be gisi nato angewasi: edo be nato imo dasiga ari ge taina.

16. Rorou ari jipapa ae, edo gido plane tae: ko rorou dungari imo jipapa ae.

17. God da rorou dubo bedari: dubo bedari de depeka ari de, God, Imo beuto ain ae.

18. Dubo dave ari Zion da iai dave ewasi: Jerusalem da puwa jiwasi.

19. Ango de jimbo dave da rorou da dubo ito dave are, rorou dungari de de: angoo de ox tenemba ito da piore.

Mamo de, Mai de, Asisi Kotopu de da iai: parara itesira.

Ango teka de: boroko, edo natopo itaina. Amen.

## COMMINATION

Bada, nakare do ewasi.

*Keriso, nakare do ewasi.*

Bada, nakare do ewasi.

**M**AKA natokare, Utu da isima eta awa, Dao ito kotpupu etera; Basileia ito puresira; jipapa ito etera awa butu de utu de angoo. Boroko edo iji da doae, rorae natokare piedo ewasi. Edo buria natokare kotembedo dowasi, Ango nakare embo nenei da buria natokare iai kotembedo doturora. Edo bawari da nakare kundo aimbote, Ko beiae da nakare toregewasi. Amen.

*Kera ari.* Bada, singabanga ito toregewasi.

*Mina tari.* Imo tumo da eora awa.

*Kera ari.* Pamo da angoo kondade ari pie wotare,

*Mina tari.* Edo iji da doae goroba edo jijimbewasi.

*Kera ari.* God, Ari kaviegari natokare, kondade ewasi.

*Mina tari.* Edo dao ito da parara gido toregewasi; dao ito embo nakare bebegae do ewasi.

*Kera ari.* Bada, benunu natokare giwasi.

*Mina tari.* Edo ji natokare ito iai purarate.

*Kera ari*

Kaen benunu tana.

**B**ADA, Imo de tedo gera, do edo benunu natokare giwasi; edo berari ainda jimbo beiae jisi ito da onjigateraw, dowasi, edo awamane da dubo vevera eira jimbo beiae embo Ine do edo kotembedo dowasi; Keriso mi Bada natokare. Amen.

**G**OD, Goroba jiwae, Mamo do kato, embo berari do Gedo, eota awa ro dumo ae, jimbo beiae embo Ine mi betore kaen jipapa ae rata beiae dodo taingedo kaviegorote; Nakare do ewasi, jimbo beiae natokare kotembedo dowasi, edo ewasi dubo damo are, natokare iai jimbo beiae bouga eiri dubo natokare vevera eite nakare oena apae era. Ari ito rare do natopo eota; ito iai akuta jimbo beiae kotembedo dowari. Awa tedo nakare dowasi, Bada, embo ito rorou eota awa dowasi; singabanga ito atota

## COMMINATION

eote, awamane awa aewa dono de jimbo beiae embobo. Ari dono awa ajigoro wareregetivira; duduno ito natokare iai awa kumbuwas, edo Ine mi butu einda nakare eiage toregewasi, ango edo nasi da isipevira awa Imo de daedo kaen natopo itana Iesu Keriso mi Bada natokare. *Amen.*

*Embo ge eiwa ajigore, Kera ari de daedo.*

**D**UBO natokare jiato wareregare, Bada dave, edo nakare atutumbedo itara. Dave ewasi, Bada, dave ewasi embomai ito da iai, ji de rorae dowari de benunu tegeregari de do ito da gupera awa. Imo God do kato, doari mi be da ari, Duduno babain ango eota, ko doari ito bajina. Jimbo beiae embo riroa mina ain edo dodo eta. Duduno eite ta dubo ito mi sitedo ewa ate tae. Embomai ito dowasi, Bada dave, awamane do e. Ko ewowo ito gindore kae. Dengoro mi giwasi, Bada, Do ari ito bajina. Edo do ari ito jiwae ango jisi tu da edo nakare giwasi, Mai ito dave Iesu Keriso da ari de ainda benunu embo. *Amen.*

*Kera ari akuta tare,*

**B**ADA mi kaena ewa edo, sima aina, Bada da dombu da Butata kaenato iai jiari enaina edo bega kaenamonde natopo piaina. *Amen.*

## DAVID AINDA PSALMS

### PSALM I

**E**MBO beiamana, bebegae ainda katari da temain ae, Edo ge jindedegari da begata da petedo itae: edo jiji-regari da anumba da anumbae.

2. Edo Bada da ge dubo beiamana ari: edo ainda ge kotembetevira iji de munia de.

3. Amo ni inge aina un ji da urevira awa: edo ainda ve iji ika de vivitevira.

4. Edo ainda gi tokedo ain ae: edo rorae ika beiamana aina.

5. Embo bebegae ango ae: awamane be oieie inge bisi mi gindevira awa.

6. Awa tedo embo bebegae katari da tembudo ain ae: edo ge jindedegari embo ewa da doregari da.

7. Bada embo beiamana da begata gotevira: edo embo bebegae da begata sitaina.

### PSALM 6

**B**ADA, Imo duduno ae na isimbote: edo imo sini gaimain ae na mina eote.

2. Na do ewasi, Bada, na sivena: Bada, ewasi kaviegane, vetu nato beiae era.

3. Asisi nato de beiae eira: edo Bada, iji nandogo na mina asi?

4. Tekago puwasi, Bada, asisi nato toregate: do ito embo na ewasi kaviegane.

5. Betari da embo Imo kotemain ae: edo Imo aimi ategaina uro da?

6. Na ji teno beowo eira, munia de doae awari nato tedo ena: edo besi nato jijiumi tarido ena.



## DAVID AINDA PSALMS

12. Embo rora kavigari jipapa evira: edo iji jiwae awa dubo evira edo beiamana garate.

13. Iwawa ito beiae da ge tewasi: edo begisi ito ge pitawa tain ae.

14. Beiae dodo bambudo, beiamana ewasi: bega kakoa edo, amboda amboda ewasi.

15. Bada da jisi embo ewa eora: edo dengoro ainda ge gotora.

16. Bada da dubo rorae beiae eora awa beuto evira: edo ainda kenatu butu da sitaina.

17. Awamanemi ji tero, Bada mi gotevira: edo dubo beiae ika jiwae mi toregetevira.

18. Bada embomai dubo badari da iai atutumbetevira: edo embomai asisi depeka ari euri kavigotora.

19. Embo beiamana topa kotembu ika indewa: edo Bada jiwae de toregetevira.

20. Vetu jiwae sima evira: berari erigeiko.

21. Beiae embo bebegae dari betara: edo awamane embo ewa ge jindora awa mina piania.

22. Bada singabanga ika da asisi euri kavigotora: ami mi kotembotora awa ain bekumba eiko.

### PSALM 39

**T**ETENA, begata nato sima edo: iwawa nato mi ge beiae tain ae.

2. Be nato bogama dana: ango de jimbo beiae embo jisi nato da isira.

3. Be daretena, ge dotena: ge dave beuto etena; tamo mamato ari nato bajina.

4. Dubo do nato da vevera esira, dubo mi sitetena, edo ni tepo avesiri: amboda iwawa nato mi ge tetena.

5. Bada, gombu nato atopasiwasi, edo iji nato ajijigari rori: siwari nato pie gane.

6. Gi, iji nato ipa da tega ango eteta, edo jisi ito da

## DAVID AINDA PSALMS

tuvira nato ro itae: awara embomai berari wasiri de awa-mane oena akuta.

7. Awara, embo dunga tepo tepara; awara embo da dubo vevera evira tepo embo: rorae dada evira daredo ave kumaini.

8. Ko boroko, Bada na ro tumo da eni: tumo jirari nato ito iai.

9. Jimbo beiae nato berari da na toregewasi: pitate na embo dutari da gandumbari.

10. Daretena, be nato angae etena: ari ikaito.

11. Dari nato iai kundo aimbu: ipa ito da vedari na usimbese eira.

12. Ango de embo isimbotota jimbo beiae embo, berari dubo burevira awa gindota be baiwa inge: awara embo berari awamane awa oena akuta.

13. Benunu nato giwasi, Bada, edo ji nato giwasi: ji tena awa imo ge dote.

14. Na embo eve ito iai: etega embo tepo, mamane berari ango.

15. Na do ato goroba ane tae: edo aimano, na gae aina.

### PSALM 51

**N**A do ewasi, God, paira ito bajina ango: do ari ito jiwae ango jimbo beiae nato sitewasi.

2. Beiae nato de na teie: edo jimbo beiae da na beiamana ewasi.

3. Ae dumbae edo gotena: edo jimbo beiae nato do nato da matawa isima eira.

4. Ito iai akuta jimbo beiae nato etena, ko beiae jisi ito da etena: edo ango de ge tedo dambudarari ata, edo beiamana ango de atota eota.

5. Gi, na beiae da kumbera: ko jimbo beiae da aiaka mi watou jinina.

6. Gi, ge be do da jipapa eta: edo onjigedo dubo embo ari namonde pie gane.

## DAVID AINDA PSALMS

7. Ae hyssop de daedo na ewa e, ato dave ane: teiato na ainia ane snow ango ae.

8. Ewasi ato dubo ewa ari gane: edo vetu erigeteta awa dubo dave are.

9. Jimbo beiae nato da dombu ito onjigewasi: edo beiae nato berari sitewasi.

10. Do nato dave ari ewasi, God, edo dubo dambudarari do nato da teka ewasi.

11. Dombu ito mi na augeote: edo Asisi ito Kotopu nato iai kumbote.

12. Kaviegari ito da dubo dave ari namonde tekago pie: edo asisi wasiri de daedo na ji enane.

13. Ango de bebegae begata ito piano gido: jimbo beiae embo ito iai overegore.

14. Buria ororo da awa na toregewasi, God, kaviegari nato da God: edo iwawa nato jimbo ito dave tare.

15. Bada, be gisi nato angewasi: edo be nato imo dasiga ari ge taina.

16. Rorou ari jipapa ae, eeo gido plane tae: ko rorou dungari imo jipapa ae.

17. God da rorou dubo bedari: dubo bedari de depeka ari de, God, Imo beuto ain ae.

18. Dubo dave ari Zion da iai dave ewasi: Jerusalem da pua jiwasi.

19. Ango de jimbo dave da rorou da dubo ito dave are, rorou dungari dede: anga de ox tenemba ito da peggiore.

### PSALM 67

**G**OD nakare do aina, edo beiamana aina: namondekare daedo dombu utata aina.

2. Edo nasi da begata ika kotembara: edo kaviegari ito etene jiwae da iai.

3. Jisi imo dasiga ara, God: jisi jiwae mi imo dasiga ara.

## DAVID AINDA PSALMS

4. Embo dubo dave ari ia tara: jisi be tedo gi, edo embo nasi da kundo gumbuwasasi.

5. Jisi imo dasiga ara, God; jisi jiwae mi imo dasiga ara.

6. Nasi be esira: God, natokare God beiamana aina.

7. God nakare beiamana aina: edo nasi gombu jiwae awa adu ara.

### PSALM 71

**I**MO Bada tumo jirido ena: nanjigo mana usimbesei aina.  
2. Jimbo dave ito da na toregewasi, edo e kaviegane: dengoro ito mi giwasi, edo ewasi kaviegane.

3. Nato iai isiwasi ganuma goroba jiwae ango ango aimana iji nato berari: na kavieganate teteta, Imo ganuma nato ra ta oro nato goroba jiwae.

4. God nato, jimbo beiae embo da ingo da na torege: jimbo beiae embo, duduno de ainda ingo da.

5. Imo jipapa ena, Bada God: na baingae Imo tumo jijinona.

6. Osi da ango na jido eta: aiaka da owa da pieteto udegositena, Imo dasiga ana.

7. Na be kore ari jiwae da iai: Imo nato tumo darari goroba de.

8. Dasiga ari ito be nato be da aina: edo parara ito ia sinano turo are.

9. Ango de owo ane, Imo na dote: anga de goroba nato itae are, Imo na dodo aimbote.

10. Gitopo nato mi ge nato ge tera: edo embo asisi nato embo sima eora awamane ge ika jijirera.

11. Sira, God mi dodo taingesira: ondedo dewasi, ainda toregari itae.

12. God, Imo aikamana itote: God nato na eiage torege.

13. Asisi nato da gitopo usimbesei edo gindore: gandumbari de isimbari embobo mi na usimbesei eora awa apuregare.

## DAVID AINDA PSALM

14. Na sima akuta iji da doae ana: edo dasiga ito bajina be bajina ajijigana.

15. Be nato jimbo ito dave edo kavigari ito ajigeteiaro turo aina: ajigari na danena.

16. Bada God da goroba da punana: jimbo ito dave akuta ge tane.

17. God, na siaka, ine na atopateta: dembae de boroko de kore ari ito onjiga tetena.

18. Edo ango de na owo ano kopuru tu nato wo gu-maina, God, na dodo aimbote: edo ipa ito da ari umo nei de onjiga tane, goroba ito embo jiwae gupera ainde bedane.

19. Jimbo ito dave, God, ikane isira: ari babain eteta, God, Imo ango ain isiri?

### PSALM 90

**B**ADA, Imo tumo jirari natokare: umo natokare berari.  
2. Peji wotae, nasi de butu de Imo eae: Imo God natopo itota.

3. Embo eoto popo jindora: teota, Tekago puwavi, embo da mamai.

4. Duberi tausana jisi ito da be matu inge eira: be utura ari munia da.

5. Papoteite aunteta awamane awa aundo ruvegari ango: sipo de manene ango erorera.

6. Sipo erido isite euri: turo de vedoro bidevira.

7. Nakare duduno ari ito da betedo era: edo sini gambari ito da dubo natokare vevera eira.

8. Jimbo beiae natokare jisi ito da pieteta: edo ari natokare gae itari dombu ito utata da.

9. Iji natokare berari duduno ari ito da itae edo era: jienda natokare itae era ge gemata ango.

10. Duberi natokare da iji dubera 70; edo gido goroba aro duberi 80 are tae: ango edo iawa natokare buro de

## DAVID AINDA PSALMS

mamato ari de; borae aimbura nakare tumbudo dodo taingedo eora.

11. Aimi duduno ari ito goroba ari goteviri: adu ari ito, ango sini gambari ito.

12. Nakare pie gido iji natokare ajigore: edo dubo natokare dubo embo ore.

13. Tekago puwasi, Bada iji nandogo: ambodani ito embo dubo ito wareregare.

14. Sipo de do ari ito mi nakare undewasi osi ore: edo ia taro dubo natokare dave are iji natokare berari.

15. Dubo natokare dave e iji eteto dubo vevera esisina ango: ko duberi ango ango de beiae gera.

16. Buro ito ambodani ito da iai bedaina: edo parara ito awamane da mamai da iai.

17. Ko Bada God natokare ainda dubo ewa ari natokare iai itaina, edo ipa natokare da buro ari natokare iai Ine mi sia ewasi: awara, ipa natokare da buro Ine mi ewasi.

### PSALM 95

**P**UWAVI, Bada da iai da kaen ia tane: ge kaenato dave are kavigari kaenato da ganuma da iai.

2. Do da kaen pumango edo kaen ategane: ge kaenato dave are ainda iai Psalm da.

3. Bada God siakabadae: edo Daotari siakabadae God jiwae da tamo da.

4. Ipa da iai ungono: edo peji eno topa ainda.

5. Ewa topa ainda, edo ami ena: edo ipa mi iai tanambari jina.

6. Kaen pumango, benunu site tumondebain ane: kaen baongo dadari ane Bada kaena Ariembo da jisi da.

7. Amo God kaenato: edo kaena ainda buro embobo, edo ipa ainda undari vetari.

8. Boroko ge getewa dubo itomane okain eove: Meriba da ango, be Masa dumo da inge.

## DAVID AINDA PSALMS

9. Engo de mamono mi na bavewa: na kotembedo, jimbo nato giwa.

10. Jienda 40 umo einda iai na sini gamuna: tema, Embo do da bambae dumbae, edo begata nato gae eora.

11. Edo na duduno eite temo giwa: tema, Dango turari nato da torore kae.

### PSALM 98

**B**ADA da iai ia teka teu: ami ari kore ari esisina.

2. Ainda ingo be, edo ingo kotopu: goroba ari awa embo burisina.

3. Bada da ari kavigari dambu bejisina: edo ari ika dave ewowo da jisi da piesiri gositera.

4. Do ari ika de ge be ika de Israel embo da iai kotembe-sisina: butu gombu berari mi God kaenato ari kavigari gositera.

5. Ge itomane dave eu Bada da iai, imomane butu berari mi: dubo itomane dave ari ia site, dasiga eu.

6. Bada ae kitara de daedo dasiga eu: kitara de daedo ae psalm de.

7. Ae to de ango: Daotari, Bada da jisi da iai teu.

8. Ewa aoro gataina, edo berari do da: butu, ae awa-mané nasi jijiora awa de daedo.

9. Ung ingo mi pokupoku daro, ko jiri dubo ewa ari, ia inono de tara Bada da dombu da: awa gupeira butu katain tede.

10. Butu jimbo dave mi kataina: ewowo dambudarari mi.

### PSALM 100

**B**ADA da iai da ia tewavi, iai berari: dubodubo mi beiamana Bada da iai da kera ewavi, do da ia de pu-wavi.

2. Giwavi Bada owa God: omi mi kaena ena, edo

## DAVID AINDA PSALMS

kaena ounda ikaito; kaena ounda embornai, edo ounda buro da sinopu.

3. Ounda pua be da torido ategewavi: ounda kamboro da dasiga ewavi, owa do tewavi, ounda dao beiamana tewavi.

4. Bada beiamana, do eite itevira: edo ounda ge be otatawo berari da iai itevira.

### PSALM 110

**B**ADA nato de Bada mi engo tevira; be nato de anumbe: Bedo ano gitopo ito dapari ito.

2. Goroba ito da ketu Bada mi Zion da awa jiari ena-ina: gitopo ito toropu gisi ji.

3. Embo ito gisi jiari ito engo de akuta tede piara: kambo kotopu sipo de sini da kumbari ito damone ito iai isira.

4. Bada mi gorote sisina edo dubore kotemain ae: imo priest matawa Melchizadek da jimbo ango.

5. Bada be ito da: duduno ari ika ango de Daotari mi urugaina.

6. Etene toropu da tede kataina: iai embake mi atao ae aina; kopuru butu jiwae da bedaina.

7. Un begata da inaina: awa embo pangaina.

### PSALM 114

**E**NGO de Israel awa wotetero: edo Jacob da oro ge Enei embobo da iai.

2. Judah ainda iai kotopu: Israel ainda basileia.

3. Ewa awa gido edo tupusina: Jordan wareregesira.

4. Peji sheep jianda ango kekepunia eora: edo pamo sheep mamai inge.

5. Imo ewa, nomi eiri tumbesi: imo Jordan edo wareregetesi?

6. Imomane peji, sheep jianda ango kekepunia etevi: edo imomane pamo sheep mamai inge?

## DAVID AINDA PSALMS

7. Imo butu, tu ito boroboro ata: Bada da do da Jacob da God da do da.

8. Ami ganuma boma esisina: edo ganuma okain sinini esisina.

### PSALM 116

**N**ANE MI Bada dubo bunena: ami ge nato de benunu nato de gido eira.

2. Dengoro nato iai eira: edo nane dao tana iji nato berari.

3. Betari da asi mi na engesira: edo Sheol da tamomegesi mi na tu jiri.

4. Dubo vevera de mamato ari de tuvetena, ko Bada da dao dao tetena: Bada, asisi nato torege, imonde tedo gena.

5. Bada kondade ari kato, rata dave: awara, God kae-nato do kato.

6. Bada mi dutetegari sima edo eira: mamato eteno, ko esiri kaviegetena.

7. Dango turari da tenda aimbu, asisi nato: Bada ito iai paira esira.

8. Asisi nato betari da awa jisi nato jijiu da awa: edo tai nato durari da awa toregeteta.

9. Bada da do da pepeta eite aimana: wawasiri de da butu da.

10. Kotembetena, ge tana: na dubo vevera be ena.

11. Adu be eite tetena: Embo berari pitawa kakato.

12. Bada de tekago ro piani: ainda dave ari berari nato iai embo?

13. Kaviegari da akou kumana: edo Bada da Dao dao tana.

14. Beiamana Bada da jisi da: Ainda kokotopu da betari.

15. Bada, ge be na singa ito: na singa ito, gagara ito da da mai; bundari nato udegetera.

## DAVID AINDA PSALMS

16. Ategari da rorou Imonde piana: edo Bada da Dao daotana.

17. Matu tari nato Bada da iai ana: awara embomai ika berari da jisi da.

18. Bada da oro da arapa da: toropu ito da Jerusalem. Bada dasiga ewavi.

### PSALM 121

**P**EJI da pangana: kondade nato inda ango gumaini?

2. Kondade nato Bada mi: utu de butu de Ariembo.

3. Tai ito ari dabibiro ain ae: tao ari embo ito jitao amain ae.

4. Israel da tao ari embo: jitao amain ae, jisi akiemain ae.

5. Bada tao ari embo ito: Bada dunga ito be da.

6. Iji do iji imo inain ae: munia de kariga ain ae.

7. Bada beiae berari de imo tao aina: ouwa asisi ito tao aina.

8. Bada wotari ito de torari ito de: boroko de amboda de tao aina.

### PSALM 124

**B**ADA kaena umo jiae amone: Israel mai mi tetera.

2. Bada kaena umo jiae amone: engo de itoro kaenato erera.

3. Kaena wasiri de nutugeterita: engo de ami sini kaenato iai gapera.

4. Un mi kaena kundo bambesira: ung asisi kaenato apuregesira.

5. Un awa kakato mi: asisi kaenato apuregetera.

6. Bada beiamana: kaena wo ango ainda ji da piaesira.

7. Asisi kaenato idegesira ni inge wao ari ainda wao da: wao erigedo kaena toregesira.

## DAVID AINDA PSALMS

8. Toregari kaenato Bada da dao da: utu de butu de ariembo.

### PSALM 126

**I**Ji ango de Bada Zion de gupeite tekago kundo kupu-sina: kaena be aturo eora ango.

2. Be kaenato iromi be da esira: edo iwawa ia ango.

3. Etene da iai tesira: Bada awamane embo siakabadae esisina.

4. Bada kaena embo siakabadae esisina: edo dubo kaenato ewa evira.

5. Bundari natokare tekago kundo gumbuwas, Bada: un inge gombu da.

6. Ji site baundo uritera awa: dubo dave ari kapara.

7. Ji site baundo edo ve kundo bauntevira: dubo dave ari tekago gundo, bundari ika kundo gumaina.

### PSALM 127

**B**ADA mando ae evira: eora awa ae dumbae eora.

2. Bada nasi sima ae evira: sima ari embo tepo jisi gundesira.

3. Dauwa imomane, sipo de erido, turo de anumbedo: ango de ainda dubo bari de awari pipitevira.

4. Gio, mamai Bada da baiau: edo sini da be rorou.

5. Be unini giga goroba ari embo da ipa da inge: ango singa da mamai.

6. Beiamana ainda iai ainda kaita ami mi atoae: me mana gara iji de ainda itoro ae da de manguro da ge teora.

### PSALM 128

**E**MBO beiamana awawa Bada adu eora awa: edo ainda begata da tepora.

2. Ipa ito jijiteta awa indata: beiamana ato dubo beiamana aina.

## DAVID AINDA PSALMS

3. Aro ito be duru be de: mando ito da dedemo da inge.

4. Mamai ito be olive patu inge: tenemba ito da jinenemberiko.

5. Ango edo beiamana arate; Bada adu evira awa.

6. Bada Zion de wotedo imo beiamana aina: edo Jerusalem woba de giwasi iji ito berari.

7. Awara da mamai ito da mamai giwasi: bega Israel da itesira.

### PSALM 130

**U**N gono da imo dao tetena, Bada: Bada ge nato gi.

2. Benunu nato ge: dengoro itomi kotembatate.

3. Imo Bada, ae dumbae eora awa kotembato: edo Bada aimi petaini.

4. Edo kotembedo do ari ito iai isira: awa embo imo adu ara.

5. Bada sima ena, asisi nato sima eira: edo ainda nato kotembari.

6. Asisi nato Bada kakoa eira: sima ari sipo kakoa evira ango ae, awara sima ari sipo kakoa evira ango ae.

7. Israel Bada tumonde e, Bada da iai do ari isira: edo ainda iai ari kavigari jiwae.

8. Edo Israel: ainda jimbo beiae jiwae mi ari kavigara.

### PSALM 134

**B**ADA beiamana ewavi, imomane Bada da kera ari: Bimomane munia de Bada da oro da pepotewa awa.

2. Ipa itomane iai kotopu da jiu erore: edo Bada beiamana ewavi.

3. Bada utu de butu de evira awa: imo Zion mi beiamana aina.